





曾文正公
全集



曾文正公

全錄卷之四

光緒二年
傳忠書局

PL
2728
A1
1876
v. 1

曾文正公全集首卷目錄

上諭三道

諭賜祭文二首

諭賜入祀京師賢良祠祭文一首

御製碑文一首

國史本傳

江蘇巡撫查明事蹟疏

安徽巡撫請建祠疏

湖廣總督請建祠疏

江西巡撫請建祠疏



直隸總督請建祠天津疏

直隸總督請建祠保定疏

神道碑

墓志銘

總目

同治十一年二月十二日內閣奉

上諭大學士兩江總督曾國藩學問純粹器識宏深秉性忠誠持躬清正由翰林院蒙

宣宗成皇帝特達之知洊升卿貳咸豐三年間創立楚軍勦辦粵匪轉戰數省迭著勛勞

文宗顯皇帝優加擢用補授兩江總督命爲欽差大臣督辦軍務朕御極後簡任綸扉深資倚任東南底定厥功最多江甯之捷特加恩賞給一等毅勇侯世襲罔替並賞戴雙眼花翎歷任兼圻於地方利病盡心籌畫老臣碩望實爲股肱心膂之臣方冀克享遐齡長承恩眷茲聞溘逝震悼良深曾國藩著

追贈太傅照大學士例賜卹賞銀三千兩治喪由江甯藩庫發給賜祭一壇派穆騰阿前往致祭加恩予謚文正入祀京師昭忠祠賢良祠並於湖南原籍江甯省城建立專祠其生平政蹟事實宣付史館任內一切處分悉予開復應得卹典該衙門察例具奏靈柩回籍時著沿途地方官妥爲照料其一等侯爵卽著伊子曾紀澤承襲毋庸帶領引見其餘子孫幾人著何璟查明具奏候旨施恩用示篤念忠良至意欽此

同治十一年二月十八日奉

上諭前據穆騰阿等並梅啟照同日奏到曾國藩因病出缺當降旨優予卹典並於湖南原籍江甯省城建立專祠生平政蹟事實宣付史館一等侯爵卽著伊子曾紀澤承襲其餘子孫幾人令何璟查明具奏候旨施恩茲據何璟歷陳曾國藩公忠體國懋著賢勞覽奏尤增悼惜何璟原摺著暫行畱中卽將該故督之孫何名年歲若干查明具奏再降諭旨欽此

同治十一年四月二十八日奉

上諭大學士兩江總督曾國藩於本年二月閒因病出缺當降
旨優予卹典並於湖南原籍江甯省城建立專祠生平政蹟
事實宣付史館一等侯爵卽令伊子曾紀澤承襲其餘子孫
幾人令何璟查明具奏候旨施恩旋據何璟英翰李瀚章先
後臚陳曾國藩歷年勛績英翰李瀚章並請於安徽湖北省
城建立專祠又據何璟遵查該故督子孫詳晰覆奏披覽之
餘彌增悼惜曾國藩器識過人盡瘁報國當湘鄂江皖軍務
棘手之際倡練水師矢志滅賊雖屢經困阨堅忍卓絕曾不
少渝卒能萬眾一心削平逋寇功成之後寅畏小心始終罔

懈其薦拔賢才如恐不及尤得以人事君之義忠誠克效功德在民允宜迭沛恩施以彰忠盡曾國藩著於安徽湖北省城建立專祠此外立功省分並著准其一體建祠伊次子附貢生曾紀鴻伊孫曾廣鈞均著賞給舉人准其一體會試曾廣鎔著賞給員外郎曾廣銓著賞給主事均俟及歲時分部學習行走何璟英翰李瀚章摺三件均著宣付史館用示眷念勲臣有加無已至意欽此

諭賜祭文

朕惟功懋懋賞信圭表延世之勲思贊贊襄雕俎厚飾終之
典爰申聿奠用賁絲言爾原任大學士兩江總督一等毅勇
侯贈太傅曾國藩賦性忠誠砥躬清正起家詞館屢持節而
掄才洊陟卿曹輒上書而陳善值皇華之載賦聞風木而遄
歸忽鄉鄰有鬪之頻驚潢池盜弄懍戰陣無勇之非孝墨經
師興奇功厯著於江淮大名永光乎竹帛俾正鈞衡之位仍
兼軍府之尊一等酬庸錫侯封於帶礪雙輪曳羽影翠影於
雲霄重鎖鑰而任北門百僚是式還敬戒而惠南國萬眾騰
歡方期碩輔之延年豈意遺章之入告老成忽謝震悼良深

頒厚賻於帑金遣重臣而奠醑特易名於上諡贈太傅之崇
階列祀典於昭忠賢良建專祠於金陵湘渚彝章載考初祭
特頒於戲天不憖遺一老永懷翊贊於元臣人可贖兮百身
用寄咨嗟於典冊靈其不昧尙克歆承

諭賜祭文

朕惟位兼將相仗經文緯武之才氣壯山河懋崇德報功之
典爰陳芳奠用獎成勞爾原任大學士兩江總督一等毅勇
侯贈太傅曾國藩學有本原器成遠大忠誠體國節勁淩霜
正直律躬心清盟水初聯班於玉署芸省蜚聲旋獻賦於鑾
坡芝坊晉秩疊司文柄先蜀郡而後洪都頻進讜言因疾風
而知勁草卿階超擢荷

先朝特達之知忠悃彌摠篤臣子靖其之誼乃乘輅而奉使旋持
服以去官值粵逆之紛來遂楚軍之創立援墨經從戎之義
俾移孝以作忠勵丹心報國之誠每出奇而制勝選將不拘

常格募壯士於三科分軍屢拔逆巢懾長城於萬里秩隆總
制節授專征洎朕寶祚誕膺皖江告捷特晉鈞衡之位仍持
旄鉞之權埽穴擒渠告成功於建業酬庸錫爵膺懋賞於通
侯疊翠羽以增輝賁黃裳而耀采未幾畿疆移節藉修三接
之儀旣因南服需才仍涖兩江之任方冀長承湛露恩眷優
隆何期遽隕大星老成彫謝覽遺章之入奏震悼良深予卹
典以從優哀榮式備諭重臣而致奠給愬幣以治喪崇階贈
太傅之銜秩祀永賢良之譽並專祠之分建宜世爵之欽承
特沛丹綸增光青史謚爲文正允副嘉名於戲日贊黃扉勲
業永思夫補袞風淒丹旄愴懷倍切於騎箕歆是苾芬榮茲

俎豆

諭賜入祀賢良祠祭文

聞鼓輦而思將帥每深良弼之懷治馨香而感神人用永明
禋之報崇祠載列元祀攸隆爾原任大學士兩江總督一等
毅勇侯贈太傅曾國藩學蔚儒宗忠全令德早入承明之選
玉尺提衡洊躋卿貳之班冰壺挈操厯華省而讜言屢上議
禮制而正論無阿迨奉諱以旋湘迺盡哀而廬墓值戎車之
告警奮集鄉兵爰墨經以誓師恪遵朝命勇呼爪士率長沙
子弟以先來捷奏膚公挽半壁河山而永定綸扉懋贊總制
仍兼雙輪揚上將之華輝增翠羽一等錫通侯之貴服稱黃
桂延爵賞於後人畀官銜於太保節制甫資於北道旌麾旋

轉於南方歌遵渚而人望鴻飛莫長江而民爭蛾伏范希文
以天下自任志事終酬李西平爲社稷而生身名俱泰江淮
流惠草木知名方倚元老以圖功忽悵台星之斂耀披章軫
惻厚禮飾終晉太傅之崇封易嘉名於上謚念經天而緯地
斯謂之文繄輔世而長民爾身克正允表賢良於京國睠懷
耆舊於湖湘廟貌聿新烝嘗罔替有功德於民則祀尙念典
型惟俎豆之事嘗聞載頌芬飴昭茲休渥式克欽承

御製碑文

朕惟台衡績懋樹峻望於三公鐘鼎勲垂播芳徽於百世寵
頒紫綬色煥丹珉爾原任大學士兩江總督一等毅勇侯贈
太傅曾國藩秉性忠純持躬剛正闡程朱之精蘊學茂儒宗
儲方召之勳猷器推公輔登木天而奏賦清表風規歷芸館
而遷資誠孚日講屢持使節兼校春闈洊擢卿班允諧宗伯
溯建言之直節荷殊遇於

先朝凡茲靖獻之丹忱早具忠貞之素志乃突來夫粵匪俾訓練
夫楚師拔岳郡而克武昌功如破竹靖章江而平皖水威振
援枹兩江尊制府之權九伐重元戎之命朕丕承基緒眷念

成勞榮銜特畀以青宮峻秩更登諸黃閣辭節制於三省四
省彌見寅恭精調度於湘軍淮軍務嚴申令聯蘇杭爲犄角
堅壘同摧倚昆季爲爪牙逆巢直搗金陵奏凱慰

皇考

知人善任之明玉詔酬庸褒元老決勝運籌之略旣析圭而
列爵亦疊翠以彰纓旣而畿輔量移因之闕廷展覲汲黯近
戇實推社稷之臣楊震厚遺無慚清白之吏惟是瘡痍未復
每塵念乎天南鎖鑰攸司仍遄歸於江左方謂功資坐鎮何
期疾遽淪殂贈太傅而階崇祀賢良而譽永專祠徧祭世賞
優頒易名以表初終覈實允孚文正於戲松楸在望倍懷麟
閣之遺型金石不磨長荷鸞綸之錫寵欽茲異命峙爾豐碑

國史本傳

曾國藩湖南湘鄉人道光十八年進士改庶吉士授檢討二十三年

大考二等升侍講充四川正考官

文淵閣校理二十四年充教習庶吉士轉侍讀二十五年厯遷右庶子左庶子翰林院侍講學士充會試同考官日講起居注官二十六年充

文淵閣直閣事二十七年

大考二等擢內閣學士兼禮部侍郎銜二十八年稽察中書科二十九年擢禮部右侍郎署兵部左侍郎三十年

文宗登極國藩奏言今日所當講求者惟在用人人才不乏欲作育而激揚之則賴

皇上之妙用有轉移之道有培養之方有考察之法三者不可廢一臣觀今日京官辦事通病有二曰退縮曰瑣屑外官辦事通病有二曰敷衍曰顛預習俗相沿但求苟安無過不肯振作有爲將來一遇艱鉅

國家必有乏才之患今遽求振作之才又恐躁競者因而倖進臣愚以爲欲令有用之才不出範圍之中莫若使從事於學術又必

皇上以身作則乃能操轉移風化之本臣考

聖祖登極後勤勤學問儒臣逐日進講寒暑不輟召見廷臣輒與往復討論當時人才濟濟好學者多康熙末年博學偉才大半皆

聖祖教諭成就之

皇上春秋鼎盛正符

聖祖講學之年臣請俟二十七月後舉逐日進講例四海傳播人
人向風召見臣工從容論難見無才者則勗之以學以痛
懲模稜罷輒之習見有才者則愈勗之以學以化其剛愎
刻薄之偏十年以後人才必大有起色此轉移之道也內
閣六部翰林爲人才薈萃之地內而卿相外而督撫率出

曾文正公全集 卷一
於此

皇上不能一周知也培養之權不得不責成堂官所謂培養有數端曰教誨曰甄別曰保舉曰超擢堂官於司員一言嘉獎則感而圖功片語責懲則畏而改過此教誨不可緩也榛棘不除則蘭蕙減色害馬不去則騏驥短氣此甄別不可緩也嘉慶四年十八年兩次令部院各保司員此保舉成案也雍正間甘汝來以主事而賞人參放知府嘉慶間黃鉞以主事而充翰林入南齋此超擢成案也蓋嘗論之人才譬若禾稼堂官之教誨猶種植耘耔也甄別去稂莠保舉猶灌溉也

皇上超擢譬之甘雨時降苗勃然興也堂官時常到署猶農夫日在田間乃熟穡事今各衙門堂官多

內廷行走之員或累月不到署自掌印主稿外司員半不識面譬之嘉禾稂莠聽其同生同落於畝畝之中而農夫不問教誨之法無聞甄別之例亦廢近奉

明詔保舉又但及外官不及京秩培養之道不尙有未盡者哉頃歲以來六部人數日多或廿年不得補缺終身不得主稿內閣翰林院人數亦三倍於前往往十年不得一差不遷一秩而堂官多直

內廷本難分身入署又或兼攝兩部管理數處縱有才德俱

優者曾不能邀堂官之顧又烏能達

天子之知以數千人才近在眼前不能加意培養甚可惜也臣愚
欲請

皇上稍爲酌量每部須有三四堂官不入

內廷者令日日到署與司員相砥礪翰林掌院亦須有不直
內廷者與編檢相濡染務使屬官之性情心術長官一周
知

皇上不時詢問某也才某也直某也小知某也大受不特屬官優
劣粲呈卽長官淺深亦可互見旁考參稽而八衙門之人
才同往來

聖主之胸中彼屬官者但令姓名達於

九重不必升官遷秩而已感激無地然後保舉之法甄別之例次

第舉行舊章

皇上偶有超擢則梗枘一升而草木之精神皆振此培養之方也
古者詢事考言二者兼重近來各衙門辦事小者循例大
者請

旨本無才猷可見莫若於言考之而召對陳言
天威咫尺不宜喋喋便佞則莫若於奏摺考之

國家定例內而九卿科道外而督撫藩臬皆有言事之責各
省道員亦許專摺言事乃十餘年間九卿無一人陳時政

得失司道無一摺言地方利病科道奏疏無一言及

主德隆替無一摺彈大臣過失一時風氣不解其所以然

本朝以來匡言

主德者如孫嘉淦以自是規

高宗袁銑以寡慾規

大行皇帝皆

優旨嘉納糾彈大臣者如李之芳劾魏裔介彭鵬劾李光地後四

人皆爲名臣至今傳爲美談直言不諱未有盛於茲

朝者也

皇上御極之初

特詔求言而褒答倭仁之諭臣讀之至於怵舞感泣然猶有過慮者誠見

皇上求言甚切諸臣紛紛入奏或條陳庶政頗多雷同或彈劾大臣懼長攻訐臣愚願

皇上堅持聖意借奏摺爲考核人才之具永不生厭斲之心涉於雷同者不必交議而已過於攻訐者不必發抄而已此外則但見有益不見有損今考九卿賢否憑召見應對考科道賢否憑三年京察考司道賢否憑督撫考語若人人建言參互質證豈不更爲核實乎此考察之法也奏入

諭稱其剴切明辨切中事情著於百日後舉行日講國藩條陳日

講事宜一考定日講設官之制二講官員數三每日進講
員數四講官應用何項人五定保舉講官之法六進講之
地七進講之儀八進講之時九所講之書十陳講之道十
一覆講之法十二纂成講書十三講官體制十四進講年
數下部議格不行六月署工部左侍郎元年署刑部右侍
郎充武闡正考官二年署吏部左侍郎充江西正考官丁
母憂回籍粵逆起犯湖南圍長沙不克竄武昌陷之連陷
沿江郡縣江南大震十一月二十九日

上特命國藩會同湖南巡撫辦理本省團練搜剿土匪時塔齊布
尙以都司署撫標參將國藩奏稱其奮勇耐勞深得民心

竝云塔齊布將來如打仗不力臣甘同罪請

旨獎敘專令督隊剿賊會賊破金陵逆流西上皖鄂郡縣相繼淪

陷

上以國藩所練鄉勇得力剿匪著有成效

諭令馳赴湖北剿賊國藩以爲賊所以恣意往來者由長江無官
軍扼禦故也乃駐衡州造戰艦練水軍勸捐助餉四年正
月督師東下與賊接戰岳州又戰靖港皆不利得

旨革職仍准專摺奏事時國藩已遣楊岳斌彭玉麟與塔齊布合
擊賊湘潭大破之復其城賊退踞岳州七月國藩攻克之
燬其舟賊浮舟上犯再破之遂與塔齊布水陸追擊自城

陵磯二百餘里勦洗淨盡

賞三品頂戴九月復武昌漢陽盡焚襄河賊舟

賞二品頂戴署湖北巡撫

賞戴花翎旋以國藩力辭

賞兵部侍郎銜辦理軍務毋容署理巡撫國藩建三路進兵策奏
言江漢肅清賊之回巢抗拒者多集興國蘄州廣濟諸屬
自巴河至九江節節皆有賊船擬塔齊布由南路進攻興
國大冶湖北督臣派兵由北路進攻蘄州廣濟自由江路
直下與陸軍相輔爲進止

上命如所請行國藩揚帆而下連戰勝賊蘄州賊來犯再破之會

塔齊布復興國大治時賊以田家鎮爲巢穴蘄州爲聲援
自州至鎮四十餘里沿岸築土城設礮位對江轟擊橫鐵
鎖江上以阻舟師南岸半壁山富池口均大股悍賊駐守
舟楫往來如織國藩計欲破田鎮當先奪南岸十月羅澤
南大破賊半壁山克之國藩部署諸將分戰船四隊一隊
阨賊上犯二隊備爐翦椎斧前斷鐵鎖賊礮船護救三隊
圍擊之沈二艘賊不敢近須臾鎔液鎖斷賊驚顧失色率
舟遁四隊駛而下追及於鄔穴東南風大作賊舟不能行
官軍圍而焚之百里內外火光燭天浮尸蔽江陸軍自半
壁山呼而下悉平田家鎮富池口營壘蘄州賊遁是役也

弊賊數萬燬其舟五千遂與塔齊布復廣濟黃梅孔壠口
小池驛上游江面肅清進圍九江十二月

上以國藩調度有方

賞穿黃馬褂

賞狐腿黃馬褂白玉搬指白玉巴圖魯翎管玉靶小刀火鑱各一

國藩遣水軍攻湖口梅家洲以通江西餉道大小十餘戰
銳卒二千人陷入鄱湖爲湖口賊所扞水軍分爲兩五年
賊竄武昌分股乘夜由小池口襲焚國藩戰艦戰失利越
數日大風復壞舟數十國藩迺以其餘遣李孟羣彭玉麟
及胡林翼所帶陸師回援武漢親赴江西造船募勇增立

新軍連破賊姑塘都昌進攻湖口大敗之七月塔齊布卒
國藩馳往九江兼統其軍八月水軍復湖口九月補兵部
右侍郎九江不下國藩以師久無功自請嚴議

上諭曾國藩督帶水師屢著戰功自到九江後雖未能迅卽克復
而鄱湖賊匪已就肅清所有自請嚴議之處著加恩寬免六年
賊酋石達開竄江西郡縣多陷國藩馳赴省城遣彭玉麟
統內湖水師退駐吳城以固湖防李元度回勦撫州以保
廣信諸將分扼要地先後復進賢建昌東鄉豐城饒州連
破撫州樟樹鎮羅溪瓦山吳城之賊會同湖北援師劉騰
鴻曾國華等大破賊瑞州復靖安安義上高自江西達兩

湖之路賴以無梗七年正月復安福新淦武甯瑞昌德安
奉新軍聲大振不一歲石逆敗遁江西獲安曾國藩力也
二月十八日丁父憂

上諭曾國藩見在江西軍務正當喫緊古人墨經從戎原可奪情
不令回籍惟念該侍郎素性拘謹前因母喪未終授以官職具
摺力辭今丁父憂若不令其回籍奔喪非所以遂其孝思著賞
假三個月回籍治喪俟假滿後再赴江西督辦軍務尋固請終
制

上諭曾國藩本以母憂守制在籍奉諭幫辦團練當賊氛肆擾鄂
皖卽能統帶湖南船勇墨經從戎數載以來戰功懋著忠誠耿

耿朝野皆知伊父曾麟書因聞水師偶挫又令伊子曾國華帶
勇遠來援應尤屬一門忠義朕心實深嘉尚今該侍郎假期將
滿陳請終制竝援上年賈楨奏請終制蒙允之例覽其情詞懇
切原屬人子不得已之苦心惟現在江西軍務未竣該侍郎所
帶楚軍素聽指揮當茲勦賊喫緊亟應假滿回營力圖報效曾
國藩身膺督兵重任更非賈楨可比著仍遵前旨假滿後卽赴
江西督辦軍務竝署理兵部侍郎以資統率俟九江克復江面
肅清朕必賞假令其回籍營葬俾得忠孝兩全毫無餘憾該侍
郎殫心事主卽以善承伊父教忠報國之誠當爲天下後世所
共諒也國藩復奏稱江西各營安謐如常毋庸親往撫馭竝瀝

陳才難宏濟心抱不安奉

旨先開兵部侍郎缺暫行在籍守制江西如有緩急卽行前赴軍營以資督率八年五月奉

命辦理浙江軍務移師援閩匪分股竄擾江西遣李元度破之廣豐玉山張運蘭復安仁時國藩駐軍建昌東南北三路皆賊國藩計東路連城賊勢已衰閩事不足深慮北路景德鎮乃大局所關又較南路信豐爲重乃遣運蘭以景德鎮蕭啟江追剿信豐之賊九年啟江破賊南康克新城墟池江賊巢遂復南安解信豐圍賊竄湖南將由粵黔入蜀國藩隨檄啟江馳赴吉安援應湖南運蘭復景德鎮浮梁

縣江西肅清餘賊竄皖南國藩奉

命防蜀行至陽邏奉

諭以皖省賊勢日張飭籌議由楚分路剿辦國藩回駐巴河簡校
軍實因奏言自洪楊內亂鎮江克復金陵逆首凶燄久衰
徒以陳玉成往來江北勾結捻匪廬州浦口三河等處迭
挫我師遂令皖北之糜爛日廣江南之賊糧不絕欲廓清
諸路必先破金陵欲破金陵必先駐重兵滁和而後可去
江甯之外屏斷蕪湖之糧路欲駐兵滁和必先圍安慶以
破陳逆之老巢兼搗廬州以攻陳逆所必救進兵須分四
路南則循江而下一由宿松石牌規安慶一由太湖潛山

規桐城北則循山而進一由英山霍山攻舒城一由商城
六安規廬州南軍駐石牌則與楊岳斌黃石磯之師聯爲
一氣北軍至六安州則與壽州之師聯爲一氣國藩請自
規安慶多隆阿鮑超取桐城胡林翼取舒城李續宜規廬
州奏入

上是之十年二月賊酋陳玉成犯太湖國藩分兵破之四月
賞兵部尙書銜署兩江總督六月補兩江總督以

欽差大臣督辦江南軍務七月

命皖南軍務統歸國藩督辦十一年國藩進駐祁門督飭楊岳斌
彭玉麟曾國荃鮑超等水陸夾擊爲逐層掃蕩之計先後

復黟縣都昌彭澤東流建德休甯徽州義甯悍賊數萬據
安慶久不下曾國荃多隆阿等圍之陳玉成來援諸軍擊
走之拔其城賊無脫者進復池州鉛山無爲銅陵及泥汊
神塘河運漕東關各隘

賞太子少保銜

命統轄江蘇安徽江西浙江四省軍務巡撫提鎮以下悉歸節
制國藩力辭

上不許諭曰前命曾國藩以欽差大臣節制江浙等省巡撫提
鎮以一事權曾國藩自陳任江督後於皖則無功可敘於蘇
則負疚良深并陳用兵之要貴得人和而勿尙權勢貴求實

際而勿爭虛名懇請收回成命朕心深爲嘉許仍諭令節制
四省以收實效曾國藩復陳下情言見在諸路出師將帥聯
翩威柄太重恐開斯世爭權競勢之風兼防他日外重內輕
之漸足見謙卑遜順慮遠思深得古大臣之體在曾國藩遠
避權勢自應如此存心而國家優待重臣假以事權從前本
有成例曾國藩曉暢戎機公忠體國中外咸知當此江浙軍
務喫緊生民塗炭我

兩宮皇太后孜孜求治南望增憂若非曾國藩之惓忱真摯豈能
輕假事權所有四省巡撫提鎮以下各官仍歸節制該大臣
務以軍事爲重力圖攻剿以拯斯民於水火之中毋再固辭

先是賊圍杭州國藩迭奉援浙之

命咨令太常寺卿左宗棠統軍入浙檄派張運蘭孫昌國等水陸各營均歸調度以厚兵力竝撥給錢漕釐金以清所部積欠因奏稱左宗棠前在湖南撫臣駱秉章幕中贊助軍謀兼顧數省其才實可獨當一面懇請明降

諭旨令左宗棠督辦浙江全省軍務

上以浙江巡撫王有齡及江蘇巡撫薛煥不能勝任著曾國藩察看具奏竝迅速保舉人員候旨簡放國藩奏言蘇浙兩省羣賊縱橫安危利鈍繫於巡撫一人王有齡久受客兵挾制難期振作欲擇接任之人自以左宗棠最爲相宜惟

此時杭州被困必須王有齡堅守於內左宗棠救援於外
俟事勢稍定乃可更動至江蘇巡撫一缺目前實無手握
重兵之人可勝此任查有臣營統帶淮揚水師之福建延
建邵遺缺道員李鴻章勁氣內斂才大心細若蒙

聖恩將該員擢署江蘇巡撫臣再撥給陸軍便可馳赴下游保
衛一方至是杭州失守國藩復奏陳補救之策一擬令各
軍堅守衢州與江西之廣信皖南之徽州爲犄角之勢先
據形勝扼賊上竄左宗棠暫於徽衢信三府擇要駐紮相
機調度總須先固江西皖南邊防保全完善之地再籌進
剿一請於浙江藩臬兩司內將廣西按察使蔣益澧調補

一缺飭帶所部五六千人赴浙隨左宗棠籌辦防剿可收指臂之助一浙省兵勇恃甯紹爲餉源今全省糜爛無可籌畫懇

恩飭下廣東粵海關福建閩海關按月協撥銀兩交左宗棠以資軍餉奏入

上皆如所請行同治元年正月

命以兩江總督協辦大學士國藩奏言自去秋以來疊荷鴻恩臣弟國荃又拜浙江按察使之

命一門之內數月之間

異數殊恩有加無已感激之餘繼以悚懼懇求

皇朝文獻通考卷之三百一十五 兵考 軍制 皇上念軍事之靡定鑒微臣之苦衷金陵未克以前不再加恩於臣家又前此疊奉

諭旨飭保薦江蘇安徽巡撫復蒙

垂詢閩省督撫飭臣保舉大臣開列請簡封疆將帥乃

朝廷舉措之大權如臣愚陋豈敢干預嗣後如有所知堪膺疆寄者隨時恭疏入告仰副

聖主旁求之意但泛論人才以備採擇則可指明某缺徑請遷除則不可蓋四方多故疆臣既有征伐之權不當更分黜陟之柄風氣一開流弊甚長辨之不可不早尋遣將擊走徽州荻港之賊復青陽太平涇縣石埭國荃會同水師復

巢縣含山和州竝銅陵聞雍家鎮裕溪口西梁山四隘弟
貞幹復繁昌南陵破賊三山魯港

上以國藩前奏情詞懇摯出於至誠不再加恩而進國荃貞幹
等職國藩駐安慶督師奏請仍建安徽省會於安慶設長
江水師提督以下各官指授諸將機宜以次規取皖南北
府縣各城國荃率師進圍金陵蘇浙賊酋李秀成等分道
來援大小數十戰力卻之二年五月復江浦浦口克九洑
洲長江肅清因淮南運道暢通籌復鹽務改由民運奏陳
疏銷輕本保價杜私之法三年正月官軍克鍾山合圍金
陵六月金陵平

上諭曾國藩自咸豐四年在湖南首倡團練創立舟師與塔齊布羅澤南等屢立戰功保全湖南郡縣克復武漢等城肅清江西全境東征以來由宿松克潛山太湖進駐祁門迭復徽州郡縣遂拔安慶省城以爲根本分檄水陸將士規復下游州郡茲大功告成逆首誅鋤由該大臣籌策無遺謀勇兼備知人善任調度得宜曾國藩著加恩賞加太子太保銜錫封一等侯爵世襲罔替并賞戴雙眼花翎浙江巡撫曾國荃賞加太子少保銜錫封一等伯爵并賞戴雙眼花翎將士進秩有差時捻匪倡亂日久僧格林沁戰歿於曹州賊勢日熾

四年四月

命國藩赴山東一帶督兵剿辦捻匪山東河南直隸三省旗綠各營及地方文武員弁均歸節制調遣國藩將赴徐州督師乃招集新軍添練馬隊檄調劉松山劉銘傳周盛波潘鼎新諸軍會剿五月賊竄雒河集國藩駐臨淮關遣兵擊走之先後奏言此賊已成流寇飄忽靡常宜各練有定之兵乃足以制無定之賊臣由臨淮進兵將來安徽卽以臨淮爲老營及江蘇之徐州山東之濟甯河南之周家口四路各駐大兵爲重鎮一省有急三省往援其援軍之糧藥卽取給於受援之地庶幾往來神速呼吸相通時捻酋張總愚任柱牛落紅及髮逆賴汶光擁眾十數萬倏分倏合

八月國藩遣銘傳敗之潁州賊東走曹州國藩檄鼎新力
扼運河派軍馳赴山東助剿賊不能渡運遂南走徐州踞
豐沛銅山境內九月國藩遣李昭慶鼎新敗之徐州豐縣
賊復竄山東十月盛波銘傳敗之甯陵扶溝賊竄陷湖北
黃陂五年正月國藩遣銘傳破之復其城任逆回竄沈邱
將踞蒙亳老巢遣銘傳盛波擊之張逆分股入鄆城三月
銘傳張樹珊敗之潁州周口羣賊合踞濮范鄆鉅間諸軍
擊破之張逆趨單縣任逆走靈壁國藩駐徐州修浚運河
以固東路五月遣諸將敗張逆於洋河王家林敗任逆於
永城徐州時賊自二月北竄堅圖渡運徘徊曹徐淮泗者

兩月有餘迄不得逞於是張逆入豫任逆入皖國藩遣盛
波大破牛逆於陳州敗任賴二逆於烏江河樹珊敗張逆
於周口牛張二逆渡沙河而南任賴二逆亦竄渡賈魯河
國藩以前防守運河粗有成效必仿照於沙河設防俾賊
騎稍有遮攔庶軍事漸有歸宿定議自周家口下至槐店
阨守沙河上至朱仙鎮扼守賈魯河因奏言河身七百餘
里地段太長不敢謂防務旣成百無一失然臣必始終堅
持此議不以艱難而自畫不以浮言而中更以求有裨時
局自古辦流寇本無善策惟有防之使不得流猶是得寸
則寸之道俟河防辦成則令防河者與游擊者彼防此戰

更番互換庶足以保常新之氣六月遣松山張詩日大破賊於上蔡西華賊由河南巡撫所派防軍汛地逸出東竄河防無成七月遣松山宋慶大破之南陽新野九月銘傳鼎新破之鄆城運防賴以無恙國藩自陳病狀七月

上命國藩仍回兩江總督本任以李鴻章代辦勦捻事宜國藩請以散員畱營自效奏言

朝廷體恤下情不責臣以治軍但責臣以籌餉不令畱營勉圖後效但令回署調理病軀臣屢陳病狀求開各缺若爲將帥則辭之爲封疆則就之則是去危而就安避難而趨易臣內度病體外度大義減輕事權則可竟回本任則不

可故前兩次奏稱但求開缺不求離營蓋自抱病以來反復籌思必出於此然後心安理得請開江督各缺目下仍在周口軍營照料一切維湘淮之軍心聯將帥之情誼凡臣材力所可勉精神所能到必當殫竭愚忱力圖補救斷不因兵符已解稍涉疏懈致乖古人盡瘁之義

上諭曾國藩請以散員仍在軍營自效之處具徵奮勉圖功不避艱難之意惟兩江總督責任綦重湘淮各軍尤須曾國藩籌辦接濟與前敵督軍同爲朝廷所倚賴該督忠勤素著且係朝廷特簡正不必以避勞就逸爲嫌致多過慮著遵奉前旨仍回本任以便李鴻章酌量移營前進並免後顧之憂國

藩復奏陳江督之繁非病軀所能勝任與其勉強回任辜恩溺職不如量而後入避位讓賢籲請仍開各缺

上諭前因曾國藩患病未痊軍營事繁特令回兩江總督本任以資調攝竝因請以散員自效復疊次諭令迅速回任俾李鴻章得以相機進剿曾國藩爲國家心膂之臣誠信相孚已久當此捻逆未平後路糧餉軍火無人籌辦豈能無誤事機曾國藩當仰體朝廷之意爲國家分憂豈可稍涉疑慮固執己見著卽懍遵前旨尅期回任俾李鴻章得以專意剿賊迅奏膚功該督回任以後遇有湘淮軍事李鴻章仍當虛心咨商以期聯絡毋許再有固請用慰厯念國藩回任後六年奏

稱製造輪船爲救時要策請將江海關洋稅酌畱二成一
成爲專造輪船之用一成酌濟淮軍及添兵等事

從之七月補授體仁閣大學士仍畱兩江總督之任十二月擒
匪平

賞雲騎尉世職七年四月補武英殿大學士七月調直隸總督
十二月到京

賞紫禁城騎馬八年二月查明積澇大窪地畝應徵糧賦請分
別豁減

從之三月奏直隸刑案積多與臬司張樹聲力籌清釐甫有端
緒張樹聲見調任山西請暫畱畿輔一年以清積案

曾文正公全集卷之六
上諭曾國藩到任後辦事認真於吏治民風實心整頓力挽敝
習著如所請俾收指臂之助又先後二次查明屬員優劣開
單具奏得

旨分別嘉勉降革以肅吏治時直隸營務廢弛廷議選練六軍
上諭國藩將前定練軍章程妥籌經理五月國藩奏言臣見內
外臣工章奏於直隸不宜屯畱客勇一節言之詳矣惟養
勇雖非長策而東南募勇多年其中亦有良法美意爲此
練軍所當參用者一曰文法宜簡勇丁樸誠耐苦不事虛
文營規祇有數條別無文告管轄祇論差事不計官階挖
濠築壘刻日而告成運米搬柴崇朝而集事兵則編籍入

伍伺應差使講求儀節及其出征則行路須用官車紮營
須用民夫油滑偷惰積習使然而前此所定練軍規制至
一百五十餘條之多雖士大夫不能驟通而全記文法太
繁官氣太重此當參用勇營之意者也一日事權宜專一
營之權全付營官統領不爲遙制一軍之權全付統領大
帥不爲遙制近來江楚良將爲統領時卽能大展其才縱
橫如意皆由事權歸一之故今直隸六軍統領迭次更換
所部營哨文武各官皆由總督派撥下有翼長分其上
有總督攬其全統領竝無進退人才總管餉項之權一旦
驅之赴敵羣下豈肯用命加以總理衙門戶部兵部層層

檢制雖良將亦瞻前顧後莫敢放膽任事又焉能盡其所
長此亦當參用勇營之意者也一曰情意宜洽勇營之制
營官由統領挑選哨弁由營官挑選什長由哨弁挑選勇
丁由什長挑選譬之木焉統領如根由根而生幹生枝生
葉皆一氣所貫通是以口糧雖出自公款而勇丁感營官
挑選之恩皆若受其私惠平日既有恩誼相孚臨陣自能
患難相顧今練軍之兵離其本營本汛調入新哨新隊其
挑取多由本營主政新練之營官不能操去取之權而又
別無優待親兵獎拔健卒之柄上下隔閼情意全不相聯
緩急豈可深恃此雖欲參用勇營之意而勢有不能者也

又聞各營練軍皆有冒名頂替之弊防不勝防蓋兵丁因口分不足自給每兼小貿手藝營生此各省所同也直隸六軍以此處之兵調至他處訓練其練餉二兩四錢在練營支領底餉一兩五錢仍在本營支領兵丁不願離鄉往往仍畱本處於練營左近僱人頂替應點應操一遇有事遠征受僱者又不肯行則轉僱乞丐窮民代往兵止一名人已三變練兵十人替者過半尙安望其得力今當講求變通之方自須先杜頂替之弊擬嗣後一兵挑入練軍卽裁本營額缺練軍增一兵底營卽減一兵無論底餉練餉均歸一處支放或因事斥革卽由練營募補底營不得干

預冀可少變積習此外尙須有酌改如馬隊不應雜於步隊各哨之內應另立馬隊營使臨敵不至溷亂一隊不應增至二十五人仍爲什人一隊使士卒易知易從若此之類臣本擬定一簡明章程重整練軍練足萬人以副

朝廷殷勤訓飭之意其未挑入練者各底營存餘之兵亦須善爲料理未可聽其困窮墮壞擬略仿浙江減兵增餉之法不必大減兵額但將老弱者汰而不補病故者闕而不補卽以所節餉項量發厯年底營欠款俾各營微有公費添製器械旗幟之屬庶足壯觀瞻而作士氣數年後或將當日之五折七折八折者全數賞發兵丁之入練軍者所

得固優卽畱底營者亦足自贍營務或漸有起色而畿輔練軍之議亦不至屢作屢輟事同兒戲請

敕原議各衙門核議施行尋

飭國藩籌定簡明章程奏報定議國藩奏言臣維用兵之道隨地形賊勢而變焉者也初無一定之規可泥之法或古人著績之事後人效之而無功或今日制勝之方異日狃之而反敗惟知陳迹之不可狃獨見之不可恃隨處擇善而從庶可常行無弊卽就紮營一事言之湘勇初出屢爲粵匪所破旣而高壘深濠先圖自固旋即用以制敵淮勇繼起亦以深溝高壘爲自立之本善紮營者卽稱勁旅後移

師勦捻每日計行路遠近分各營優劣曾無築壘挖壕之暇而營壘之堅否於勝敗全不相涉陝甘勦回貴州平苗亦不以此爲先務足知兵勢之無常矣然斯乃古來之常法終未可棄而不講臣愚以爲直隸練軍宜添學紮營之法每月拔營一次行二三百里爲率令兵丁修壘浚濠躬親畚築以習勞勦不坐差車以慣行走增募長夫以任樵汲負重之事至部臣所議兵丁宜講衣冠禮節臣意老營操演可整冠束帶以習儀文拔營行走仍帕首短衣以歸簡便凡此皆一張一弛擇善而從者也臣前摺所請重統領之權者蓋因平日事權不一則臨陣指麾不靈臣在南

中嘗見有巡撫大帥所部多營平日無一定之統領臨時酌撥數營派一將統之赴敵終不能得士卒死力而江楚數省倖獲成功者大抵皆有得力統領其權素重臨陣往來指揮號令進退之人卽平日撥餉挑缺主持賞罰之人士卒之耳目有專屬心志無疑貳是以所向有功臣所謂事權宜專本意如此然亦幸遇塔齊布羅澤南李續賓楊岳斌多隆阿鮑超劉銘傳劉松山諸人或隸臣部或隸他部皆假重權而樹偉績苟非其人權亦未可概施部臣所議得良將則日起有功遇不肖則流弊不可勝言洵爲允當之論良將者可倖遇而不可强求者也嗣後直隸練軍

統領臣當悉心察看遇上選則破格優待盡其所長遇中材則隨處防維無使越分庶幾兩全之道部臣復議及兵將相習可收一氣貫通之效又言轉弱爲強不必借才於異地等語臣竊意就兵言之斷無令外省客勇充補之理客勇亦無願補遠省額兵之志就官言之則武職自一命以上至提鎮皆可服官外省況畿輔萬方輻輳尤志士願效馳驅之地是各路將弁有出色者皆可酌調來直不得以借才論直隸練軍詢諸眾論不外二法一曰就本管之鎮將練本管之弁兵一曰調南人之戰將練北人之新兵訪聞前此六軍用本管鎮將爲統領者其情易通而苦閤

營無振作之氣用南人戰將爲統領者其氣稍盛而苦上下無聯絡之情將欲救二者之弊氣之不振本管官或不勝統率之任當察其懈怠擇人而換之情之不聯南將或不知士卒之艱當令其久處積誠以感之臣今擬於前畱四千人外先添三千人稍復舊觀一於古北口暫添千人該提督傅振邦老於戎行安詳勤慎一於正定鎮暫練千人該總兵譚勝達勇敢素著志氣方新皆以本管官統之者也一於保定暫添千人令前瓊州鎮彭楚漢以南將統之以中軍冷慶所轄千人姑分兩起俟查驗實在得力而後合併一軍此因論兵將相孚而擬目前添練之拙計也

至練軍規模臣仍擬以四軍爲斷二軍駐京北二軍駐京南每軍三千人統將功效尤著者或添至四五千入請

旨交各衙門覆議先行試辦俟試行果有頭緒然後奏定簡明章程俾各軍一律遵守奏入

允之其後以直隸練軍有效他省仿而行之營務爲之一振自國藩始九年五月通商大臣崇厚奏天津民人因迷拐幼孩匪徒有牽涉教堂情事毆斃法國領事官焚毀教堂

上命國藩赴天津查辦國藩奏言各省打毀教堂之案層見迭出而毆斃領事洋官則爲從來未有之事臣但立意不欲與之開衅準情酌理持平結案使在彼有可轉圜之地庶

在我不失柔遠之方尋奏誅爲首滋事之人將辦理不善之天津府縣革職治罪因陳時事雖極艱難謀畫必須斷決伏見道光庚子以後辦理夷務失在朝戰夕和無一定之至計遂至外患漸深不可收拾

皇上登極以來守定和議絕無改更用能中外相安十年無事津郡此案因愚民一旦憤激致成大變初非臣僚有意挑衅

朝廷昭示大信不開兵端此實天下生民之福以後仍當堅持一心曲全鄰好以爲保民之道時時設備以爲立國之本二者不可偏廢八月調兩江總督國藩瀝陳病狀請另

簡賢能開缺調理

上諭兩江事務殷繁職任綦重曾國藩老成宿望前在江南多年情形熟悉措置咸宜見雖目疾未痊但得該督坐鎮其間諸事自可就理該督所請另簡賢能之處著無庸議十一月命充辦理通商事務大臣十年以楚岸淮南引地爲川鹽侵占與湖廣總督定議與川鹽分岸行銷奏請武昌漢陽黃州德安四府專銷淮鹽安陸襄陽鄖陽荊州宜昌荊門五府一州暫行借銷川鹽湖南巡撫請於永寶二府試行官運粵鹽國藩復力陳二府引地不必改運部議皆如所請十一年二月卒遺疏入

諭曰大學士兩江總督曾國藩學問純粹器識宏深秉性忠誠持躬清正由翰林院蒙

宣宗成皇帝特達之知洊升卿貳咸豐間創立楚軍勦辦粵匪轉戰數省疊著勛勞

文宗顯皇帝優加擢用補授兩江總督命爲欽差大臣督辦軍務朕御極後簡任綸扉深資倚任東南底定厥功最多江甯之捷特加恩賞給一等毅勇侯世襲罔替竝賞戴雙眼花翎歷任兼圻於地方利病盡心籌畫實爲股肱心膂之臣方冀克享遐齡長承恩眷茲聞溘逝震悼良深曾國藩著追贈太傅照大學士例賜卹賞銀三千兩治喪由江甯藩庫給發賜祭

一壇派穆騰阿前往致祭加恩予諡文正入祀京師昭忠祠
賢良祠於湖南原籍江甯省城建立專祠其生平政績事實
宣付史館任內一切處分悉予開復應得卹典該衙門查例
具奏靈柩回籍時著沿途地方官妥爲照料其一等侯爵卽
著伊子曾紀澤承襲毋庸帶領引見其餘子孫幾人著何璟
查明具奏候旨施恩尋湖廣總督李瀚章安徽巡撫英翰署
兩江總督何璟奏陳國藩歷年勛績李瀚章奏略云國藩
初入翰林卽與故大學士倭仁太常寺卿唐鑑徽甯道何
桂珍講明程朱之學克己省身得力有自遭值時艱毅然
以天下自任死生禍福置之度外其過人識力在能堅持

定見不爲浮議所搖用兵江皖陳四路進攻之策勦辦擒
匪建四面蹙賊之議其後成功不外乎此英翰奏略云自
安慶克復後國藩督軍駐紮整吏治撫瘡痍培元氣訓屬
寮若子弟視百姓如家人生聚教養百廢具舉至今皖民
安堵皆國藩所畱貽一聞出缺士民奔走婦孺號泣以遺
愛而言自昔疆臣湯斌于成龍而後未有若此感人之深
者何璟奏略云咸豐十年國藩駐祁門皖南北十室九空
自金陵至徽州八百餘里無處無賊無日無戰徽州初陷
休祁大震或勸移營他所國藩曰吾初次進兵遇險卽退
後事何可言吾去此一步無死所也賊至環攻國藩手書

遺囑帳懸佩刀從容布置不改常度死守兼旬檄鮑超一
戰驅之嶺外以十餘載稽誅之狂寇國藩受鉞四年次第
蕩平皆因祁門初基不怯有以寒賊膽而作士氣臣聞其
昔官京師卽已畱心人物出事戎軒尤勤訪察雖一材一
藝罔不甄錄又多方造就以成其才安慶克復則推功於
胡林翼之籌謀多隆阿之苦戰金陵克復又推功諸將無
一語及其弟國荃談及僧親王及李鴻章左宗棠諸人皆
自謂十不及一清儉如寒素廉俸盡充官中用未嘗置屋
一廛田一區食不過四簋男女婚嫁不過二百金垂爲家
訓有唐楊綰宋李沆之遺風其守之甚嚴而持之有恆者

曰不誑語不晏起前在兩江任內討究文書條理精密無不手訂之章程點竄之批牘前年回任感激

聖恩高厚仍令坐鎮東南自謂稍有怠安負疚滋重公餘無客不見見必博訪周諮殷勤訓勵於僚屬之賢否事理之源委無不默識於心其患病不起實由平日事無鉅細必躬必親殫精竭慮所致也

上諭據何璟英翰李瀚章先後臚陳曾國藩歷年勛績英翰李瀚章竝請於安徽湖北省城建立專祠又據何璟遵查該故督子孫詳晰覆奏披覽之餘彌增悼惜曾國藩器識過人盡瘁報國當湘鄂江皖軍務棘手之際倡練水師矢志滅賊雖

屢經困阨堅忍卓絕曾不少移卒能萬眾一心削平捕寇功成之後寅畏小心始終罔懈其薦拔賢才如恐不及尤得以人事君之義忠誠克効功德在民允宜迭沛恩施以彰忠藎曾國藩著於安徽湖北省城建立專祠此外立功省分并著准其一體建立專祠伊次子附貢生曾紀鴻伊孫曾廣鈞均著賞給舉人准其一體會試曾廣鎔著賞給員外郎曾廣銓著賞給主事俟及歲時分部學習行走何璟李瀚章英翰摺三件均著宣付史館用示瞻念勛臣有加無已至意欽此

江蘇巡撫

臣

何璟跪

奏爲督

臣

因病出缺暫委藩司代折代行請

旨迅賜簡放并陳督

臣

歷年賢勞籲懇

恩施仰祈

聖鑒事竊

臣

於同治十一年二月初六日接據江甯布政使梅

啟照稟稱督

臣

曾國藩正月廿六日忽患手戰舌強似有

中風之症延醫服藥旋發旋止仍視公事不輟惟醫者診

脈均云心血過虧等情正馳念閒旋於初八日接梅啟照

續稟初四日申刻督

臣

前症復發兼患足麻卽於是日戊

刻出缺已由該司將各印信封存并於初五日將督

臣遺

摺由驛馳遞奏明請

旨簡放遺缺鈔錄奏稟到

臣臣

接閱之下不勝駭異伏念大學

士一等毅勇侯兩江總督

臣

曾國藩由翰林起家以大考

受

宣宗成皇帝特達之知洊躋卿貳道光三十年在禮部侍郎任內

應

詔陳言屢攄讜議忠忱悱惻仰邀

嘉獎咸豐二年典試江西丁憂回籍旋以粵匪竄陷武昌奉

旨飭辦團練數年之間迭奉援鄂援皖援江西援浙援蜀之命無

日不在兵間

文宗顯皇帝硃批獎諭鑑其孤忠十年四月遂以兵部右侍郎
簡授兩江總督

欽差大臣

皇上踐阼之初倚任愈重同治元年元旦以克復安慶功

授爲協辦大學士三年六月以克復金陵功

錫封一等毅勇侯其秉性之忠學術之正悉在

聖明洞鑒之中無俟

微臣

之覲縷其历年戰功政績又有督

臣

自具奏報及創定湘營營制營規水師馬隊各章程內而

咨存樞府外而傳布各省亦無俟

微臣

之表彰此次因病

出缺想

聖主篤念藎臣凡

賜卹飾終之典自必渥荷

恩施亦無需

微臣

之籲告

臣

之所不能已於言者

臣

與曾國藩

相從日久相知頗深灼見其立功之偉胥本於進德之勤
其生平盡瘁報

國克己省身器識過人堅貞自矢不特今世所罕觀卽方之
古賢臣蓋亦未遑多讓請敬爲

聖主陳之咸豐之初曾國藩以在籍侍郎練團殺賊無尺寸之
土地無涓滴之餉源餉之巨者丁漕關稅而職在軍旅不
敢越俎以代謀餉之細者勸捐抽釐而身爲客官州縣旣

不肯奉行百姓亦終難見信概係募勇又不得照綠營之
例拔補實缺空有保舉之名而無履任之實名器不屬激
勵尤難方其初敗於岳州再挫於九江兵幾不振窮且益
堅迨江西困阨之時事勢非順動多觸忤一錢一粟非苦
心經營則不能得一弁一勇非苦口訓誡則不能戰於困
苦難堪之中立堅忍不拔之志卒能練成勁旅削平逋寇
上慰

先帝在天之靈輔佐

聖世中興之業雖曰疢疾可以成德術動忍可以增智能而艱
難創造之初固不敢自料有今日也逮咸豐十年初膺江

督進駐祁門正值蘇常新陷浙省再淪皖南皖北十室九
空人煙稀少軍糧則半菽難求轉運則一夫難雇自金陵
以至徽州八百餘里無處無賊無日無戰徽州之方陷也
休祁大震江楚皆驚或勸移營江西省城以保餉源或勸
移營江干州縣以通糧路而仍不出江督轄境曾國藩曰
吾初次進兵遇險卽退後事何可言吾去此一步無死所
也羣賊旣至晝夜環攻飛砲雨集曾國藩手書遺囑帳懸
佩刀猶復從容布置不改常度死守兼旬直待鮑超率霆
軍自山外來始以一戰驅賊出嶺以十餘載稽誅之狂寇
曾國藩授鉞四年次第蕩平皆以祁門初基不怯有以寒

賊膽而壯士氣也咸豐十一年八月克復安慶同治元年
水陸兩軍並江而下沿江兩岸三千里名城要隘皆爲我
有其弟曾國荃統得勝之師直抵雨花臺以瞰金陵左宗
棠統楚軍以達浙境李鴻章統淮軍以達滬上皆深入虎
穴捷報頻聞夏秋之間兵機遂大順矣乃攻勦甫利而疾
疫流行上自蕪湖下至上海無營不病不但守壘無勇幾
於炊爨無夫楊岳斌曾國荃鮑超諸統將各抱重病昔之
勁兵胥變孱卒蘇浙賊酋方以此時大舉以援金陵圍攻
雨花臺四十六晝夜更番不歇南岸則甯國旌德同時吃
緊北岸則潁宿蒙亳捻匪出巢正陽壽州苗逆復叛髮賊

又由江浦上竄滁和巢含亦復岌岌可危數年以來辛苦
戰爭之土地由尺寸而擴至數百里者深恐一旦潰裂盡
隳前功援浙救蘇保江三者又須兼顧時危事亟軍情反
覆異議環生有謂金陵進兵太早必致師老餉竭者有謂
宜撤金陵之圍以退各路援賊者曾國藩於羣言淆亂之
時有三軍不奪之志枕戈臥薪堅忍卓絕卒能以寡禦眾
出死入生迨事機大定之後語寮友曰昔人嘗言憂能傷
人吾此數月心膽俱碎矣幸賴

國家鴻福得以不死然則今日之一病不起蓋其精力爲已
瘁矣曾國藩戰勝之蹟指不勝屈惟此數年坎坷艱辛當

成敗絕續之交持孤注以爭命當危疑震撼之際每百折而不回蓋其所志所學不以死生常變易也古之名臣謀國効忠惟以人事君爲急曾國藩昔官

京朝卽已畱心人物出事戎軒尤勤訪察雖一材一藝罔不甄錄而又多方造就以成其材其厯年薦達與平日忠義相切劘者如江忠源羅澤南李續賓劉騰鴻死於戰陣塔齊布李續宜蕭捷三江忠義死於勤勞皆已載諸史傳其幕府賓僚偏裨卒伍由書生而洊厯疆圻由末職而洊膺重鎮無愧戡亂之選亦錚錚在人耳目無待臣言其苦心孤詣使兵事厯久而不敗人材愈用而不窮者則在以湘

勇之矩矱推行於淮化濠泗剛勁之風爲

國家干城之用

臣

遠稽史籍唐之李郭亦僅收復兩京宋之

韓范亦僅經略西夏一隅耳我

朝武功之盛超軼前代屢次戡定大難然如嘉慶川楚之役
蹂躪不過四省康熙三藩之役蹂躪尙止十二省今髮捻
回教諸匪蹂躪竟及十七省用兵已滿二十年若專恃湘
楚一軍與之角逐而無淮軍繼起於其閒亦豈能南北分
兵次第削平禍亂是其公忠偉略推賢讓功和衷共濟尤
足多者臣昔在軍中每聞談及安慶收復之事輒推功於
胡林翼之籌謀多隆阿之苦戰其後金陵克復則又推功

諸將而無一語及其弟國荃談及僧親王勦捻之時習勞
耐苦輒自謂十分不及一二談及李鴻章左宗棠一時輩
流非言自問不及則曰謀略不如往往形之奏牘見之函
札非臣一人之私言也當江皖糜爛之際實仕宦所謂畏
途曾國藩不辭選拔知兵之員隨時保奏以期同濟艱難
厥後大功底定南服承平

朝廷延訪殷勤猶復疊奉

諭旨令保封疆將帥曾國藩則奏稱疆吏既有征伐之權不當
更分黜陟之柄宜防外重內輕之漸兼杜植黨樹私之端
其小心遠慮若此宜其立功之後不自矜伐也曾國藩自

督師以來卽有不期生還之志是以經歷危險屹然不可搖撼精誠之至部曲化之手足化之故湘軍陣亡文武官兵可以按冊而稽者多至萬餘人咸豐八年三河之戰其胞弟曾國華隨李續賓以單騎衝賊死同治元年雨花臺之戰其胞弟曾貞幹於賊退數日勞疾而死可謂一門忠義矣而與諸弟共在軍中任事則督之爭先論功則率之居後蓋深見乎功名之際終始之難常以位高於眾權重於人懷大名不祥之懼故遭非常之

知遇彌切爾位之靖共其平日辦事不分畛域江皖蘇浙兩湖之兵事聯爲一氣兩江糧臺之軍火餉糈又不惜接濟鄰

省分應他軍而於節制四省節制三省之

命則堅不敢居不憚一再陳情期於得請而後已蓋時念及報稱之難不敢恃

恩寵之厚也其本身清儉一如寒素官中廉俸盡舉以充官中之用未嘗置屋一廛增田一區疏食菲衣自甘淡泊每食不得過四簋男女婚嫁不得過二百金垂爲家訓有唐楊綰宋李沆之遺風而鄰軍困窮灾民饑饉與夫地方應辦之事則不惜以祿俸之贏餘助公用之不給臣在皖時固稔知之其立身平實不求立異守之甚嚴而持之有恆者一曰不誑語二曰不晏起

朝端之奏報僚屬之咨札親友之函牘就臣所見固未嘗有欺飾矣卽外撫遠人內馭降將亦必推誠布公言皆質實中外遠近皆有以信其爲人之不苟在軍在官夙夜未嘗少懈雖風瀟雨晦疾病憂鬱之時率以雞鳴而起夜分始息蓋數十年如一日也晚年不服珍藥未嘗有臥疴倚衾之日前在兩江任內討究文書條理精密無不手訂之章程無不點竄之批牘惟有舌蹇心悸之症不能多見僚屬前年回任感激

聖恩高厚仍令坐鎮東南自謂稍卽怠安負疚滋重公餘無客不見見必博訪周諮殷勤訓勵於僚屬之賢否事理之源

委無一不默識於心人皆服其耄年進德之勤其勉力在此其致病亦在此上年閱兵回省適臣行抵金陵見其體貌尙如往年而曾國藩自言精力大衰右目昏瞶臣與晤談數次議論公事娓娓不倦曾勸以節勞省神爲

國自愛不意相距未及兩月遽病不起實由平日事無鉅細必躬必親殫精竭慮所致兩江官紳士庶聞其溘逝無不同聲太息則其功德及民不可泯也合無仰懇

天恩准於江南省城建立專祠並飭於所在立功省分一體建祠以彰忠藎並祈將臣奏章

宣付史館以備採擇現在督臣身後之事已經藩司梅啟照等

曾紀澤次附貢生曾紀鴻孫三人均幼皆隨侍任

聖

會同伊子曾紀澤安爲經理查督臣有子二人長卽戶部員外郎曾紀澤次附貢生曾紀鴻孫三人均幼皆隨侍任所所有兩江總督衙門日行公事除由臣暫委梅啟照代折代行外所遺兩江總督員缺緊要相應請旨迅賜簡放以重職守理合將接據督臣因病出缺緣由並將其歷年賢勞實蹟附陳恭摺由驛五百里馳

奏伏乞

皇太后

皇上聖鑒訓示謹

奏

太子少保安徽巡撫

奴才英翰跪

奏爲督

臣勲勞卓著輿情愛戴同深籲懇

天恩俯准建立專祠以彰忠藎恭摺奏祈

聖鑒事竊兩江督

臣

曾國藩因病出缺荷蒙

聖慈篤念藎臣

逾格矜卹

隆施曠典業已至優極渥原非

臣

下所敢再瀆卽該督

臣

平時

武功政事立品植學諸大端仰荷

天語之褒嘉更有史館之撰述久已宣布遐壤遠近周知且曾

國藩綏靖南疆

奴才

正轉戰淮北雖係皖中屬寮時承指

示然未得一日相從一切事蹟亦無待奴才爲縷述惟是

曾國藩督師幾二十年蕩平數省用兵以在皖爲最久功績亦以在皖爲最多當其由江鄂轉戰而前正值髮逆披猖接連一片江淮南北幾無完土曾國藩勵兵選將推賢讓能百折不回堅忍不拔先平皖南繼克安慶旋復廬州淮淝以南大江上下同時底定僧格林沁大軍得以專力蕩平北路無南顧之虞曾國荃李鴻章左宗棠等因而分道並進肅清江浙克復金陵殄除巨憝是以論者僉謂克復安慶一役不特爲平定金陵之基亦實爲南北廓清一大關鍵安慶克復後曾國藩督軍駐紮整吏治撫瘡痍培

元氣訓屬寮若師弟視百姓如家人生聚教養百廢具舉
閭閻慶衽席之安父老忘亂離之苦如是者又數年迨至
同治五六年閒奴才帶兵剿捻曾國藩駐軍徐州每有書
問皖事猶諄諄以安民察吏爲要務至今皖中一切措施
遵其規畫皖民之安堵實皆曾國藩所畱貽故一聞督臣
出缺之信士民奔走婦孺感泣爭赴奴才衙門懇請奏建
專祠以崇報饗同聲籲懇實出愛戴之誠伏思督臣中興
戰績列在簡冊固可媲美古人卽以遺愛而言則自昔疆
臣湯斌于成龍而後亦未有若此感人之深者在

朝廷褒功之厚固已廣被無遺而在皖民尸祝之誠又未敢壅

於上達可否仰懇

天恩俯准於安慶省城建立專祠以順輿情而彰忠藎出自

鴻慈至該督

臣

立功省分甚多可否一併建祠之處恭候

聖裁

奴才

未敢再爲瀆請所有督

臣

勲勞卓著據情籲請各緣

由謹恭摺具陳伏乞

皇太后

皇上聖鑒訓示謹

奏

頭品頂戴湖廣總督臣李瀚章跪

奏爲故大學士功德在民請於湖北省城建立專祠並補陳

賢勞實蹟仰祈

聖鑒事竊臣恭讀本年二月十二日

上諭大學士兩江總督曾國藩學問純粹器識宏深秉性忠誠
持躬清正著追贈太傅照大學士例賜卹賞銀三千兩治喪
賜祭一壇加恩予諡文正入祀京師昭忠祠賢良祠並於湖
南原籍江甯省城建立專祠其生平政蹟事實宣付史館等
因欽此仰見

聖主篤念忠良之至意無任欽感又准署兩江督臣何璟咨送

摺稿到臣所陳曾國藩勞蹟並其立身行政諸大端均甚切當其敍咸豐十年以後軍事亦極詳明惟自咸豐初年創立水陸二軍率以東征及歷年在鄂在江艱危拮据情形尙有未盡蓋何璟與曾國藩共事在咸豐十年以後聞見有所未詳其勢然也臣於咸豐三年署善化縣任內經曾國藩檄調從軍前後近十年知之較悉欽奉

諭旨將其政蹟事實宣付史館則採擇不厭周詳謹再爲我皇上補陳之咸豐二年曾國藩典試江西行入江境聞訃丁母憂回籍時長沙解圍未久武漢繼失土匪蜂起兵勇陸續過境強擄民船所在劫掠曾國藩奉

旨幫辦團防查匪事宜因時局艱難義不容已而奪情視事又非其所安比經奏明將來無論建立何項功績均不敢仰邀議敘及抵長沙立拏擄船遊勇梟示河干頒發鄉團族團執照凡從賊勾賊各匪責成團總戶族摺送前後擒斬數百人自後賊屢犯湘各屬匪徒無敢應者皆其先機能斷之效也由是延訪人才拔羅澤南王鑫李續賓張運蘭等使練陸勇拔彭玉麟楊岳斌黃翼升鮑超等使練水勇又以綠營廢弛奏參長沙協副將清德特保游擊塔齊布且云塔齊布將來如打仗不力臣甘與同罪塔齊布等均感激思奮力戰成名皆其知人善任之效也咸豐三年賊

圍江西曾國藩命羅澤南等赴援解圍後留商江忠源奏請創立水師爲三省會剿議是年冬親赴衡州督造戰船經費無出惟以忠義激勵人心勸捐濟用四年二月統率水陸兵勇六千人行抵長沙賊已由岳州竄陷湘陰甯鄉曾國藩派營擊退追剿至岳州會王鑫挫於蒲圻岳州再失賊仍由甯鄉竄陷湘潭其時長沙西南北三面數十里外賊蹤徧野省城危急曾國藩令塔齊布率陸勇彭玉麟楊岳斌率水師上剿湘潭而親率水師二營陸勇一營下剿靖港四月初二日靖港戰敗曾國藩自咎調度無方投水三次幕客親兵力救乃免四月初五日湘潭克復盡焚

賊舟乃自劾靖港之失疏請治罪不以湘潭同時大捷稍
自寬飾也七月整軍東下克復岳州廣東總兵陳輝龍水
師敗於城陵磯褚汝航等死之曾國藩堅持不動閏七月
塔齊布羅澤南擊敗陸賊轉戰而前八月二十三日遂克
武昌十月十三日大破田家鎮戰績均詳奏牘十二月水
師破湖口賊卡衝入鄱陽湖盡焚賊艘而老營之紮九江
對岸者被賊用小舟襲焚事機危急曾國藩慨然曰大臣
不可辱復欲投水幕客親兵強掖渡江夜入羅澤南軍中
五年正月入江西重整水陸各軍賊自北岸上竄武漢再
陷方其在江西也以客軍當敗挫之餘呼應不靈動多觸

忤曾有三難之奏然一聞賊陷弋陽廣信卽命羅澤南等
力戰復之七月攻克義甯又分攻湖口會塔齊布卒於九
江鄂事日棘復令羅澤南等赴援與胡林翼會攻武昌以
全大局是年冬逆首石達開自崇通陷瑞臨另股賊自廣
東來會江西八府五十餘州縣皆淪於賊湖南文報不通
乃分九江之軍以援吉安而自率舟師回駐省河官民倚
以爲固六年春吉安失守周鳳山失利樟樹鎮其分攻撫
建者皆不能下時餉源罄竭枵腹轉戰軍無怨言皆曾國
藩忠誠所感也是年七月胡林翼派曾國華劉騰鴻等援
江西進攻瑞州駱秉章派劉長佑等進攻袁州派曾國荃

進攻吉安湖南之路始通會撫州陸營失利乃令移駐貴溪以保浙東一線之餉路七年三月曾國藩丁父憂回籍八年夏復奉

命統軍援浙其時瑞臨撫建皆經湘軍克復八月曾國荃克吉安曾國藩擬由建昌入浙九年移駐撫州攻克景德鎮旋奉入川之

命中途經官文胡林翼奏請改而援皖駐宿松克太湖戰績均詳奏牘至十年四月補授江督充

欽差大臣以後事蹟何璟所陳甚詳臣亦由贛南道奏調廣東籌餉矣竊維曾國藩識力之堅毅志慮之忠純持躬之謹慎

久在

聖鑒之中豈待

微臣

陳述惟前後艱危拮据情形有非奏報所

能詳者似不妨合兩摺以備史館之採擇也

臣

聞曾國藩

初入翰林卽與故大學士倭仁太常寺卿唐鑑徽甯道何桂珍講明程朱之學克己省身得力有自遭值時艱毅然以天下自任忘身忘家置死生禍福得喪窮通於度外其大端則在以人事

君晉接士類能決其人之賢否推誠布公不假權術故人皆樂爲之用其過人之識力在能堅持定見不爲浮議所搖進攻安慶江甯則建三路進兵之議剿辦捻匪則建四面蹙

賊之議其後成功不外乎此所創水師尤能制賊死命蓋賊自湖南竄踞金陵盡掠沿江船隻乘風日蹕數百里飄忽無常瀕江各郡縣一日數驚自曾國藩水師東下扼駐一處卽能保全一處當武漢再陷時胡林翼以孤軍困守城下而賊船不敢上越金口一步漢鎮貿易均移至新堤籌辦鹽釐捐輸藉濟軍餉胡林翼屢次奏稱曾國藩創立水師其功甚大蓋身在事中故能言之深切其後曾國藩遣羅澤南馳援武昌惟時江西四面皆賊旦夕不能自保祇以通籌天下大勢非力爭上游則金陵無可規復之理是以自畱江西支持危局而特遣勁旅進攻武昌此其深

識遠略公爾忘私尤有古人所不能及者是曾國藩底定東南之功尤以經營武昌爲一大關鍵查羅澤南李續賓胡林翼官文均經奉

旨於湖北建立專祠現在鄂中士民間曾國藩湫逝莫不咨嗟感慕籲請建祠以崇報享相應請

旨敕建曾國藩專祠於湖北省城以順輿情而彰忠藎所有請建專祠竝補陳賢勞實蹟以備史館採擇各緣由謹會同湖北撫臣郭柏蔭恭摺具陳伏乞

皇太后

皇上聖鑒訓示謹

奏

管文正公全集

首卷

三

頭品頂戴江西巡撫

臣劉坤一跪

奏爲紳民呈請建立已故督

臣專祠恭摺仰祈

聖鑒事竊

臣

接據在籍三品京堂銜翰林院修撰劉繹等呈稱

江西用兵十數年幾與軍務相爲始終原任大學士兩江
總督臣曾國藩之保衛江西亦相爲始終咸豐三年賊圍
江西省城守兵已嫌單薄而上游泰和縣土匪乘機起事
暗與髮逆勾通勢殊岌岌幸得曾國藩由湖南派羅澤南
等各營來援撲滅泰和之匪省城髮逆勢孤隨亦解圍而
迨四年曾國藩克復武昌遂率得勝之師順流而下分攻
九江湖口各軍失利身瀕於危五年以次進駐南康南昌

分遣諸將規復廣信弋陽義甯等處人心倚以爲固會逆
酋石達開賴裕新胡以昞等大股竄入江西復有另股自
廣東來合而曾國藩得力之將羅澤南等又先派援湖北
賊眾我寡致江西八府五十餘州縣先後淪陷維時餉源
已竭士氣不揚曾國藩內則籌給飢軍以支危局外則乞
師鄰省以遏狂氛其拮据之狀堅忍之操士民共見共聞
至今念之莫不流涕六年湖南湖北各派楚師分道入援
其瑞州一路則其胞弟曾國華也吉安一路則其胞弟曾
國荃也此外諸將如劉長佑等皆曾國藩素所識拔之人
曾國藩以援師大集會同撫臣左提右挈指授機宜竝派

李元度等駐紫貴溪以通浙東餉道由是諸軍飽騰用命
所向有功六七八三年之中遂收全省肅清之效九年曾
國藩提師援浙猶先分兵攻克浮梁縣景德鎮地方迨後
攻安慶下金陵每聞江西風鶴之驚輒卽派兵馳回援剿
同治三年逆酋李世賢陳炳文汪海洋等率眾數十萬由
浙竄入江西蘇常餘氛亦接踵而至撫建等府遍地皆有
賊踪人情洶洶懼蹈咸豐五年覆轍時曾國藩駐師皖境
飛調鮑超全軍赴援羽檄頻催急於星火鮑超兼程而進
遂大戰於潁灣跳盪已逾三時撿斬實以萬計該逆土崩
瓦解隨卽遁往廣東安危利鈍之幾間不容髮四年髮逆

管公集卷之五
蕩平亦深資霆軍越勦窮追之力江境得以解嚴曾國藩
之有功於江西如此至於接引士類識拔人才裁減丁漕
撫恤黎庶一切善政不可殫述夫

盛典飾終

朝廷已極優渥而感恩戴德輿情願奉馨香公懇

奏請於江西省城建立專祠俾士民得申報享之忱等情前
來臣查立功江西省各員如前安徽巡撫江忠源前江西巡
撫張芾等八人均經奉

旨於省城分建專祠今督臣曾國藩歷年保衛江西厥功尤偉
士民追慕不忘可否仰懇

天恩俯如該紳等所請准於江西省城建立專祠以慰輿情而彰忠藎理合恭摺具

奏伏乞

皇太后

皇上聖鑒訓示謹

奏軍機大臣奉

旨著照所請該部知道欽此

太子太保大學士直隸總督一等伯

臣李鴻章跪

奏爲津郡紳民籲懇建立已故督

臣

曾國藩專祠恭摺仰祈

聖鑒事竊據天津道丁壽昌天津府知府馬繩武等詳稱原任大學士兩江總督

臣

曾國藩久任東南勲勞懋著同治八年調任直隸正歲歉匪擾之後地方彫敝下車伊始卽以治河練兵飭吏三大端爲務次第舉行民賴以安天津爲諸河下梢海疆要地利益尤多辦理中外交涉事件顧全大局至今咸鑒其苦衷他如清訟獄減徭役勸農桑嚴鍋夥之刑祛鹽務之弊凡有裨於

國計民生無不盡心經營實力興辦委屬有功於民據紳士

沈兆雲等聯名籲懇於津郡擇地建立專祠以資報饗由
該道府轉詳請

奏聲明所需經費另行集捐等情前來臣查曾國藩前於兩
江總督任內因病出缺疊荷

恩施至優極渥竝准於立功省分一體建祠仰見

聖主眷念蓋臣有加無已欽感同深其在直隸幾及兩年政績
實多可傳今津郡紳民追念舊德籲懇祠祀出於至誠相
應仰懇

天恩俯賜照准以順輿情理合恭摺具陳伏乞

皇上聖鑒訓示謹

奏軍機大臣奉

旨著照所請該部知道欽此

曾文正公全集

首卷

太子太保大學士直隸總督一等伯

臣李鴻章跪

奏爲已故督

臣

遺愛在民據情奏懇

恩准建立專祠崇祀名宦恭摺仰祈

聖鑒事竊據藩司孫觀臬司范梁清河道葉伯英會詳據保定府紳士賀錫福等稟稱原任大學士兩江總督曾國藩自同治七年調任直隸時值捻氛甫靖該督臣苦心經理澄敘官方禮賢清訟選將練兵興舉水利賑恤災荒善政班班不可殫述前津郡稟請建祠業蒙奏准省城爲首善之區士民愛戴尤深籲懇捐建專祠春秋致祭竝據直省紳耆進士王振綱翰林院庶吉士辛家彥等公呈請將前督

臣曾國藩崇祀省城名宦祠各等情請

奏前來

臣

查該故督

臣

調任畿輔兩年舉賢任能吏治爲之

清肅他如治河練兵次第籌辦皆有成效於地方利弊切實講求綱紀漸立廢墜具修其在任時清理通省訟獄積案數萬件去任後籌助天河水災賑銀二十萬兩尤爲人所難能功德在民久而弗替旣據合詞環請出於至誠相應據情籲懇

天恩准於保定省城由該紳士等捐建前督臣曾國藩專祠由地方官春秋致祭竝准祔祀省城名宦祠以順輿情而彰忠藎理合恭摺具

奏伏乞

皇太后

皇上聖鑒訓示謹

奏軍機大臣奉

旨著照所請該部知道欽此

卷之五

卷之四

五



皇清誥授光祿大夫贈太傅武英殿大學士兩江總督一等毅
勇侯曾文正公神道碑

聖清受命二百載有相曰曾公始以儒業事

宣宗皇帝入翰林七遷而爲禮部侍郎

文宗御極正色直諫多大臣之言咸豐二年以母憂歸湘鄉遂起
鄉兵討賊自

宣宗時天下乂安內外弛備於是西洋始通中國海上多事未幾
而廣西羣盜起大亂以興及此年放兵東出攻長沙不克
遂渡洞庭陷武昌循江而下所過摧靡而是時天下兵大
氏情竄恇怯不可復用諸老將盡死爲吏者不習戰陳公

既歸

天子詔公治團練長沙公曰金革之事其敢有避因奏言團練不食於官緩急不可恃請就其鄉團丁千人募爲勇營教以兵法束伍練技號曰湘軍湘軍之名自此始明年益募人三千解南昌之圍是時賊已陷金陵踞之掠民艘巨萬縱橫大江中於是議創舟師制船鑄礮選將練卒教習水戰天子嘉之湘軍水師由此起矣四年成軍東討初戰再失利未幾大捷湘潭以師不全勝上疏自劾已而克岳州下武昌大破田家鎮斷橫江鐵鎖乘勝圍九江進規湖口當是時湘軍威名震天下會水師陷入彭蠡湖鄂帥喪師武昌再失

公曰武昌據長江上游必爭之地也急檄湖北按察使胡公林翼率偏師西援不克則悉銳師繼之而自畱江西督攻九江已而悍賊石達開等分道犯江西破郡縣六十餘城公上疏自劾卒以孤軍堅拒死守賊不得逞六年胡公等復武昌明年拔九江軍威復振公治軍謀定後動折而不撓堅如金石重如山岳諸將化之雖離公遠出皆遵守約束不變自九江未拔諸軍已略定江西郡縣矣公以父憂歸累

詔起復視師不出既逾小祥始奉

命援浙江是時公軍爲天下勁旅四方有警爭乞公赴援南則浙

閩西則蜀北則淮甸皆遙恃公軍爲固慮旌旗他指

天子亦屢詔公規畫全勢視緩急輕重去就之公曰謀金陵者必

據上游法當舍枝葉圖本根遂建議三道規皖咸豐十年

蘇浙淪陷

朝廷憂之以公總制江南趨

詔公東兵而公卒不棄皖以失上游是年西夷內犯定和議十一

年公克安慶今

上同治元年正月元日授公協辦大學士於是分道出師大舉

東下公弟浙江巡撫國荃以湘軍緣大江薄金陵今陝甘

總督左公宗棠以楚軍抵衢州援浙江

鴻章

以淮軍出上

海規蘇常水師中江而下爲陸軍聲援三年蘇浙以次戡定而公弟等亦攻拔金陵僞都自公初出師至是十有三年粵賊平東南大定論功

封一等毅勇侯開

國以來文臣封侯自公始公旣平定江南威振方夏名聞外國會忠親王僧格林沁戰歿於曹廷議以公北討流寇是時公所部湘軍皆已散歸經畫歲餘功緒漸彰會疾作有詔還鎮江南中外大事皆就決之公所謀議思慮深遠進規中原議築長牆以制流寇策西事議清甘肅而後出關籌滇黔議以蜀湘兩省爲根本皆初立一議數年之後事之成

否卒如其說而馭夷爲尤著云初咸豐三年金陵始陷米
利堅人嘗謁江南帥願以夷兵助戰十一年和議旣成俄
羅斯米利堅皆請以兵來助公議以爲宜嘉其效順而緩
其師期及同治元年英吉利法蘭西又以爲請公又議以
爲宜申大義以謝之陳利害以勸之皆

報可廷議購夷船公力贊之比船至欲用夷將則議寢其事其
後自募工寫夷船之制近似之遂議開局製造自是外洋
機器輪舟夷礮中國頗得其要領矣六年

詔中外大臣籌和議利害可許不可許公議以爲其爭彼我之
虛儀者許之其奪吾民之生計者勿許也移直隸總督天

津民有擊殺法蘭西領事官者法人訟之

朝

天子慰解之法人固爭有

詔備兵以待公曰百姓小忿不足肇邊釁

從之而密議儲將練兵設方略甚備先是公已積勞成疾至是

疾益劇會江南闕帥上念南洋馭夷事任絕重非公不可

遂命還江南臥治之至則經營遠略益勤旣一年疾甚同

治十一年二月戊午遂薨於位官至武英殿大學士享年

六十有二遺疏入

天子震悼賻賜有加贈太傅諡文正公諱某字滌生世爲湖南

湘鄉人曾祖竟希祖玉屏父縣學生麟書三世皆以公貴
封光祿大夫曾祖妣彭氏祖妣王氏妣江氏皆

封一品夫人夫人衡陽歐陽氏生男二人紀澤廕生戶部員外
郎錫爵爲侯紀鴻附貢生孫三人廣鈞廣鎔廣銓皆幼公
旣薨紀鴻廣鈞皆

賜舉人廣鎔

賜員外郎廣銓

賜主事女五人皆適士族公爲學肇究義理精通訓詁爲文效
法韓歐而輔益之以漢賦之氣體其學問宗旨以禮爲歸
嘗曰古無所謂經世之學也學禮而已於古今聖哲自文

周孔孟下逮

國朝顧炎武秦蕙田姚鼐王念孫諸儒取三十有二人圖其像而師事之自文章政事外大氏皆禮家言嘗謂聖人者自天地萬物推極之至一室米鹽無不條而理之又嘗慨古禮殘闕無軍禮軍禮要自有專篇細目如戚敬元氏所紀者若公所定營制營規博稽古法辨等明威其於軍禮庶幾近之至其論議規畫秩序井井經緯乎萬變調理乎鉅細其素所蘊蓄然也喪歸湖南營葬於善化縣某鄉

章少從公問學又相從於軍旅與聞公謀

國之大者乃爲文刻其墓道之碑銘曰於鑠

皇清世載聖武萬夷震疊匪臣伊主厯載二百極熾而屯孰排
其紛厥維宗臣功與時會其成則天惟公之興事乃異前
國有舊旅雲屯星羅公曰窳矣汰之則那率我萌隸敵愾同
仇舍其鉏耰來事戈矛厥初孤立百挫不懾天日可格鬼
神爲泣持己所學陶鑄羣倫雖培浸灌爲國得人孰任鉅
艱刊印使帥孰以節死孰成孰敗決之於微卒驗不爽
朝廷乏人取之公旁始

詔求賢江以薦起繼才胡公勝已十倍陸軍諸將首塔羅王二李
繼之水則彭楊皆公所識拔於風塵知人之鑑竝世無倫
萬眾一心貫虹食昴終奠九土殄此狂醜事已大畢乃謀

於海益我之長奪彼所恃動如雷霆靜守其雌內圖自強
外羈縻之默運方寸極九萬里人謂公怯曰吾過矣式蛙
嘗膽以生以訓大勛宜就胡棄而隕道光季世夷始恩我
內患乘之燎原觀火彼睨吾旁雌雄首尾曰敝可乘附耳
同起夷齧其外寇訐其內不有我公嘻甚矣憊維昔相臣
佐治以文武功之盛則由

聖人畱都開基三藩定變新疆外拓川楚內奠四夷奔走唯恐在
後皆秉

聖謨羣臣拱手公起詞臣以安以攘

天子虛己曰汝予匡相業之隆近古無有開物成務是謂不朽退

之有言衡爲嶽宗扶輿磅礴鬱積必鍾後千百年降神堯
堯我銘不誂以配崧高

誥授光祿大夫太子太保武英殿大學士直隸總督一等肅毅
伯兼騎都尉世職門下士李鴻章頓首拜譔

皇清誥授光祿大夫贈太傅武英殿大學士兩江總督一等毅
勇侯曾文正公墓志銘

同治十有一年二月武英殿大學士總督兩江曾公薨於
位

天子震悼加贈太傅諡文正命儒臣撰賜祭文墓碑以葬公子
紀澤紀鴻以銘墓之文屬之劉公蓉未及葬而劉公薨檢
其遺書得所爲銘辭而前敍闕焉又明年卜葬善化縣之
平塘伏龍山葬有日而夫人歐陽氏薨遂卽其地祔葬於
是嵩燾涕泣承劉公之意而敍之公諱國藩字伯涵號滌
生湘鄉人咸豐初寇發廣西一隅之地所至糜爛盜踞金

陵十四年盡蹂江浙兩省地披而有之公以侍郎奉母喪歸起鄉里討賊奮其佔畢之儒鉏耰之民盪長江萬里蹙賊踣之天下復覩乂安民用蘇息已而合肥李公平捻逆於鬲津湘陰左公殄回亂於關隴皆用公薦擢席其遺規遂藏成功於時江以南搆亂尤深公再督兩江噓枯翦穢煦濡羣萌孤嫠有養儒宿有歸漸摩淳涵納之太和故公功在天下而江南之於公若引之以爲己私公始爲翰林窮極程朱性道之蘊博考名物熟精禮典以爲聖人經世宰物綱維萬事無他禮而已矣澆風可使之醇敝俗可使之興而其精微具存於古聖賢之文章故其爲學因文以

證道常言載道者身也而致遠者文天地民物之大典章
制度之繁惟文能達而傳之俛焉日有孳孳以求信於心
而當於古其平居抗心希古以美教化育人才爲己任而
尤以知人名天下一見能辨其才之高下與其人賢否滿
洲塔齊布公新甯江公忠源衡陽彭公玉麟善化楊公岳
斌或從末弁及諸生獎拔爲名臣其於左公宗棠趣尙不
同而奇左公智術以公義相取左公亦以顯名天下片長
薄技受公一顧爭自琢磨砥礪敦尙名節在軍必立事功
在官爲循吏曰吾不忍負曾公而公斂退虛抑勤求已過
日夜憂危如不克勝自初仕及當天下重任始終一節未

嘗有所寬假及其臨大敵定大難從容審顧徐厝之安一
無疑懼此公道德勛名被於天下施之萬世而其意量之
閎深終莫得而罄其用而窺其藏也公以戊戌科進士改
翰林院庶吉士又明年授檢討五轉至禮部侍郎

文宗卽位

詔求直言公疏陳本原至計天下驚歎以爲唐宋名臣所不及典
試江西未至丁母憂會廣西賊圍長沙奉

命幫辦湖南團練治軍長沙又治水師衡州武昌再陷

命公督師東征再克之轉戰江西丁父憂歸

上初卽位授大學士總督兩江節制四省而公弟太子少保威

毅伯國荃以一軍特起克復金陵

天子嘉勞錫公一等毅勇侯晉太子太保旋調直隸總督復調
兩江公生於嘉慶十六年辛未歲十月十一日薨於同治
十一年壬申歲二月初四日年六十有二曾祖竟希祖玉
屏父麟書自公祖若父皆名德耆壽及見公爲侍郎受封
光祿大夫天下榮之配歐陽夫人衡陽縣貢生凝祉之女
勤儉有禮法恩周於人行飭於家自文正公在軍夫人常
蔬食夜疏告天乞早紓生民之禍助成大功慰

天子憂勞以同治十有三年八月十三日薨年五十有九子紀
澤戶部員外郎襲封一等毅勇侯紀鴻賞給舉人女五人

一適袁氏江蘇松江府知府芳瑛之子秉楨一適陳氏安徽池州府知府源充之子遠濟一適羅氏浙江甯紹台道追贈巡撫忠節公之子兆升一適員外郎郭剛基嵩燾之冢子也一字聶氏廣東候補道爾康之子緝槩孫四人廣鈞舉人廣鎔六部員外郎廣銓六部主事年皆幼

朝廷推恩賞官有差廣鑾公薨後生公識量恢闔望而知其偉人生平趨舍是非求信諸心不與人爲去就而精鑒微識一言一事研覈無遺尤務規其大而見其遠始出治軍討賊以東南大勢在江險不宜盡弛與賊力請以水師自效及爲

欽差大臣建三路進攻以規江浙兩省之議討捻逆河南建合
四省之力蹙賊一隅之議皆策之始受事之日其後成功
一如公言在軍戈鋌樓櫓短長尺度躬自省量無或苟者
榮辱得失無關其心而未嘗一念不周乎天下一事不盡
乎民隱傳曰爲仁由己公無愧焉公學行功業具見

國史本傳及合肥李公所撰神道碑不復論著其生平志節
關係天下之大者藏於公之墓而繫以劉公之銘其辭曰
國有治亂任賢者昌惟

聖御世與時弛張道光末造亢極而僵吏惰民偷卒嬉於伍娖
徒乘之揭竿起舞天祚

聖清篤生元輔重奠八荒爲國肱股始公通籍翱翔掖垣

顯皇初政抗疏陳言謇諤之風

帝心所簡起公衰麻戎符往綰時寇方張百城潰亂羹沸於鼎當
者糜爛公倡義旅豪傑景從虎飛龍嘯吐氣如虹銳師東
討靡堅不攻大江南北阨塞四通利鈍無常或傷眾毀孤
忠籲天義泣神鬼亦或左次斂兵祁門豺狐夜嗥星日晝
昏百憂所叢不震不悚一柱屹然華嶽之重卒夷大難奮
績鷹揚殪渠掃穴寸磔梟狼以義擎天浴日於海盪滌垢
汙河山無改

帝勞相臣建侯剖符畀蕃畿輔再鎮三吳民謳於野絃歌載途

公心廓然與物無競斂聚羣謀虛己以聽慮周六合不耀
其明淵衷自惕婦豎歸誠羣彥煌煌洪纖高下大匠陶鎔
歸諸一治何材不植何功不庸片長思奮大受以隆公不
自賢厥心愈下被寵若驚聞過則謝退偃一室仰思古人
尙友千載遙契以神發爲文字怪偉縱橫雷霆砰擊金石
鏘鳴蹴踏百家孤懷自賞跨宋軼唐近古無兩德溢於位
功不償年載其忠藎往卽重泉誰與主者豈曰非天北斗
帝鄉公魂攸寄陵圯谷湮其誠不替伐石勒銘敢告萬世
誥授光祿大夫賜進士出身二品頂戴前署理廣東巡撫加七

級湘陰郭嵩燾撰文

誥授資政大夫前陝西巡撫湘鄉劉蓉製銘

誥授光祿大夫太子少保前湖北巡撫一等威毅伯湘鄉曾國

荃書丹

誥授光祿大夫賜進士出身太子太保武英殿大學士直隸總督一等肅毅伯合肥李鴻章篆蓋

曾文正公全集一百五十六卷

首卷一冊

奏稿三十卷

十八家詩鈔二十八卷

經史百家雜鈔二十六卷

經史百家簡編二卷

鳴原堂論文二卷

詩集三卷

文集三卷

書札三十三卷

曾文正公全集
卷一
批牘六卷

雜著二卷

求闕齋讀書錄四卷

求闕齋日記類鈔二卷

年譜十二卷

合肥李瀚章笈泉編輯

合肥李鴻章少荃校刊

開縣李宗羲雨亭

侯官沈葆楨幼丹

香山何璟小宋

豐順丁日昌雨生

合肥張樹聲振軒

六安涂宗瀛朗軒

廬江劉秉璋仲良

衡陽彭玉麟雪琴

新甯劉長佑印渠

德清俞樾蔭甫

嘉興錢應溥子密

南昌梅啟照筱岩

西鄉李文敏捷峯

瑞安孫衣言紹聞

中江李鴻裔眉生

歙縣程桓生尙齋

臨桂王必達霞軒

涇縣洪汝奎琴西

甯鄉陳濟清雲卿

平江李元度次青

湘陰郭崑燾意城

桐城吳汝綸摯甫

陽湖趙烈文惠甫

無錫薛福成叔耘

武昌張裕釗廉卿

忠州李士棻芋仙

遵義黎庶昌蓴齋

東湖王定安鼎丞

湘潭王闓運王秋

瀏陽賀宏勳雲舫

長沙楊書霖商農

善化黃維申笏堂

石埭楊文會仁山參校

15640

曾文正公

鳳城

晉文正公

奉議

光緒二年季夏
傳忠書局校

PL
2728
A1
1876
112

曾文正公奏稿

門人合肥李瀚章編錄

嘉興錢應溥

中江李鴻裔

歙縣程桓生參校

平江李元度

桐城吳汝綸

長沙曹耀湘校字



旌德湯炳南刻字

曾文正公奏稿

卷之一目錄

遵議大禮疏

道光三十年正月二十八日

應 詔陳言疏

三月初二日

請設壇祈雨疏

三月初四日

條陳日講事宜疏

四月初四日

議汰兵疏

咸豐元年三月初九日

議覆李綱從祀文廟疏

三月十四日禮部會奏

敬陳 聖德三端預防流弊疏

四月二十六日

謝署刑部左侍郎

恩疏

五月二十七日

備陳民間疾苦疏

十二月十八日

平銀價疏

十二月十九日

謝署吏部左侍郎

恩疏

咸豐二年正月二十五日

請寬勝保處分疏

四月初五日

謝放江西正考官

恩摺

六月十三日

請假回籍省親片

敬陳團練查匪大概規模摺

十二月二十二日

附陳辦團有緒即乞守制片

遵議大禮疏

道光三十年正月二十八日

奏爲遵

旨敬謹詳議事正月十六日

皇上以

大行皇帝硃諭遺命四條內無庸

郊配

廟祔二條令臣工詳議具奏

臣等謹於二十七日集議諸臣皆

以

大行皇帝功德懿懌

郊配旣斷不可易

廟祔尤在所必行直道不泯此天下之公論也臣國藩亦欲隨從眾議退而細思

大行皇帝諄諄誥誥誠必有精意存乎其中臣下鑽仰

高深苟窺見萬分之一亦當各獻其說備

聖主之博采竊以爲

遺命無庸

廟祔一條考古準今萬難遵從無庸

郊配一條則不敢從者有二不敢違者有三焉所謂無庸

廟祔一條萬難遵從者何也古者祧廟之說乃爲七廟親盡言之間有親盡而仍不祧者則必有德之主世世宗祀不在七廟

之數若殷之三宗周之文武是也

大行皇帝於

皇上爲

禰廟本非七廟親盡可比而論

功德之彌綸又當與

列祖

列宗同爲百世不祧之室豈其弓劍未忘而烝嘗遽別且諸侯

大夫尙有廟祭况以

天子之尊敢廢

升祔之典此其萬難遵從者也所謂無庸

郊配一條有不敢從者二何也古聖制禮亦本事實之既至而情文因之而生

大行皇帝仁愛之德同符大造偶遇偏災立頒帑項年年賑貸薄海含哺粒我烝民后稷所以配天也

御宇三十年無一日之暇逸無須臾之不敬純亦不已文王所以配上帝也既已具合撰之實而欲辭

升配之文則普天臣民之心終覺不安此其不敢從者一也歷考

列聖升配惟

世祖章皇帝係由御史周季琬奏請外此皆繼統之

聖人特旨舉行良由上孚

昊眷下愜民情毫無疑義也行之既久遂爲成例如

大行皇帝德盛化神卽使無例可循臣下猶應奏請况乎成憲昭昭曷敢踰越傳曰君行意臣行制在

大行皇帝自懷謙讓之盛意在大小臣工宜守

國家之舊制此其不敢從者二也所謂無庸

郊配一條有不敢違者三何也

壇壝規模尺寸有定乾隆十四年重加繕修一甎一石皆考律呂之正義按九五之陽數增之不能改之不可

七廟配位各設青幄當初幄制闊大乾隆三年量加收改今則

每幄之內僅容豆籩七幄之外幾之餘地我

大行皇帝慮及億萬年後或議增廣乎壇壝或議裁狹乎幄製故定爲限制以

身作則俾世世可以遵循今論者或謂西三幄之南尙可添置一案暫爲目前之計不必久遠之圖豈知人異世而同心事相沿而愈久今日所不敢言者亦萬世臣子所不敢言者也今日所不忍言者亦萬世臣子所不忍言者也經此次

殊諭之嚴切盈廷之集議尙不肯裁決遵行則後之人又孰肯冒天下之不韙乎將來必至修改基址輕變舊章此其不敢違者一也古來祀典興廢不常或無其祭而舉之或有其禮而罷

之史冊所書不一而足唐垂拱年間郊祀以高祖太宗高宗並配後開元十一年從張說議罷太宗高宗配位宋景祐年間郊祀以藝祖太宗真宗並配後嘉祐七年從楊畋議罷太宗真宗配位我

朝順治十七年合祀

天地日月星辰山川於

大享殿奉

太祖

太宗以配厥後亦罷其禮祀典改議乃古今所常有我
大行皇帝慮億萬年後愚儒無知或有援唐宋罷祀之例妄行

陳奏者不可不預爲之防故

硃諭有曰非天子不議禮以爲一經

斷定則巍然七幄與

天長存後世增配之議尙且不許罷祀之議更何自而興所以禁後世者愈嚴則所以尊

列祖者愈久此其計慮之周非三代制禮之聖人而能如是乎大行皇帝以制禮之聖人自居臣下何敢以尋常之識淺爲窺測有尊崇之虛文無謀事之遠慮此其不敢違者二也我

朝以孝治天下而

遺命在所尤重康熙二十六年

孝莊文皇后遺命云願於遵化州孝陵近地擇吉安厝當時臣工皆謂遵化去

太宗昭陵千有餘里不合祔葬之例我

聖祖仁皇帝不敢違

遺命而又不致違成例故於

孝陵旁近建

暫安奉殿三十餘年未敢竟安

地宮至雍正初始敬謹藏事嘉慶四年

高宗純皇帝遺命云廟號無庸稱祖我

仁宗睿皇帝謹遵

遺命故雖乾隆中之豐功大烈而

廟號未得

祖稱載在會典先後同揆矣此次

大行皇帝遺命惟第一條森嚴可畏若不遵行則與我

朝家法不符且

硃諭反覆申明無非自處於卑屈而處

列祖於崇高此乃大孝大讓亘古之盛德也與其以尊崇之微

忱屬之臣子孰若以莫大之盛德歸之

君父此其不敢違者三也

臣竊計

皇上仁孝之心兩者均有所歉然不奉

升配僅有典禮未備之歉遽奉

升配既有違

命之歉又有將來之慮是多一歉也一經

大智之權衡無難立判乎輕重

聖父制禮而

聖子行之必有默契於精微不待臣僚擬議而後定者

臣職在

秩宗誠恐不詳不慎

皇上他日

郊祀之時上顧

成命下顧萬世或者恍然難安則禮臣無所辭其咎是以專摺

奏和卷一
具奏干瀆

宸嚴不勝悼悚戰慄之至謹
奏

應

詔陳言疏

道光三十年三月初二日

奏爲應

詔陳言事二月初八日奉

皇上諭令九卿科道有言事之責者於用人行政一切事宜皆得據實直陳封章密奏仰見

聖德謙沖孜孜求治

臣

竊維用人行政二者自古皆相提并論

獨至我

朝則凡百庶政皆已著有

成憲既備既詳未可輕議今日所當講求者惟在用人一端耳方今人才不乏欲作育而激揚之端賴我

皇上之妙用大抵有轉移之道有培養之方有考察之法三者不可廢一請爲我

皇上陳之所謂轉移之道何也我

朝

列聖爲政大抵因時俗之過而矯之使就於中順治之時瘡痍初復民志未定故

聖祖繼之以寬康熙之末久安而吏弛刑措而民偷故世宗救之以嚴乾隆嘉慶之際人尙才華士騖高遠故

大行皇帝歛之以鎮靜以變其浮誇之習一時人才循循規矩準繩之中無有敢才智自雄鋒芒自逞者然有守者多而有猷

有爲者漸覺其少大率以畏蒞爲慎以柔靡爲恭以臣觀之京
官之辦事通病有二曰退縮曰瑣屑外官之辦事通病有二曰
敷衍曰顛預退縮者同官互推不肯任怨動輒請
旨不肯任咎是也瑣屑者利析鎰銖不顧大體察及秋毫不見
輿薪是也敷衍者裝頭蓋面但計目前剜肉補瘡不問明日是
也顛預者外面完全而中已潰爛章奏粉飾而語無歸宿是也
有此四者習俗相沿但求苟安無過不求振作有爲將來一有
艱鉅

國家必有乏才之患我

大行皇帝深知此中之消息故亟思得一有用之才以力挽頽

風去年京察人員數月之內擢臬司者三人擢藩司者一人蓋亦欲破格超遷整頓積弱之習也無如風會所趨勢難驟變今若遽求振作之才又恐躁競者因而倖進轉不足以收實效臣愚以爲欲使有用之才不出範圍之中莫若使之從事於學術漢臣諸葛亮曰才須學學須識蓋至論也然欲人才皆知好學又必自我

皇上以身作則乃能操轉移風化之本臣考

聖祖仁皇帝登極之後勤學好問儒臣逐日進講寒暑不輟萬壽聖節不許間斷三藩用兵亦不停止

召見廷臣輒與之往復討論故當時人才濟濟好學者多至康

熙末年博學偉才大半皆

聖祖教諭而成就之今

皇上春秋鼎盛正與

聖祖講學之年相似

臣之愚見欲請俟二十七月後舉行逐日

進講之例四海傳播人人嚮風

召見臣工與之從容論難見無才者則勗之以學以痛懲摸稜
罷輒之習見有才者則愈勗之以學以化其剛愎刻薄之偏十
年以後人才必大有起色

一人典學於宮中羣英鼓舞於天下其幾在此其效在彼康熙
年間之往事昭昭可觀也以今日之委靡因循而期之以振作

又慮他日之更張僨事而澤之以詩書但期默運而潛移不肯矯枉而過正蓋轉移之道其略如此所謂培養之方何也凡人
才未登仕版者姑不具論其已登仕版者如內閣六部翰林院
最爲薈萃之地將來內而卿相外而督撫大約不出此八衙門
此八衙門者人才數千我

皇上不能一一周知也培養之權不得不責成於堂官所謂培
養者約有數端曰教誨曰甄別曰保舉曰超擢堂官之於司員
一言嘉獎則感而圖功片語責懲則畏而改過此教誨之不可
緩也榛棘不除則蘭蕙減色害馬不去則騏驥短氣此甄別之
不可緩也嘉慶四年十八年兩次令部院各保司員此保舉之

成案也雍正年間甘汝來以主事而賞人參放知府嘉慶年間黃鉞以主事而充翰林入

南齋此超擢之成案也蓋嘗論之人才譬之禾稼堂官之教誨猶種植耘耔也甄別則去其稂莠也保舉則猶灌溉也

皇上超擢譬之甘雨時降苗勃然興也堂官常常到署譬之農夫日日田間乃能熟悉穡事也今各衙門堂官多

內廷行走之員或累月不克到署與司員恆不相習自掌印主稿數人而外大半不能識面譬之嘉禾稂莠聽其同生同落於畎畝之中而農夫不問教誨之法無聞甄別之例亦廢近奉明詔保舉又但及外官而不及京秩培養之道不尙有未盡者

哉自頃歲以來六部人數日多或二十年不得補缺或終身不得主稿內閣翰林院員數亦三倍於前往往往十年不得一差不遷一秩固已英才摧挫矣而堂官又多在

內廷終歲不獲一見如吏部六堂

內廷四人禮部六堂

內廷四人戶部六堂皆直

內廷翰林兩掌院皆直

內廷在諸

臣隨侍

御閱本難分身入署而又或兼攝兩部或管理數處爲司員者畫稿則匆匆一面白事則寥寥數語縱使才德俱優曾不能邀

堂官之一顧又焉能達

天子之知哉以若干之人才近在眼前不能加意培養甚可惜也

臣之愚見欲請

皇上稍爲酌量每部須有三四堂不入直

內廷者令其日日到署以與司員相砥礪翰林掌院亦須有不直

內廷者令其與編檢相濡染務使屬官之性情心術長官一一

周知

皇上不時詢問某也才某也直某也小知某也大受不特屬官之優劣粲然畢呈卽長官之淺深亦可互見旁考參稽而入衙

門之人才同往來於

聖主之胸中彼司員者但令姓名達於

九重不必升官遷秩而已感激無地矣然後保舉之法甄別之
例次第舉行乎舊章

皇上偶有超擢則梗柙一升而草木之精神皆振蓋培養之方
其略如此所謂考察之法何也古者詢事考言二者並重近來
各衙門辦事小者循例大者請

旨本無才猷之可見則莫若於言考之而

召對陳言

天威咫尺又不宜喋喋便佞則莫若於奏摺考之矣

國家定例內而九卿科道外而督撫藩臬皆有言事之責各省道員不許專摺謝

恩而許專摺言事乃十餘年間九卿無一人陳時政之得失司道無一摺言地方之利病相率緘默一時之風氣有不解其所以然者科道間有奏疏而從無一言及

主德之隆替無一摺彈大臣之過失豈君爲堯舜之君臣皆稷契之臣乎一時之風氣亦有不解其所以然者

臣考

本朝以來匡言

主德者孫嘉淦以自是規

高宗袁銑以寡慾規

大行皇帝皆蒙

優旨嘉納至今傳爲美談糾彈大臣者如李之芳參劾魏裔介彭鵬參劾李光地厥後四人皆爲名臣亦至今傳爲美談自古直言不諱未有盛於我

朝者也今

皇上御極之初又

特詔求言而

褒答倭仁之諭

臣

讀之至於抃舞感泣此誠太平之象然

臣

猶

有過慮者誠見我

皇上求言甚切恐諸臣紛紛入奏或者條陳庶政頗多雷同之

語不免久而生厭彈劾大臣
臣之愚見願
懼長攻訐之風又不免久而生厭

皇上堅持

聖意借奏摺爲考核人才之
不必交議而已過於攻訐者
具永不生厭戮之心涉於雷同者
不必發鈔而已此外則但見其有
益初不見其有損人情狃於
故常大抵多所顧忌如

主德之隆替大臣之過失非
皇上再三誘之使言誰肯輕
冒不韙如藩臬之奏事道員之具
摺雖有定例久不遵行非

皇上再三迫之使言又誰肯
立異以犯督撫之怒哉臣亦知內

外大小羣言並進卽浮僞之人不能不雜出其中然無本之言其術可以一售而不可以再試

朗鑑高懸豈能終遁方今考九卿之賢否但憑

召見之應對考科道之賢否但憑三年之京察考司道之賢否但憑督撫之考語若使人人建言參互質證豈不更爲核實乎臣所謂考察之法其略如此三者相需爲用並行不悖臣本愚陋頃以議禮一疏荷蒙

皇上天語褒嘉感激思所以報但憾識見淺薄無補萬一伏求皇上憐其愚誠俯賜

訓示幸甚謹奏

請設壇祈雨疏

道光三十年三月初四日

奏爲農田待澤孔殷亟請設壇祈禱以迓

天和而慰民望仰祈

聖鑒事竊惟民生以穡事爲先

國計以豐年爲瑞本年入春以後雨澤較稀現在節交立夏正
百穀播種之時必大沛甘霖方卜豐綏有兆近來京畿地方晴
多雨少糧價漸增並聞山陝一帶均盼雨甚切惟冀旬日間普
霑甘澍乃無亢旱之虞因思豐北大工未竣漕行或恐愆期今
歲河北各省收成尤關緊要我
皇上軫念民依無微不至凡屬雨暘之時若早蒙

宵旰之塵懷茲當東作方興
彌殷望澤

聖主虔申祈禱

蒼穹定需和甘應請

勅下各該衙門敬謹設壇誠
求膏雨將見

昊慈垂佑而渥澤旁敷草野
臚歡而倉箱有慶矣臣愚昧之見

是否有當伏乞

皇上聖鑒謹

奏

條陳日講事宜疏

道光三十年四月初四日

奏爲條陳日講事宜補

臣

前摺所未備事竊

臣

前於用人三策

摺內言及康熙年間日講之例三月十一日奉

諭旨著於百日後舉行日講所有一切應行事宜著各該衙門

察例詳議以聞欽此查康熙年間例案

臣

部及各衙門俱已無

存而

臣

之初意係於贊助

聖學之中陰寓陶成人才之意原摺內所謂其幾在此其效在

彼者尙未申明詳晰今一切應行事宜亦必求於人才有益不

徒務講學之虛名謹參考會典及

聖祖御製文集

國史列傳諸書竭臣愚見先定大概規模補前摺所未備請
皇上再交各衙門覈議務使精益求精

聖學人才兩有裨益方得實效謹將臣所擬條款臚列於後
一考定日講設官之制

謹按日講起居注官現在滿洲十員漢人十二員臣考舊章則
日講官與起居注官係屬兩項非一項差使也日講官主執經
入侍每日進講卽宋時崇政殿說書之職也起居注官主典禮
侍班簪筆載記卽周時左史右史之職也我

朝順治十年設立日講官其時並無起居注之名至康熙九年
復舉行日講且創立起居注館於是起居注官卽以日講官兼

攝之兩項差事乃併爲一項矣厥後康熙二十五年停止日講而起居注官則未嘗廢銜上日講二字亦未裁去雍正乾隆以來相沿不改其實所辦之事乃記注侍班之事日講二字則有空銜而無實事也今奉

旨舉行日講似須循名責實二者分作兩項於現在記注官之外別添一項人作日講官以復順治及康熙初年之例其現在之起居注官祇於銜上裁去日講二字其餘不改以循雍正乾隆以來之例庶名實相符而於

六朝成憲皆不稍背云

一講官員數

謹按順治十二年初設講官選詞臣八人不分滿漢康熙九年定設滿洲四員漢官八員厥後遞有增加至十八員二十六員不等蓋以講官而兼記注之事職務較繁故也今既將講官與記注官分作兩項似可循康熙九年之例定爲滿洲講官四員漢講官八員

一每日進講員數

謹按順治十二年定以掌院學士率講官或二人或三人進講康熙年間每日進講之員無可查考臣愚以爲進講之員太多不免徒務虛文謹擬每日以一人進講不事旅進旅退與尋常召見無異庶講官凝定專一得以悉心啟沃

皇上靜對臣工聽其講論今古亦得細察其精神器識卽此可以陶冶人才矣

一講官應用何項人

謹按現在起居注官專用翰詹兩衙門之人溯查康熙年間勵杜訥以州同而轉講官高士奇以中書而轉講官當時取人往往不限資格又康熙十六年有滿洲講官兼用小九卿之例乾隆初年有呈進講章兼用科道之例此次設立講官似可援此二例斟酌行之臣之愚見擬請除大學士掌院學士及六部都察院職事較繁無庸充補講官外其餘內閣學士及九卿科道之由科甲出身者准其與翰詹兩衙門一體充補講官庶取人

之途較廣而仍不違乎成例

一定保舉講官之法

謹按順治十二年初立講官

諭令大臣選詞臣學問淹博者八人既由臣下選擇是保舉之法也康熙年間講官由題本開列請

簡乾隆年間講官由引

見擢用至今相沿不改

臣

思此次復設此官仍須行選擇保舉

之法蓋保舉尙恐其濫惟保舉講官斷不至於濫不特保人者十分慎重卽受保者自揣學問平庸亦必不敢妄進以取戾也

求

皇上於一二品大臣中

特旨派出四五人令其各保數員以備進講此次所保之人或升遷出差將次缺員又求

特派四五人令其各保數員進講所保之人必容止莊重辭氣溫雅又必兼熟通鑑會典二書如不稱職令其退出講筵或根柢甚深而口稍拙訥者不妨保舉

一進講之地

謹按康熙年間進講之地

懋勤殿爲多惟十二年暫修

宮殿

駕駐瀛臺卽在瀛臺進講二十三年天氣嚴寒卽在暖閣進講其餘或在郊外或

幸南苑皆不輟講是地可隨時遷移也今奉

諭旨便殿進講

皇上現御東書房

臣擬請卽在東書房進講以後或有遷移臨

時再降

諭旨

一進講之儀

謹按康熙年間進講儀節初入行三叩禮侍立詣講案前進講講畢復行三叩禮至十六年停止講畢之三叩禮臣今擬就此

儀稍爲酌量請卽東書房言之

皇上升御牀西面牀上恭設一橫几爲書案置所講之書於案上又豫設小几於室中爲講官之講案屆時講官捧書入陳於講案上轉出案西跪東北面一叩興復講案位侍立宣講講畢復轉出案西跪一叩興趨出如遇

聖駕不御東書房所有

皇上南面講官北面之處有時限於地勢再行臨時斟酌謹照此儀另繪一圖附

呈

一進講之時

謹按康熙年間尙未設立軍機處部院奏事卽係大臣入對承旨奏事旣畢然後講官入侍自九年至二十年皆然也二十一年乃改於部院未啟奏之前講官先入進講遙想其時大約不過辰刻耳今則時勢移易較康熙年間迥有不同康熙年間部院章奏不過數件今則每日多至七八十件康熙年間各省章奏

聖祖省覽直待夜分然燭之後今則清晨

裁定宣諭軍機而批答康熙年間引

見人員甚少今則逐日皆有引

見有此數者之不同則每日早間

聖躬亦煩勞矣臣之愚見擬請待引

見以後

皇上萬幾已畢

御前大臣侍衛等皆已散直日永神暇然後講官進講則有義理之悅而無他務之擾庶幾如

聖祖讀書記中所謂神理淵穆怡然忘倦云

一所講之書

謹按康熙年間所講之書先四書次尙書次周易次詩經次通鑑講通鑑之時仍兼講四書而順治年間亦曾繙譯通鑑及大學衍義二書呈進今臣聞

聖學高深諸經通鑑講貫已熟竊謂爲君之道莫備於真德秀
衍義邱濬衍義補二書真氏於用人之道邱氏於理財治民之
道尤言之深切著明頃給事中呂賢基曾以爲請臣擬請講此
二書於今日時政實有裨益

一陳講之道

謹按講官陳說貴忠誠切直尤貴明於

本朝掌故康熙十六年

諭講官宜進直言毋有隱諱二十一年

諭講官須有勸戒箴規之意乃稱啟沃又

聖祖御製講官箴曰體之行之朕躬是力載獻載替爾職宜飭

又曰誼貴勵翼先正其心爾苟勿欺吐辭足欽繹此八句則知切直者未有不由於忠誠也至於

本朝掌故則大經大法實有超越前古者若能於每日進講之時將

列聖至德善政稱述一二條不惟

君臣之精神互相警發而爲講官者必熟於

國家之典章則凡會典及

列朝聖訓皆當時時研究此中之磨厲人才已不少矣

一覆講之法

謹按康熙十四年

諭曰講原期有益身心今祇講官進講朕不覆講日久將成故事不惟於學問之道無益亦非所以爲法於後世也嗣後進講時講官講畢朕乃覆講如此庶幾有裨實學欽此臣思覆講之法不過疑者詰之誤者辨之非必逐句討論也今講官講畢應請

皇上於疑難之處俯加詰問講官錯誤之處仰承指示若無疑可問無誤可指卽不妨默識深領方爲可久之道一纂成講書

謹按康熙年間講官撰成講章分寫正副本先期將正本進呈其撰法先列經文次列諸儒之說次列講官推演之義既講之

後又將講章編輯成書今所傳四書解義書經易經各解義是也此次所講衍義及衍義補真氏邱氏之書本係臣下進講體裁不必更撰講章亦不必先期呈進矣祇須於本日遞一摺片云臣某人今日進講第幾卷第幾頁某句起某句訖謹奏已爲簡當至已講之後仍須編輯成書將來刊刻流傳以昭

聖學之盛其編輯之法先鈔真氏邱氏全文次列講官敷陳之說以能徵引會典者爲上於旣講後三日呈遞俟發下之後彙繕成帙彙成三卷進

呈一次抑

臣

又有請者

聖祖御製文集中有講筵緒論二卷凡八十五條

皇上聰明天縱講筵觸發間有緒論敬祈發下交講官編入使臣等欽誦之餘益加儆惕則興起多矣

一講官體制

謹按康熙年間講官

恩遇最爲隆渥或

賜詩篇或

賜邸第或

賞貂皮或交部議敘錫賚便蕃非常之典非臣下所敢議及也至於體制所在雖屬虛文亦宜稍示優異一得講官雖編檢科道皆得專摺謝

恩其雨帽坐墊請照現在起居注官之例朝賀班次請照南書房翰林之例至於春秋

經筵侍班宜在六部堂官之次並隨至

文淵閣

賜茶其科道充講官者卽不派街道巡城差使間有扈從之時講官所用帳房及一切應用物件仍遵康熙十二年

諭定章程酌定數目由內務府給與

一進講年數

謹按康熙進講自九年至二十五年凡十有七載中間如三藩用兵九省騷動捐例常開倉庫空虛實有倍甚於今日者而未

嘗停講蓋

聖祖實由於此中深求政要兼厲人才非以此爲文章之娛也
湯斌之放江蘇巡撫

聖祖諭曰以爾久侍講筵老成端謹故特簡爾熊賜履之旣沒
聖祖諭吏部曰賜履夙學老成爲講官多年未嘗不以內聖外
王之道正心修身之體直言講論當時偉人輩出大抵多識拔
於講筵之中蓋侍學旣久故知之真也

皇上復舉舊章伏願行之久遠不可遽求速效雖有偏災小警
不可停罷漸濡旣久風氣日振臣前摺所謂十年以後人才當
有起色也若舉行數載或卽停止雖於

聖學無損而固不能收百年樹人之效區區之忱尤在於此伏乞

聖鑒

以上十四條竭

臣

愚忠麤定大概規模其有不典不詳求

皇上飭交各衙門覈覆施行謹

奏

議汰兵疏

咸豐元年三月初九日

奏爲簡練軍實以裕國用事臣竊維天下之大患蓋有二端一曰國用不足一曰兵伍不精兵伍之情狀各省不一漳泉悍卒以千百械鬪爲常黔蜀冗兵以勾結盜賊爲業其他吸食鴉片聚開賭場各省皆然大抵無事則游手恣睢有事則雇無賴之人代充見賊則望風奔潰賊去則殺民以邀功章奏屢陳諭旨屢飭不能稍變錮習至於財用之不足內外臣工人人憂慮自庚子以至甲辰五年之間一耗於夷務再耗於庫案三耗於河決固已不勝其浩繁矣乙巳以後秦豫兩年之旱東南六省之水計每歲歉收恆在千萬以外又發帑數百萬以振救之

天下財產安得不絀

宣宗成皇帝每與臣下言及開捐一事未嘗不咨嗟太息憾宦途之濫雜悔取財之非計也

臣嘗卽

國家歲入之數與歲出之數而通籌之一歲本可餘二三百萬然水旱偏災堯湯不免以去年之豐稔而江浙以大風而災廣西以兵事而緩計額內之歛收已不下百餘萬設更有額外之浮出其將何以待之今雖捐例暫停而不別籌一久遠之策恐將來仍不免於開捐以天下之大而無三年之蓄汲汲乎惟朝夕之圖而貽

君父之憂此亦爲臣子者所深恥也當此之時欲於歲入常額

之外別求生財之道則搜括一分民受一分之害誠不可以妄議矣至於歲出之數兵餉爲一大宗

臣嘗考

本朝綠營之兵制竊見乾隆四十七年增兵之案實爲兵餉羸絀一大轉關請卽爲我

皇上陳之自康熙以來武官卽有空名坐糧雍正八年因定爲例提督空名糧八十分總兵六十分副將而下以次而減下至千總五分把總四分各有名糧又修製軍械有所謂公費銀者紅白各事有所謂賞卹銀者亦皆取給於名糧故自雍正至乾隆四十五年以前綠營兵數雖名爲六十四萬而其實缺額常六七萬至四十六年增兵之議起武職坐糧另行添設養廉公

費賞卹另行開銷正項向之所謂空名者悉令挑補實額一舉而添兵六萬有奇於是費銀每年二百餘萬此臣所謂餉項羸絀一大轉關者也是時海內殷實兵革不作普免天下錢糧已經四次而戶部尙餘銀七千八百萬

高宗規模閎遠不惜散財以增兵力其時大學士阿桂卽上疏陳論以爲

國家經費驟加不覺其多歲支則難爲繼此項新添兵餉歲近三百萬統計二十餘年卽須用七千萬請毋庸概增旋以廷臣議駁卒從增設至嘉慶十九年

仁宗覲帑藏之大絀思阿桂之遠慮慨增兵之仍無實效

特詔裁汰於是各省次第裁兵一萬四千有奇

宣宗卽位又

詔抽裁冗兵於是又裁二千有奇乾隆之增兵一舉而加六萬五千嘉慶道光之減兵兩次僅一萬六千

國家經費耗之如彼其多且易也節之如此其少且難也臣今冒昧之見欲請汰兵五萬仍復乾隆四十六年以前之舊驟而裁之或恐生變惟缺出而不募補則可徐徐行之而萬無一失醫者之治瘡癰甚者必剷其腐肉而生其新肉今日之劣弁羸兵蓋亦當量爲簡汰以剷其腐者痛加訓練以生其新者不循此二道則武備之弛殆不知所底止自古開國之初恆兵少而

國強其後兵愈多則力愈弱餉愈多則國愈貧北宋中葉兵嘗百二十五萬南渡以後養兵百六十萬而軍益不競明代養兵至百三十萬末年又加練兵十八萬而孱弱日甚我

朝神武開國本不藉綠營之力康熙以後綠營屢立戰功然如三藩準部之大勦回疆金川之殊烈皆在四十六年以前至四十七年增兵以後如川楚之師暎夷之役兵力反遠遜於前則兵貴精而不貴多尤爲明效大驗也八旗勁旅亘古無敵然其額數常不過二十五萬以強半翊衛京師以少半駐防天下而山海要隘往往布滿

國初至今未嘗增加今卽汰綠營五萬尙存漢兵五十餘萬視

八旗且將兩倍權衡乎本末較量乎古今誠不知其不可也近者廣西軍興紛紛徵調外兵該省額兵二萬三千土兵一萬四千聞竟無一人足用者粵省如此他省可知言念及此可勝長慮臣聞各省之兵稍有名者如湖南之鎮筄江南之壽春浙江之處州天下不過數鎮裁汰之法或精強之鎮不動而多裁劣營或邊要之區不動而多裁腹地或營制太破歸而併之或汛防太散撤而聚之是在兵部之精審督撫之體察未可鹵莽以從事耳誠使行臣之說缺出不補不過六年五萬可以裁畢以一馬二步計之每年可省餉銀一百二十萬十年以外於經費大有裨益此項銀兩不輕動用督撫歲終奏解戶部另行封存

專備救荒之款永塞開捐之路養兵爲民也備荒亦爲民也塞捐以清仕途尤愛民之大者也一分一毫

天子無所私利於其間豈非三代公心賢於後世摅括之術萬萬者哉若夫訓練之道則全視乎

皇上精神之所屬

臣考

本朝以來大閱之典舉行凡二十餘次或於南苑或於西廡或於蘆溝橋玉泉山

天弧親御外藩從觀軍容一肅藩部破膽自嘉慶十七年至今不舉大閱者四十年矣凡兵以勞而強以逸而弱承平日久京營之兵既不經戰陳之事又不見蒐狩之典筋力日懈勢所必

然伏求

皇上於三年之後行大閱之禮明降

諭旨早示定期練習三年京營必大有起色外省營伍勢難遽徧求

皇上先注意數處物色將才分布天下要害之地但使七十一鎮之中有十餘鎮可爲腹心五十餘萬之中有十餘萬可爲長城則緩急之際隱然可恃

天子之精神一振山澤之猛士雲興在我

皇上加意而已昔宋臣龐籍汰慶厯兵八萬人遂以大蘇邊儲明臣戚繼光練金華兵三千人遂以蕩平倭寇

臣書生愚見以

奏稿卷一
爲今日論兵正宜法此二事謹抄錄乾隆增兵嘉慶道光減兵
三案進呈伏乞
聖鑒

飭下九卿科道詳議斯道甚大
臣鮮閱歷不勝悚惶待命之至

謹奏

議覆李綱從祀文廟疏

咸豐元年三月十四日

爲遵

旨議奏事內閣鈔出福建巡撫徐繼畬等奏請宋臣李綱從祀文廟一摺奉

硃批禮部議奏欽此查原奏內稱云等語臣等查歷代從祀諸儒皆以德行純懿有功經學者爲要至我

朝康熙年間以宋臣范仲淹從祀始於道德學問之外兼取經濟非常之才蓋聖門政事之科原與德行文學並重厥後雍正年間以漢臣諸葛亮從祀道光年間以唐臣陸贄宋臣文天祥從祀此四人者皆經綸彌天壤忠義貫日月列於從祀鉅典誠

聖朝教忠之至意也茲查李綱仕宋歷官尙書左僕射忠言讜
論定傾扶危倉卒而守圍城刺血以草奏疏力排和議躬佐中
興宋史稱其負天下之望以一身之用舍爲社稷生民安危朱
子稱其知有君父而不知有身知天下之安危而不知身之禍
難屢瀕九死而愛君憂國之志終有不可奪者可謂一世之偉
人史筆昭垂洵爲千古定論至其生平著述爲該撫原奏所稱
者有易傳內外篇論語詳說二種原奏所未稱者有中興至言
建炎類編及乘閑志預備志各種今皆不傳僅存其序於集中
其爲

文淵閣所著錄者惟梁谿集八十卷及建炎時政記二種而已

臣等細觀其文集奏議於政治得失言之深切著明純忠亮節
皎然不磨核其品學經濟實與諸葛亮陸贄范仲淹文天祥相
等自當一體從祀以獎忠義應如該撫等所請准其從祀

文廟西廡在先儒尹焞之次所有臣等核議緣由是否有當伏

祈

皇上訓示遵行謹

奏

敬陳

聖德三端預防流弊疏

咸豐元年四月二十六日

奏爲敬陳

聖德仰贊

高深事

臣

聞美德所在常有一近似者爲之淆辨之不早則流

弊不可勝防故孔門之告六言必嚴去其六弊

臣

竊觀

皇上生安之美德約有三端而三者之近似亦各有其流弊不可不預防其漸請爲我

皇上陳之

臣

每於祭祀侍儀之頃仰瞻

皇上對越肅雍跬步必謹而尋常蒞事亦推求精到此敬慎之美德也而辨之不早其流弊爲瑣碎是不可不預防人臣事君

禮儀固貴周詳然苟非朝祭大典難保一無疏失自去歲以來步趨失檢廣林以小節被參道旁叩頭福濟麟魁以小節被參內廷接

駕明訓以微儀獲咎都統暫署惠豐以微儀獲咎在

皇上僅予譴罰初無苛責之意特恐臣下誤會風旨或謹於小而反忽於大且有謹其所不必謹者行禮有儀注古今通用之字也近來避

皇上之嫌名乃改爲行禮禮節朔望常服既經臣部奏定矣而去冬忽改爲貂褂

御門常服挂珠既經臣部奏定矣而初次忽改爲補褂以此等

爲尊

君皆於小者謹其所不必謹則於國家之大計必有疏漏而不暇深求者矣夫所謂國家之大計果安在哉卽如廣西一事其大者在位置人才其次在審度地利又其次在慎重軍需今發往廣西人員不爲不多而位置之際未盡妥善姚瑩年近七十曾立勲名宜稍加以威望令其參贊幕府若泛泛差遣委用則不能收其全力嚴正基辦理糧臺而位卑則難資彈壓權分則易致牽掣夫知之而不用與不知同用之而不盡與不用同諸將旣多亦宜分爲三路各有專責中路專辦武宣大股西路分辦泗鎮南太東路分辦七府一州至於地利之說則

欽差大臣宜駐劄橫州乃可以策應三路糧臺宜專設梧州銀米由湖南往者暫屯桂林以次而輸於梧由廣東往者暫屯肇慶以次而輸於梧則四方便於支應而寇盜不能劫掠今軍興一載外間既未呈進地圖規畫全勢而

內府有康熙輿圖乾隆輿圖亦未聞樞臣請出與

皇上熟視審計至於軍需之說則捐輸之局萬不可開於兩粵捐生皆從軍之人捐資皆借湊之項展轉挪移仍於糧臺乎取之此三者皆就廣西而言今日之大計也即使廣西無事而凡爲臣子者亦皆宜畱心人材亦皆宜講求地利亦皆宜籌畫國計圖其遠大卽不妨略其細微漢之陳平高祖不問以決獄

唐之房杜太宗惟責以求賢誠使我

皇上豁達遠觀罔苛細節則爲大臣者不敢以小廉曲謹自恃不敢以尋行數墨自取竭蹶必且穆然深思求所以宏濟於艱難者臣所謂防瑣碎之風其道如此又聞

皇上萬幾之暇頤情典籍游藝之末亦法前賢此好古之美德也而辨之不細其流弊徒尙文飾亦不可不預防自去歲求言以來豈無一二嘉謨至計究其歸宿大抵皆以無庸議三字了之間有特被

獎許者

手詔以褒倭仁未幾而疏之萬里之外

優旨以答蘇廷魁未幾而斥爲亂道之流是鮮察言之實意徒飾納諫之虛文自道光中葉以來朝士風氣專尚浮華小楷則工益求工試律則巧益求巧翰詹最優之途莫如

兩書房行走而保薦之時但求工於小楷者閣部最優之途莫如軍機處行走而保送之時但取工於小楷者衡文取士大典也而考差者亦但論小楷試律而不復計文義之淺深故臣常謂欲人才振興必使士大夫考古來之成敗討

國朝之掌故而力杜小楷試律工巧之風乃可以崇實而黜浮去歲奏開日講意以人臣陳說古今於黼座之前必不敢不研求實學蓋爲此也今

皇上於軍務倥傯之際仍舉斯典正與康熙年三藩時相同然非從容

召見令其反覆辨說恐亦徒飾虛文而無以考核人才目前之時務雖不可妄議

本朝之成憲獨不可稱述乎

皇上於外官來京屢次

召見詳加考核今日之翰詹卽異日之督撫司道也甫脫乎小楷試律之間卽與以兵刑錢穀之任又豈可但觀其舉止便捷語言圓妙而不深究其真學真識乎前者臣工奏請刊布

御製詩文集業蒙

允許臣考

高宗文集刊布之年

聖壽已二十有六

列聖文集刊布之年皆在三十四以後

皇上春秋鼎盛若稍遲數年再行刊刻亦足以昭

聖度之謙冲且明示天下以敦崇實政不尙虛文之意風聲所被必有樸學興起爲

國家任棟梁之重

臣

所謂杜文飾之風其道如此

臣

又聞

皇上娛神淡遠恭己自怡曠然若有天下而不與焉者此廣大之美德也然辨之不精亦恐厭薄恆俗而長驕矜之氣尤不可

以不防去歲求言之

詔本以用人與行政并舉乃近來兩次

諭旨皆曰黜陟大權朕自持之在

皇上之意以爲中無纖毫之私則一章一服皆若奉天以命德
初非自執己見豈容臣下更參末議而不知天視自民視天聽
自民聽

國家設立科道正民視民聽之所寄也

皇上偶舉一人軍機大臣以爲當左右皆曰賢未可也

臣等九

卿以爲當諸大夫皆曰賢未可也必科道百僚以爲當然後爲
國人皆曰賢黜陟者

天子一人持之是非者

天子與普天下人共之

宸衷無纖毫之私可以謂之公未可謂之明也必國人皆曰賢乃合天下之明以爲明矣古今人情不甚相遠大率戇直者少緘默者多

皇上再三誘之使言尙且顧忌濡忍不敢輕發苟見皇上一言拒之誰復肯干犯

天威如禧恩之貪黷曹履泰之汙鄙前聞物論紛紛久之竟寂無彈章安知非畏雷霆之威而莫敢先發以取罪哉自古之重直臣非特使彼成名而已蓋將借其藥石以折人主驕侈之萌

培其風骨養其威稜以備有事折衝之用所謂疾風知勁草也
若不取此等則必專取一種諧媚輭熟之人料其斷不敢出一
言以逆耳而拂心而稍有鋒鋷者必盡挫其勁節而銷鑠其剛
氣一旦有事則滿庭皆疲茶沓泄相與袖手一籌莫展而後已
今日

皇上之所以使賽尙阿視師者豈不知千金之弩輕於一發哉
蓋亦見在廷他無可恃之人也夫平日不儲剛正之士以培其
風骨而養其威稜臨事安所得人才而用之哉目今軍務警報
運籌於

一人取決於俄頃

皇上獨任其勞而臣等莫分其憂使廣西而不遽平固中外所同慮也然使廣西遽平而

皇上意中或遂謂天下無難辦之事眼前無助我之人此則一

念驕矜之萌尤微臣區區所大懼也昔禹戒舜曰無若丹朱傲

周公戒成王曰無若殷王受之迷亂舜與成王何至如此誠恐

一念自矜則直言曰覺其可憎佞諛曰覺其可親流弊將靡所

底止臣之過慮實類乎此此三者辨之於早祇在幾微之間若

待其弊既成而後挽之則難爲力矣臣謬玷卿陪幸逢

聖明在上何忍不竭愚忱以仰裨萬一雖言之無當然不敢激

切以沽直聲亦不敢唯阿以取容悅伏惟

聖慈垂鑒謹

奏

魏和

美

謝署刑部左侍郎 恩疏 咸豐元年五月二十七日

奏爲恭謝

天恩事本月二十六日內閣奉

上諭刑部左侍郎王植未到任以前著曾國藩兼署欽此竊臣材本疏庸識尤淺陋無朱雲之廉正徒學其狂乏汲黯之忠誠但師其戇荷

鴻慈之曲被極

聖量之優容清夜默思果有何德堪對

君父寸心自矢要當竭愚以答

生成感激正深悚惶無已乃復仰荷

恩綸俾攝今職實天良之難昧聞

寵命而若驚惟有進思退思無荒無怠雖駑駘十駕斷難收追
風逐日之功而鼇戴三山豈不知厚地高天之

德所有

微臣

感激下忱謹繕摺恭謝

天恩伏乞

皇上聖鑒謹

奏

備陳民間疾苦疏

咸豐元年十二月十八日

奏爲備陳民間疾苦仰副

聖主愛民之懷事

臣

竊惟國貧不足患惟民心渙散則爲患甚

大自古莫富於隋文之季而忽致亂亡民心去也莫貧於漢昭之初而漸致乂安能撫民也我

朝康熙元年至十六年中間惟一年無河患其餘歲歲河決而新莊高堰各案爲患極鉅其時又有三藩之變騷動九省用兵七載天下財賦去其大半府藏之空虛殆有甚於今日卒能金甌無缺寰宇清謐蓋

聖祖愛民如傷民心固結而不可解也我

皇上愛民之誠足以遠紹

前徽特外間守令或玩視民瘼致

聖主之德意不能達於民而民間之疾苦不能訴於上臣敢一縷陳之一曰銀價太昂錢糧難納也蘇松常鎮太錢糧之重甲於天下每田一畝產米自一石五六斗至二石不等除去佃戶平分之數與抗欠之數計業主所收牽算不過八斗而額征之糧已在二斗內外兌之以漕斛加之以幫費又須去米二斗計每畝所收之八斗正供已輸其六業主只獲其二耳然使所輸之六斗皆以米相交納則小民猶爲取之甚便無如收本色者少收折色者多即使漕糧或收本色而幫費必須折銀地丁

必須納銀小民力田之所得者米也持米以售錢則米價苦賤而民怨持錢以易銀則銀價苦昂而民怨東南產米之區大率石米買錢三千自古迄今不甚懸遠昔日兩銀換錢一千則石米得銀三兩今日兩銀換錢二千則石米僅得銀一兩五錢昔日賣米三斗輸一畝之課而有餘今日賣米六斗輸一畝之課而不足

朝廷自守歲取之常而小民暗加一倍之賦此外如房基如墳地均須另納稅課准以銀價皆倍昔年無力監追者不可勝計州縣竭全力以催科猶恐不給往往委員佐之吏役四出晝夜追比鞭朴滿堂血肉狼籍豈皆酷吏之爲哉不如是則考成不

及七分有參劾之懼賠累動以巨萬有子孫之憂故自道光十五年以前江蘇尙辦全漕自十六年至今歲歲報歉年年蠲緩豈昔皆良而今皆刁蓋銀價太昂不獨官民交困

國家亦受其害也浙江正賦與江蘇大略相似而民愈抗延官愈窮窘於是有截串之法截串者上忙而預徵下忙之稅今年而預截明年之串小民不應則稍減其價招之使來預截太多缺分太虧後任無可復征雖循吏亦無自全之法則貪吏愈得藉口魚肉百姓巧誅橫索悍然不顧江西湖廣課額稍輕然自銀價昂貴以來民之完納愈苦官之追呼亦愈酷或本家不能完則鎖拏同族之殷實者而責之代納甚者或鎖其親戚押其

鄰里百姓怨憤則抗拒而激成巨案如湖廣之未陽崇陽江西之貴溪撫州此四案者雖閭閻不無刁悍之風亦由銀價之倍增官吏之浮收差役之濫刑真有日不聊生之勢臣所謂民間之疾苦此其一也二曰盜賊太眾良民難安也廬鳳潁毫一帶自古爲羣盜之藪北連豐沛蕭碭西接南汝光固此皆天下腹地一有嘯聚患且不測近聞盜風益熾白日劫淫捉人勒贖民不得已而控官官將往捕先期出示比至其地牌保輒詭言盜遁官吏則焚燒附近之民房示威而後去差役則訛索事主之財物滿載而後歸而盜實未遁也或詭言盜死斃他囚以抵此案而盜實未死也案不能雪贓不能起而事主之家已破矣吞

聲飲泣無力再控卽使再控幸得發兵會捕而兵役平日皆與盜通臨時賣放泯然無迹或反借盜名以恐嚇村愚要索重賄否則指爲盜夥火其居而械繫之又或責成族鄰勒令縛盜來獻直至縛解到縣又復索收押之費索轉解之資故凡盜賊所在不獨事主焦頭爛額卽最疏之戚最遠之鄰大者蕩產小者株繫比比然也往者嘉慶川陝之變盜魁劉之協者業就擒矣太和縣役賣而縱之遂成大亂今日之劣兵蠹役豢盜縱盜所在皆是每一念及可爲寒心臣在刑部見疏防盜犯之稿曰或數十件而行旅來京言被劫不報報而不准者尤不可勝計南中會匪名目繁多或十家之中三家從賊良民逼處其中心知

其非亦姑且輸金錢備酒食以供盜賊之求而買旦夕之安臣
嘗細詢州縣所以諱盜之故彼亦有難焉者蓋初往跣緝有拒
捕之患解犯晉省有搶奪之患層層勘轉道路數百里有繁重
之患處處需索解費數百金有賠累之患或報盜而不獲則按
限而參之或上司好粉飾則目爲多事而斥之不如因循諱飾
反得晏然無事以是愈釀愈多盜賊橫行而良民更無安枕之
日臣所謂民間之疾苦此又其一也三曰冤獄太多民氣難伸
也臣自署理刑部以來見京控上控之件奏結者數十案咨結
者數百案惟河南知府黃慶安一案密雲防禦阿祥一案皆審
係原告得實水落石出此外各件大率皆坐原告以虛誣之罪

而被告者反得脫然無事其科原告之罪援引例文約有數條
或曰申訴不實杖一百或曰驀越進京告重事不實發邊遠軍
或曰假以建言爲由挾制官府發附近軍或曰挾嫌誣告本管
官發煙瘴軍又不敢竟從重辦也則曰懷疑誤控或曰訴出有
因於是有收贖之法有減等之方便原告不曲不直難進難退
庶可免於翻控而被告則巧爲解脫斷不加罪夫以部民而告
官長誠不可長其刁風矣若夫告奸吏舞弊告蠹役詐贓而謂
案案皆誣其誰信之乎卽平民相告而謂原告皆曲被告皆直
又誰信之乎

聖明在上必難逃洞鑒矣

臣

考定例所載民人京控有提取該

省案卷來京核對質訊者有交替撫審辦者有

欽派大臣前往者近來概交替撫審辦督撫發委首府從無親提之事首府爲同寅彌縫不問事之輕重一概磨折恫喝必使原告認誣而後已風氣所趨各省皆然一家久訟十家破產一人沈寃百人含痛往往有纖小之案累年不結顛倒黑白老死囹圄令人聞之髮指者

臣所謂民間之疾苦此又其一也此三者皆目前之急務其盜賊太眾寃獄太多二條求

皇上申諭外省嚴飭督撫務思所以更張之其銀價太昂一條必須變通平價之法

臣謹據管見另擬銀錢並用章程一摺續

行人奏國以民爲本百姓之顛連困苦苟有纖毫不得上達皆

臣等之咎也區區微誠伏乞

聖鑒謹

奏

平銀價疏

咸豐元年十二月十九日

奏爲貴錢賤銀以平銀價而甦民困事臣於本月陳奏民間疾苦一疏聲明銀價太昂另摺具奏思所以變通之竊惟十年以來中外臣工奏疏言錢法者前後不下十餘人皆思貴錢賤銀以挽積重之勢而臣所深服者惟二十四年吳文鎔一疏二十五年劉良駒一疏二十六年朱嶠一疏此三疏者皆奉旨交軍機大臣會同戶部議奏戶部又交各省議覆旋以外間覆奏議論不一此事停閣不行臣反覆思維民生切害之痛國計日絀之由實無大於此者謹就三臣原奏所及參以管見擬爲銀錢並用章程數條伏候

聖鑒

奏稿卷一

聖

一部定時價每年一換也凡民間銀錢之貴賤時價之漲落早晚不同遠近亦異若官收官放而不定一確鑿之價則民間無所適從胥吏因而舞弊查吳文鎔原奏內稱照各省時價由藩司酌定於開徵前十日頒示各屬朱嶠所奏與吳文鎔大略相同惟稱多不過一千七百少不過一千二百稍示限制而已劉良駒所奏則以爲由部酌中定價若捐輸案內以制錢一千五百文抵銀一兩之例厥後戶部議覆酌定每兩折錢一千五百文核准在案臣愚以爲時價可換二千若驟改爲一千五百以放兵餉則譁然矣應請部頒定酌每年一換如現在時價換一

千九百有奇部改爲一千八百則耳目不至乎大駭而官民皆得以相安明年時價稍平則部價亦從而稍減令各省每年奏報銀價九月奏到戶部酌定明年之價於十月奏聞求

皇上明降

諭旨明年每銀一兩抵制錢若干文收之民者不許加分毫放之兵者不許加分毫窮鄉僻壤膽黃徧諭凡一切糧串田單契尾鹽照捐照等件概將本年銀價刻入海內皆知婦孺共曉堅如金石信如四時庶民不致生怨胥吏不能舞弊也其與官項全無交涉市肆漲落與部價不符仍置不問至現在八旗搭放兵餉每兩抵錢一千文外省搭放兵餉每兩抵錢千數百文不

等不足以昭畫一應俟新章定後概從每年所定部價以免參差

一京外兵餉皆宜放錢也查劉良駒原奏兵餉分成放錢吳文鎔則言外省之兵概放錢文朱嶧一摺於兵餉尤爲詳細其說以爲京營分建東西兩庫東四旗兵赴東庫領錢西四旗兵赴西庫領錢外省之錢則分道庫府庫存貯省標城守之兵由藩司支放外標外營之兵由藩司發帖持向各道府廳州支領臣愚以爲朱嶧之說實屬可行凡兵丁領銀之後皆須換錢而後適用應請嗣後八旗兵餉皆各平分一半仍放銀兩一半搭放錢文其外省綠營一概放錢各州縣所收錢文有道員處解存

道庫無道員處解存府庫無知府處解存直隸州廳庫由藩司發帖持向各處支領庶錢無解省累重之煩而兵丁無減平剋扣之苦至駐防各兵仍舊放銀以免紛更

一部庫入項亦可收錢也查戶部所收各項惟井田科之旗租捐納房之常捐係京庫坐收之款此外皆由各省解運來京劉良駒原奏內稱常捐銀兩儘可收錢朱嶠奏內稱長蘆鹽價可解錢以充京餉臣愚以爲不特此也旗租銀兩本係近京小民佃種其所納皆係錢文官爲易銀轉費周折不若卽令解錢入京常捐大捐之銀亦可酌收錢文計此二項每年可得百餘萬串至於外省解京之款如長蘆山東鹽課儘可解錢進京直隸

山東地丁起運之項亦可運錢應令此二省督撫每年各解錢百萬串入京又令兩淮鹽運使每年解錢二百萬串入京合之京局鼓鑄之錢共得六百餘萬串足以資運轉矣臣雖至愚豈不知錢質笨重搬運艱難然不行天下至難之事不足挽天下積重之勢大利所在未可以小小窒礙輒畏難而苟安也且較之滇黔之銅鉛江廣之漕糧難易相去懸遠矣其解錢之官須照銅員之例量與津貼之費務使毫無賠累官兵稱便共計幫費不過二三萬金所失無幾而所轉移者大矣

一地丁正項分縣收錢也凡出項莫大於兵餉入項莫大於地丁查吳文鎔劉良駒朱嶠三臣摺內皆極言地丁收錢之益臣

愚以爲當分縣辦理如雲貴川廣閩蜀甘肅此七省者本省之
丁賦不足充本省之兵餉初無起解之項其地丁銀兩應卽全
數收錢以省轆轤此外各省除去存留及兵餉二項尙有餘銀
解運京庫協濟鄰省者其地丁銀兩應令一兩以下小戶全數
收錢一兩以上大戶銀錢各半兼收不必按成指派不必分析
名目使小民易知易從其或患收錢太多不便起運者州縣自
行換銀解省以備京款協款之用

一外省用項分別放錢也查各省廉俸工需役食等項名曰存
留坐支之款前吳文鎔劉良駒朱嶧三摺及戶部議覆一摺皆
言此項可全行放錢應卽遵照辦理至兩河經費劉良駒朱嶧

及戶部三摺皆言可搭成用錢臣聞從前林則徐在汴工目前
陸建瀛在豐工皆令遠近州縣輦錢到工以防市價居奇銀價
驟跌之患東河捐輸案內曾令以錢報捐是河工在在需錢其
理易明應請嗣後南河每年解錢百萬串到工於兩淮鹽課江
蘇地丁項下各半分解東河每年解錢五十萬串到工於河南
山東地丁項下各半分解

一量減銅運以昂錢價也查朱嶧原奏內稱暫停鼓鑄一弛一
張庶錢重而價漸平臣愚以爲鑄不可停而運不可不減側聞
雲南銅務洞老山空民怨官困滇銅不足搜買外省外省不足
儉買寶局實有萬不能繼之勢應請於六運中酌量停一二運

使雲南官民稍紓積困其銅本一項即可採買錢文並可於鑪頭匠役量加優恤以期鑄造堅好庶錢質日精錢價日起俟十年後滇厥稍旺再復六運各停鑪之省亦漸次開卯務使天下官民皆知錢之可貴而不知輦運之苦則相安無事庶不終受紋銀出洋之苦矣

以上六條皆就吳文鎔劉良駒朱嶧三臣奏議參以鄙意粗定規模伏求

飭下戶部妥議抄錄三臣原奏進呈備

聖明採擇施行謹

奏

奏
稿
卷
一

五

謝署吏部左侍郎 恩疏 咸豐二年正月二十五日

奏爲恭謝

天恩事本月二十四日內閣奉

上諭吏部左侍郎著曾國藩兼署欽此竊臣材本疏庸識尤淺

陋秩宗襄事愧典禮之未嫻司寇攝官更刑名之莫晰迺復仰

荷

恩綸兼權吏部自維愚昧深懼弗勝惟當勤慎自持涓埃勉效

凡事必求其實常存此冰淵惕厲之懷片念不敢自欺冀無負

君父生成之德所有微臣感激下忱謹繕摺恭謝

天恩伏乞

皇上聖鑒謹

奏

奏稿

五

請寬勝保處分疏

咸豐二年四月初五日

奏爲請寬處分以昭

特恩而廣言路事本月初三日吏部奏勝保撤回奏章處分一摺奉

旨照部議降三級調用

皇上於其條陳事務意存諷諫不加譴責於其遞事撤回有違定例則特加謫罰二者原並行而不悖也惟念當此

特詔求言之時又值傳

旨詰問之際兩端雖不相涉而其情實則相因在

聖意因其違例而示懲在輿論疑其直言而獲咎是適足以成

勝保之名而反有累於吾

君之德

臣

與勝保雖曾相識而素非親善此次條奏

臣

尙未見

邸鈔第觀

諭旨中所指各條似亦戇直犯顏無貪位保祿之見卽其所稱市井細民私議

主德者經此次

諭旨一一剖晰宣示亦足以息悠悠之口而使士大夫盡釋前疑曉然於民間訛言之不足信是

天質堅白經磨涅而益彰勝保此奏正所以顯揚

聖德而靖絕浮言也卽使因他事獲咎猶望

曲賜矜宥况卽因此奏而陷於大戾乎臣昨在吏部見烏蘭泰
向榮賽尙阿革職降級處分皆蒙

恩改而從輕蓋恪遵定例者臣守法之常經特從

寬宥者

皇上用人之微權臣之愚蒙欲求

皇上於勝保亦示以微權稍寬處分則凡進言者皆感戴浩蕩
之

恩而激發忠義之氣采納愈廣而時艱可拯矣是否有當伏乞

聖鑒謹

奏

卷之九

五

謝放江西正考官 恩摺 咸豐二年六月十三日

奏爲叩謝

天恩事本月十二日內閣奉

上諭江西正考官著曾國藩去欽此竊臣秉質庸愚未諳學術

曾持衡於西蜀又襄校於南宮沐養於

兩朝得幸躋乎九列毫無報稱時切悚惶茲復仰荷

恩綸俾持文柄自維淺陋深懼弗勝惟當以勤補拙藉公生明

采楨榦於大邦冀擷彭蠡匡廬之秀竭愚誠於方寸稍酬

高天厚地之恩所有微臣感激下忱謹繕摺恭謝

天恩伏乞

皇上聖鑒謹

奏

請假回籍省親片

咸豐二年六月十三日

再臣自道光十九年來京供職迄今十有四年未經告假省親

又未能迎養頃因粵匪竄入湖南臣家鄰近衡陽辦理團練各

鄉警懼臣念切桑梓烏烏私情日夜懸懸茲幸仰沐

天恩奉使江西伏查由江西袁州一路至臣家程途不過八日

謹援上年呂賢基何彤雲之例仰懇

皇上天恩賞假二十日俾臣於九月發榜之後回籍省親合家

沾戴

皇恩實無既極如蒙

俞允臣即由長沙取道湖北還京不勝悚惕待

命之至謹附片請

旨

敬陳團練查匪大概規模摺

咸豐二年十二月二十二日

奏爲遵

旨幫辦團練查匪事務敬陳現辦大概規模仰祈

聖鑒事本月十三日准湖南巡撫咨稱承准軍機大臣字寄咸豐二年十一月二十九日奉

上諭前任丁憂侍郎曾國藩籍隸湘鄉聞其在籍其於湖南地方人情自必熟悉著該撫傳旨令其幫同辦理本省團練鄉民搜查土匪諸事務伊必盡力不負委任等因欽此又於十五日接巡撫函稱武昌省城被賊攻陷聞信之下不勝憤憾賊勢猖獗如此於大局關係匪輕念我

皇上宵旰南顧不知若何焦灼

臣雖不才亦宜勉竭愚忠稍分

君父之憂卽於十七日由家起程二十一日馳抵省城與撫

面商一切相對感歎伏惟

聖諭團練鄉民一節誠爲此時急務然團練之難不難於操習

武藝而難於捐集費貲小民倚財爲命卽苦口勸諭猶遲疑而

不應若經理非人更譁然而滋擾非比嘉慶川楚之役官給練

費不盡取之民也

臣此次擬訪求各州縣公正紳耆以書信勸

諭使之董理其事俾百姓知自衛之樂而不復以捐貲爲苦庶

幾有團練之實效而無擾累之流弊至

聖諭搜查土匪一節前月撫

臣

張亮基曾有一札嚴飭各州縣

查拏土匪痞棍令州縣力能捕者自捕之力不能者專丁送信
至撫臣署內設法勦辦現在各州縣遵札辦理屢破巨案業有
成效臣又以信諭紳耆令其畱心查察本團之匪徒斷不能掩
本團紳耆之耳目紳耆密告州縣州縣密告撫臣卽日派人勦
捕可期無案不破抑臣又有請者逆匪旣破武昌凶燄益熾如
湖南安徽江西毗連之省皆爲其所窺伺長沙重地不可不嚴
爲防守臣現來省察看省城兵力單薄詢悉湖南各標兵丁多
半調赴大營本省行伍空虛勢難再調附近各省又無可抽調
之處不足以資守禦因於省城立一大團認真操練就各縣曾
經訓練之鄉民擇其壯健而樸實者招募來省練一人收一人

之益練一月有一月之效自軍興以來二年有餘時日不爲不
久糜餉不爲不多調集大兵不爲不眾而往往見賊逃潰未聞
有與之鏖戰一場者往往從後尾追未聞有與之攔頭一戰者
其所用兵器皆以大礮鳥鎗遠遠轟擊未聞有短兵相接以槍
鈚與之交鋒者其故何哉皆由所用之兵未經練習無膽無藝
故所向退怯也今欲改絃更張總宜以練兵爲要務臣擬現在
訓練章程宜參訪前明戚繼光近人傅鼐成法但求其精不求
其多但求有濟不求速效誠能實力操練於土匪足資剿捕卽
於省城防守亦不無裨益臣與撫臣熟商意見相同謹將現辦
情形敬陳大概伏乞

皇上聖鑒訓示謹

奏

硃批知道了悉心辦理以資防剿欽此

7

附陳辦團稍有頭緒卽乞守制片

咸豐二年十二月二日

臣在京師十有四年往年入京供職之時臣之祖父母及父

母皆在堂今歲歸來祖父祖母之墓已有宿草臣母亦沒其時

長沙尙未解圍風鶴警報晝夜驚惶卽將母棺倉卒權厝尙思

另尋葬地稍展孝思臣父已老久別乍歸亦思稍盡定省之儀

今回籍未滿四月遽棄庭闈出而蒞事不特臣心萬分不忍卽

臣父亦慈愛難離而以武昌警急

宵旰憂勞之時又不敢不出而分任其責再四思維以墨經而

保護桑梓則可若遂因此而奪情出仕或因此而仰邀

恩敘則萬不可區區愚衷不得不預陳於

聖主之前一俟賊氛稍息團防之事辦有頭緒卽當專摺陳情
回籍守制烏烏之私伏乞


聖上矜全所有

微臣

下情謹附片奏

聞

硃批另有旨欽此



PL
2728
1.01
1876
1.3

曾文正公奏稿

卷之二目錄

嚴辦土匪以靖地方摺

咸豐三年二月十二日

會奏特參副將清德摺

六月十二日

拏匪正法并現在幫辦防堵摺

全日

保參將塔齊布千總諸殿元摺

全日

請將副將清德交刑部治罪片

移駐衡州摺

八月十三日

暫緩赴鄂并請籌備戰船摺

十月二十四日

請截畱粵餉籌備礮船片



籌備水陸各勇赴皖會剿俟粵省解礮到楚乃可成行摺

十一月二十六日

請提用湖南漕米片

請捐輸歸入籌餉新例片

瀝陳現辦情形摺

十二月二十一日

衡永一帶剿匪未畢摺

全日

釐正衡清兩縣保甲片

報東征起程日期摺

咸豐四年二月初二日

代遞唐樹義遺摺片

請派大員辦捐濟餉摺

二月十五日

畱胡林翼黔勇會剿片

賊蹤退出南省現駐岳州摺

三月初五日

請卹儲玖躬等摺

全日

岳州戰敗自請治罪摺

三月二十日

鄒國彪傷亡請卹片

探明前路賊蹤片

報崇通剿匪勝仗摺

三月二十二日

會奏湘潭靖港水陸勝負情形摺

四月十二日

靖港敗潰自請治罪摺

全日

保水陸統領各員片

恭謝 天恩摺

五月初八日

覆陳湘潭甯鄉靖港勝敗情形片

請提督塔齊布會合東下片

請單銜專摺奏事片

嚴辦土匪以靖地方摺

咸豐三年二月十二日

奏爲嚴辦土匪以靖地方恭摺奏

聞仰祈

聖鑒事正月初九日准湖南巡撫咨稱咸豐二年十二月三十日奉

上諭湖南籌辦撥兵募勇各事宜卽著責成張亮基潘鐸會同在籍侍郎曾國藩妥爲辦理欽此又於二月初一日准署理湖南巡撫咨稱咸豐三年正月初三日奉

上諭朕思除莠卽以安良卽有會匪地方亦莠民少而良民多封疆大吏惟當剪除白惡卽可保衛善良所有瀏陽攸縣各處

匪徒卽著該署督撫等認真查辦並著會同在籍侍郎會國藩
體察地方情形應如何設法團練以資保衛之處悉心妥籌辦
理等因欽此仰見我

皇上南顧焦慮無時或釋去年

臣初至省城撫

臣

張亮基調撥

湖南外營兵一千名招募湘鄉練勇一千名來省防禦至正月

初間粵匪東竄武昌業已收復長沙卽可解嚴署督

臣

張亮基

署撫

臣

潘鐸皆與

臣

商所有畱省之雲南河南各兵卽行分別

撤回新舊招募之勇亦卽分別裁汰共畱兵勇三千餘人已足

以資防守卽間有土匪竊發亦足以資剿辦至於團練一事

臣

前摺略陳大概曾言捐錢斂費之難近來博采輿論體察民情

知鄉團有多費錢文者亦有不必要多費錢文者併村結寨築牆建礮多製器械廣延教師招募壯士常操技藝此多費錢文民不樂從者也不併村落不立礮堡居雖星散聞聲相救不製旗幟不募勇士農夫牧豎皆爲健卒耰鋤竹木皆爲兵器此不必多費錢文民所樂從者也多費錢文者不免於擾累地方然以之禦粵匪則仍不足不必多費錢文者雖未能大壯聲勢然以之防土匪則已有餘今粵匪全數東下各縣鄉團專以查拏土匪爲主臣是以剴切曉諭令其異居同心互相聯絡不多費錢不甚勞力以冀百姓之鼓舞而聽從湖南會匪之多人所共知去年粵逆入楚凡入添弟會者大半附之而去然尙有餘孽未

盡此外又有所謂串子會紅黑會半邊錢會一股香會名目繁多往往成羣結黨嘯聚山谷如東南之衡永郴桂西南之寶慶靖州萬山叢薄尤爲匪徒卵育之區蓋緣近年有司亦深知會匪之不可遏特不欲其禍自我而發相與掩飾彌縫以苟且一日之安積數十年應辦不辦之案而任其延宕積數十年應殺不殺之人而任其橫行遂以釀成目今之巨寇今鄉里無賴之民囂然而不靖彼見夫往年命案盜案之首犯常逍遙於法外又見夫近年粵匪土匪之肆行皆猖獗而莫制遂以爲法律不足憑官長不足畏也平居造作謠言煽惑人心白日搶劫毫無忌憚若非嚴刑峻法痛加誅戮必無以折其不逞之志而銷其

逆亂之萌臣之愚見欲純用重典以鋤強暴但願良民有安生
之日卽臣身得殘忍嚴酷之名亦不敢辭但願通省無不破之
案卽勦辦有棘手萬難之處亦不敢辭署督臣張亮基署撫臣
潘鐸皆思嚴厲整頓力挽頽風時時相與籌商誓當盡除湖南
大小各會匪滌瑕去穢埽蕩廓清不敢稍畱餘孽以貽
君父之憂其匪徒較多之地如東南之衡永郴桂臣當往衡州
駐紮數月就近查辦西南之寶靖各屬臣當往寶慶駐紮數月
就近查辦所至常帶兵勇數百文武數員以資勦捕之用聯絡
本地之鄉團使之多覓眼線堵截要隘以一方之善良治一方
之匪類可期無巢不破無犯不擒此臣擬辦會匪之大概情形

也至於教匪盜匪與會匪事同一律三者之外又有平日之痞匪與近時新出之游匪何謂游匪逃兵逃勇奔竄而返無資可歸無營可投沿途逗畱隨處搶掠此游匪之一種也粵寇蹂躪之區財物罄空室廬焚燬弱者則乞丐近地强者則轉徙他鄉或乃會聚醜類隨從劫掠此游匪之一種也大兵紮營之所常有游手數千隨之而行或假充長夫或假冒餘丁混雜於買賣街中偷竊於支應局內迨大營既遠展轉流落到處滋擾此游匪之又一種也臣現在省城辦理街團於此三種游匪尤認真查拏遇有形跡可疑曾經搶掠結盟者卽用巡撫令旗恭請王命立行正法臣寓館設審案局派委妥員二人拏獲匪徒立

予嚴訊卽尋常痞匪如奸胥蠹役訟師光棍之類亦加倍嚴懲不復拘泥成例概以寬厚爲心當此有事之秋強弱相吞大小相侵不誅鋤其刁悍害民者則善良終無聊生之日不敢不威猛救時以求於地方有益所有

臣遵

旨會商撥兵募勇各事宜及現擬查辦匪徒規模謹陳大概伏求

皇上訓示至

臣

移駐衡寶各郡容俟長沙辦有頭緒另行專摺

奏請伏乞

聖鑒謹

奏

永利卷二
硃批知道了辦理土匪必須從嚴務期根株淨盡欽此

特參副將清德摺

咸豐三年六月十二日

奏爲特參庸劣武員請

旨革職以肅軍政而儆疲玩事竊維軍興以來官兵之退怯遷延望風先潰勝不相讓敗不相救種種惡習久在

聖明洞鑒之中推原其故總由平日毫無訓練技藝生疏心虛

膽怯所致湖南經去年賊匪圍城堅守八十餘日之久臣等懲

前愆後今年以來諳飭各營將弁認真操練三八則臣等親往

校閱餘日則將弁自行操閱惟長沙協副將清德性耽安逸不

遵訓飭操演之期該將從不一至在署偷閒養習花木今春由

岳州回省旋至常澧一帶查辦土匪所過地方雖經賊匪蹂躪

之區尙復需索供應責令所屬備弁購買花盆裝載船頭一切
營務武備茫然不知形同木偶現值粵賊竄逼江西楚省防堵
喫緊之際該將疲玩如此何以督率士卒相應請
旨將長沙協副將清德革職以勵將士而振軍威謹會同湖廣
總督臣張亮基恭摺參奏伏乞

皇上聖鑒訓示謹
奏

拏匪正法并現在幫辦防堵摺

咸豐三年六月十二日

奏爲搜拏匪徒隨時正法并現在幫辦防堵恭摺奏

聞仰祈

聖鑒事竊

臣奉

命搜查土匪曾於二月十二日具奏

臣

寓館設審案局派委妥

員二人拏獲匪徒訊明定供卽用巡撫令旗立行正法奏蒙

聖鑒在案維時已派准陞同知前署石門縣知縣劉建德在局
審案旋又添派准陞直隸州前任清泉縣知縣厲雲官輪流審
訊自上年粵匪竄逼長沙各處搶劫之案層見疊出臣設局以
來控告紛紛或簽派兵役緝拏或札飭紳士踴捕或著落戶族

勒令跟交或卽令事主自行擒縛一經到案訊明立予正法計
斬決之犯壹百肆名立斃杖下者貳名監斃獄中者叁拾壹名
此外札飭各州縣擒拏匪黨賁呈供摺批令無庸解省就地正
法者不在此數又如安化藍田串子會匪前經札飭湘鄉縣知
縣朱孫詒密往掩捕擒獲九十二名其陸續正法者俟結案後
另摺會奏亦不在此數雖用刑稍過於嚴峻而地方頗藉以安
靜臣受

命來省將及半年辦理各案粗有頭緒六月十二日爲臣母喪
初周年之期本擬奏明回籍敬修小祥之禮稍盡人子之心適
聞粵匪分股回竄江西業於十八日逼臨南昌省城湖南與之

壤地相接脣齒相依人心驚惶紛紛遷徙

臣受

恩深重明知賊逼鄰境斷不敢以事權不屬稍存推諉之見又何敢以軍旅未嫻陰懷畏蒞之心惟有殫竭愚忱晝夜不懈與撫臣襄辦一切或堅守省城或出堵要隘臣俱無所辭避除防堵事宜業經另摺會奏外謹附驛陳明伏乞

皇上聖鑒謹

奏

硃批知道了欽此

三和名

保參將塔齊布千總諸殿元摺咸豐三年六月十二日

奏爲武臣堪膺重任恭摺保奏仰祈

聖鑒事竊爲粵寇未滅土匪蠡起軍威不振餉項支絀當此之時求足以稍紓

君父之憂者蓋莫先於得人而得一文臣尤莫如得一武將臣到省以來畱心察訪大小將弁求其臨陣不怯爲士卒所信服者實難其人惟查有陞用遊擊署撫標中軍參將事塔齊布忠勇奮發習勞耐苦深得兵心臣今年在省操練常用該遊擊整頓營務臣每於三八日校閱該遊擊則日日常閱大約十日之中不過間斷二三日軍士皆樂爲之用又有准補千總武舉諸

殿元精明廉謹膽勇過人管帶辰勇百人操練日久各有兼人之藝塔齊布統領辰勇與該武舉同心努力皆思盡忠報効謹將二人履歷開單進

呈伏乞

皇上天恩破格超擢當湖南防堵喫緊之際獎拔一人冀以鼓勵眾心如該二人日後有臨陣退縮之事卽將微臣一併治罪除因案保敘各員由撫臣另行會奏外臣謹具摺密保區區愚

忱伏乞

聖鑒謹

奏

請將副將清德交刑部治罪片

咸豐三年六月十二日

再長沙協副將清德性耽安逸不理營務去年九月十八日賊匪開挖地道轟陷南城人心驚惶之時該將自行摘去頂戴藏匿民房所帶兵丁脫去號褂拋棄滿街至今傳爲笑柄今春該將自岳州回省旋至常澧一帶查辦土匪所過地方雖經賊匪蹂躪之區尙復苛索供應責令各屬備弁購買花盆裝載船頭臣到省半年每逢三八之期督率弁兵齊集校場操閱該將並未到過一次實出情理之外臣面商撫臣駱秉章函商督臣張亮基本擬會參請

旨將該將革職惟思此等惡劣將弁僅予革職不足蔽辜現在

逆匪圍逼南昌湖南已調兵數百擬往救援臣兩次接江忠源書函囑添募楚勇三千現已次第募到擬令陞任知縣朱孫詒及江忠源之弟江忠濬等管帶於日內起行星馳赴援湖南本省防堵亦在十分喫緊之際惟將士畏葸疲玩已成錮習勸之不聽威之不懼竟無可以激厲之術相應請

旨將長沙協副將清德革職解交刑部從重治罪庶幾懲一儆百稍肅軍威而作士氣臣痛恨文臣取巧武臣退縮致釀今日之大變是以爲此激切之請若臣稍懷私見求

皇上嚴密查出治臣欺罔之罪謹

奏

移駐衡州摺

咸豐三年八月十三日

奏爲

微臣

移駐衡州恭摺具奏仰祈

聖鑒事竊

臣奉

命查辦土匪惟衡永郴桂尤爲匪徒聚集之藪擬駐紮衡州就近搜捕曾於二月十二日奏明在案數月之間四屬匪徒屢次滋擾如常甯有白沙堡之案衡山有草市之案永興有獅子寨之案安仁有焚燒衙署之案桂東有縣城失守戕害把總之案宜章臨武有廣東匪徒滋擾之案永明江華有廣西匪徒竄入戕害千總之案均經次第撲滅先後具奏昨七月二十七日又有廣東土匪竄入興甯縣城經候補縣丞王鑫管帶湘勇於二

十九日收復立即撲滅尚未查明具奏此外四屬中聚眾倡亂搶劫拒捕爲案甚多未及一一上瀆

聖聰皆由上年粵匪經過衡永郴桂一帶裹脅最眾或久授僞職或飽掠潛歸以致莠民構煽甘心從逆動輒貼粵匪之僞示張太平之逆旗甚至乞兒偷盜三五成羣亦敢倡言謀亂毫無忌憚若非痛加誅鋤隨時整頓則禍患將無了日

臣前與撫臣

熟商曾調三廳兵數百駐防永州一帶札湘鄉勇數百駐防郴桂一帶臣擬即日移駐衡州以便就近調遣將現練之勇酌帶前往逐日操演一聞土匪蠢動立時掩捕撲滅愈速則糜費愈少即尋常痞匪劫盜亦仍逐案懲辦以期根株淨絕四境安恬

至省城防堵事宜江西與湖南交界之區共有四路相通北爲平江通義甯州之路南爲茶攸通吉安府屬之路中間二路一爲瀏陽通瑞州上高一爲醴陵通袁州萍鄉現在瀏醴二路已派兵勇防守隘口北路去賊蹤尙遠惟南路茶攸一帶與吉安府屬之安福永新緊接目下土匪竄擾吉安茶攸去長沙較遠去衡州甚近臣到衡時急宜設法堵禦以防土匪勾引乘虛竄入商之撫臣意見相合其省城守備經撫臣等悉心籌畫尙屬布置周妥堪以仰慰

宸厯所有

微臣

移駐衡州緣由謹繕摺由驛三百里具奏伏乞

皇上聖鑒謹

奏

奏和

暫緩赴鄂并請籌備戰船摺

咸豐三年十一月二十四日

奏爲武昌現已解嚴微臣暫緩赴鄂并請籌備戰船合力堵剿

恭摺奏

聞仰祈

聖鑒事十月十七日准湖南巡撫咨稱承准軍機大臣字寄十

月初三日奉

上諭前因江西賊匪竄擾湖北逼近武昌省城當經諭令駱秉章曾國藩派撥兵勇船礮駛赴下游會剿諒已遵照籌辦矣現在台湧所帶官兵及咨調江西官兵未知何日趕到武昌兵單實恐不敷剿捕曾國藩團練鄉勇甚爲得力剿平土匪業經著

有成效著卽酌帶練勇馳赴湖北合力圍攻以助兵力之不足
所需軍餉等項著駱秉章籌撥供支兩湖唇齒相依漢黃一帶
尤爲豫省門戶該撫等自應不分畛域一體統籌也將此由六
百里諭令知之欽此遵

旨寄信前來臣正具摺覆奏間旋於二十日又准湖南巡撫咨
稱承准軍機大臣字寄咸豐三年十月初五日奉

上諭昨因武昌兵單不敷勦辦諭令曾國藩卽酌帶練勇馳赴
湖北并著駱秉章籌撥軍餉諒該撫等接奉諭旨卽遵照辦理
矣本日據江忠源唐樹義馳奏田家鎮兵潰之後賊匪連陷黃
州漢陽賊船現又上駛武昌被圍現在收集殘兵先援漢陽等

語武昌省垣情形萬分危急江忠源尙須先赴漢陽以圖收復
未能卽抵武昌現已諭令吳文鎔等悉力堅守并令台湧卽日
撥兵前往救援第兵力仍虞單弱著曾國藩遵照前旨趕緊督
帶兵勇船礮駛赴下游會剿以爲武昌策應所需軍餉等項著
駱秉章卽設法供支以資接濟毋稍延誤將此由六百里加緊
諭令知之欽此遵

旨寄信前來

臣

前奉派兵救援湖北之

旨卽經函商撫

臣

派令候補知府張永實候選同知王金管帶

湘勇三千前赴湖北尙未起行又奉兩次

諭旨令

臣

親帶練勇前往

臣

理應遵

旨卽日起程惟連日接准撫臣來函及各處探報均稱賊船於十月初五以後陸續開赴下游近已全數下竄漢陽府縣業經收復江面肅清武昌解嚴等語據此則援鄂之師自可稍緩因思該匪以舟楫爲巢穴以擄掠爲生涯千舸百艘遊弈往來長江千里任其橫行我兵無敢過而問者前在江西近在湖北凡傍水之區城池莫不殘毀口岸莫不蹂躪大小船隻莫不擄掠皆由舟師未備無可如何兵勇但保省城亦不暇兼顧水次該匪飽掠而去總未大受懲創今若爲專保省會之計不過數千兵勇卽可堅守無虞若爲保衛全楚之計必須多備礮船乃能堵剿兼施夏間奉到

寄諭飭令兩湖督撫籌備舟師經署督臣張亮基造船運礮設
法興辦尙未完備忽於九月十三日田家鎮失守一切戰船礮
位盡爲賊有水勇潰散收合爲難現在兩湖地方無一舟可爲
戰艦無一卒習於水師今若帶勇但赴鄂省則鄂省已無賊矣
若馳赴下游則賊以水去我以陸追曾不能與之相遇又何能
痛加攻剿哉再四思維總以辦船爲第一先務臣現駐衡州卽
在衡城試行趕辦湖南木料薄脆船身笨重本不足以爲戰艦
然就地興工急何能擇止可價買民間釣鈎小艚之類另行改
造添置礮位教練水勇如果舟師辦有頭緒卽行奏明臣親自
統帶駛赴下游目下武昌無賊臣赴鄂之行自可暫緩未敢因

諭旨嚴催稍事拘泥不特臣不必遽去臣與撫臣商派援鄂之湘勇三千亦可暫緩起程行軍三千月費將近二萬南省雖勉強應付鄂省實難於供支不能不通盤籌畫臣已咨明撫臣飭令帶勇之張丞實王鑫無庸起行如使礮船尚未辦齊逆船仍復來鄂則由臣商同督撫隨時斟酌仍專由陸路先行赴援斷不敢有誤事機軍情變幻須臾百出如有萬分緊急之處雖不奉

君父之命亦當星馳奔救如值可以稍緩之時亦未可輕於一行虛糜餉項所有微臣暫緩赴鄂并籌備戰船緣由恭摺由驛五百里復奏伏乞

皇上聖鑒訓示謹

奏

硃批所慮俱是汝能斟酌緩急甚屬可嘉欽此

非所國是則謂之亂
國是謂之亂
國是謂之亂

請截畱粵餉籌備礮船片

咸豐三年十月二十四日

再籌備礮船召募水勇約需銀十餘萬兩湖南藩庫僅存銀三萬餘兩實屬不敷供支查有廣東解往江南大營餉銀十餘萬現畱長沙因鄂省梗阻未敢前進臣咨商撫臣卽將此項截畱四萬兩作爲籌備礮船之費其有不敷由臣設法勸捐添湊前七月間

諭旨令兩湖籌辦礮船奉部撥粵餉二十萬兩解赴湖北作爲水師之需不知此項曾否運解到鄂若尙未解到將來廣東解鄂之款卽將此次預截之四萬兩劃清扣抵兩湖辦船本屬一氣其用項自可歸併一款如前項粵餉業已解鄂應請

旨飭下戶部查照另撥四萬兩補解大營實於公事有裨謹附

片具

奏

硃批戶部查照辦理欽此

籌備水陸各勇赴皖會剿俟粵省解礮到楚乃可成行摺

咸豐三年十一月二十六日

奏爲籌備水陸各勇馳赴安徽會剿俟右江道張敬脩解礮到楚乃可成行恭摺覆奏仰祈

聖鑒事十一月二十三日兵部遞到承准軍機大臣字寄咸豐三年十一月十二日奉

上諭本日據宋晉奏會國藩鄉望素孚人皆樂爲效用請飭挑選練勇雇覓船隻順流東下與江忠源水陸夾擊速殄賊氛等語前因湖北緊要諭令該侍郎督帶楚勇駛出洞庭湖迎頭截剿旋據該侍郎奏稱武昌現已解嚴擬暫緩赴鄂卽在衡州趕

辦戰艦添置礮位教練水師各等情諒已辦有頭緒現在安徽
逆匪勢甚披猖連陷桐城舒城逼近廬郡呂賢基已經殉難江
忠源又復患病暫住六安不能前進皖省情形甚屬危急總由
江面無水師戰船攔截追剿任令賊踪往來自如以致逆匪日
肆鴟張該侍郎前奏亦曾籌慮及此著卽趕辦船隻礮位並將
前募楚勇六千由該侍郎統帶自洞庭湖駛入大江順流東下
直赴安徽江面與江忠源會合水陸夾擊以期收復安慶及桐
舒等城並可牽制賊匪北竄之路現在廣東紅單船數十隻計
已由閩入江又有艇船數十隻均可備夾擊之用該侍郎忠誠
素著兼有膽識朕所素知諒必能統籌全局不負委任也將此

由六百里加緊諭令知之欽此遵

旨寄信前來竊自田家鎮失防以來督

臣

吳文鎔撫

臣

駱秉章

與

臣

往返函商至十餘次皆言各省分防禦餉多而兵力薄不

如數省合防禦餉少而力較厚卽與張芾江忠源函商亦言四

省合防之道兼籌以勦爲堵之策

臣

前月覆奏一摺曾言舟師

辦有頭緒卽由

臣

親自統帶駛赴下游是未奉此次

諭旨之前

微臣

之志已思率師東下一抒積憤矣况重以

新命委任

天語褒嘉尤臣子竭誠效命之秋敢不捐糜頂踵急圖報稱於

萬一惟礮船一件實有不宜草率從事者

臣

前發摺後卽鳩工

購材試行造辦成造樣船數隻皆以工匠太生規模太小不足以壓長江之浪不足以勝巨礮之震近由撫臣處送到水師守備成名標一員又由督撫臣處咨到廣東繪來之拖罟快蟹船式二種始細加講求照快蟹式重新製造現已先造十號更須添造二三十號計必中宮能載千餘斤之礮兩旁能載數百斤之礮乃足以壯軍威而摧逆倭惟新造之舟百物未備雖日夜趕辦亦難遽就上油未乾入水既虞其重澀捻灰未固放礮又患其酥鬆必須一月以外乃可下河至價買舊船修改艙面其用力稍省其爲日自少然至二三百號之多亦須一月餘之久蓋爲數過少則聲勢太孤賊眾之船未遇我軍之心先怯至拖

呂船隻本奉

諭旨令兩湖督撫照式製造者武昌現在照造未知合用與否
衡州匠少技拙現在尙未試造前經奉

旨特派之廣西右江道張敬脩帶有工匠自粵來楚若其到湘
尙早臣當令其趕辦如其到湘太遲亦不能以勢難遽成之拖
宕延刻不可緩之時曰此辦船之大略也至於礮位一項現在
衡城僅有廣西解來之礮百五十尊長沙新造之礮雖有三百
餘尊除解往鄂省及存城防守外可取備戰船之用者已屬無
幾聞張敬脩遵

旨購辦夷礮廣礮千尊由韶州一帶來楚臣專俟此項礮位前

來乃足以資配放特樂昌以上之河上水不易千斤以上之礮
搬嶺尤難計該道到衡之期即微臣辦船之事亦將次就緒矣
至於募勇一事前臣添勇六千之信係爲江忠源尙守江西言
之也旋奉帶勇六千之

旨係爲臣救援湖北言之也厥後武昌解嚴臣奏明暫不赴鄂
因飭江忠源之胞弟先帶楚勇千人赴皖其餘五千之數因舟
師尙未辦齊故陸勇亦未發往今臣接奉此

旨陸勇已屬整備而水勇尙無章程計張敬脩帶來之礮勇與
湖南新募之水手亦須湊成四千人乃可自成一隊水陸兩軍
合之則兩相夾擊分之則各能自立庶不致一遇大股卽被衝

散統計船礮水勇三者皆非一月所能辦就

臣北望

宸極念

君父之憂勞東望皖江痛舒廬之危急寸心如擣片刻難安而
事勢所在關係甚重有不能草草一出者必須明春乃可成行
且廣東購備之礮張敬脩雇募之勇皆係奉肅清江面之
旨而來者臣若不督帶同行則殊失

皇上命

臣

統籌全

局之意亦非

臣

與吳文鎔等四省合防之心

臣

之斟酌遲速規

畫大局不得不一

縷陳所有

臣

籌備水陸

各勇赴皖會剿緣由恭摺由驛六百里覆奏伏乞

皇上聖鑒訓示謹

奏

硃批現在安省待援甚急若必偏執己見則太覺遲緩朕知汝
尙能激發天良故特命汝赴援以濟燃眉今觀汝奏直以數省
軍務一身克當試問汝之才力能乎否乎平時漫自矜詡以爲
無出己之右者及至臨事果能盡符其言甚好若稍涉張皇豈
不貽笑於天下著設法趕緊赴援能早一步卽得一步之益汝
能自擔重任迴非畏葸者比言旣出諸汝口必須盡如所言辦
與朕看欽此

請提用湖南漕米片

咸豐三年十一月二十六日

再臣聞湖北以下沿江市鎮逃徙一空千里蕭條百貨俱無可買臣此次一出必須將米鹽油薪等物多爲儲備用船裝載卽以水次爲糧臺使兵勇無乏食之患庶無潰散之虞查本年湖南漕米雖有改征折色之議而州縣仍謹遵

諭旨照舊征收相應奏明請

旨准臣提用漕米二三萬石事關緊急臣一面具奏一面咨商

督撫酌提傍水州縣之漕米趕緊交兌俟兌定後某縣實交若干石再行開單咨明戶部查照辦理謹附片奏

聞

殊批戶部知道用之於軍需固不爲浪費尤須迅速咨部勿稍
含混欽此

請捐輸歸入籌餉新例片

咸豐三年十一月二十六日

再現在經費支絀民力艱難卽捐輸一事亦無裨益臣來衡兩
月有餘僅勸捐錢貳萬串有奇再三勸諭終不踴躍緣此次係
開城工捐輸之局向例由城工報捐者須俟修城完畢後奏明
議敘始給予吏部執照核計自上兌之日起至發給部照之日
止相隔常在三四年以外鄉民無知往往因部照未到疑經手
者或有情弊故捐生愈觀望不前相應奏明請

旨飭下該部查照此次臣經手由城工例報捐者仍准歸入籌
餉新例之內由臣開單咨部隨時發給部照嗣後臣行營所至
如湖北安徽等省准令臣隨處勸捐一例咨部仍隨時發給部

照目下南省紛擾士民情殷報効大約願給虛銜者多願授實職者少誠能如此通融辦理於

朝廷之名器無損而於軍營之接濟不無小補伏乞

聖恩俯准飭下該部查照辦理謹附片請

旨

硃批該部知道欽此

瀝陳現辦情形摺

咸豐三年十二月二十一日

奏爲瀝陳現辦情形

微臣

愚見恭摺奏明仰祈

聖鑒事竊臣前月覆奏赴皖援剿俟張敬脩解礮到楚乃可成行一摺於十二月十六日奉到

硃批現在安省待援甚急若必偏執己見則太覺遲緩朕知汝尙能激發天良故特命汝赴援以濟燃眉今觀汝奏直以數省軍務一身克當試問汝之才力能乎否乎平時漫自矜詡以爲無出己之右者及至臨事果能盡符其言甚好若稍涉張皇豈不貽笑於天下著設法趕緊赴援能早一步卽得一步之益汝能自擔重任迴非畏葸者比言旣出諸汝口必須盡如所言辦

與朕看欽此仰見

聖諭諄諄周詳懇至見臣之不事畏憚而加之

教誨又慮臣之涉於矜張而嚴爲

懲誡跪誦之下感悚莫名惟現辦之情形與微臣之愚見恐我

皇上尙有未盡知者不得不逐條陳明伏候

訓示

一起行之期必候張敬脩解礮到楚查張敬脩在廣東購礮千
餘尊分爲十起運解來楚現在頭起業經到衡僅八十位其後
九起尙無信息臣屢次咨催又專差迎催本月十六日永興境
內又有匪徒道路阻梗實爲十分焦急臣所辦之戰船新造者

九十號改造者百餘號合之雇載者共四百號可於正月中旬一律完畢自興工之日起統計不滿八十日晝夜催趕尙不遲緩惟礙位至少亦須八百尊乃敷分配前此欽奉

諭旨令廣東購辦礙位千餘尊限三箇月解楚計算正月之末總可陸續解到縱不能全到稍敷配用卽行起程

一黃州以下節節有賊水路往援之兵不能遽達皖境前兩奉援鄂之

旨命臣籌備礙船肅清江面後兩奉援皖之

旨命臣駛入大江順流東下直赴安徽等因查現在黃州以下節節被賊占據修城濬濠已成負隅之勢與前月情形又已迥

殊若舟師東下必須克復黃州攻破巴河掃清數百里江面賊
艖乃克達於皖境此則萬難之事微臣實無把握萬一黃州巴
河之賊亦如揚州鎮江之堅守抗拒則臣之到皖無期現在安
徽待援甚急前次江忠源之戚劉長佑帶楚勇千餘自湖北前
往又令其胞弟江忠濟帶勇一千自湖南繼往又有滇兵一千
自湖南撥往計湖南由陸路援皖之兵已三千餘矣臣奉
命由水路前往阻隔黃州一帶何能遽行掃清直抵安徽目前
之守候船礮其遲緩之期有限將來之阻隔江面其遲緩之期
尤多晝夜焦思誠恐有誤皖省大事不能不預行奏明
一現在大局宜堵截江面攻散賊船以保武昌今年兩次賊舟

上竄湖南防堵耗費甚多湖北江西亦各耗費數十萬三省合

力防堵之說係

臣駱秉章與臣函內言之四省合防之說係臣

江忠源與

臣函內言之待南省船礮到鄂卽與北省水師合力

進剿係

臣吳文鎔與臣函內言之是以臣前摺內聲敘茲奉到

批諭今觀汝奏直以數省軍務一身克當試問汝之才力能乎

否乎等因

臣自度才力實屬不能而三臣者之言臣以爲皆係

切要之務該逆占據黃州巴河一路其意常在窺伺武昌論目

前之警報則廬州爲燃眉之急論天下之大局則武昌爲必爭

之地何也能保武昌則能扼金陵之上游能固荆襄之門戶能

通兩廣四川之餉道若武昌不保則恐成割據之勢此最可憂

者也目今之計宜先合兩湖之兵力水陸並進以剿爲堵不使賊舟回竄武昌乃爲決不可易之策若攻剿得手能將黃州巴河之賊漸漸驅逐步步進逼直至湖口之下小孤之間與江西安徽四省合防則南服猶可支撐臣之才力固不能勝臣之見解亦不及此此係吳文鎔駱秉章江忠源三臣之議論然舍此辦法則南數省殆不可問矣臣此次東下擬幫同吳文鎔照此辦理前摺未及詳敘故復縷陳之

一臣所練之勇現在郴桂剿辦土匪不能遽行撤回湖南土匪惟衡永郴桂最多臣二月一摺八月一摺已詳言之自駐紮衡州以來除江西之匪竄入茶陵安仁一起外其餘本處土匪竄

撲常甯嘉禾藍山等縣城及盤踞道州之四庵橋經臣派勇隨處攻剿先後撲滅昨十二月十五日又有一股竄入永興縣城亦經派勇往剿現在臣之練勇在桂屬者尙有千餘人在郴屬者八百人昨十二日奉到

諭旨曾國藩著仍遵前旨督帶船勇速赴安徽江面至湖南常甯一帶土匪卽責成駱秉章迅卽妥辦等因目下桂屬正在搜捕之際未便遽行更換郴州永興正在危急之際不能不星速進剿且待船將辦齊礮將到齊再將各勇撤回帶赴下游如尙未剿畢則由省城調兵前來更換

一餉乏兵單

微臣

竭力效命至於成效則不敢必臣以丁憂人

員去年奏明不願出省辦事仰蒙

聖鑒在案此次奉

旨出省徒以大局糜爛不敢避謝然攻剿之事實無勝算臣係幫辦團練之人各處之兵勇既不能受調遣外省之餉項亦恐不願供應雖

諭旨令撫

臣

供支而本省藩庫現僅存銀五千兩卽起程一月

之糧尙恐難備且賊勢猖獗如此豈

臣

區區所能奏效茲奉

批諭平時漫自矜詡以爲無出己之右者及至臨事果能盡符其言甚好若稍涉張皇豈不貽笑於天下言旣出諸汝口必須盡如所言辦與朕看等因臣自維才智淺薄惟有愚誠不敢避

死而已至於成敗利鈍一無可恃

皇上若遽責

臣

以成效則

臣

惶悚無地與其將來毫無功績受

大言欺

君之罪不如此時據實陳明受畏憚不前之罪

臣

不嫻武事既

臣

不能在籍終制貽譏於士林又復以大言僨事貽笑於天下

臣

亦何顏自立於天地之間乎中夜焦思但有痛哭而已伏乞

聖慈垂鑒憐

臣

之進退兩難誠

臣

以敬慎不遽責

臣

以成效

自當殫竭血誠斷不敢妄自矜誦亦不敢稍涉退縮

以上五條皆

臣

據實直陳毫無欺飾伏求

皇上聖鑒訓示謹

奏

殊批知道了成敗利鈍固不可逆睹然汝之心可質天曰非獨朕知若甘受畏蒞之罪殊屬非是欽此

衡永一帶勦匪未畢摺

咸豐三年十二月二十一日

奏爲衡永桂陽一帶尙有一股會匪勦捕未畢恭摺奏明仰祈
聖鑒事竊照湖南上四屬土匪繁多臣屢次具奏在案十月二
十七日土匪竄入常甯縣城經臣派令千總周鳳山臣弟曾國
葆帶勇往勦於初一日在洋泉地方開仗斃賊二百餘人十一
月十四日該匪竄入嘉禾縣城十九日圍逼藍山縣城臣派令
候選訓導儲玫躬軍功魏崇德帶勇往勦於二十四日在古城
地方開仗斃賊七百餘人二十八日竄據道州之四庵橋經臣
派候選知府張榮組監生鄒壽璋及周鳳山儲玫躬等帶勇往
勦於十二月初八日在教頭坪地方開仗斃賊三百餘人此三

戰者所獲旗幟大小一百餘面及腰牌偽示令箭逆書圖記等件一概解送衡州臣逐件親驗實是一股會匪與金陵之粵匪相通前在常甯拏獲之要犯吳玉老十解來衡州臣親自研訊亦稱此股會匪勾結甚多其大頭目爲道州之何賤苟自稱爲僞普南王今年永州廣西兩次拏獲皆非正身也其散頭目則有唐定其霍德滔等其巢穴則常甯之五洞桂陽之白水洞道州之岩頭村甯遠之癩子山等處勾結十餘州縣到處發牌弔碼入會者約四五百人初八日敎頭坪一戰卽殺斃長髮賊三人在內十五日又有土匪四五百人竄撲永興縣城現經派勇飛速進剿尙未查明未知卽是此股分支竄擾否統計常甯藍

山道州雖經三次獲勝殲斃千餘而餘黨尙多首犯何賤苟未

獲此股會匪實爲湖南之巨患

臣現函商撫

臣擬於

臣出征之

後擇一賢幹之員帶精壯兵勇千餘駐紮衡州隨時剿捕無使

其蔓延日盛不可收拾除俟商定妥員再行會奏外

臣奉

命查辦土匪於此股剿除未畢是

臣經手未完之件不敢不據

實陳明伏乞

皇上聖鑒訓示謹

奏

硃批知道了汝以在籍人員能如是出力已屬可嘉著知會撫臣
勦辦或有汝素來深信之紳士酌量辦理亦可欽此

釐正衡清二縣保甲片

咸豐三年十二月二十一日

再臣到衡以來拏獲衡清二縣齋匪一案會匪一案齋匪聚於衡陽四十都等處與永興祁陽之匪相通現僅獲屈太岷陳青長等八人會匪聚於清泉江東岸等處與常甯之匪相通起獲一簿載明六十六人現僅獲汪興生許興干等五人此二案踪跡詭秘堅不認供未獲之犯尙多亦是臣經手未完之件今欲杜絕後患必須保甲團總認真稽查已入會者縱不能盡獲未入會者猶可以漸少復查衡清二縣保甲近來專管包征錢糧反置查匪事件於不問推原其始由於道光十五年前任衡陽縣沈洽輕改章程既未奏明亦未稟知撫藩輒將衡陽錢糧概

歸保甲徵收清泉亦隨同辦理厥後弊端叢生保甲弱者則不勝墊賠之苦強者則勾結蠹役捐票浮勒甚至痞棍買充領票訛索小民浮收數倍名曰包包保包甲以致保甲一項專管催徵錢糧而查團之事置之不理匪徒充斥豪無稽察實爲兩縣一大弊政不可不急爲更改查道光三十年九月御史吳若準條陳積弊言及催徵爲差役之責詰盜爲保甲之責欽奉上諭假催科爲名擾及保甲若不嚴行申禁何以靖閭閻而肅吏治著各督撫飭地方官嚴行懲辦等因通諭在案衡清二縣尙未遵照更正今會匪齎匪如此之多自應立即改正以催科責成差役嚴比抗戶以查匪責成保甲並飭團總如地方有會

匪煽誘不行查出送官者將該團總保甲等一併嚴懲如該縣因循不改仍將錢糧事件擾及保甲者亦卽從嚴參處除分咨及札飭外相應奏明請

旨飭下督撫嚴禁二縣保甲收餉之弊實於團務大有關係謹附片奏

聞

硃批此應亟更易者著知照駱秉章將改辦章程速行覆奏欽此

卷二

報東征起程日期摺

咸豐四年二月初二日

奏爲恭報

微臣

起程

日期事竊

臣

於上年十一月二十三日奉

旨援剿皖省迄今已滿兩月曾經具奏一俟戰船辦齊廣礮解

到卽行起程兩次奏明在案茲於正月二十六日衡州船廠畢

工

臣

卽於二十八日自衡起程湘潭分造之船廠尙未盡畢

臣

到潭須耽閣數日晝夜督辦到長沙時支領軍械數千餘件搬

運子藥二十餘萬又須守催數日卽行趲程長征馳赴下游

臣

所辦之船拖罟一號快蟹四十號長龍五十號三板艇一百五

十號皆仿照廣東戰艦之式又改造釣鉤船一百二十號雇載

輜重船一百餘號所配之礮借用廣西者一百五十位廣東購

辦者去年解到八十位今年解到二百四十位本省提用者一百餘位所募之勇陸路五千餘人水師五千人陸路各營編列字號五百人爲大營不滿五百者爲小營水路分爲十營前後左右中爲五正營正營之外又分五副營正營旗用純色副營旗用廂邊陸路操練已久差覺可用水路招集太驟尙無可恃所備之糧台帶米一萬二千石煤一萬八千石鹽四萬斤油三萬斤軍中應需之器物應用之工匠一概攜帶隨行合以陸路之長夫隨丁水路之雇船水手糧台之員弁丁役統計全軍約一萬七千人臣才智淺薄素乏閱歷本不足統此大眾然當此時事艱難人心渙散之秋若非廣爲號召大振聲威則未與賊

遇之先而士卒已消沮不前矣是以與撫臣往返函商竭力經營圖此一舉事之成敗不暇深思餉之有無亦不暇熟計但期稍振人心而作士氣臣區區效命之微誠也至臣前摺稱必待張敬脩解礮到楚乃可起行頃專弁自粵歸來知張敬脩爲粵省奏畱不能赴楚續購之礮亦不能遽到下游賊勢急於星火臣更不可少延矣合併陳明所有微臣起程日期恭摺由驛五百里具奏伏乞皇上聖鑒訓示謹奏

代遞唐樹義遺摺片

咸豐四年二月初二日

再湖北按察使唐樹義於正月二十三日在鄂省上游之鮎魚套殉難當經手繕遺摺遣伊子舉人唐炯賁赴鄂垣陳乞代奏時因下游賊氛阻隔鄂城門已封閉不能前進唐炯間跋涉赴臣行營呈稱伊父力竭捐軀有封就遺摺懇爲代奏等情臣查該臬司曾任二品大員素著循聲慷慨殉難旣據伊子籲請代遞遺摺不敢壅於

上聞所有湖北按察使唐樹義遺摺一件理合據呈轉達謹奏

孝和卷三

三

請派大員辦捐濟餉摺

咸豐四年二月十五日

奏爲請

旨特派大員辦理捐輸以濟軍餉事竊臣於二月初二日在衡
山舟次具報起行日期恭摺奏明在案其時臣但知督臣吳文
鎔黃州接仗官兵失利近日連接北撫臣崇綸南撫臣駱秉章
來函知賊船已由漢陽上竄金口及新隄等處陸路官兵潰散
極多水路之師竟至全數潰散唐樹義業已殉難船隻礮械盡
爲賊有東南大局真堪痛哭從此湖廣江皖四省止有臣處一
枝兵勇較多若臣再有挫失則後此更不堪設想臣所以招練
萬餘人蓋欲以收渙散之人心而作積弱之士氣惟人數眾多

每月需餉銀近八萬兩本省難盡供支鄰省亦難協濟專恃勸捐一途以濟口食之需但勸捐非有大員專辦則畏難避怨無人肯獨任其責者現在湖南江西四川較爲完善之區臣於此三省中各擇官紳數人湖南則擇署鹽道新授四川鹽茶道夏廷樾翰林院編修郭嵩燾江西則擇前任刑部侍郎黃贊湯升用知府郴州直隸州朱孫詒四川則擇按察使胡興仁前翰林院編修李惺此數人者在官則素洽民心居家則素孚鄉望相應請

旨飭諭各該員辦理捐輸專濟臣軍之用伏查上年戶部議准頒發職銜

封典各執照交各藩司填給又議每省派捐監生預將空名部
監二照發各藩司轉發各州縣此二事人所樂從實爲勸捐良
策應請

飭下戶部國子監印發空白執照四千張內職銜照一半監照
一半分派三省其大小職銜均勻搭配及核減銀數俱照原案
辦理以一千張封發臣軍營中以一千張封發湖南交夏廷樾
經收以一千張封發江西交黃贊湯經收以一千張封發四川
交胡興仁經收其部監各照未到之先恭請
特旨諄諭各該員先行籌辦隨時解赴臣軍不作別用現在師
過長沙搜括省城庫項僅供一月之需撫臣駱秉章以此事畫

夜焦灼是以奏請川廣二省協濟臣軍伏念臣此次成軍以出已屬竭力經營若因餉項不繼飢疲潰散則後此更無望矣世小亂則督兵難於籌餉世大亂則籌餉更難於督兵臣於萬難設措之中爲此接濟目前之計伏乞

聖慈垂鑒特降

諭旨專飭諸臣認真督辦不勝迫切待命之至謹

奏請

旨

畱胡林翼黔勇會剿片

咸豐四年二月十五日

再貴州黎平府知府升用道胡林翼前經督臣吳文鎔奏調湖北差遣該員自帶練勇六百名由黔赴鄂於正月下旬馳抵金口適值黃州師潰賊踪上竄該員所募黔勇係山民不習水戰又兼無餉無夫無火藥鍋帳不能前進疊據該員具稟南撫臣暨臣行營請支給口糧軍械在案臣與撫臣函商派員解送火藥帳棚撥銀二千兩往資接濟臣擬先遣陸勇與該員會合援鄂又值賊匪竄擾岳州湘陰道路阻隔委員仍行折回臣思岳州一帶既被賊擾自當先攻克岳州不使南北梗塞方能全師東下現擬札飭該員暫駐岳州附近地方臣迅卽東下與該員

督勇先行會勦理合附陳謹

奏

硃批知道了欽此

賊蹤退出南省現駐岳州摺

咸豐四年三月初五日

奏爲賊蹤全數退出南省

微臣

現駐岳州搜捕湖汊并就近剿

辦崇通股匪恭摺奏

聞仰祈

聖鑒事竊

臣

於二月二十四日會同撫

臣

將分途剿賊獲勝各

情由具報在案自靖港甯鄉新康三獲勝仗後

臣

卽傳令各陸

營馳赴湘陰并派水師山西候補知府褚汝航候補守備諸殿

元千總楊載福文生彭玉麟四營各帶水軍齊赴湘陰截剿賊

聞官兵水陸大至當卽退出湘陰據褚汝航稟報二十三日辰

刻探明西湖口賊船尙多當派五品翎頂張宏邦等駛駕礮船

迎擊轟斃賊匪數十名生擒唐興道等七名燒燬賊船十餘號
諸殿元等三營共奪獲賊船八隻又據勇目黃忠等稟在團山
地方奪獲賊船砍斃然礮賊匪二名生擒賊匪蕭茂瑞等五名
泗水賊呂金富等三名訊明正法逆匪疊經懲創全數竄逃岳
州亦已退出臣前派之陸路各營均於二十六七等日先後抵
岳分駐城鄉搜捕餘匪臣亦督帶水軍於三月初二日行抵岳
州查洞庭一湖周迴近八百里爲資湘沅澧諸大川所匯小港
支汊紛歧至數十處最易藏奸全湖入江之所名曰荊河口上
游爲監利荊州其虎渡河等處多與湖水相通屢獲賊探均供
稱賊蹤內則藏匿湖汊外則竄伏荊河俟我軍東下再在上游

滋擾等語臣現駐岳州多派哨船分巡內則哨探湖中港汊外則哨探荆河以上必須逐處搜查上游肅清然後壹意東下乃無後路邀截之虞至陸路各軍屢據稟報崇陽通城先後失守臣已札飭貴東道胡林翼前平江縣知縣林源恩帶勇千餘前往勦辦若能趁臣在岳時就近將崇通股匪辦有頭緒則馳赴下游庶無彼此牽掣之患所有賊蹤全數退出南省微臣現駐岳州搜捕湖汊并就近勦辦崇通股匪各緣由恭摺由驛五百里具奏伏乞

皇上聖鑒訓示謹

奏

請卹儲孜躬等摺

咸豐四年三月初五日

奏爲請將屢著戰功衝鋒遇害之員照擬保升銜

賜卹以昭激勸而慰忠魂事竊臣前派兵勇於靖港甯鄉新康等處剿賊獲勝業經會奏在案惟甯鄉一戰督勇委員武陵縣學訓導儲孜躬奮勇捐軀將大股賊登時擊退保全實多當此士氣積弱之秋非破格表章不足以昭激勵查該訓導自札調帶勇以來屢立戰功上年十一月常甯土匪竄擾嘉禾藍山等處臣調該訓導會剿於二十四日抵藍山之古城時賊眾千餘圍藍山已六晝夜該訓導甫至卽督勇目喻西林等分路衝擊共殺賊六百餘名奪獲馬騾二十二匹拾鎗鳥鎗各數十件藍

山股匪卽日蕩平旋以道州四眼橋土匪滋擾該訓導於十二月初八日馳抵賊巢時賊負隅抗拒各營兵勇相持莫進該訓導立督諭西林等直前奮擊追奔十餘里殺賊百餘名道州股匪亦平此二案業經撫臣駱秉章奏明在案本年二月臣率師抵省適逆賊已由岳州湘陰竄擾甯鄉一帶距省止數十里臣於十一日派該訓導及各營馳往靖港喬口截剿該訓導路聞賊竄甯鄉卽冒雪疾趨十餘里於十三日未刻先至甯鄉派勇分門抄截自帶親兵諭西林文生楊華英等直衝賊隊由龍塘灣痛剿衝入西門又至北門轉戰至南門突東城外一股橫截而出該訓導力竭遇害身面受傷十餘處楊華英諭西林等同

時陣亡此次該訓導以五百之勇敵三千之賊殲賊至數百名而我兵喪亡止十八名逆黨膽落氣奪驀夜竄逃甯鄉得以保全賊遂不敢直犯省城附近各州縣皆獲安堵甯鄉被擄難民千餘因賊敗得以逃回合邑感激欲爲該訓導建立專祠實屬功不可沒前此藍山之捷臣擬奏保該訓導請以知縣升用道州之捷復擬保奏請以同知直隸州升用曾與撫臣函商因衡郴各屬剿平土匪在事出力者甚多擬俟彙齊後恭摺一體保奏不料該員遽爾殉難奇功疊著懋賞久稽實堪痛惜合無仰懇

皇上逾格

天恩准照同知直隸州例議卹其陣亡之勇目喻西林三次戰功臣久擬奏保把總亦請照把總例

賜卹文生楊華英均請一體議卹用以昭激勸而慰忠魂所有懇照升銜

賜卹緣由理合專摺具

奏伏乞

皇上聖鑒訓示謹

奏

岳州戰敗自請治罪摺

咸豐四年三月二十日

奏爲岳州陸軍敗潰水軍小勝賊匪大股全數上竄現帶水陸各營回保省城請

旨將

臣交部治罪仰祈

聖鑒事竊臣於三月初五日在岳州舟次具報西路搜查湖汊東路剿辦崇通股匪恭摺奏

聞在案維時臣已札飭貴東道胡林翼前平江縣知縣林源恩前往平江防剿崇通賊匪隨又派副將塔齊布守備周鳳山帶勇直擣通城旋據林源恩會同平江縣知縣汪敷灝暨胡林翼等先後稟報初二初六兩日與賊接戰疊獲勝仗前後共計殺

斃賊匪千餘陣斬僞副丞相林大旺僞檢點陳六輔僞司馬黃
奇瑜轟斃土匪僞王廖六胖等及不知姓名黃衣紅衣賊目數
十名長髮賊數十名奪獲抬鎗鳥鎗刀矛旗幟各數十百件賊
匪連夜狂奔由通城竄回崇陽此二股均經撫臣會奏在案又
據塔齊布稟稱初五日自岳起程途間聞白港地方有賊匪沿
村擄掠初七日督勇白石南橋進剿斃賊四十餘人生擒二十
二名奪獲器械旗幟號衣多件初八日馳赴通城收復縣城此
剿辦平通股匪疊獲勝仗之實在情形也至岳州一城前經撫
臣札飭升用知府朱孫詒帶勇六百人在此追剿又札升用同
知王鑫帶勇二千餘人在此扼防臣隨身又帶有陸勇一千六

百人兵力本不爲單薄因崇通股匪過多王鑫亦於初六日自岳起程取道蒲圻繼進初七日至臨蒲交界之羊樓司地方適與賊遇前鋒少挫王鑫率勇踵至殺賊百餘賊眾僞敗王鑫率勇窮追忽大股賊匪分四面抄出眾勇勢難抵禦紛紛潰散初八日仍回岳城初十日早賊大隊卽來犯岳王鑫之勇因新在羊樓敗歸不能出隊開仗時官軍僅二千人朱孫詒所帶之南勇先獲小勝各營俱有斬獲計斃賊百數十人而賊集愈眾東門外山岡約十里許皆黃旗紅衣賊隊布滿官軍見眾寡不敵勢難抵禦各營以次奔潰竟不能止惟監生鄒壽璋一營五百人毫無驚怖自辰至酉血戰數時之久賊眾數千人層層圍住

各勇併力苦戰更休迭進卒得衝圍而出殺賊極多積屍滿地
我勇傷亡亦眾各勇有退回城內者賊匪卽乘勢圍城周城三
面皆係賊隊惟西南濱湖一門無賊城內居民早空無米無鹽
士卒已不食二日勢極危險臣當遣大小戰艦駛赴西門開礮
環擊共斃賊百數十人賊勢稍卻各勇卽乘隙縋城而出船上
礮勇亦陣亡數人此岳城陸路戰敗水軍小勝之實在情形也
臣奉

命赴下游會剿舟次岳州之南津港原飭水陸各勇俱於岳州
會齊原擬俟各勇畢集誓師東下爲肅清江面之計不料後幫
陸勇二千水師二千皆以阻風洞庭不克依限抵岳而前幫陸

勇又已先遣一千八百人至平通矣臣隨身止有陸勇一千六
百人猝遇金口大股賊匪數萬來犯遂至潰敗陸路旣已失利
水軍亦無固志初七大風以後各船損壞力難應敵誠恐輕於
一擲或將戰船洋礮盡以資賊則臣之罪戾尤重適因賊水陸
大隊全數南竄湘省臣遂乘風上駛退保省城但冀保此船礮
畱爲將來殄寇之資則臣雖蒙恥獲罪亦不敢惜至臣奉
命會剿尙未出境卽有此挫皆由臣調度乖方所致深負
鴻慈委任慚憾憂鬱莫可名言謹據實直陳請
旨將臣交部治罪以昭大戒不勝悚惶之至謹
奏

一、
二、
三、
四、
五、
六、
七、
八、
九、
十、
十一、
十二、
十三、
十四、
十五、
十六、
十七、
十八、
十九、
二十、
二十一、
二十二、
二十三、
二十四、
二十五、
二十六、
二十七、
二十八、
二十九、
三十、
三十一、
三十二、
三十三、
三十四、
三十五、
三十六、
三十七、
三十八、
三十九、
四十、
四十一、
四十二、
四十三、
四十四、
四十五、
四十六、
四十七、
四十八、
四十九、
五十、
五十一、
五十二、
五十三、
五十四、
五十五、
五十六、
五十七、
五十八、
五十九、
六十、
六十一、
六十二、
六十三、
六十四、
六十五、
六十六、
六十七、
六十八、
六十九、
七十、
七十一、
七十二、
七十三、
七十四、
七十五、
七十六、
七十七、
七十八、
七十九、
八十、
八十一、
八十二、
八十三、
八十四、
八十五、
八十六、
八十七、
八十八、
八十九、
九十、
九十一、
九十二、
九十三、
九十四、
九十五、
九十六、
九十七、
九十八、
九十九、
一百、

鄒國彪傷亡請卹片

咸豐四年三月二十日

再三月初五日有賊船扮作民船在西湖經過派令戰船前往查拏開礮轟擊奪獲三十餘隻獲犯五十四名其中有靖如邦襄陽人供稱授僞職師師又張見三蒙百鮮供係賊目其餘或供認從賊或實係客船分別正法釋放在案惟查拏之時眾舟勇敢向前賊以火毬擲入我舟適中入藥桶內登時桶熱火燃燒傷衛千總一人鄒國彪旋於初七日身故又燒傷水勇十餘名燒斃九名初七日未刻北風大作湖中巨浪如山臣之戰船在陳陵磯守卡者打沈五隻撞損十餘隻泊岳陽樓下者打沈十一隻撞損二十餘隻中幫水師二營及後幫陸勇二千雇民

船來岳者在鹿角一帶遭風飄沈戰船八隻撞損者無數水陸各勇溺斃者亦多尙未確切查明本擬在岳州大加修葺旋因賊匪大股來岳城內搬徙一空城外四五十里並無居人所需工料無從取辦而賊之水陸兩股上竄南省不得已仍回省河一面修理戰船一面招集潰卒嚴汰慎選與撫臣力籌堵剿除初五日被火燒斃之勇初七日被風溺斃之勇由臣照例給卹外所有衛千總鄒國彪因打仗受傷二日身故應請交部照陣亡例議卹謹附片具

奏

硃批何事機不順若是另有旨欽此

探明前路賊蹤片

咸豐四年三月二十日

再臣自去冬以來常以重金募人深入賊巢偵探消息迄今數月回者寥寥近有數人回營及連日在岳探得賊情數端謹開列附陳以

聞

一陳陵磯之下四十里名白螺磯北隄內六十里有裏河名朱家河其地有土匪名張台元於咸豐二年往從粵賊去年曾經回籍一次復去在偽指揮費姓屬下昨三月初二日張台元乘轎回朱家河自稱已封偽軍師劫搶當舖七家環圍五六十里擄人船銀米罄盡北省之沔陽州監利縣皆係張台元滋擾失

守張台元新招之匪不過千餘人而僞指揮費姓所屬則老賊頗多有窺伺華容澧州荊州之意

一賊在漢陽東門外築一曲尺土城西門外築一圓土城極堅極險龜山頂上築一望樓而漢陽所存之賊甚多賊眾皆聚於漢口有僞將軍賴姓守漢口彭姓守漢陽二月二十九日賊大隊上竄坐船至金口中金口登陸至咸甯蒲圻初七在羊樓司開仗初十早卽至岳城開仗

一此次自漢口大隊上竄之賊係僞丞相林姓總其事又有僞十七指揮黎姓十一指揮沈姓又有僞侍衛李八安仁人也所帶賊眾前十一軍六千餘人中一軍七千餘人後六軍一萬餘

人約計三萬餘人湖南老賊居多

一崇陽土匪最多有頭目廖姓係本邑屢次嚴拏之犯上年從賊今春廖姓至漢口帶老賊六百人至崇陽招集崇通土匪已二萬餘人該匪自誓必招滿三萬之數現在胡林翼塔齊布等剿崇通之匪與白金口竄岳竄湘之賊另是一股

一賊在漢陽管水軍者係偽翼王之兄弟賊中稱爲國宗兄其船旗以繡花呢別之其有洋礮之船以白旗別之臣在岳時探得下游之毛埠倒口金口皆停泊賊船甚多又探得西湖之明山團山尙有賊船數十號本擬先清湖面再行肅清江面不料初七日大風壞船初十日陸路戰敗臣耿耿微忱遂不能展布

絲毫實堪憤恨初三日遣六十人至西湖巡哨至今未歸不知下落現在賊船由臨資口入益陽河者已有五六百號之多

報崇通勦匪勝仗摺

咸豐四年三月二十二日

奏爲崇通勦匪續獲勝仗二次恭摺奏報仰祈

聖鑒事竊

臣與撫臣

先後

札飭貴東道胡林翼升用副將塔齊

布升用同知林源恩千總周鳳山軍功倪長誥前往平江北路

勦辦崇通股匪初二日林源恩開仗獲勝初六日胡林翼在上

塔市開仗大勝初七日塔齊布在江南橋開仗小勝均經奏報

在案旋據胡林翼稟稱十二日派黔勇二百人塔齊布派楚勇

五十人放哨行至石水灣地方距通城三十里有賊二千餘人

先匿該處民房蹤蹟甚祕忽於我兵路過之後突起接仗截住

街口層層圍逼斷我兵歸路黔勇奮力衝殺斃賊匪五十餘人

搶出街口賊匪大聚黔勇整隊上山施放槍礮打斃賊匪二百餘人刀矛並舉又斃百餘人又割尺餘長髮首級三十六顆二三寸長髮首級四十二顆奪獲僞春官副丞相熊僞司馬李大黃旗桿及風帽紅巾刀矛等件又據塔齊布稟稱十四日巳刻賊眾萬餘人由沙坪一路進犯通城我軍出隊迎勦把總李松齡等帶兵由東路把總郭渙濱帶寶勇由西路塔齊布自帶勇由中路迎殺賊匪槍礮如雨我兵伏地前進及至近賊三路兵勇始放槍礮擊斃賊匪二百餘名賊勢大敗兵勇追奔十餘里外又殺斃賊匪三百餘名並殺斃執旗賊首二十餘名生擒六十二名正在撤隊之際賊匪又分三路約共三千餘人由嶺上

直趨城邊儘先守備周鳳山軍功倪長誥藍翎千總唐得陞分途堵截力戰又殺斃執黃旗賊目二三十名殺斃賊匪四百餘名生擒七十餘名賊匪紛紛遠竄由已至申鏖戰最久奪獲大小黃旗刀矛槍礮賊衣賊帽紅巾數百件賊轎一乘騾馬十八匹火藥槍子火箭甚多各等因伏查崇通兩縣向爲匪徒嘯聚之區自正月以來居民畏賊多已蓄髮樂爲賊用其旁近州縣如通山蒲圻大冶興國咸甯嘉魚等屬皆已爲賊所踞官兵到境無土人爲之嚮導無米鹽可供買辦人心之壞實堪痛恨自初六日胡林翼上塔市一戰十四日塔齊布沙坪一戰又有初二初七十二等日三戰賊勢始就衰挫人心亦漸有轉機本擬

再和卷二
再加兵勇二三千人痛剿崇通一股即可直抵鄂省以資救援
不謂岳州陸勇一敗金口大股之賊全數上竄不特不能加兵
再剿崇通且須酌撤通城之兵回保長沙此皆臣調度乖方不
諳軍旅所致若仗

皇上天威岳州上駛之匪攻剿得手卽日下竄則陸軍仍須由
崇通一路痛加剿洗乃能與鄂省文報相通其崇通屢次獲勝
在事尤爲出力之員并可否開單保奏出自

皇上天恩所有崇通剿賊續獲勝仗緣由謹會同湖南巡撫臣
駱秉章恭摺由驛六百里馳

奏伏乞

皇上聖鑒謹

奏

奏和名二

五

會奏湘潭靖港水陸勝負情形摺

咸豐四年四月十二日

奏爲官軍擊賊靖港互有勝負賊由陸路攻陷湘潭官軍水陸夾擊大獲勝仗巨股剿滅克復縣城恭摺由驛馳奏仰祈

聖鑒事竊逆賊大股水陸并進逼近省城陸路之賊先散踞岳州湘陰各境賊船分布臨資口樟樹港喬口靖港等處連日北風甚勁大雨經旬水軍不能進剿北路水陸各賊併聚泊靖港港外環列戰船堅築礮臺爲負隅觀釁之計三月二十四五日狂飈稍息臣曾國藩飭水師各營駛赴靖港更番迭擊上下往復周而復始共斃船中岸上之賊約二百餘名擊沈賊船三隻燒賊火藥船一隻賊詞知省城水陸防剿綦嚴不敢闖入思由

陸路繞越甯鄉徑撲湘潭臣曾國藩先遣湘勇營官伍宏鑑魏崇德郭鴻翥率湘勇千八百人扼要立營防賊侵軼並飭該營官以賊勢方盛宜謹守營壘固無與戰俟副將塔齊布兵到再籌追剿二十五日賊分三股齊撲魏崇德等營盤湘勇在營內施放槍礮斃賊數十既而大股賊匪麇聚約分十餘路四面圍逼該勇等奮力衝突殺賊百餘賊來益眾勢不可支湘勇陣亡數百遂紛紛潰敗二十六日塔齊布帶兵勇一千三百餘名馳往援剿賊已於是日卯刻捲甲疾趨由間道直赴湘潭塔齊布周鳳山等探知亦即繞道前進二十八日馳抵湘潭縣城外四五里高嶺地方賊前隊於二十七日已到署湘潭縣知縣劉建

德督帶團勇於城外響水壩沙市嶺一帶地方堵禦賊已由西路暗襲縣城分遣死黨四出擄掠民船一在城北堅立木城意圖阻遏援師爲久據計塔齊布以該逆頻年猖獗每用以守爲戰反客爲主之法若不及時速剿俟賊營壘既定攻克爲難卽於二十八日未刻同周鳳山督帶弁兵壯勇分路進攻賊營鎗礮如雨塔齊布令兵勇聞礮卽伏礮止卽進數伏數起直逼賊營各兵勇奮不顧身闖入賊營施放火箭火彈殺賊五百餘名燒斃無算生擒三十餘名奪獲賊馬六匹拾鎗鳥鎗二十餘桿火藥五桶鉛彈三百斤旗幟刀矛無數木城全燬臣等卽飭國子監學正銜候選訓導江忠淑帶楚勇一千三百名都司李輔

朝帶楚勇八百名守備張正揚帶鎮筭緩靖兵丁五百名先後
繼進復挑選得力水師五營交委員候補知府褚汝航等管帶
駛往湘潭乘逆賊甫擄民船尙未成列迅速追剿二十八夜賊
匪仍於原處豎立木城二十九日卯刻塔齊布周鳳山李輔朝
等督飭兵勇分兩路進剿賊分五路蜂擁而前塔齊布等亦分
五路迎敵賊匪亡命猛撲塔齊布手執大旗麾各路兵勇奮勇
向前周鳳山嚴督後隊繼進手刃臨陣退縮之勇七人塔齊布
與周鳳山縱橫血戰立斬該逆僞統領先鋒六名僞都督元帥
三名斃賊五百餘名賊匪紛紛敗潰各路兵勇躡蹤緊追斃賊
無數仍將木城燒燬奪獲紫金冠一頂紅巾黃巾無數賊馬數

十匹僞印一顆抬礮四十八桿旂幟刀矛無數已刻始行收隊
兵勇甫回營造飯賊忽分兩路前來撲營塔齊布令兵勇僞退
誘賊逼近從營後繞出鎗礮齊施轟斃賊匪五百餘名且退且
殺至嶺下塘邊四面圍逼賊匪無路逃竄淹死不計其數此三
月二十八二十九兩日塔齊布周鳳山督率陸路兵勇三獲大
勝之實在情形也委員褚汝航候選知縣夏鑾千總楊載福附
生彭玉麟鄒世琦等於二十九日管帶水勇戰船甫抵湘潭賊
匪已擄上游民船數百號順流而下四月初一日辰刻褚汝航
等督率各營水師分隊進剿長龍在前三板在右斜出載礮轟
擊夏鑾彭玉麟楊載福各選派勁勇飛駕快蟹直撲賊船賊匪

開礮還擊火彈火箭齊發煙燄迷漫兵賊莫辨該營官等飭令各勇挽舵速據上風施放火具各隊分左右翼飛馳繼進礮斃紅衣賊目十數名火器飛入賊船遇船卽著頃刻延燒逆賊情急跳上小船輒被兵勇擒斬生擒長髮賊共一百二十餘名大小船六十餘號奪獲旂幟號衣黃巾黃馬褂鎗礮刀矛火藥鉛子偽書名冊等件無算戍刻始行收隊是日陸路之賊仍在北城外高壘木城四座塔齊布周鳳山督帶兵勇三路進剿李輔朝帶楚勇在後接應逆渠因連次敗北盡選長髮老賊居先分三路迎敵塔齊布督率兵勇奮迅向前身先士卒誓不與賊俱生兵勇感激思奮併力鏖戰往來衝突殺斃長髮老賊約數百

人黃巾紅衣狼籍道路被逼溺斃者無算後隊兵勇乘機拋擲火器燒燬賊踞房屋斃賊亦無算生擒長髮老賊六十餘人逆賊退至城根兵勇三路合隊盡銳衝殺斃賊數百焚燒木城四座望樓一座奪獲二百斤重大礮三尊抬礮抬鎗旂幟刀矛數百餘件此又初一日水陸大獲勝仗之實在情形也塔齊布以連日血戰士卒頗勞傳令暫歇一日是夜四更水路賊匪從上游燒放火船數隻順流而下小船載油燈無數隨之意欲驚擾我軍兵勇乘坐三板將賊所放火船攆開洄聚一處任其自燒各船無恙初二日辰刻褚汝航等督率快船擂鼓督戰廣東外委羅管全哨官張宏邦區聯彪呂勝等齊施鎗礮繼以火箭火

罐焚燒賊船羅管全生擒紅衣長髮賊目一名哨官薛飛雄外
委施成任把總陳武龍何卓然等連環攻擊自辰至午擊沈賊
船八十餘隻斃賊二百餘名從九品區本昌候補千總戴兆熊
分途燒斃紅衣賊目一名登岸追獲賊馬一匹復搶上賊船奪
獲僞前十一營師帥黃大旂一桿紅緞風帽黃綾帽逆匪名冊
令旂等件褚汝航親開大礮轟斃紅巾賊匪十數名長龍三板
等船鼓舞爭先自午至申又燒燬賊船二百餘隻轟斃水陸逆
賊三百餘名奪獲大小旂幟十五桿生擒長髮老賊二名逆船
三十隻米三百石火藥四百斤大小鉛子九桶衣帽器械無算
營官彭玉麟楊載福親坐三板小艇往來督戰礮聲如雷湘波

鼎沸楊載福身受鎗傷尙復指揮鏖戰自辰至酉燒燬賊船三百餘號燒斃紅衣長髮逆賊三百餘名生擒長髮賊匪十三名短髮賊匪四十餘名著船之火延燒岸上街市房屋百里外遙見火光燭天岸上之賊燒斃者實亦無數可記奪獲旂幟器械無算潭城賊船僅剩文昌閣上三十餘隻餘悉燒燬淨盡此初二日水師大獲全勝之實在情形也臣曾國藩以潭城逆賊被官軍水陸痛剿專盼靖港之賊救援亟應乘機攻剿俾逆賊首尾不能相顧明知水師可恃者均已調赴湘潭陸路各營除塔齊布周鳳山兩營正在潭城剿賊升用同知林源恩一營駐防平江此外岳州甯鄉兩次失利陣亡湘勇約七八百名又淘汰

遣散湘勇已千餘名現存營者僅及千名難期得力而事機所在又不敢不急切圖之是日卯刻親率大小戰船四十隻陸勇八百馳赴靖港上二十里之白沙洲相機進剿午刻西南風陡發水流迅急戰船順風駛至靖港不能停畱更番迭擊逆賊在礮台開礮適中哨船頭桅各水勇急落帆收泊靖港對岸之銅官渚賊眾用小划船二百餘隻順西風駛逼水營水勇開礮轟擊礮高船低不能命中戰船被焚十餘隻隨風漂散各水勇見勢不支紛紛棄船上岸或自將戰船焚燬恐以資賊或竟被逆賊掠取臣曾國藩在白沙洲聞信急飭陸勇分三路連撲靖港賊營冀分賊勢陸勇見水勇失利心懷疑怯雖小有斬獲旋即

卻退臣曾國藩見水陸氣餒萬難得手傳令撤隊回營此又初二日靖港剿賊失利之實在情形也初三日塔齊布偵賊在潭城密灣地方高豎望樓逆賊散處潭城總市將由水路逃竄知會水師迅速兜剿一面於辰刻分兵勇四路進撲城市生擒賊匪十餘名殺斃四十餘名賊已退敗忽已刻大雨如注官軍繩藥均溼遂撤隊回營該逆復蜂擁追來兵勇折回截殺署綏靖守備張萬邦單騎衝入賊隊手刃數賊登時陣亡額外童添雲四川咨記把總岳炳榮向前搶護各受重傷塔齊布指揮兵勇分投痛剿賊仍敗退回巢是夜四鼓并賊所擄上游大船數百隻駛至密灣城市各賊紛紛上船希圖乘風上竄彭玉麟商同

楊載福卽於初四日卯刻督率兩營戰船跟幫緊追午刻行抵
下攝司賊船檣帆林立彭玉麟楊載福分坐快蟹一隻三板一
隻先進賊開鎗礮抵拒水勇開放大礮轟斃賊匪百數十人賊
船四處散駛彭玉麟楊載福乘勢急進遇船卽燒船上馬匹及
所攜財物極多彭玉麟楊載福令眾勇毋許上船掠取專意射
火焚船是時北風甚勁順風縱火遇船卽著自卯至未燒賊船
六七百隻長髮短髮逐浪飄流紅巾黃巾隨波上下其中船戶
水手難以分別搭救岸赭水溫同歸浩劫事雖慘而功則奇水
戰火攻未有痛快如此者當燒船緊急時逆賊拋衣登岸折回
潭城管帶楚勇委員江忠淑偵知商同署湘潭縣劉建德覓熟

悉本處路徑已選安徽從九王炳元六品軍功武生黃德均帶
楚勇數十悄伏潭城西北角俟賊架梯出入時卽奪梯直上楚
勇嚴陣以待寅刻果見逆賊由西門緣梯而下伏勇將賊眾砍
斃乘勢奪梯而上登城大呼官兵上城逆賊不辨我兵多少倉
卒緣城竄逸該勇卽將城門洞開江忠淑帶勇直入縣城塔齊
布督帶兵勇繼至分門搜剿當斃長髮短髮二百餘名生擒長
髮六十餘名內一賊腰牌上寫春官副侍衛書士汪秉義安徽
人一僞司馬王玉春一僞司馬洪大貴皆廣西人一頭戴胎金
雙龍大紗帽身穿黃緞馬褂下穿紅緞繡龍腿褲背負令旂自
稱五軍統領大元帥羅口音似廣東人問其名堅不吐實桀驁

萬狀當卽斬決其曰又搜獲身穿黃馬褂長髮十三人以追賊在卽未及起解概予駢誅將該逆衣服剝下呈驗奪獲大小黃旂一百零一面大礮三尊戰鼓三面抬鎗五十四桿鳥鎗六十
九桿馬騾三十五匹黃龍金帽二頂火藥六桶鉛子四桶紅衣黃巾刀矛器械無算此初四日水師追剿大獲勝仗及初五日卯刻克復城池之實在情形也現在賊匪紛紛竄逸有上竄者有下竄者有徑回靖港者皆零星逃竄不復成軍已飭塔齊布等分投追剿并札飭各道府州縣四處搜拏管帶湘勇已革升用同知直隸州知州王鑫追賊至雲湖橋殺賊四十二名初六日設伏於魯家壩殺賊三百餘名生擒二十餘名又一股由淥

口竄至醴陵縣界約人數百將竄入江西萍鄉臣等飛咨江西撫臣速飭堵剿此次逆賊大舉南犯多曾經百戰兇悍之徒意圖竊踞湘潭與靖港之賊互爲首尾倘不及早撲滅不獨省城孤注難以圖存衡永郴桂及兩粵匪黨聞風響應從亂如歸東南大局不堪設想幸仗

皇上威靈八日之內水陸十獲大勝全股掃蕩賊膽已寒訊自賊中逃出者皆云粵楚滿髮老賊及皖鄂新附賊黨經此番屢次痛剿之後相向痛哭羣起怨尤老賊惡新賊之不爲盡力新賊疑老賊之暗洩軍情彼此猜忿初二初三兩日敗回收隊後在潭城分黨鬩鬪自相屠戮者約計數百之多皆臣等意想所

不到此次水陸痛剿斃賊近萬所獲旂幟器械無算兇渠僞目
除陣斬外或斃於水或斃於火爲數極多被擄解散之人約以
萬計逆賊實已聞風喪膽現在靖港一股亟應回軍剿辦俟水
陸兵勇調回卽行相機攻剿補用副將塔齊布忠義奮發勇敢
當先士卒樂爲之用通城剿賊已獲大勝此次復著奇功實屬
武員中傑出之才前辦江西土匪竄至茶陵案內請
旨賞換花領以副將補用尙未接准部覆應仍請

賞換花領加總兵銜並

賞給勇號藍翎守備周鳳山饒有膽略深得士心上年冬間在
常甯縣洋泉道州四庵橋本年正月在道州岩頭村屢次帶勇

勦匪迭著戰功擬以都司保奏三月十四日隨同塔齊布進勦崇通賊匪大獲勝仗此次奮勇當先克獲全勝應請

旨以游擊升用先換頂戴並

賞換花翎委員山西升用知府卽補同知褚汝航熟悉水戰情形才優膽壯調度有方請

旨免補同知以知府歸原省儘先補用並

賞加道銜委員卽選知縣夏鑾督勇力戰膽識俱壯應請

旨以同知升用先換頂戴藍翎千總楊載福以陸路武弁管帶水師被賊鎗傷左肋右腿數處裹創血戰奮不顧身陸續燒燬戰船四百餘隻請以守備畱於本省補用並請

賞換花翎六品軍功附生彭玉麟書生從戎膽氣過於宿將激
昂慷慨有烈士風臣會國藩前在岳州派往西湖搜查賊船該
生帶水勇三十餘名分坐兩小舟周歷重湖沿途搜剿殺斃長
髮賊匪三十餘名奪獲賊船數隻擬以縣丞府經保奏此次力
疾帶勇猶會同楊載福親坐小船焚剿賊船六七百隻免致他
竄厥功甚偉應請

旨以知縣歸部遇缺卽選分帶水勇哨官張宏邦奮勇當先搶
上賊船生擒黃巾賊目並焚燒賊船數十身受重傷應請

旨以千總歸於廣東拔補國子監學正銜候選訓導江忠淑係
前安徽撫臣江忠源胞弟督帶楚勇首先登城立將城池克復

甚合機宜應請

賞加五品銜此外各員弁兵勇奮勇出力者尙多俟卽核明勞績最著者開列名單籲請

皇上恩施加以鼓勵陣亡員弁兵勇俟該將等查明分別奏請賞卹庶才傑進用而廓清可期拔擢有眞而羣才競奮所有水陸勝負實在情形謹據實由驛馳奏伏乞

皇上聖鑒訓示施行謹奏

卷之八

靖港敗潰自請治罪摺

咸豐四年四月十二日

奏爲靖港戰敗水師半潰請

旨將_臣交部從重治罪并現在急籌補救籲請

特派大臣總統此軍恭摺奏祈

聖鑒事竊_臣自三月十四日回泊省河二十四五等日派水師

勦賊靖港兩獲勝仗二十八九初一初二初三初四等日派水

陸各營在湘潭連獲大勝殺賊近萬人燒船千餘號大股殲滅

克復縣城現已會同撫_臣另摺具報惟初二日靖港水勇潰敗

實由_{微臣}調度乖方有不忍不直陳於

聖主之前者自去冬欽奉

諭旨速援皖鄂兩省之盼望既殷微臣之求效愈急而其辦理亦愈乖謬臣之所以失者約有數端征戰之事論膽技或兵不如勇論紀律則勇不如兵募勇萬餘人必須有大員協同管帶又須有文武員弁及得力紳士一二百人節節統轄乃足互相維繫我

皇上前次

諭旨卽已預慮及之

臣

先時未能奏請大員幫同管帶又未嘗

多調文武員弁分布各營每營僅一二官紳主之紀綱不密維

繫不固以致潰散其謬一也靖港之戰

臣

因湘潭水陸大捷意

欲同時并舉破賊老巢使賊首尾不能相顧是日風太順水太

溜進戰則疾駛如飛退回則寸步難挽逮賊舟來逼礮船牽挽維艱或縱火自焚或間以資賊戰艦失去三分之一礮械失去四分之一是日但知輕進之利不預爲退敗之地其謬二也水勇無曾經行陣之人不得已招集船戶水手編派成軍訓練未及一月陸勇雖曾經訓練亦須隨同久經戰陣之兵接仗一二次乃可期其得力今驅未經戰陣之勇驟當百戰兇悍之賊一營稍挫全軍氣奪非真勇不可用乃臣不善調習而試用之故其謬三也臣整軍東下本思疾驅出境乃該逆大舉南犯臣師屢挫鄂省危急不能速援江面賊氛不能迅掃大負聖主盼望殷切之意清夜以思負罪甚大愧憤之餘但思以一

死塞責然使

臣

效匹夫之小諒置大局於不顧又恐此軍立歸

烏有我

皇上所倚以爲肅清江面之具者一旦絕望則

臣

身雖死

臣

罪

更大是以忍恥偷生一面俯首待罪一面急圖補救現在

臣

處

一軍除潰敗及汰遣外水師僅畱湘潭大勝五營二千餘人陸

路僅存戰勝湘潭與畱防平江之勇二千餘人若率以東下太

覺單薄而大小戰船自洞庭遭風靖港退敗以後存者須加修

葺失者仍須添造

臣

前於二月初五在湘潭時察知水勇未必

可恃當卽咨商廣西撫

臣

勞崇光代募曾經戰陣之水勇一千

名旋准咨覆已在潯梧一帶如數招募委知府李孟羣管帶

臣

已疊次咨催令其迅速前來又臣於三月初七在岳州遇風壞船回省時卽派人往衡州續造大快蟹船二十號又准兩廣督臣葉名琛咨稱現派總兵陳輝龍督水師二百六十名解礮一百位已於二月二十五起程前來此時尙未見到亦已咨催合此三者又將水手認真挑換一兩月間水師當有起色但微臣自憾虛有討賊之志毫無用兵之才孤憤有餘智略不足仰累聖主知人之明請

旨將

臣

交部從重治罪以示大公并籲懇

皇上天恩特派大臣總統此軍臣非敢因時事萬難遂推諉而不復自任未經赴部之先仍當竭盡血誠一力經理如船隻已

修水更可恃臣亦必迅速駛赴下游不敢株守片刻所有微臣

辦理錯謬據實直陳自請治罪并請

特派大臣緣由恭摺由驛具奏伏乞

皇上聖鑒訓示謹

奏

硃批另有旨此奏太不明白豈已昏憤耶欽此

保水陸統領各員片

咸豐四年四月十二日

咸豐四年四月十二日

再方今東南大局江南皖鄂半淪賊中萬不足以有爲必須兩廣湖南併力以成一軍從上游建瓴而下庶足以扼賊之吭斷賊之餉兩廣湖南之亟宜出師剿賊此必不可易之局也特微臣才疏識闇用兵無術終必貽誤大局是以籲懇

皇上特簡謀勇兼資之大臣畀以水陸總統重任實見此軍關係非細勝任爲難非臣敢置身事外也至分統水陸諸人如副將塔齊布之忠勇絕倫守備周鳳山之精練持重貴州知縣徐河清之膽略優長堪膺陸路統領分領之選塔齊布周鳳山現在臣軍徐河清現經臣與撫臣奏調在案水勇惟兩粵最強必

須粵中官紳統帶方可駕馭得宜查廣西臬司許祥光右江道張敬脩皆夙諳水戰素蓄健卒製備火器多而且精該二員膽識過人與現在臣軍之褚汝航新經咨調之李孟羣均堪膺水路統領分領之選相應請

旨飭令許祥光張敬脩各帶精勇礮械來楚併入此軍厚集其勢以保東南之全局倘蒙我

皇上俯如所請得謀勇兼優之大臣主之於上而以此數員者分布其間必能同心戮力迅掃逆氛臣雖身膺重罪亦足少紓耿耿之忱謹附片具

奏伏乞

聖鑒訓示遵行謹
奏

恭謝

天恩摺

咸豐四年五月初八日

奏爲恭謝

天恩事本年五月初二日准湖南撫臣駱秉章咨稱准兵部火票遞到咸豐四年四月二十三日內閣奉

上諭曾國藩親督舟師進剿雖小有斬獲旋以風利水急戰船被焚以致兵勇多有潰敗據曾國藩自請從重治罪實屬咎有應得姑念湘潭全勝水勇甚爲出力著加恩免其治罪卽行革職仍趲緊督勇剿賊帶罪自效欽此又准撫臣咨稱承准軍機大臣字寄同日奉

上諭駱秉章等奏官軍水陸獲勝克復湘潭縣城又曾國藩奏

靖港水師潰敗自請治罪各一摺已明降諭旨將塔齊布等分別加恩並將曾國藩革職仍責令帶罪自效以贖前愆曾國藩統領舟師屢有挫失此摺所陳紕謬各情朕亦不復過加譴責現在所存水陸各勇僅集有四千餘人若率以東下誠恐兵力太單該革員現復添修戰船換募水勇據稱一兩月間當有起色果能確有把握亦尙不難轉敗爲功目下楚北賊蹤由應山竄回德安隨州之賊亦回武漢是鄂省望援甚急該撫等務當督飭水陸各軍迅將此股敗竄之匪殲滅淨盡兼可赴援武昌以顧大局將此由六百里加緊諭知駱秉章兼諭知塔齊布曾國藩知之欽此竊臣自上年十月十一日奉

命帶勇援鄂援皖嗣後屢奉

諭旨嚴催

飭令迅速東下不准專顧桑梓乃臣於正月由衡赴省卽值賊

舟上竄賴甯鄉戰勝驅逐出湖臣率師追至岳州又值該逆數

萬人大舉南犯仰託

皇上威福湘潭水陸兩軍大獲全勝殲賊近萬以本省言之有

岳州靖港之敗有甯鄉湘潭之勝臣之功罪尙不相掩以大局

言之武昌危急不能赴援江面逆氛不能迅掃奉

命數月之久而水師忽然半潰戰船復多損失上無以副

聖主飭催之嚴下無以應鄰省望援之切臣所以誠惶誠恐且

愧且恨無地自容籲請治罪者此也迺蒙

皇上逾格

天恩俯從寬宥仍令督勇勦賊既曲貸其前愆復勉期其後效

重申

寄諭

訓示周詳聞

命之下感激涕零現在賊踪全竄下游所有六溪口倒口金口等處支河小湖藏泊船隻之所皆被該匪占據或於口門築造礮臺兩岸修置土城以陸路之賊守河干之船爲抵死抗拒之計臣此次整旅東下喫緊固在水路而制勝尤須陸軍日內將

陸勇嚴汰另募又添用勁兵以濟勇之不足水師亦重整規模
廣東派來之兵與廣西新招之勇計於本月內可以到省衡州
新造之船與長沙重修之船亦於出月初可以竣工一俟料理
完畢臣卽星夜遄征誓殲此賊以雪挫敗之恥而贖遲延之罪
庶冀稍答

高厚鴻慈於萬一所有

微臣感悚下忱理合繕摺叩謝

天恩伏乞

皇上聖鑒謹

奏

硃批知道了欽此

覆陳湘潭甯鄉靖港勝敗情形片

咸豐四年五月初八日

再臣摺奉到

硃批此奏太不明白豈已昏憤耶欽此竊臣自三月十四日回
泊省河卽有賊舟千餘竄至樟樹港喬口靖港一帶因臣舟師
在省不敢直犯長沙遂由西岸登陸上竄甯鄉湘潭意欲盡擄
上游船隻爲兩頭夾攻困我省垣之計臣於十三日在湘陰途
次卽飛調塔齊布周鳳山倪長誥等由通城回省旋於十八日
遣魏崇德等帶陸勇千八百人由甯鄉陸路迎剿二十一日二
十五日兩次遣水勇千餘人至靖港水路堵剿水路之師二十
一日小勝二十五六等日大勝殲賊百餘陸路之師二十五日

始在甯鄉開仗我軍挫敗傷亡至五百餘人塔齊布周鳳山等
回省卽於二十六日渡湘而西臣送至河干囑其與魏崇德等
合師堵賊竄湘潭之路維時尙未知二十五日甯鄉已敗之信
也塔齊布等在途次聞信卽折回趨潭二十八日以後六獲大
勝前此會奏摺內已詳悉具報矣水軍自兩次在靖港迎剿後
二十七日仍回省河聞湘潭失守之耗二十八日遣候選知府
褚汝航等率五營水師二千餘人往潭攻賊上游新擄之船初
一日以後屢獲勝仗亦經會奏在案四月初二日臣自率留省
之水勇五營陸勇八百前往靖港意欲同時並舉破賊老巢斷
賊歸路不料因風急水溜繚挽難行遂至敗潰前此三月二十

五當靖港水路獲勝之日卽甯鄉陸軍敗北之日後此四月初
二當靖港水陸挫敗之時卽湘潭水陸大捷之時陸路竄潭之
賊係由湘西繞越而上水路集潭之賊係由上游擄船而下均
未由省經過此賊蹤及用兵之曲折情形也臣自靖港歸來念
船礮損失不能遽修武昌危急不能趕救憂憤之極昏憤數日
摺內僅自陳紕繆未能將上下勝敗異地同時之故詳晰聲敘
誠如

聖諭所謂太不明白茲欽奉
批飭不敢不縷細覆奏仰慰
聖廑謹

奏

硃批知道了欽此

請提督塔齊布會合東下片

咸豐四年五月初八日

再此次欽奉

上諭著駱秉章塔齊布會國藩卽督水陸兵勇乘勝卽行統兵
東下迅殄妖氛欽此伏查靖港餘匪業於四月初八九等日全
竄下游岳州以上現無賊蹤署提督塔齊布卽日先赴岳州
親帶水陸兵勇出月初准赴岳州自岳州以下卽出湖南地境
臣有援鄂之責自應出境勦賊撫臣駱秉章職任地方難以出
境署提臣塔齊布亦有地方專責未敢遽赴外省惟塔齊布與
臣共事年餘實見其忠勇絕倫堪膺辦賊重任曾經奏保在案
今同奉

諭旨統兵東下該署提督白應會合遄征無庸稍涉拘泥株守
本省其提督印務應否派員護理抑或帶印出省之處伏候
聖裁謹附片請

旨

硃批另有旨欽此

請單銜專摺奏事片

咸豐四年五月初八日

再臣係革職人員蒙

恩飭令督勇自效此後出境勦賊所有一切軍情必須隨時奏報又疊奉

諭旨垂詢隨帶員弁人數漂損船隻數目及通城勝仗遵

旨酌保數員均應詳悉覆奏前次挫敗有應行參劾之員此次水陸二軍重定章程亦擬奏求

訓示可否容臣專摺奏事之處出自

皇上天恩微臣未敢擅便謹附片請

旨

硃批著准汝單銜奏事欽此

奏稿卷二

三

PL
2708
A1
1876
24

曾文正公奏稿

卷之三目錄

水師克復岳州南省已無賊蹤摺

咸豐四年七月十二日



調浙江龔振麟來楚造礮片

請催廣東續解洋礮片

水師前後起行日期片

水師疊獲大勝將犯岳賊船全數殲滅摺

七月十六日

請領捐照摺

水師失利陸軍獲勝摺

七月二十一日

李卿穀請卹片

岳州水陸官軍四獲勝仗摺

閏七月初三日

岳州水陸大勝踏平賊營進紫螺山摺

閏七月初九日

請以夏廷樾總理糧台片

胡林翼羅澤南隨同東征片

水陸官軍疊獲勝仗現在剿辦情形摺

八月初四日

謝三品頂戴恩摺

八月十九日

克復崇陽戰勝咸甯水師疊次獲勝摺

八月二十二日

水陸續獲勝仗現籌進兵摺

水陸大捷武昌漢陽兩城同日克復摺

八月二十七日

李宗涑等畱營差委片

遵 旨彙保員弁兵勇第一單摺

水師搜剿襄河續獲大勝摺 八月三十日

查明賊目殲斃狀及賊中各情片

請 飭江西等省籌解餉銀片

統籌三路進兵摺 九月初七日

保案第二單摺

請 飭陝西解餉來營片

謝 恩仍辭署鄂撫摺 九月十三日

水師克復岳州南省已無賊蹤摺

咸豐四年七月十一日

奏爲水師克復岳州越日大股續至復被水師痛剿全數殲滅
南省已無賊蹤恭摺馳奏仰祈

聖鑒事竊逆賊自復踞岳州分股竄越西湖攻陷龍陽分陷常
澧嗣聞官軍大至卽於六月初五六等日駕駛船隻退守岳州
東南門外添築土城木城二十餘座新牆對河及閣鎮市等處
四路設卡拆毀橋梁爲負隅久抗之計臣等念賊舟累萬盈千
非舟師莫能制其死命卽飭水師後營兼營務處道銜山西卽
補府褚汝航副後營升用同知夏鑾左營卽選知縣彭玉麟右
營卽補守備楊載福各帶水勇合以先鋒嚮導等船共計二千

人於十三日自省河頭幫起行進泊鹿角遏賊上竄之路時提
臣塔齊布陸營駐紮新牆分兵援常澧一帶臣等因其兵力稍
單會調保升知府羅澤南帶湘勇一千新授岳州府知府魁聯
帶寶勇一千先後會剿復調周鳳山由常德馳至新牆搭造浮
橋約期水陸並進二十七日褚汝航等進泊萬石湖親駕小船
前往君山一帶探明虛實察看地形見賊舟灣泊甚多遂將小
船前往誘敵逆舟開礮抗拒嚮導官藍翎軍功文生何南青奪
獲賊船一號擒賊五名因天色已晚仍回泊萬石湖該營官等
業已探明虛實會商定計以君山雷公湖等處先須設伏再用
小艇駛入南津港誘賊出追乘隙截擊遂於二十八日繪圖貼

說稟商臣等二十九夜分五隊進兵彭玉麟埋伏君山南岸楊載福埋伏雷公湖上游夏鑾及先鋒營由鳊山直趨南津港褚汝航隨後策應又派何南青在新牆河口多張旂幟作爲疑兵午刻夏鑾等舟行距港不遠該逆出拒我軍開礮一週轉舵佯敗該逆不敢出追我軍轉頭開礮彼此相持突遣三板數隻斜趨入港賊遂蜂擁而出三板又復佯卻逆舟左右攻圍忽楊載福雷公湖伏兵先起抄賊之尾彭玉麟君山伏兵繼起攔賊之腰褚汝航坐船亦到併力合攻擊沈賊舟數隻中有大頭目身穿黃馬褂手執黃旗被我軍轟斃落水匪船登時淆亂狂竄下游白相碰擊我軍嚴鼓進追燬沈賊船百餘號轟斃溺斃賊匪

約二百餘名生擒六十二名奪獲賊船大小三十四隻鐵礮十二位銅礮一位抬鎗四十桿馬二十二匹旗幟僞書無算是夜各營暫泊君山東岸南津港賊舟宵遁初一日五鼓各戰船駛至城下見水陸之賊並空褚汝航率水勇入城安撫難民蹋毀賊營此三十初一等日水師獲勝克復岳城之實在情形也時各營水師分泊南津港君山一帶仍刻刻戒嚴防賊再犯初二戌刻探明下游有賊船駛至該營官傳令各營不許張燈止暗點火香火繩坐守礮側將小舟設伏港口大船分布湖心預備迎敵初三日卯刻賊果蜂擁而來我軍分五隊迎敵先令嚮導官何南青先鋒蘇勝等誘敵褚汝航率夏鑾由中路迎敵彭玉

麟領各船仍由左邊繞湖之西遙抄其尾楊載福領各船仍由右邊沿湖之東斜擊其腰該匪船駛過城陵磯卽遇嚮導官小船意甚輕之何南青繞湖佯走逆船尾追我先鋒艇遽出褚汝航夏鑾催各船齊進鎗礮兼施趁北風稍逆之字斜行穿梭開礮擊折該匪頭船之舵該匪紛紛落水其船遂爲我得各勇爭握籐牌跳船立斬賊首復有大鈞鉤船上坐戴紫金冠穿黃馬褂黃傘龍旗之賊目我軍攢礮齊擊各弁勇必欲得而甘心該匪脫袍撲水登時泅沒彭玉麟由湖西抄尾而來正遇大鈞鉤賊船數隻扣篷迎敵彭玉麟親點大礮羣子散落中賊十餘人賊船卽時紛亂復拋擲火罐中賊之火藥船大煙突起迷漫半

湖哨官把總孫昌國爭先跳入賊船被賊還擲火包身受重傷
左營各戰士不稍退怯反冒火衝煙奮力追殺殲斃偽丞相一
名生擒三十五名楊載福身坐三板艇由湖東沿岸斜行捷如
飛鳥初無礮聲及近賊船舉旗一招眾礮齊響斃賊十餘名內
有船插黃旂身披黃袍之賊執兵護衛者十餘人招手相向楊
載福憤甚手挺長矛催船前進登時刺殺餘匪全行撲水逆船
遂爲所獲楊載福微傷左臂轉戰不休事後查得黃袍之匪爲
汪得勝偽官丞相者也該匪三路皆敗自相仇殺狂竄下游稽
汝航出入於濃煙巨浪之中往來策應督令大隊進追由城陵
磯螺山白螺磯等處直追至臨湘縣對河距岳州七十五里時

日已西沈始行鳴金收隊逆船三四百號全軍覆沒共計斬首二百七十二級生擒長髮短髮一百三十四名奪船七十六號燒斃溺斃之賊難以查悉所獲號旗軍械據褚汝航夏鑾開單呈繳大小鐵礮二十五位抬鎗紅鎗一百一十三桿火藥二十八桶鐵彈三十一桶藥箭一匣黃馬褂三件黃繡花蟒袍二件繡龍金花帽十三頂大黃統傘三把龍虎旂七面令箭十三枝繡字炎三總制龍帽一頂紫金冠一頂紅旗號褂風帽三捆籤筒筆架等共四十一件彭玉麟呈繳大小礮十七位馬十四匹大小黃旗六十餘面紅黃號馬褂六十餘件火箭一捆龍袍二件僞丞相大黃龍虎旗六面子藥八桶抬鎗刀矛百餘件楊載

福呈繳黃旂號褂補子三捆龍袍二件大小礮十四位抬鎗鳥鎗長矛短刀百餘件火藥鉛子三桶何南青呈繳僞秋官右丞相坐船一隻米船二隻號褂風帽一捆鎗礮刀矛九十六件騾馬五匹此次逆賊重踞岳州被官軍擊退復集老長髮悉銳來犯意欲將我軍誘泊孤港然後水陸夾擊計甚狡毒幸我師連捷轟擊無遺其由陸路同時來犯者復經提臣塔齊布派都司彭三元諸殿元普承堯等沿岸截剿轟斃執黃旗賊目一名餘匪百餘名生擒四十五名奪賊馬十四匹賊船八隻旂幟號令軍械二百餘件水路敗竄上岸之賊概經我軍截殺此皆仰託皇上天威遠震故能將士用命大挫兇鋒郡城克復賊蹤遠竄

道銜山西卽補府褚汝航綜理營務謀定後戰膽識過人應請免補知府以道員歸部儘先選用升用同知遇缺卽選知縣夏鑾輕舟誘賊乘勝力追不避危險應請以同知歸部遇缺卽選並

賞戴花翎卽選知縣彭玉麟忠勇性生氣吞兇逆奮不顧身應請加知州銜並

賞戴花翎補用守備楊載福手刃賊目裹創力戰所向無前應請以都司畱於本省遇缺卽補並請

賞加勇號藍翎軍功文生何南青嚮導得力洞悉賊情應請以主簿歸部選用其餘出力員弁兵勇可否容臣等擇其尤爲出

力者核實開單保奏出自

皇上天恩所有水師克復岳州大股續至復被水軍痛剿全股殲滅各緣由謹會同提臣塔齊布恭摺由驛六百里馳奏伏乞

皇上聖鑒訓示施行謹
奏

調浙江龔振麟來楚造礮片

咸豐四年七月十一日

再逆賊占據長江三千餘里擄掠民船數萬餘號此次舟師進
剿即使處處得手亦恐非數月半年所能淨盡所有礮位一宗
必須廣爲儲備且從前失陷城池礮位皆爲賊有現在克復岳
州常德將來克復武漢黃州皆須多備礮位乃足以資防守除
奏請

飭催兩廣督

臣

續解夷礮

數百尊

外查有浙江候補知縣龔振

麟及其子龔之棠皆精於造礮自製鐵模與洋礮無異合無仰
懇

皇上天恩

飭下浙江撫臣飛調候補縣龔振麟并其子龔之棠迅速來楚
其曾經造成之大小鐵礮模一併帶來以資速鑄臣等一面奏
聞一面咨商浙江撫臣黃宗漢專差迎提搬取鐵模等件如蒙
諭旨允准飭調其於舟師礮位之接濟南北兩省各城之防守
均屬大有裨益伏乞

聖鑒訓示施行謹附片具

奏請

旨

請催廣東續解洋礮片

咸豐四年七月十一日

再查水師事宜以造船置礮二者爲最要船隻縱修造堅固而風波間有飄失戰陣不無損傷數月之後損失者必須添補完好者亦須油艙若非早爲預備隨時整理直待全數破壞之時眾船齊修必致停兵待船坐失機宜臣國藩自洞庭遇風之後卽於三月中旬在衡州設廠續造新船六十號自靖港敗退之後又於四月下旬在長沙設廠修理舊船百餘號衡州廠工於五月之末完竣長沙廠工於六月之末完竣現雖整備各船足資征剿而兩處船廠仍不停工臣駱秉章與臣國藩悉心咨商酌畱戰艦十餘隻兵勇數百餘人在省河操演如出征之船偶

有損壞則由衡厥省河駕放好船前往更換庶源源接濟無老
師糜餉之患至於礮位適用之品最爲難得此次蒙

皇上屢降諭旨飭令兩廣督臣葉名琛購備洋礮爲兩湖水師

之用現已先後解到六百尊來楚皆係真正洋裝選驗合用之
礮湘潭岳州兩次大勝實賴洋礮之力惟原奉

諭旨共購辦千餘尊現止來六百尊尙屬不敷分配且江面非
可遽清水師尙須增添尤須有洋礮陸續接濟乃能收愈戰愈
精之效相應請

旨飭催兩廣督

臣

將應行續解之夷礮數百尊趕緊分起運解

來楚於江面攻剿大有裨益謹附片具

奏請

旨

水師前後起行日期片

咸豐四年七月十一日

再前經咨調廣西升用道李孟羣招募兩廣水勇一千名於六月初六日始到長沙廣東續解之五起六起夷礮一百八十尊於六月十二日始行解到山東登州鎮總兵陳輝龍到湘以後新造淺水拖罟二號於六月之末畢工臣國藩卽於七月初六日自省河起碇開行鎮臣陳輝龍帶廣東水師弁兵四百餘員名李孟羣帶兩廣水勇一千名亦於初六初八等日起行均用湖南舵工水手人等攬配約計前後兩幫水師共四千餘人又用陸勇二千雇船隨水師以行每遇戰船灣泊之處卽用陸勇登岸紮營以資護衛現在水師前幫二千人到岳已屢獲勝仗

臣國藩率後幫到岳卽當會合痛剿冀埽逆氛以慰
聖廕所有水師前後起行日期謹附片奏

聞

硃批知道了覽奏稍慰朕懷汝能迅速東下藉此聲威或可掃
除武漢之賊朕日夜焦盼憂思彌增護船陸勇終恐未可深靠
欽此

水師疊獲大勝將犯岳賊船全數殲滅摺

咸豐四年七月十六日

奏爲水師疊獲大勝將二次三次犯岳之賊船全數殲滅恭摺

馳奏仰祈

聖鑒事竊前幫水師於初一日克復岳州初三日大獲全勝業將各情形會奏在案初五日戌刻嚮導官何南青探知下游擂鼓台一帶有賊船數百號恐復乘風上竄徹夜戒嚴初六日卯刻該營官等會議以北風甚勁與其坐待賊至不若迎其未至而擊之遂令左營彭玉麟右營楊載福前敵副後營夏鑾先鋒營蘇勝等二隊策應營務處褚汝航自領本營督陣未刻行至道林磯遙見逆舟蜂擁而來及我軍頭敵將到該匪一面開礮

抵拒一面齊卸布帆停泊老岸爲以逸待勞反客爲主之計左
右兩營由西岸占上風攻擊左營戰艇駛近賊巢開礮數輪轉
帆稍息右營連檣繼進開礮數輪亦轉舵稍息左營復進如此
更番疊戰正副後營及先鋒營各船分兩翼包住併力向前浪
激煙迷礮子如雨有持花筒燒賊者有將火罐遙擲賊船者有
手握藤牌躍上賊船受傷者有以三板小艇逼近誘賊返被擊
中者雖殺賊甚多而我軍傷亡亦眾鏖戰二時之久勝負未分
時日將西墜北風大作下游賊艘仍復魚貫而上計停泊者續
來者約賊舟五六百號而我軍船僅七十餘號離南津港老營
已逾六十里之遙士卒竟日未食若卽行收隊該匪必趁勢壓

追有不堪設想者該營官等於進退兩難之中出萬死一生之策楊載福親駕三板艇穿入賊隊且戰且下約三四里許繞賊之背截其來船轟沈湖北划子三號船上之賊紛紛墮水復親擲火罐火毬因風縱火自下而上連燒十數船下游續來之船始行退竄上游賊船迴顧本營屯聚之處延燒已徧烈焰沖天倉皇失措賊陣遂亂彭玉麟見五綵畫龍三桅船知係賊目冒險衝入該匪攢礮擊兼放火箭彭玉麟頸後及左手右骹三處受傷哨官秦國長中礮陣亡彭玉麟猶裹創力進竟奪其船船中搜得龍袍龍帽上繡金字偽銜鋪陳華麗金碧熒煌乃偽北王韋正之兄之座船賊中稱爲國宗兄

臣

國藩前經密奏者

也時褚汝航麾旗督戰攔腰截擊復遇畫龍巨艦遂作擒賊擒王之計急起直追鎗礮環擊該匪勢不能支上岸狂竄落水者無數其船遂爲所獲並獲僞印一顆查係僞承宣林姓座船其裝飾與韋逆之船相等夏鑾率哨官歐陽春往來衝擊鎗礮僞十三檢點黎振輝該逆向眇一目屢次上犯湖南匪黨敗竄之時該逆猶持刀督戰竟被殲旃後營哨官守備羅管全把總呂鎮往來夾擊轟斃僞丞相曾姓奪獲僞印一顆時各營奮力合攻上岸之賊如蟻緣牆撲水之賊如鳧逐浪餘皆自投烈燄燒燬無遺是日自未至戌鏖戰數時之久晚間仍在螺山對岸紮營約計燒船四百餘號其得脫者僅數十號耳斃賊約二千名

生擒百二十餘名奪船二十餘號內有長龍戰船一隻大礮十
四位繡字北殿右四承宣金龍冠一頂殿前正丞相龍帽一頂
功勳北殿右二承宣龍帽一頂北殿右四承宣黃帽二頂功勳
南殿左一指揮帽一頂功勳南殿左參護帽一頂承宣將使紫
金冠一頂北殿承宣繡龍風帽二頂各繡僞銜於冠上五色繡
紛侈麗無匹內有十四龍金冠一頂鑿金爲字製尤僭妄又黃
緞傘三把繡龍黃馬褂二件黃羽綾馬褂一件畫龍宮扇六把
紅黃繡龍卓圍二件龍袍一件蟒袍一件承宣補褂一件團龍
補服圓領袍一件大紅緞靴三雙黃緞鞋一雙承宣龍印一顆
丞相龍印一顆印匣均用黃龍綉袱裹以銀葉其餘旂幟號衣

紅巾黃帽抬鎗子藥刀矛馬匹之屬合計千餘件不能悉載此
初六日大獲全勝之實在情形也臣國藩正擬會摺飛報於抵
岳時拜發隨於十五日已刻到岳據各營官稟稱十四日午初
該逆在城陵磯下游埋伏小划二百餘隻匪黨皆上坡藏匿其
螺山對岸之夾洲一帶灣船約千餘號沿岸築有礮台洋陵磯
以上一字排列戰船數十號意欲以小艇誘我軍深入然後伏
舟齊起迎頭抄尾計甚狡毒時提臣塔齊布陸營駐紮岳州北
門外五里許褚汝航先期稟商預備水陸夾擊隨率楊載福彭
玉麟夏鑾等魚貫而行舟過城陵磯該匪以爲中計伏匪正欲
上船抄尾不期樹林內號礮一聲提臣陸路伏兵四起該匪紛

紛上船水軍分途迎擊該伏匪復竄上坡有陸兵截殺者有亂
擠落水者該逆見伏船已破心遂忙亂我軍乘勢擠進候補千
總張世基然燒賊船一隻時螺山一帶上駛之賊船約一千五
六百號見火起卽行折回復被我軍趲燒而該匪戰船猶橫阻
江心開礮抵拒候補把總歐聯彪奮斬紅衣長髮老賊一名右
營哨官秦國祿復奪得快蟹賊船一隻上有洋礮十一位卽前
此靖港敗仗所喪失者也後營哨官羅管全手提長矛躍入賊
船殺斃長髮賊數名左營各哨官併力拋擲火罐延燒賊船十
餘隻褚汝航座船與賊舟僅離尋丈被一礮傷勇三人立斃其
二各勇愈憤開礮愈密賊正思退有藍油匪船一隻上插大黃

旗載悍賊百許人被我軍三板七號長龍四號攢礮圍擊該匪紛紛撲水僅贖七名歐陽春見贖匪無多急欲躍上賊船被賊拋一火彈反將我軍長龍船延燒歐陽春等情急勢欲撲水各三板竭力搶救而藍油匪船竟得乘空逃出其餘賊船亦皆下竄時已昏黑未便窮追水陸各營均卽收隊三更後水軍回泊南津港總計燒賊船三十餘號奪賊船七隻轟斃溺斃殲斃約三四百名生擒三十五名此二次該逆從武漢下游分起上犯誓爭岳州仍處處埋伏純用詐謀幸仗

皇上天威屢戰屢捷以少勝多殲斃大頭目數名各將士非常奮勉當酷暑鏖戰之際每出隊俱用長巾漬水圍繞心窩馳騁

烈日之下隨漬隨乾辛苦萬狀傷亡亦復不少然士氣終不稍挫營務處兼正後營道銜山西卽補府褚汝航躬親督陣膽力俱壯前次已保升道員卽選此次應請

賞加運司銜副後營升用同知夏鑾帶勇策應甚合機宜前此已保同知卽選并請

賞戴花翎此次應請

賞加運同銜左營卽選知縣彭玉麟裹創陷陣誓不與賊俱生前次已保同知銜並請

賞戴花翎此次應請免選知縣以同知歸部選用右營升用守備楊載福繞出賊後乘風縱火初六日之戰甚得其力前次已

保都司卽選並請

奏和卷三

賞加勇號此次請免補都司以游擊畱於本省遇缺卽補嚮導官藍翎軍功何南青偵探得實前次已保主簿選用此次請免選主簿以布政司照磨歸部卽選其餘出力員弁兵勇請由

臣

等核其勞績最著者開單籲懇

皇上恩施以示鼓勵哨官六品軍功秦國長前數次打仗出力擬保千總此次擊賊陣亡深堪憫惻合無仰懇

皇上逾格

天恩准照千總例給卹以作士氣而慰忠魂其各營傷亡兵勇現飭查明照例辦理所有水師疊獲大勝各緣由謹會摺由驛

六百里馳奏伏乞

皇上聖鑒訓示遵行謹

奏

請領捐照摺

咸豐四年七月十六日

奏爲請

旨飭部將前請部監執照頒發以速捐務而濟要需恭摺奏祈
聖鑒事竊臣於上年十一月二十六日附片具奏請

飭部查照凡由

臣

經手援本省城工事例上捐者仍准歸入籌

餉新例之內由

臣

開單咨部隨時發給部照此後臣行營所至

如湖北安徽等省准令

臣

隨處勸捐一例咨部仍隨時發給部

照庶捐生不致觀望等情於十二月十六日奉到

硃批該部知道欽此欽遵在案嗣於本年二月十五日奏請江

西四川湖南三省各派大員勸捐仍照部定新章預發空名執

照由各員填給請

飭部頒發空白部監二照共四千張以一千張封發江西以一千張封發四川以二千張封發湖南及

臣營當奉

硃批戶部速議具奏欽此迄今數月之久尙未接准部文六月二十二日傳閱邸鈔本年三月初六日奉

上諭戶部奏遵議曾國藩請頒發部監執照派員勸捐軍餉一摺著照曾國藩所請湖南卽派署鹽道夏廷樾編修郭嵩燾江西卽派前任侍郎黃贊湯升用知府朱孫詒四川卽派按察使胡興仁編修李惺各就地方情形妥爲勸諭以濟曾國藩所帶礮船軍需之用並令各該督撫添派公正紳士幫同地方官實

力辦理欽此恭讀之下始悉臣前奏已蒙

諭旨允准因道途梗塞迄未接准部文亦未見頒到執照現在

臣與提臣塔齊布一軍水陸共計一萬三千餘人月需餉銀六

七萬兩湖南司庫久形支絀卽奉

諭協濟之川廣江西等省解款亦屬無多本省派員籌捐又因

換照無期不甚踴躍目下水陸兩軍卽日出境勦賊求一月之

口糧尙不可得臣與提臣萬分焦灼是以專差賫摺赴

京卽令赴部守領前項執照合無仰懇

皇上天恩飭部迅將部監執照共二千張封給差弁領回其江

西四川各一千張亦懇

飭令設法封寄各該省以便廣勸而濟要需無任迫切禱企之至再臣自上年八月移駐衡州卽設局勸捐凡捐虛銜者俱借用湖南藩司城工例實收捐實職者俱借用籌餉事例實收嗣蒙

聖慈俞允准臣隨地勸捐一例咨部換照自長沙起行後臣又將原奏自刻實收一體發給各捐生收執計自上年九月至本年五月共捐過三百四十八名現已造冊送部仍將副實收彙繳俟前項空白執照領到時擬先將現捐各員如數填給庶已捐者不稍畱難未捐者益臻踴躍於軍餉不無裨益合並陳明所有專差請領執照緣由理合專摺陳奏伏乞

皇上聖鑒訓示遵行謹

奏

硃批戶部速行查辦欽此

夢林名

二

水師失利陸軍獲勝摺

咸豐四年七月二十一日

奏爲水師失利鎮道員弁同時陣亡陸營旋獲大勝恭摺奏

聞仰祈

聖鑒事竊初三初六十四等日水師連獲勝仗業經馳奏在案

臣國藩偕鎮

臣

陳輝龍於十五抵岳時賊雖屢敗尙盤踞城陵

磯下游一帶又將漢口賊舟數千傾巢上犯連檣數十里出沒

無常陳輝龍卽欲親督廣東水師四百餘員名於十六日出隊

進剿

臣

國藩以大隊甫到岳州必須相機漸進囑緩其行

臣塔

齊布亦勸其稍緩陳輝龍謂自四月下旬到楚因船礮未齊坐糜餉項至兩三月之久啟行後復守風耽閣焦灼難名急思殺

賊自效且水陸官軍宜先扼城陵磯以固南省西川門戶若不
乘勝急剿使賊占踞此地剿辦愈難其持論不爲無見褚汝航
夏鑾亦俱慫恿並請隨同進剿臣國藩因陳輝龍在水師營伍
四十餘年老成練達必能相機而行且褚汝航等屢勝之將每
論戰守皆合機宜當不至於貽誤是以未經沮止是晚仍函商
該鎮囑以下游水急進易退難如遇南風不必開仗且沿江港
汊慮有埋伏獲勝後仍勿窮追等語鎮臣函覆亦深以爲然並
知會提臣預撥陸路兵勇策應十六日辰刻陳輝龍自坐拖罟
督率所部前行褚汝航夏鑾分坐戰船繼進李孟羣尙未到岳
其前隊廣勇先到者亦隨陳輝龍會剿左營彭玉麟右營楊載

福均酌撥長龍三板藉作聲援時風色尙平靜行至城陵磯正遇該逆出隊上犯該鎮道等排陣合攻鎗礮齊發轟斃賊匪數十名燒燬賊船數隻賊卽下竄游擊沙鎮邦礮船乘勝跟追陳輝龍見風勢愈大卽插旗收隊因恐沙游擊頭船有失又復督催拖罟趕往救護船身重大膠淺於旋渦激流之中該逆見拖罟膠淺卽時蜂擁而來旋湖港伏船亦出並潛由西岸邇迤而上復有逆賊數百人在岸上護緯夾攻廣東弁兵之船與廣西何越珽等之船均奔往救護又被風橫吹而下互相擁擠鎗礮難施當被賊船擁近兵勇陷入重圍不能進退被賊戕斃多名餘皆梟水逃生陳輝龍沙鎮邦均卽陣亡褚汝航等見陳輝龍

危急義不獨生馳往拚救無如賊勢益眾我軍勢不能支褚汝
航手刃數賊夏鑾與賊交鋒均被重創落水殉難廣東署千總
何若灋廣西帶與候選府經唐幪一同遇害維時提臣陸營雖
出隊至城陵磯因隔港不能飛越無從救援各戰船有冒死突
回者賴前營及左右二營以三板艇斷賊尾追行至城陵磯又
得陸營接應始獲保全計陳輝龍一營船礮盡失褚汝航夏鑾
二營失去快蟹四隻三板六隻李孟羣一營失去快蟹四隻波
山艇一隻長龍二隻三板四隻惟彭玉麟楊載福完全無恙此
十六日水師失利之實在情形也臣國藩與陳輝龍等經營數
月晝夜趕辦每船器械至百餘件之多一旦損失將半傷心隕

涕憤恨何言十七日收集散亡點存礮械一面飛催省城所造三板等船以資添補十八日卯刻臣塔齊布親督陸營出隊適逆匪三千餘人由城陵磯舍舟登岸思欲踞險紮營並分三股來撲我軍亦分三股迎勦臣塔齊布匹馬當先兵勇奮力猛進陣斬悍賊十餘名該逆猶抵死抗拒中軍參將玉山將白製火箭親點數枝延燒賊隊賊勢稍卻突有滿髮長髯大賊目身穿青縐短衫急起來犯戳傷臣塔齊布坐馬兵丁黃明魁用矛刺翻該逆回矛相向致傷右脇眾兵一擁向前登時砍斃當奪大黃旂一桿上書秋官右正丞相字樣賊喪頭目始行潰逃其左右兩股亦被我軍截殺四百餘名該逆見中路已潰猶欲佯敗

以圖合抄我軍中路之尾我軍愈殺愈奮呼聲震天又斃賊匪三百餘名賊始紛紛敗北搶舟逃竄復被我軍截殺直追至擂鼓台地方計共殲斃賊八百餘名落水死者無數奪獲軍械旗幟號衣三百餘件生擒二十三名此十八日陸路獲勝之實在情形也伏查山東登州鎮總兵陳輝龍自到湖南以來造船製械事事躬親於水師事宜實屬閱歷有得每與臣等言及賊勢披猖誓欲決一死戰此次雖乘勝輕進而忠勇奮發大節克全深堪憫惻應請

飭部照例議卹保升道員並加運司銜褚汝航保升同知並加運同銜夏鑾自去冬到湖南經臣國藩委令造船帶勇屢挫逆

鋒湘潭大戰岳州四捷該員等之功爲多此次又以救護鎮臣奮勇捐軀與敗不相救者迥別可否請

旨飭部照保奏升銜議卹之處出自

皇上天恩廣東提標水師右營游擊沙鎮邦大鵬協標右營署千總何若灃候選府經歷唐礫奮勇捐軀均請

飭部照例議卹以作士氣而慰忠魂其餘陣亡弁兵俟查明分別奏咨辦理至十八日一戰當逆燄方張之會立挫兇鋒人心大定所有陸戰出力之永綏協把總童添雲湘潭案內已保藍翎守備此次衝鋒突陣所向無前應請免補守備以都司補用並

賞換花翎六品軍功周岐山已保藍翎把總此次殺賊最多應請免補千把以守備用並

賞換花翎撫標兵丁黃明魁湘潭案內已保藍翎外委此次陣斬賊目身受重傷應請免補外委把總以千總儘先拔補仍賞戴藍翎其餘出力弁兵可否容臣等核實開單請獎之處出自

皇上天恩

臣

國藩雖無節制鎮

臣

之責惟同辦一事未能極力

沮止謀定後進以致挫失咎實難辭應請

旨交部嚴加議處現在水陸關鍵以城陵磯荆河腦爲扼要之區如能防守謹嚴則西可塞由荆入蜀之門南可截由湖入湘

之路惟荆河以上賊踪游奕不少水師新挫上下勢難兼顧臣等惟有竭力籌維扼守要隘先清上游以期速殄逆氛仰紓聖慮所有水師失利陸軍獲勝各緣由謹會摺由驛六百里馳奏伏乞

皇上聖鑒訓示遵行謹

奏

卷之三

三

李卿穀請卹片

咸豐四年七月二十一日

再臣國藩前經咨調廣西平樂府知府升用道李孟羣招募廣西水勇一千名來楚協剿曾經奏明在案該道在廣西屢著戰功深悉賊情於六月初六日督勇到省其時適聞武昌再陷該道之父李卿穀方署湖北臬司卽知其萬無生理因道途梗塞未得確信不敢發喪該道忠憤鬱結焦急難名晝夜趕辦船礮以期迅速出征爲報讐殄逆之舉臣國藩於七月初六日起旋該道卽於初八日成行十五日舟次萬石湖據逃出家丁寇升來報具述該署臬司殉難情形該道始得發喪成服十六日行抵岳州赴臣國藩行營具稟稱竊職父係河南光州舉人由大

挑分發四川歷任長甯金堂華陽等縣知縣在瀘州知州任內
保送引

見簡放雲南臨安府知府洊升今職本年正月逆匪圍攻鄂省
職父兼署臬司帶兵在保安門守禦晝夜焦勞鬚鬢全白嗣因
餉盡援絕時時以忠義激勵眾心並請出糶倉穀改鑄京銅人
心賴以復固五月內寄來家信有竭力待援城亡與亡之語自
後賊匪攻圍日急五月二十八日官兵出城接仗失利六月初
二未刻賊遂攻陷東門其時有以撫鎮均已出城勸令下城隨
出者職父感憤涕零誓以死報從容回至行署焚香冠帶望
闕叩頭隨卽遣散從人投池盡節父妾高氏隨同殉難特懇據

情轉奏籲請

賜卹以慰忠魂再職慘遭大故例應丁憂回籍惟

國讐家難憤激填膺且武昌一日不復父骨一日難收惟有寢
苫枕戈隨同大軍進剿以期奔喪收骨返葬故里惟是昏愁餘
生恐滋貽誤懇將前營統領官另行遴委俾得墨經從戎竭誠
自効等語伏查湖北糧儲道署按察使司李卿穀由縣令起家
歷著循聲當餉盡援絕之時以身殉城克全大節既據伊子呈
請轉奏不敢壅於

上聞合無仰懇

皇上天恩准照臬司例

賜卹庶足以申明與城存亡之義至李孟羣例應回籍丁憂但該道忠勇奮發爲軍中必不可少之員況家

國之讐迫切思報亦不忍一日置身於事外應請

旨飭令該道從權統領以專責成所有該署臬司殉難捐軀及伊子畱營勦賊各緣由謹附片奏

聞請

旨

岳州水陸官軍四獲勝仗摺

咸豐四年閏七月初三日

奏爲岳州水陸官軍四獲勝仗恭摺奏祈

聖鑒事竊前月十六日水師失利十八日陸營全勝業經馳奏
在案十九二十等日風雨交加未便出隊二十一日黎明臣塔
齊布親督陸營進剿派都司諸殿元千總劉士宜從中路進攻
游擊周鳳山都司彭三元保升守備童添雲等分左右兩路抄
截其羅澤南所帶湘勇擇地埋伏以備應援行至城陵磯遙見
該逆築有土城諸殿元等奮往拋擲火罐延燒賊壘帳棚各勇
踰溝撲牆逆賊敗竄正在跟追詎該逆先在湖汊偷搭浮橋見
賊營火起伏匪齊出約二三千人諸殿元劉士宜向前迎擊兵

力太單其所帶士卒多已卻退左右兩路以途徑紆迴不能趨赴應援諸殿元力戰陣亡劉士宜同時被害臣塔齊布聞二將危急麾軍往救短兵相接斃賊多名湘勇突出橫截賊勢稍卻中路敗退之兵始復回戈向前轉敗爲勝共殲賊百餘名奪獲旗幟軍械數十件湘勇割取首級十五顆此二十一日開仗先挫後勝之實在情形也二十五日申刻探明逆黨萬九千人由湖北悉銳來犯各裹乾糧意欲鏖戰數日撲我陸營仍爲上犯長沙之計佔踞高橋地方距羅澤南等湘勇營十里鳳凰山大營十四里我軍徹夜巡防二十六日卯刻該逆首撲湘勇營盤擁踞九塘嶺燒燬望樓羅澤南督同保升府經歷李續賓等大

呼衝突直趨高嶺陣斬僞國宗石姓奪其黃綾大旂長廣丈餘
賊始大潰湘勇追至高橋殺賊數十時賊隊之別駐東嶺者馳
下救援復經李續賓奮力擊退又斃賊數十名賊遂狂竄其分
撲鳳凰山大營者數以萬計臣塔齊布親督將弁由中路先進
鎗礮齊施斃賊至一二百名猶抵死抗拒及至刃斃執旗賊目
賊陣始亂其左右兩路之賊經周鳳山彭三元等出奇抄截各
勇愈戰愈力賊之慣技有所謂螃蜞陣者常分十餘路圍繞抄
襲我軍亦分十餘路迎敵無不以一當百呼聲震天約斃賊六
百餘名而山下又突出三騎均著青縐短衣勢極兇猛膽敢招
手直呼臣塔齊布之名臣塔齊布應聲撲去手刃其一餘二賊

下馬率眾紛逃適羅澤南等亦追擊至此會合併攻又斃賊數十名追賊過河乃止溺斃不計其數生擒三十五名各路奪獲鎗礮器械共數百件馬二十一匹此二十六日湖北新添悍賊二萬來岳官軍大勝之實在情形也臣國藩帶來陸勇二千餘人內臨武縣學教諭李原濬將親兵五百署宜章營守備楊名聲將宜章勇辰勇五百從九品施恩實將新田勇五百外委黃三清將祁陽勇三百署把總黃玉芳將常甯勇三百皆坐船與水軍同行原爲護衛舟師之用駐泊南津港與臣塔齊布陸營相去約二十里因陸路賊勢浩大卽飭此二千人者移紮鳳凰山大橋一帶與各路陸兵聯營故自二十一日以後陸路添生

力之軍較前此兵力更厚矣二十八日臣塔齊布傳令直搗高橋賊壘派羅澤南等攻其南周鳳山等攻其北親督彭三元普承堯等由中路先行將近賊巢該逆開礮拒敵中路兵勇合攻連斃數賊正衝突間大股續至愈聚愈多適羅澤南湘勇繞抄賊尾奮登高阜該逆後路受敵立即大潰周鳳山之道州勇楊名聲之宜章勇暨各營均經趨到併力齊攻斃賊近百名因慮有埋伏暫駐高岡以防回竄且令搖旂誘賊賊果拚命撲出我軍猛進前後圍攻賊又敗潰自辰至午三撲三潰力不能支賊始全退歸巢計共斃賊二百餘名生擒十二名奪軍械旗幟共六十餘件馬騾三匹此二十八日開仗獲勝之情形也賊經兩

次大挫之後卽憤甚欲大舉再一決戰二十九日分數大股來
撲我軍先燒附近民房臣塔齊布正在出隊突有騎馬賊四人
撲近營壘卽麾兵勇大呼迎擊童添雲等奮力抵禦殺賊十餘
名中路之匪旋卽敗退右路之賊約三四千人周鳳山迎敵酣
戰適楊名聲之宜章勇黃玉芳之常甯勇趨來應援殲斃騎馬
賊目二名該逆見兵勇勢猛其右路卽與中路合併抵禦又值
岳州府知府魁聯帶楚勇由山後馳來呼聲震林谷該逆見各
處皆有援應遂相率潰逃我軍追殺鎗斃手執令旗賊目一名
殺賊三百餘名其左路之賊先從樹林中潛上直踞山巔羅澤
南據險以待各勇靜伏不動俟賊近前突起開礮刀矛猛進斬

賊近百名各逆黨已潰旋有別隊千餘人吹角搖旂分路來撲李續賓等竭力堵禦李原濬率親兵趲到橫截中間分抄賊尾各勇併擊鎗斃黃馬褂大旗賊二名墮山嶺死者不可勝計約共殺賊五百餘名生擒二十三名奪旗幟鎗礮刀矛馬匹無數臣國藩以陸軍大戰賊勢全注陸路其水路必甚空虛密飭各水軍乘隙進剿右營楊載福爲前鋒時左營彭玉麟養傷回省暫解營務因飛調湘陰汛千總題補永綏營守備蕭捷三來營署理是日率戰船進攻廣西升用道李孟羣亦派前營戰船策應行近城陵磯有逆船十餘號往來馳突冀以虛聲沮遏我軍各營燭破詭謀見船卽擊一擁而前燒燬數船賊皆墮水我軍

用小艇當先風馳雨驟東岸追至擂鼓台西岸追至荊河腦忽有伏兵兩起從道林磯白螺磯兩岸擁出希圖抄尾我軍愈奮轟擊無遺哨官把總秦國祿鄧翼升等均深入賊巢賊遂大潰紛紛投江共轟死二三百名生擒十一名溺死約五六百名浮屍蔽江各勇持矛攢刺立即飄斃計焚燒賊船二十餘號奪獲賊船大小六十三號內戰船三隻洋礮十五尊旗幟號衣軍械子藥及僭逆違禁之物合計數百件內有織金團龍黃馬褂二件製尤悖妄此二十九日水陸大獲全勝之實在情形也訊據生擒各犯供稱是日悍賊均集陸路畱船之賊每船僅六人半係膽怯之弱賊半係被脅之水手一見我軍焚燒賊舟即紛紛

落水雖有悍賊督之不能禁止故水路戰僅三時而斃賊近千
陸路血戰六時之久而斃賊不過五六百然功則極大自有此
數次大戰岳州應可保無虞矣現在晝夜嚴防水陸交資各兵
勇以數千之眾當數萬兇猛之賊酷暑鏖戰踴躍用命皆我
皇上獎勵將士感激思奮之所致管帶湘勇委員羅澤南行軍
整暇沈毅有謀尤善審擇地勢獨當大橋一面扼守總隘永興
勦匪案內已保知府尙未接准部覆此次仍請以知府儘先選
用並請

賞戴花翎藍翎千總署宜章營守備楊名聲忠勇勤奮紀律嚴
明應請免補守備以都司升用先換頂戴已革臨武營千總唐

得陞疊次冒險衝鋒最爲出力湘潭剿賊案內已保請開復原官

賞還藍翎並加守備銜此次請以守備儘先補用撫標兵丁李榮華屢次執旗向前殺斃賊目應請以把總儘先補用並

賞戴藍翎其餘水陸兩營員弁兵勇容_臣等擇其尤爲出力者

開單請獎出自

天恩升用都司諸殿元謀勇兼優曉暢軍務_臣國藩曾經專摺

保奏正資倚任力戰捐軀深堪矜憫應請

飭部從優議卹千總劉士宜請照例議卹其陣亡兵勇均卽查明照例辦理所有二十一二十六二十八九等日官軍水陸屢

捷各緣由謹會摺由驛六百里馳奏伏乞
皇上聖鑒訓示遵行謹
奏

奏稿卷三

岳州水陸大捷踏平賊營進紮螺山摺

咸豐四年閏七月初九日

奏爲岳州陸軍大捷踏平賊營十三座水師踏盡沿江賊營追賊至嘉魚縣境大股殲滅官軍進紮螺山恭摺奏祈

聖鑒事竊前月二十一二十六二十八九等日水陸大勝業經會奏在案閏七月初一日水師營務處升用道李孟羣親督戰船出隊至城陵磯下游該逆開礮抗拒我軍轟擊數輪賊卽敗走我軍追至洲尾該逆復駕拖呂來迎卽前月十六陳輝龍失利被奪之座船也李孟羣自坐三板攢礮環攻擊斷拖呂中桅該逆被羣子所傷及桅折震壓滾跌落水者約四五十名正欲向前奪船突有綠篷賊舟數隻齊來搶護我軍近前施放火箭

噴筒燒船三隻該逆駛竄下游自放黃綠毒煙迷路沮我追兵
日暮收隊查點我軍僅陣亡一人受傷二人此初一日水戰小
勝之情形也是日申刻臣塔齊布以陸路賊駐高橋距我軍十
餘里未悉其營壘曲折之形因匹馬直赴賊營周視途逕是夕
賊營明火達旦往來不絕知其意在逃竄初二日已刻臣塔齊
布傳令直撲賊營派羅澤南等由東路進剿周鳳山等由西路
進剿岳州府知府魁聯帶勇從後路接應羅澤南李續賓李原
濟等於未經接令之先探知賊眾將遁卽分三路並進直抵高
橋賊營見賊營已空每營僅數十賊多張旗幟虛放鎗礮我軍
撲入燒燬賊營七座盡奪其旗幟軍械擒斬數十人餘匪悉奔

城陵磯一帶賊營負嵎自固臣塔齊布帶同李續賓等直赴城陵磯該逆正在出隊約二萬人彼此開礮互擊相持約一時之久我軍伏地前進臣塔齊布策馬大呼首先衝入湘勇繼之各兵勇一擁而前適大雨如注東南風驟作賊營大礮點放不然我軍乘風猛撲羅澤南周鳳山等分投合擊踰溝越牆頃刻之際尸橫遍野殲斃滿髮老賊及黃馬褂賊目多名一營旣破其五營同時踏平雖竹籤數丈濠溝兩重我軍大呼躍入助殺之聲與暴雨之聲震動天地該逆大亂狂奔自相踐踏我軍四路攢殺直追至江岸偏溺者不計其數共踏燬賊營十三座殲賊約二千名生擒一百二十三名逃散者又數千名奪獲騾馬六

百餘匹鎗礮旂幟刀矛鍋帳共二千餘件此初二日陸軍大勝
掃平賊巢之實在情形也臣國藩當飭李孟羣親率前左右三
營奮力追剿該逆先開所擄民船而以戰船拒後希圖抵敵右
營楊載福左營蕭捷三等由東西兩岸抄擊李孟羣從中路進
攻該逆膽落驚竄有棄舟登岸者有情急撲水者其前奪陳輝
龍之拖罟座船該逆鑿沈江心推礮落水然後狂奔時已昏黑
但聞呼號之聲愈去愈遠是夕我軍暫泊擂鼓台下初三日黎
明分途進剿先從荆河沂流而入搜捕三十餘里並無賊踪其
東岸之旋湖港芭蕉湖道林磯鴨欄磯西岸之觀音洲白螺磯
陽林磯螺山夾洲一帶港汊紛歧逐一窮搜生擒伏匪三十四

名踏平兩岸賊營九座礮台三座晚間大船駐泊螺山分遣三板艇往下游進追初四日五鼓楊載福蕭捷三及前營哨官千總何越珽把總鄧清等各乘勢追剿行至倒口見賊船二隻上插白旂從內港駛出哨官李成謀開礮轟擊遂奪其船追至石頭關哨官史久立生擒長髮賊四名奪獲旗幟多件追至六溪口卽蒲圻崇陽河道入江之口也時大股賊均已下竄僅截斷尾船十餘隻該逆施放數礮爭上小划棄船逃竄概被我軍燒燬聞口內上游賊舟尙多卽深入搜剿行二十餘里見賊船紛紛開竄我軍連環轟擊立斃數十人該逆棄船上岸潛匿蘆洲楊載福令各哨不許搶船止許焚燒凡燒船近百號生擒十二

名奪旗幟號衣數百件六溪口內之賊勦洗無遺三營弁勇竟夕不寐次早始回泊新堤該市鎮商民均薙髮迎接官軍據稱逆黨屢挫後逃散幾及萬人此初三初四等日水軍大勝窮追二百里之實在情形也伏查逆賊從常豐飽掠歸來占踞岳城環岳二十里堅築土壘木城至二十餘處自荆河腦以下沿江灣泊賊船連檣數十里仍於兩岸分紮營壘設立礮台而螺山倒口六溪口等處皆賊舟老巢層層關鎖沮我東下之師自我軍克復岳城水陸屢捷之後又從湖北添集二萬人悉銳上犯於二十五日到岳二十六二十八九等日三次大戰該逆兇鋒頓挫臣等卽知其有逃竄之志矣向來此賊將竄往往故張虛

聲示以進戰之狀幸我軍燭破詭計一鼓而掃平之是以賊之軍火器械旂幟馬匹無一物得返歸者又以水師併力窮追沿江二百里之賊巢剿洗殆盡西可塞由荆入蜀之路南可固由岳入湘之門稍紓

宵旰焦勞於萬一然

臣

等仍當慎之又慎步步爲營謹遵屢次

訓諭謀定後戰不敢輕於一擲現在

臣

國藩進紮監利縣屬之

螺山

臣

塔齊布亦卽日拔營前進

一面咨會荊州將軍官文多

派兵勇從大江西岸直下協助

臣

等一軍並咨會兼署督

臣

楊

需由德安進攻漢口之背以圖克復鄂省掃蕩逆氛此次仰仗天威將士用命謹擇其尤爲出力者酌保數人升用游擊周鳳

山分路抄截屢撲賊營應請免補游擊以參將補用已保府經歷李續賓堵截要隘首先衝破賊營江西安福剿賊案內保升府經歷並

賞戴藍翎尚未接准部覆永興剿匪案內擬保知縣尚未出奏此次請免選府經歷以知縣選用仍

賞戴藍翎守備銜藍翎千總何越挺身先士卒斃賊多名廣西鬱林州剿匪案內擬保守備並請

賞換花翎未知會否出奏此次仍請以守備補用並

賞換花翎長沙協千總余星元寶慶協千總滕國獻直衝賊隊奮勇爭先均請以守備儘先補用湘陰汛千總題補永綏營守

備蕭捷三殺賊奮勇冒險窮追湘陰失守案內應候查明參辦
現值用人之際合無仰懇

皇上天恩俯准免其查參以收後效其餘水陸員弁英勇容
臣等分別等第酌核保奏伏候

恩施所有官軍水陸大捷踏盡賊營追奔二百餘里現在進紮
螺山各緣由謹會同湖南撫臣駱秉章恭摺由驛六百里馳奏
伏乞

皇上聖鑒訓示遵行謹
奏

請以夏廷樾總理糧台片

咸豐四年閏七月初九日

再臣等水陸兵勇合以長夫隨丁約計一萬五千餘人每月需餉銀六七萬兩而每戰之賞項卹銀船械之修葺添造尙不在此數款項既鉅運送維艱現在出境東下步步前進程途愈遠轉輸愈遲水路風信無常尤難應手必須派司道大員專駐岳州總辦糧台方足以資轉運前經奏調前署湖北荆宜施道蔣徵蒲辦理糧台已奉

旨俞允欽遵在案嗣因常澧被賊劫掠一空該道所捐之制錢三十六萬串尙未繳齊急須設措不及分身前來查有新授湖北藩司夏廷樾品正才優精明幹練熟悉兩湖情形現值賊氛

奏和卷三
梗沮無從到任合無仰懇

皇上天恩飭令該藩司總理行營糧台暫駐岳郡將來克復武昌前赴新任仍令兼司糧台以資接濟庶大軍水陸東下饋餉常充是否有當伏乞

訓示謹附片請

旨

硃批著照所請欽此

胡林翼羅澤南隨同東征片

咸豐四年閏七月初九日

再新授四川按察使胡林翼係前督臣吳文鎔奏調赴鄂之員
因道途梗沮經臣國藩及撫臣駱秉章先後奏畱湖南委辦軍
務該臬司膽識絕人威望夙著所帶黔勇六百餘人前在貴州
黎平府任內教練有素屢著戰功本年剿辦崇通股匪安化土
匪又收復常德郡城所至皆愜民望現奉

諭旨飭該臬司仍畱湖南軍營辦理防剿事務仰見

聖慮周詳無微不至惟南省現無賊蹤臣等正在出境剿賊該
臬司才大心細爲軍中萬不可少之員相應請

旨飭令該臬司管帶黔勇酌撥他路兵勇自成一隊隨同臣等

東征於大局必能有濟又

臣

等接准江西撫

臣

陳啟邁來咨稱

逆賊竄擾江西亟待南省應援請仍飭上年援江之委員朱孫

詒羅澤南帶勇前往等因伏查升用知府朱孫詒前經

臣國藩

奏派赴江勸捐因未接准部文尙未前往現署寶慶府事能否

帶兵赴援應由撫

臣

酌核至保升知府羅澤南現帶湘勇一千

與

臣

塔齊布聯營協剿屢次大捷多由該員獨當要隘以寡擊

眾之力現已進紮螺山正當剿辦喫緊之際應請

旨飭令隨同

臣

等出境東征免其赴援江省

臣

等非敢意存畛

域實因武漢爲東南必爭之區理合全力併注迅圖克復目下

水陸官軍尙嫌單薄豈可更分兵力致有顧彼失此之虞所有

該一員均請

飭令隨同東征之處謹附片奏

聞請

旨

勢利名三

三

水陸官軍疊獲勝仗現在勦辦情形摺

咸豐四年八月初四日

奏爲水陸官軍疊獲勝仗水師現扼金口俟陸軍勦辦崇陽後卽會攻武漢恭摺奏祈

聖鑒事竊自逆匪占據岳州以來水陸鏖戰月餘挫敗一次大勝十二次克復城池踏平賊營追奔二百餘里先後奏報在案該逆竄回武昌以後臣等本欲乘勝東下直搗武漢旣而再四熟商陸路之賊尙有崇陽大股數逾二萬卽自岳竄出者分匿於臨蒲咸嘉等縣山僻之區亦恃崇陽爲巢穴若不先勦崇邑而遽下武昌則恐後路牽掣餉道中梗終非萬全之策水路則東有倒口六溪口黃蓋大冶密泉等湖西有襄河上通洪湖朱

耳湖下通沌口漢口若非節節搜剿則恐藏匿小舟抄襲後路亦非慎重之道是以審度定計陸路則臣塔齊布親往崇陽進剿水路則臣國藩步步移營遍搜支湖小河然後扼險要以蹙之初十日探明黃蓋湖內之新店尙存賊船數十號有賊千餘人右營升用游擊楊載福左營永綏守備蕭捷三等親駕長龍三板由倒口入湖湖面寬廣百餘里初更時行至芭茅湖距新店三里許楊載福等將長龍船盡紮湖濱各坐三板駛進軍士悄寂擊棹無聲三更向盡突放鎗礮呼聲震天該逆猝出不意轟斃溺斃者無數餘皆上岸狂奔楊載福首衝賊隊被賊回擲火包舟覆落水旋即躍上蕭捷三座船大呼突陣將賊船四十

餘隻登時燒盡復奪船四隻大礮一尊旗幟軍械百餘件十一
日上岸搜捕餘匪詢之土人芭茅湖山後尙有賊船四隻沅潭
市有賊船二十餘隻聶家市有賊船二隻當卽飛駕三板往剿
賊聞大軍猝至闐然下竄各船一概燒盡黃蓋湖一路搜捕無
遺十二日重搜六溪口該處爲匪黨老巢東通蒲圻崇陽北通
大冶湖太乙密泉等湖直達嘉魚左營蕭捷三等搜剿北路所
過湖港村市沿途搜伏盡焚賊舟直抵嘉魚縣城綏輯難民前
營把總鄧清等搜捕東路至車埠地方遇賊船數十號副哨官
馮登開礮轟擊該逆開鎗抵禦傷我水勇一名馮登奮登賊舟
殺賊數人餘匪棄舟逃走溺斃十餘人內有數賊抵死拒敵經

馮登等縱火焚船生擒三名奪船七隻米約四百石逆書二十餘本鎗礮旗幟百餘件候補守備何越珽等別由車埠直抵黃龍團又燒賊船十餘隻奪獲數隻該弁等正在沿湖搜剿適遇署蒲圻縣知縣孫守信自帶練勇會同荊州將軍官文所派兵勇追賊至此當卽會商合剿附城大股該逆約二千人聞官軍至卽竄入崇陽孫守信等入城安撫居民各營水師始行收隊回紮新堤老營東岸之支湖小港搜剿已遍乃遣嚮導官何南青搜查西岸裏河一律肅清於是前左中三營水師遂乘勝直下金口扼據要隘距武昌僅六十里矣金口之東有淮山西有大軍山小軍山兩岸對峙關鎖謹嚴爲水路必爭之地下瞰武

漢如扼其吭該逆不虞我軍之猝至乃乘我大隊未齊之時思欲伺隙撲營奪回關隘二十七日賊從水陸兩路來犯蕭捷三何越珽及中營把總秦國祿等嚴陣以待各哨官分駕三板往西岸大軍山下遏賊上竄陸賊千餘人先由淮山越嶺而來直入金口市冀誘我軍登岸而以小艇突入奪我戰船隨有賊舟百餘號分兩翼來抄我軍三板亦分兩路迎擊該逆受傷甚多猶拚死不退我軍併力圍攻將該逆快船轟壞並擊沈小船二十餘隻哨官劉培元史久立奪船二隻水賊始行敗走岸上之賊齊撲河干鎗礮如雨我軍長龍快蟹排列江心向岸開礮轟斃黃旗賊目數名前營水勇分二百餘人登岸刀矛並舉殺斃

僞指揮一名餘賊二十餘名生擒八名陸賊乃敗北回竄凡鏖戰四時之久我軍陸兵未至水師大隊未齊竟能以少勝眾大挫兇鋒此初十十二等日搜剿湖匪及二十七日金口水師大勝之實在情形也臣塔齊布既定親剿崇陽之策念崇陽臨蒲三縣以羊樓司爲總隘之區必駐紮老營於此然後可以四面策應遂於十二三等日督率各營由岳州先後拔營馳赴羊樓卽選知府羅澤南率湘勇千人先行十七日宿長安驛十八日黎明有賊千餘人乘我不備搖旗吹角分四路撲營羅澤南令湘勇偃旗息鼓佯爲無備也者靜立以待誘賊近營突出抄尾鎗礮刀矛猛進賊眾大潰追殺八十餘名生擒三名奪軍械子

藥無算追至五里外因未晨餐卽行收隊次日進紮羊樓司各營次第皆到四川臬司胡林翼亦自常澧帶勇來會臣塔齊布探明附近之羊樓崗山岩險峻爲赴崇第一關隘遂派羅澤南於二十三日出隊進剿該逆於崗尾盧家橋紮立大營外豎松木內貫黃土高踰數丈中跨溪水攔截隘口搭蓋棚廠我師於午後直抵賊穴該逆以數百人守營以數百人據兩山之上搖旗抗拒羅澤南分左右兩支奮登山脊分抄賊尾自督弁勇從中路進剿踰溝冒刃踏破賊營墮岩死者無數追至百花嶺殺斃長髮賊八名奪鎗鈚木礮數十件棚廠概行燒燬盧家橋之卡旣破賊眾悉集東偏守佛嶺之卡佛嶺兩山高峻羊腸一縷

尤爲險絕

臣

塔齊布

急令都司普承堯

帶兵

勇前往助戰

二十

四日

已刻羅澤南督勇由佛嶺之西山直攻賊巢普承堯由佛

嶺之東出西冲監生蕭啟江由佛嶺之北出曹家冲皆攀岩踰

嶺冒險而進賊眾大潰我兵追奔十五里至雙港口乃止共斃

賊二十餘名生擒二十八名二日之內東西兩卡皆破矣崇陽

首逆僞總制廖敬順探知我兵大隊未進在羊樓崗者不及千

人乃自崇城調賊三千餘前來二十六日辰刻猝至羊樓崗尾

四面環攻黃旂紅衣漫天蔽野羅澤南令普承堯駐右冲口以

截佛嶺之賊蕭啟江排列右山以爲右翼自率弁勇由中路迎

勦該逆亦分三路來攻我軍堅陣不動相持片時猝令抬鎗隊

十二人近賊以誘之賊亦持重不進十二人者佯敗而走賊黨
奔追羅澤南振鼓馳突呼聲震山谷賊勢瓦解反奔我軍中路
之兵乘勝擁上山岡追至盧家橋約七里許殺賊二百餘名生
擒十八名內有偽軍帥一名旅帥二名蕭啟江追右路之賊圍
入石山內殺賊百餘名生擒九名內有旅帥三名餘賊竄匿墮
崖死者無算此陸兵二十三連破賊卡二十六日羊樓大獲
勝仗之實在情形也自有此數戰崇陽股匪業已膽寒臣塔齊
布親統大隊進攻臣國藩現駐嘉魚臣曰馳赴金口一俟崇陽
股匪剿畢即當水陸並進疾搗武昌探明武漢賊黨不過二萬
餘人自岳州大敗人懷離心臣等布告示於各路投木牌於江

中解散脇從量予錢米近日自賊營薙髮逃出求路票回籍者
幾及四千人又北路有署督臣楊需之兵西岸有魁玉楊昌泗
之師聲威大有可恃然臣等仍當慎之又慎不敢萌驕矜之志
不敢貪急遽之功以期仰慰

聖懷於萬一所有水陸連獲勝仗及現在剿辦情形謹會同湖
南撫臣駱秉章恭摺由驛六百里馳奏伏乞

皇上聖鑒訓示謹

奏

硃批覽奏俱悉此時非徒知謹慎所能了事汝等自湘潭大捷
後屢次得手有此聲威豈可自餒惟利在速戰莫待兩下相持

師勞餉乏大有可慮處塔齊布不致爲崇陽一股牽制方好欽此

謝三品頂戴

恩摺

咸豐

四年八月十九日

奏爲恭謝

天恩瀝陳下情事本月初四日接准兵部火票遞到咸豐四年閏七月二十日內閣奉

上諭塔齊布曾國藩奏水陸二軍大獲勝仗一摺辦理甚合機宜曾國藩著賞給三品頂戴欽此竊臣辦理軍務已逾半年本識闇而才疏實過多而功少前歲丁憂回籍奉

諭幫辦團練本應恭疏辭謝因值武昌失守不忍置身事外是以出而襄辦當經奏明不敢仰邀議敘在案去歲奉

命援鄂援皖肅清江面

臣

豈不知艱大之責非

臣

愚所能勝任

祇以東南數省大局糜爛凡爲臣子者無論有職無職有才無才皆當畢力竭誠圖補救於萬一遂自忘其愚陋日夜焦思冀收尺寸之效然守制未終臣之方寸常負疚於神明雖治軍數月墨經素冠尙如禮廬之舊而奪情視事此心終難自安月前岳州之捷皆臣塔齊布及羅澤南楊載福等數人之功微臣豪無勞績荷

溫綸之寵錫祇慚悚之交增刻下崇陽業經克復陸軍由蒲咸北趨卽日兩道夾攻疾搗武漢仰仗

皇上天威嗣後湖南一軍或得克復城池再立功績無論何項

褒榮何項議敘

微臣

概不敢受伏求

聖主俯鑒愚忱使居憂之人與在任者顯示區別不得一例希榮是卽

聖朝教孝之意而

皇上所以成全

微臣

者更大也倘藉

皇上訓誨辦理日有起色江面漸次廓清卽當據實奏明回籍補行心喪以達人子之至情而明

微臣

之初志庶出而討賊入

而守禮公私兩盡名義無虧感戴

高厚生成之德益無旣極所有

微臣

感激

天恩並瀝陳下情緣由謹繕摺附驛具奏伏乞

皇上聖鑒訓示謹

奏

殊批知道了殊不必如此固執汝能國爾忘家鞠躬盡瘁正可
慰汝亡親之志盡孝之道莫大於是酬庸褒績國家政令所在
斷不能因汝請稍有參差汝之隱衷朕知之天下無不知也欽
此

官軍克復崇陽戰勝咸甯水師疊次獲勝摺

咸豐四年八月十九日

奏爲官軍克復崇陽旋在咸甯大獲勝仗水師連日接戰情形
恭摺奏祈

聖鑒事竊陸軍前在羊樓峒屢破賊卡水師搜剿各湖戰勝金
口業經馳奏在案八月初一日逆黨千餘人聚集崇蒲交界之
分水坳設卡抗拒臣塔齊布先派升用參將周鳳山等攻破賊
卡兩處斃賊二十餘名生擒五名是夜定議分路進兵之策派
候選知府羅澤南都司彭三元普承堯等由南路佛嶺桂口入
臣塔齊布親督周鳳山岳炳榮李新華等由北路分水坳入期
俱會於崇陽初二日羅澤南等行至小沙坪見神橋有賊數百

人扼險抵拒其地高峯插天惟羊腸一綫可通行人賊用播石
滾木塞路搭棚廠於峭壁之上我軍審明形勢彭三元等緣右
山而上候選知縣李續賓等緣左山而上攀藤捫石繞出神橋
之下以抄賊尾羅澤南普承堯由中路進攻直抵賊壘賊黨敗
退我軍焚其棚廠追殺十餘里斃賊數十名生擒十一名奪獲
大黃旂及軍械無數並將賊目熊滿珠沈應隆住宅焚燬申刻
進紮虎爪市忽桂口之賊會合神橋敗賊共千餘人乘我軍營
壘未成揚旗吹角分三路來攻羅澤南等亦分三路埋伏以待
賊至伏兵突出逆黨驚竄追過高山四重斃賊千名生擒九名
日暮收隊次日在桂口沙坪一帶遍厯山谷搜勦餘匪臣塔齊

布率北路之師初二日駐紫桂花樹初三卽抵崇陽距縣城里許該逆二千餘人分三路抗拒我軍亦分三路衝擊斬其前鋒逆黨敗竄過河半回縣城拒守我軍一面飛渡窮追一面圍城急攻共殺賊百餘名城上鎗礮如雨滾木擂石紛紛并下兵勇多帶重傷然屢勝之餘人人皆以退縮爲恥裹創前進鏖戰四時至日暮始行收隊適署崇陽縣知縣鈕芳津會同荊州委員候補縣吳振鏞等帶勇千人前來會剿初四日黎明臣塔齊布復督將弁攻城南路羅澤南等之兵亦至探明賊勢併注西城遂用聲東擊西之法先攻東北二門以分賊勢選壯士二百人埋伏城根隨督大隊奮攻西門城上賊連放鎗礮拋擲瓦石我

軍傷亡雖眾仍冒險力攻旋用劈山大礮轟破西門一擁而入
前埋伏之二百人者亦從北城根肉薄而登四門截殺凡斃賊
約三百人餘匪由東門過河逃走又經追殺百餘名生擒僞丞
相金之亨等十一名立將縣城克復奪礮十尊抬鎗鳥鎗百餘
件馬二十四匹綠緞大轎一乘大黃傘四把紫金冠五頂子藥
旗幟刀矛無數我軍傷亡亦六十餘名緣崇陽向爲亂民萃聚
之藪自鍾人傑以後反者數起今年賊目廖敬順據爲老巢盤
踞數月資糧盡聚其中悍賊數千嬰城死守又山路險峻城小
而固故官軍傷亡較前此諸戰獨多雖餘匪潰竄未能盡殲然
非兵勇奮不顧身未易破此堅城也

臣塔齊布隨飭鈕芳津會

帶荆勇駐城搜捕餘匪卽於初六日拔營前進蒲圻派羅澤南等先赴咸甯初八日紮官塘驛探明武昌賊黨八百餘人從金牛地方招集崇陽逃匪乘虛而入踞城抗禦阻遏大軍殺斃團練首事及居民數十人羅澤南等於初九日兼程疾進已刻馳抵城下賊從東門潰出竄至十里外之官步橋忽回駐要隘分路埋伏以待我軍羅澤南由西路進彭三元普承堯由中路進候選知縣李續賓由東路進官軍繞出賊伏之後賊技已窮遂向北路逃竄我軍攔途截殺追奔十餘里殺斃長髮賊八十餘名生擒二十餘名內有頭目二名奪獲偽丞相黃帽一頂大黃旗三面上書太平天國丞相劉各等字樣子藥號衣軍械無算

此陸軍克復崇陽旋在咸甯獲勝之實在情形也水軍戰船自
前月二十七日金口獲勝後該逆不敢上犯旋於初三四等日
已革副都統魁玉總兵楊昌泗帶兵勇四千三百人來會紮營
金口之西岸同知銜李光榮帶川勇千餘人亦至紮金口之東
岸皆荊州將軍遣來協剿者也初三日右營游擊楊載福派哨
官劉國斌王明三等六人各乘三板往下游探賊虛實行至鹽
關兩岸均有賊營賊船約四五十隻見哨船猝至水陸出隊開
礮迎擊中流水急瞬息之間我哨船已駛出賊營以下賊以礮
船並小划數十隻蟻聚圍擊我軍且敵且退王明三殿後賊礮
攢攻轟損四十餘處水勇帶傷二名王明三履險不驚直至賊

划圍近始將火彈連擲延燒賊艙船小人多驚翻落水餘划盡
靡遂得衝出重圍初八日楊載福偕清江營俞晟親往沌口巡
哨該逆見戰船甚少分兩路來抄我軍迎擊鏖戰一時之久轟
斃二十餘名逆黨已退忽兩岸陸路賊突出千餘人開礮來攻
魁玉楊昌泗飭派參將恆泰札勒罕等出隊至沌口抵禦擊斃
穿黃衣賊目殺賊十餘名生擒六名內有僞旅帥楊大順餘賊
撲水退竄淹斃數十名楊載福俞晟仍督三板跟追擊壞數船
始行收隊初十日李光榮帶川勇由東岸出隊擬攻破袁家河
賊營以爲進剿地步升用道李孟羣撥水師前營接應李光榮
行抵花園見有木城三座當將中左二座木城衝破燒賊望樓

二座該逆敗走李光榮正在追殺忽右邊木城賊出繞道包裹李光榮等奮力血戰殺出重圍前營水師急往助陣東岸沿江之賊乃退而賊船數十復由江東蜂擁來迎哨官馮登等奮擊壞賊船三隻賊退下游又沿西岸而上李孟羣親自督追見逆船中惟紅布風篷船二隻五綵布篷船二隻爲最強悍戰船攢礮轟擊將紅布篷船擊壞並擊沈小划船十餘隻賊始敗歸我軍收回沌口維時魁玉楊昌泗率荊州兵勇由沌口渡河出隊漢陽關上賊營二千餘人突出迎敵荆兵後隊尙未渡河前隊卻退李孟羣飛飭水師戰船近岸開礮回擊一面撥三板入沌口裏河接渡荆兵有黃旗駿馬賊目數名首先撲至河邊均被

水勇擊斃共斃賊百餘名尸橫遍地荆兵亦轉敗爲勝該逆奔
退回巢此初三初八初十等日水師接濟陸營疊次獲勝之實
在情形也臣國藩已於十一日進駐金口臣塔齊布自崇陽咸
甯沿途剿賊北來雖明知餘匪未淨大兵一過仍虞嘯聚各縣
然武昌爲省會重地拔其根本則枝葉自萎勢不能兼顧小股
止得飛速進兵直搗武漢以圖迅復鄂垣此次陸軍力破堅城
水師冒險深入人員弁兵勇均甚出力應請

皇上天恩容臣等擇尤保獎其陣亡及受傷兵勇均卽查明照
例辦理所有陸營攻克崇陽戰勝咸甯及水路疊次獲勝各緣
由謹會同湖南撫臣駱秉章恭摺由驛馳奏伏乞

奏稿卷三

皇上聖鑒訓示遵行謹

奏

水陸續獲勝仗現籌進兵摺

咸豐四年八月二十二日

奏爲水陸續獲勝仗並現籌進兵先後情形恭摺奏請

聖訓指授機宜事竊陸軍攻克崇陽戰勝咸甯及水師疊勝業經奏明在案臣國藩察看牌洲對岸之新灘口湖汊紛歧縣亘千餘里上通荆襄沔陽下通沌口漢口其中如蔡店繫馬口侏儒山等處均係賊巢恐逆舟從內河駛出抄襲我軍後路是以酌畱戰船六十餘號水勇千餘人駐守新灘口以前署善化縣李瀚章總司其事而臣國藩卽以十一日進駐金口十二日乘小舟赴沌口相度形勢營務處李孟羣及各營官皆率戰船隨往魁玉楊昌泗所帶陸勇亦出隊往護未刻行抵沌口距賊船

五里許該逆不敢上犯日暮歸來登小軍山遙望武漢賊營歷
歷在目游擊楊載福等殿後突有逆船數十來抄我軍開礮迎
擊李孟羣率各船回舵策應礮聲鼎沸臣國藩倚山觀陣見陸
賊千餘沿江來撲我戰船以少半擊江中之船以強半擊岸上
之賊礮多子眾頃刻之間尸橫徧地岸賊敗退逆船亦卽下遁
我軍追擊於初更時收隊此十二日水師獲勝之情形也陸軍
自咸甯大勝後臣塔齊布率各營直趨省會飭候選知府羅澤
南都司彭三元普承堯等先行十三日探明橫溝橋地方聚賊
六七千意圖阻遏並分伏兩旁以圖抄尾羅澤南及候選知縣
李續賓帶湘勇分左右兩路前進彭三元普承堯帶寶勇新化

勇繞山之右守備岳炳榮帶辰勇川勇以爲後應有大黃旗賊目率眾來衝湘勇鏖戰鎗礮雨下陣斬大旗賊及紅巾賊十餘名賊勢稍卻踰橋而東用鎗礮跨橋禦我軍亦攢礮進攻各營涉水過河賊勢大潰追殺百餘名賊之埋伏兩山者復經分路搜剿殺斃約二百餘人伏尸滿谷賊復由徐李鋪渡河屯聚山脊使我軍不能仰攻各勇大呼直上殺賊數十名賊又大潰凡三奔三聚窮追十餘里彭三元從橋後抄出普承堯從右山抄出截殺逃賊各數十名餘賊狂奔始行收隊共生擒長髮四十三名內有僞丞相胡姓江西人龍冠黃馬褂盤踞咸甯肆毒甚久百姓爭啖其肉奪獲大小黃旗五十餘面馬十五匹訊據

賊供稱逆黨七千餘人有自鄂省來者有自崇陽來者有自興國州來者均於十二日會集金牛地方擬攻撲咸甯以拒官軍不意行至橫溝橋猝被痛勦等語此十三日陸路全勝之情形也十五日羅澤南等進紮紙坊距鄂城六十里十六日臣塔齊布亦至十七日偕羅澤南同赴金口與臣國藩會議進兵先後竊查逆黨盤踞武漢約共二萬餘人自沌口以下東西兩岸水陸賊營密布連日再四詳究進攻武昌之路有三一爲古驛路由油坊嶺以達洪山一爲新驛路由湖堤以達板橋一爲沿江之路由金口以達花園進攻漢陽之路亦有三一爲沿江之路由沌口以達鸚鵡洲一爲襄河之路由蔡店以達西門一由襄

河建瓴而下臣等悉心定議必以水師先勦江面使武漢之賊
消息隔斷陸路則先攻武昌後攻漢陽臣塔齊布暫駐紙坊總
要之區遣羅澤南等由金口一路先攻花園賊營然後由古驛
路進攻洪山至西岸沿江一路則令魁玉楊昌泗等率荆兵進
攻一面咨明署督臣楊需夾攻漢陽之背以期諸軍會合迅復
堅城雖據稟崇陽餘燼復合戕官踞城而陸軍單薄暫時不及
分兵回剿俟攻克鄂城後再行四路遣征所有水陸獲勝及武
漢進兵先後各情形謹會摺由驛馳奏是否有當伏乞

皇上聖鑒

指示機宜謹

奏

奏和卷三

官軍水陸大捷武漢兩城同日克復摺

咸豐四年八月二十七日

奏爲官軍水陸大捷踏平賊營十九座燒船千餘號武昌漢陽兩城同日克復恭摺馳奏仰慰

聖懷事竊水師自抵金口陸營進紮紙坊逼近武昌各六十里定議進兵先後次第業經馳奏在案八月二十一日臣塔齊布由油坊嶺進發扼東北洪山總匯之區臣國藩在金口定沿江三路齊下之策湖南陸軍羅澤南等三千人及荊州派來李光榮川勇千人攻東岸花園賊營魁玉楊昌泗四千三百人攻西岸蝦蟆磯賊營而水師從大江中路衝擊使賊兩岸不能相顧從來此賊守城之法不守陴而守險其精悍者不聚於城內而

堵於城外往往扼險築壘堅不可拔花園外瀕大江內枕青林湖該逆立大營三座掘深溝寬二丈長約三里引江水以達於湖溝內周立木城實以土沙中開礮眼溝外植二尺許木椿交互連釘椿外密布竹籤環以荆棘木城之內又有磚城內濠層層抗拒其堅固幾與金川之石礮相等安礮百餘尊向江者阻我水師向南者阻我陸軍西岸蝦蟆磯賊營其堅固亦與花園相等賊船泊守兩營之下水陸依護臣等深慮此關不破則各路均無可施手也因與李孟羣等熟商將水師各營分爲前後兩班前班戰船從中流飛駛衝過鹽關之下直至鸚鵡洲該逆不意我軍之猝出其後也卽回船下救我軍分兩翼自下抄繞

而上後班戰船復自上排轟而下賊勢不支紛紛落水其悍賊數舟風篷五綵每戰冒死向前臣國藩先日懸賞曰奪五綵篷者賞錢百千至是爭前奪取秦國祿張啟基鄭沭等六人各得其一餘賊撲水登岸楊載福等縱火延燒頃刻之間鹽關二百餘號賊船焚燬盡矣東岸花園賊船見西岸已敗相率鳧逃我軍攢攻悍者數舟餘亦全數燒燬羅澤南等攻花園之陸營分爲三路同進賊自木城開礮子如雨點我軍習戰已久礮將發則伏地以避子旣落則蛇行以進凡三伏三進直逼賊營候選知縣李續賓攻江邊之營從竹籤木椿中踰溝直入羅澤南攻湖邊之營先燒營外賊划百餘號以斷賊之抄尾隨奮力直入

李光榮及教諭唐訓方攻中路之營同時躍入諸勇或越高牆或穿礮眼而入賊眾大潰縱火焚其營壘而是時西岸魁玉楊昌泗率兵攻蝦蟆磯賊營亦恰衝進土城縱火焚之賊眾逾牆四竄竄出江者被礮轟擊竄入裏湖者被魁玉沌口伏兵圍剿尸橫遍野兩岸焚營之火與江中三百餘船之火煙燄相合天爲之赤楊昌泗窮追直下與水軍夾擊復破鸚鵡洲賊營計東岸陸軍殺斃千餘名生擒四十七名西岸陸軍割首級四百餘顆生擒百餘名江中擊斃者百餘名擒登賊舟殺斃者六十餘名焚死溺死者不在此數日已西墜李孟羣尙不肯收隊復督同楊載福等乘勝直下凡沿江木柵悉用大礮轟擊多放火箭

又攻破漢關賊營一座白沙洲金沙洲賊營二座遂進攻鮎魚套口縱火大燒賊舟又數十號叫殺之聲與該逆號哭之聲相雜江水爲沸忽延燒其火藥大船霹靂一聲眾船皆飛賊屍有自半空落下者我軍亦傷亡十七人遂收隊回泊沌口此二十一日連破賊營九座焚船五百餘號之實在情形也前此七月十六日象骨港之役因賊划圍繞太多我軍眩亂致敗自後臣國藩遂陸續招募小划百五十號以敵賊之所長而輔我礮船之不足是夜大軍收隊後派王策勳小划二十餘號前往劫營連環放鎗雖僅焚賊舟十餘號而該逆時泊時開船礮亂轟徹夜不得休息二十二日辰刻三路進攻仍如昨日之舊李孟羣

率前班先發攻燒鮎魚套未盡之船旋即西渡攻漢陽朝宗門
土城楊載福蕭捷三俞晟秦國祿等仍衝過賊營直下塘角何
越珽亦衝過賊營直攻漢口兩城賊礮羣子亂落江心各哨官
爭先逞長以低頭避子爲恥又以火毬不中賊艙爲恥數舟既
然火勢遂烈其桀黠之賊一面開礮抵拒一面揚帆下竄楊載
福等急槳駛追翻出下竄賊船之前曾不片刻已近青山又將
該處輜重賊船焚燒北風甚勁挂帆歸來見塘角三百餘號賊
舟火燄正殷因傍西岸而上又隨李孟羣入漢焚口內之船兩
岸火光上薄紅衣黃旂餘燼漂流斷肢賊尸與猪雞半死之畜
叫號沈浮蔽江而下腥臭不復可聞李孟羣回軍攻擊漢陽該

逆於木柵內開礮拒敵我軍轟擊愈緊魁玉楊昌泗之兵亦自上游轉戰而下會合夾攻將晴川閣下木柵大別山下木壘悉數焚燬殺賊數十名生擒十二名東岸之賊自花園旣破以後又有鮎魚套近湖一營傍江街口一營我軍分兩路進剿賊從中路迎敵四川義勇湖南親勇新田勇稍卻退奔里許李續賓帶湘勇由江邊折回急援中路破鮎魚套賊營兩座縱火焚之斃賊三百餘名生擒四十二名義勇親勇等亦轉敗爲勝焚燬附城賊營四座此二十二日焚盡漢口塘角逆船踏平兩岸賊營之實在情形也自有此兩日大戰省河上下無一賊船武漢城外無一賊營

臣

等知其萬無可守之理不日當棄城他遁矣

二十三日卯刻水陸各營預備攻城武昌之賊已於四更後潛開東北門逃竄猶畱悍賊數百在西南城搖旗放礮故作堅守之狀漢陽城上亦然我水軍及東路陸軍用大礮向漢陽望山等門轟擊而別遣壯士從僻處攀堞而登舉火爲號各營擁入眾賊狂竄截殺百餘人生擒二十餘人內有僞將軍陳昌貴僞總制丁履之立予正法李孟羣自保安門緣城而入徑奔其父李卿穀殉難之所痛哭收骨軍士爲之感泣西岸漢陽城上之賊方與水師連礮對擊楊昌泗之兵勇已自南門梯繩而入魁玉督帶各營在西門外月湖隄一帶埋伏該逆由西門奔赴蔡店被我伏兵截剿殲斃無數生擒二百餘名午未之間兩城同

時克復臣塔齊布從油坊嶺而來知武昌東北洪山一帶爲陸路竄賊必由之地預飭大隊四路埋伏該逆不知我軍之猝至前臨大敵後逼危城左近梁子湖右隔陽孫湖無路逃生因分三路拚死抗拒我軍亦分三路迎擊臣塔齊布自當中路指黃袍賊目數人與親兵分刺取之餘匪稍卻兩路之賊皆退遂向洪山之背大奔我軍搶登山脊乘勢追北殲賊約五六百人餘眾圍逼沙湖塘角灣地方紛紛赴水紅巾浮波須臾卽沒湖汊淺處賊尸塞滿後至者踐尸而逃行至中流亦皆漂溺計溺斃一千餘人我軍喊殺愈厲聲振林谷耳不忍聞中有兒童數百人先後奔投湖水臣塔齊布目睹心傷不覺泣下因飭將弁大

呼救小兒不許投水凡救活二百餘人眾賊見小兒得救遂長跪乞命亦帶回七百餘人分別斬決釋放小兒則分置各營棚中將查明籍貫而資遣之此二十三日克復兩城大勦洪山竄賊之實在情形也二十四日臣等二人先後入城履勘街道撫綏子黎該逆於大宅多置火藥燃香其上入者觸之輒被轟燒二十三日城內發地雷火礮三次震斃數十人二十四五皆數處火起市上門窗木器片片椎碎所擄各處幼童數千人酷刑虐役戰敗之後輒大加殺戮以洩其憤其慘毒如此僞國宗丞相所居之署拆神廟以興修柁木狼籍一牀之費可值千金水陸兩軍奪獲黃傘三百餘柄金冠龍袍各百餘件鏤錫籤筒筆

架至二千餘具之多其僭侈如此該逆爲神人所共憤二城收復大股破滅本屬意中之事惟三日之內焚舟千餘躡盡堅壘每次縱火輒遇順風殺賊數千而官軍傷亡不滿二百人湖南陸兵極薄恰有北省兵勇助剿西岸大隊扼洪山要路不先不後恰痛殲東北之竄匪事機之順處處湊泊此則仗我

皇上威福

天心篤祐不特非臣等籌謀所能到亦並非臣等夢想所敢期也現已飛咨湖北巡撫兼署督臣楊需請其迅速渡江鎮撫會城一面妥籌分路進剿事宜廣西升用道李孟羣忠孝鬱積戰必身先沈毅有謀應請加按察使銜并

賞加勇號候選知府羅澤南候選知縣李續賓自岳州拔營東下常在各營之前途中力戰七次大勝攻克花園堅壘制賊之命羅澤南應請

記名以道員用李續賓應請以直隸州選用

賞換花翎升用游擊楊載福永綏營守備蕭捷三廉明愛士膽力堅定從下游逆擊而上甚合機宜楊載福請以參將補用並加副將銜蕭捷三請以都司升用並

賞換花翎候補都司彭三元候補守備唐得陞力截洪山要隘殺賊尤多彭三元請以游擊補用唐得陞請以都司升用

賞換花翎同知銜文生李光榮練勇殺賊果敢有爲應請以府

經縣丞歸部遇缺卽選已革涼州副都統魁玉高州鎮總兵楊昌泗身先士卒克復郡城實屬奮勉出力可否開復原官之處出自

皇上天恩其餘出力員弁兵勇容俟臣等核明勞績開單仰奏仰候

恩施所有官軍克復武漢緣由謹會同荊州將軍官文湖北巡撫兼署督臣楊需恭摺田驛六百里馳奏仰慰

宸厪伏乞

皇上聖鑒訓示遵行謹

奏

硃批覽奏感慰實深獲此大勝殊非意料所及朕惟兢業自持
叩 天速赦民劫也另有旨欽此

李宗洄等畱營差委片

咸豐四年八月二十七日

再_臣等自辦理軍務以來凡管帶練勇襄辦糧台監製軍械在
在需員差遣湖南候補正雜各員現尙不敷委署未能多調前
此因員弁過少不能節節維繫遂致挫失曾於自請治罪摺內
詳悉聲明現在出境剿賊營務愈繁需員愈眾月前曾咨請撫
_臣駱秉章遴選州縣一員佐雜三員來營差委_臣塔齊布營中
亦請員備用撫_臣因所請揀發未到正在乏員迄今未准咨送
昨官軍克復通城咸甯等縣經南撫_臣駱秉章飛咨兼署督_臣
楊需委員守土督_臣轉咨南省就近派員代理而南撫_臣仍以
無員可派咨復旨下_臣營造船運餉接應子藥均屬事浮於人

殊形拮据昨於觴洲設立水卡稽查民船卽苦無員可委軍務吃緊未便過於拘泥致誤事機是以周諮博訪但使人才可用卽不能不兼用丁憂降革之員查有湖南候補府經縣丞李宗涑王誥前清泉縣楊恩植大挑教諭唐訓方均係丁憂人員例應奏明方准調用臣因人地相宜擬令李宗涑王誥管理軍械楊恩植襄辦船工唐訓方分帶練勇又已革升用知府鳳凰直隸廳同知劉建德候補從九署永明縣典史林周培試用按照磨署道州吏目秦豫基武舉署茶陵千總劉文煥該革員等均因失城被議劉建德署湘潭任內因眾寡不敵失守旋卽督帶鄉勇隨同官軍克復縣城林周培秦豫基先均奉委出境並未

在城惟因監犯被劫疏於防範致被議革均無餘罪劉文煥尙待查參查該員弁等官聲尙好且係有用之才是以調赴行營劉建德委督船工林周培秦豫基接濟各營子藥劉文煥幫帶新田練丁又馬丕慶係甯鄉失守之員尙待查辦昨經南撫臣委令解餉來營臣卽畱營令其稽查水卡實因軍務乏人不能不從權辦理如果始終奮勉仍當籲懇逾格

天恩一律保獎以收後效而勵戎行再前經廣西撫臣勞崇光代招水勇奏委升用道李孟羣統帶來南隨員中有已革同知銜廣西試用縣程桓生平樂縣丞升用縣趙啟昀因疏防土匪被議此次咨遣來南未知勞崇光曾否入奏臣塔齊布行營解

餉之候補未入流賀宗瀾亦係革員辦事均甚勤奮合無仰懇
皇上天恩飭下該部查照准其仍畱臣等營中差遣委用謹附
片奏聞

遵 旨彙保員弁兵勇第一單摺

咸豐四年八月二十七日

奏爲欽遵疊次

諭旨彙保出力員弁兵勇懇

恩獎敘仰祈

聖鑒事竊自賊竄常澧以後數萬逆黨盤踞岳州六月二十七
二十九等日各營水師克復郡城七月初三初六十四等日江
面鏖戰燒船逾千自十八至二十九日陸路大捷四次水陸並
勝一次閏七月初三日遂將賊營二十二座全數蹋平比之湘
潭大捷三倍過之嗣後分途東下陸軍克復崇陽沿途大勝七
次水軍搜剿各湖孤軍深入戰勝六次

臣等屢次奏報俱於摺

尾懇請將員弁兵勇開單保獎疊蒙

皇上天恩允准在案謹遵照

諭旨核實保奏分爲三起自六月二十七至七月十八日三摺爲第一單自二十一至二十九日爲第二單自閏七月初二日平賊營至八月十三止水陸十餘戰爲第三單其糧台各員在省在營經理子藥至三十餘萬斤之多千里轉輸籌備銀錢採辦鹽米有江湖風波之患有土匪梗阻之虞晝夜辛勞亦合仰懇

天恩一體保敘茲據各營官開單稟保臣等再三覆核將第一單酌定籲懇

恩施以獎屢勝之勞而作將來之氣其第二第三單容俟核定
續行奏請所有彙單請獎緣由謹會同湖南撫臣駱秉章恭摺
由驛具奏伏乞

皇上聖鑒訓示施行謹

奏

上所謂而

思慮以楚風

水師搜剿襄河續獲大勝摺

咸豐四年八月三十日

奏爲水師搜剿襄河續獲大勝燒船千餘號恭摺奏祈

聖鑒事竊自二十三日官軍大戰武漢燒燬賊船千餘號克復
兩城鄂省上下二百餘里大江已無賊踪惟襄河之內賊船尙
多襄河卽漢水居民及船戶皆稱爲小河者也其正流上通安
陸襄陽以達於興安漢中其旁派則北枝通於德安孝感應城
南枝通赤野湖沙湖以達於沔陽荊州該逆盤踞武漢之時其
國宗丞相等率老賊守城而別遣輕悍之賊在襄河南北擄糧
號令於賊名曰打先鋒誅求於民名曰催貢有船千餘號屯駐
蔡店繫馬口長江埠侏儒山等處游弈無常近北枝者有署督

臣楊店一軍堵剿近南枝者可由侏儒山新灘口以出大江前此臣國藩進紮金口之時曾奏明畱水師千餘人駐防新灘口蓋恐襄河賊舟由該處以抄襲我後路也自八月十一日雙保福忻二鎮在仙桃鎮失利以後賊舟愈多其氣愈熾二十三日克復兩城臣等即擬分派水師入襄河口內泝流搜剿二十四日探報賊舟千餘已由蔡店順流而下將衝出大江與官軍決一死戰魁玉楊昌泗親至臣國藩舟次自請督荆兵攻防陸路而請臣發水師迎而剿之臣國藩即派各營以大船錯布漢口內外而以三板迅入迎擊入僅數里該逆已連檣而下其前隊自楊林溝登岸者約二千人魁玉等令官兵佯退楊昌泗及參

將恆泰率兵勇自歸元寺遶至楊林溝抄賊之尾賊眾敗潰適戰船雷轟而入該逆開礮抵敵以河身太窄賊船太擠不能迴旋取勢該逆倉皇失措時開時泊倏進倏反後船之礮往往自擊前船之賊喧爭互詈我軍乘隙逼入將火毬火蛋雜亂拋擲間以噴筒火箭往來馳突其兇悍之賊雖以火毬回擲我軍而怯弱之賊與被擄之水手已紛紛梟水登岸逃竄老賊持刀砍殺不能禁止竄至北岸漢口者幸得脫免竄至南岸漢陽者輒被魁王楊昌泗之兵截斃殲斃無數生擒二百餘名斬首百餘級陸軍收隊後水師復乘勝追入追及上游有悍賊數舟擲火包急撲我軍各船出入於濃煙烈燄之中猝不及避軍士傷亡

十餘人營官守備蕭捷三頭面手足俱受燒傷楊載福等力前
搶救矛刺一賊墮水焚悍者數舟眾賊乃撲水大潰自三更以
後賊船逃竄一空我水軍旣不放礮亦不揚聲惟各持火毬火
蛋每隔一船輒擲一火凡行二十餘里至羅家墩地方將賊船
千餘號悉數燒盡四更始行收隊臣國藩在鮎魚套與漢水中
隔大別一山遙望火光自山後透出照見江中波紋盡赤屋瓦
可數比二十一二兩夜尤烈也蓋緣漢水逼仄乘賊船擁
擠喧亂之時而擊之又荊州陸路之兵兩岸被害之民亦乘間
助而縱火卽船戶被擄已久怨極思歸亦有自燔其船以逃者
皆若與水軍聯爲一氣是以二十餘號戰船用功甚少成功甚

多自有此戰襄河以內賊舟無幾更酌畱船隻徧爲搜剿從此
壹意東下無後路牽制之虞矣然臣等紂察大局尙有可慮者
數端水師搶船太多私匿藏貨破城以後水陸弁勇各獲財物
頗有飽則思颺之意又以岳州酷暑苦戰保奏稍遲頗生觖望
時出怨言屢勝之餘志驕氣溢殊覺散佚暗伏挫敗之機此其
可慮者一也武昌竄出之賊臣塔齊布洪山截剿雖殲去四千
然逃者尙多漢陽竄出之賊則截剿無幾現在逃歸下游蘄黃
一帶尙有數萬自岳州以下直至金陵數千里久已淪爲異域
小民劫於兇威蓄髮納貢習爲固然雖經諭令薙髮而鄉民畏
賊之暴狐疑觀望崇陽興國蘄州黃孝等處亂民尤多設官軍

稍有挫衄則四面皆賊餉道易斷此其可慮者二也水陸兩軍銀錢子藥絲豪皆取給於湖南此後去湘日遠不特餉項支絀勢難長久接濟且千里以外轉輸尤艱軍火銀米一有缺乏軍士潰散前功盡棄此其可慮者三也現在機勢大有可乘臣等急思東下以圖克復沿江諸城然念三者步步艱難又不能不熟思審度縷陳於

聖主之前所有水師續獲大勝并臣等籌慮各條恭摺由驛馳奏伏乞

聖慈垂鑒訓示施行謹

奏

查明賊目殲斃狀及賊中各情片

咸豐四年八月三十日

再逆首盤踞武昌以各衙署爲行館僞文卷俱萃其中鄂省克復後臣等將賊中往來稟牘彙查於逆謀頗得其詳內有僞東王黃綾誥諭一幅查悉據守武漢之賊係僞國宗韋以德石鳳魁僞副丞相黃再興等前次犯岳之賊係僞國宗韋俊石鎮崙僞丞相曾天養僞承宣張子朋林紹璋等而惟曾天養爲尤驍悍調度皆出其手去年破田家鎮破廬州今年破黃州堵城破岳常澧等屬皆曾天養爲一軍之主七月十八日城陵磯之戰臣塔齊布恰與曾天養迎擊該匪直呼塔齊布姓名被親兵黃明魁奮矛戳斃立碎其尸餘賊大敗曾天養係廣東惠州人年

六十許獍髯深目威令素行於眾賊中善用兵者自楊秀清外推會天養爲最伏誅後岳州之賊及武漢之賊爲之茹齋六曰臣國藩在螺山時業已問之居民屢訊賊供俱與僞稟牘相符臣等前奏言七月初六日水師哨官羅管全殺斃僞丞相曾姓係據褚汝航來稟所云其實初六日僅奪獲會天養座船及龍冠黃袍等件十八日黃明魁始殪其人也曾天養歿後脅從者始敢逃散數以萬計該匪關係賊勢盛衰不敢不聲名更正庶將來編纂方略亦得據實備書再查逆書中除僞天王及僞東西南北翼五王外又有秦曰綱由僞頂天侯加封僞燕王陳承瑤由僞天侯加封僞豫王韋俊韋以德係韋正兄弟石鎮崙石

鳳魁則石達開兄弟自水師前隊占據金口後韋以德卽託故先回金陵昨二十三日石鳳魁黃再興等開城逃走經臣塔齊布截擊殲斃溺斃約三千人訊問撈救之幼童二百餘名內有從金陵隨首逆來鄂者據供賊尸中凡手帶金鐲身穿黃馬褂者卽係僞國宗丞相檢點指揮之屬兵勇中先撈得金鐲七隻越日往尋不知鐲出何尸之手亦不能辨認也該逆初無逃意二十一日僞國宗巡城猶殺縋城逃賊數十名在城頭望見官軍戰船不避鎗礮直衝下游始驚顧失色二十二日見城外賊營盡破賊船盡燒殺縋城者愈多而逃者愈眾遂相向號哭二十三日卯刻開城向東南逃竄復恰與洪山官軍相遇故得聚

而殲旃據守漢陽之賊有偽丞相陸光祖不知已就戮否破賊必先擒首逆我

皇上亦必懸念及此前奏未及詳備今既細究各情理合附片

奏

聞

請 飭江西等省籌解餉銀片

咸豐四年八月三十日

再臣等一軍屢蒙

聖慈垂念

飭令江西廣東四川三省解餉協濟江西前後解到銀五萬五千兩又在籍侍郎臣黃贊湯籌解捐項銀二萬兩廣東解到銀六萬兩均交湖南藩庫由撫臣駱秉章撥解臣等軍營支用四川頭批解銀四萬兩係荊州將軍臣官文截畱經南撫臣將另款扣抵奏明在案二批解銀三萬兩由西陽州繞道前來現尙不知行抵何處俟其解到可敷九月之用惟十月以後餉項尙屬無著湖南省庫萬分支絀現因陸兵太單擬再添二千人又

苦餉無所出焦急難名惟江西一省物力較豐道途較近此軍之起本爲四省合防而設將來大軍下至九江湖口一帶則江西之防亦可稍弛合無仰懇

皇上天恩飛飭江西撫臣不論何款迅卽籌銀八萬兩徑解臣

等行營以濟急用至廣東四川二省均懇

飭諭該督撫各籌銀數萬兩飛速解交臣等一軍庶饋餉常繼

無待哺不給之虞臣等不勝迫切待命之至謹附片具

奏請

旨

統籌三路進兵摺

咸豐四年九月初七日

奏爲統籌三路進兵分別水陸先後直搗下游恭摺奏請

聖訓指授機宜事竊自武漢克復後襄河以內賊船焚剿殆盡
江漢一律肅清急應乘勝進剿查此次敗竄之賊脅從解散薙
髮乞命分途回籍者約二三萬人逃赴下游回踞舊巢再圖抗
拒者亦尙有數萬人南岸之薙髮解散者爲數尙少其回巢抗
拒者多集於興國州北岸之薙髮解散者爲數極眾其回巢抗
拒者多集於蘄州廣濟等處而皆以水次爲老巢以舟楫爲藏
身之固屢據探稟北岸之黃州府南岸之武昌縣均已收復自
巴河以下經田家鎮道士洑直至九江節節皆有賊船臣等現

與兼署督臣楊需商定三路進兵南路由臣塔齊布率湖南兵

勇進攻興國大冶等處北路由署督臣派令固原提臣桂明等

率各營兵勇進攻蘄州廣濟等處水師由江路直下楊載福彭

玉麟率前幫先發臣國藩督同李孟羣等率後幫繼進俟抵黃

州時與陸路北軍一會抵田家鎮富池口時與陸路南軍一會

北軍行至廣濟將入皖境再與署督臣商定行止南軍則須勦

辦九江後乃能渡江而北以圖疾搗安慶規復省會該逆擄掠

民船以數萬計經臣等一軍轟擊焚燒者不及七千各省官軍

焚擊者亦不過數千下游現存之賊踪爲數尙復不少九江以

下必當大戰數次臣等惟有激勵士卒步步整頓以期廓清江

面仰慰

聖懷於萬一所有統籌三路進兵情形謹會同兼署總督湖北撫

臣

楊需恭摺由驛六百里馳奏伏乞

皇上聖鑒訓示遵行謹

奏

硃批所籌甚是卽照擬行欽此

保案第二單摺

咸豐四年九月初七日

奏爲遵

旨彙保出力員弁兵勇懇

恩獎敘以昭激勸事竊自本年六月二十七至八月十三等日岳州水陸屢捷欽奉六次

諭旨均准擇尤保獎

臣

等悉心核定分爲三起開單其自六月

二十七日至七月十八等日爲第一單業經具奏在案茲將第二起彙單仰懇

恩敘伏查岳州水陸二十餘戰自六月二十七至七月十四日水戰功多而十八日則陸營甚爲得力自七月二十一至二十

奏稿卷三

三

九日陸戰功多而二十九日則水陸並爲得力自閏七月初二
日至八月十三等日則水路窮追陸軍鏖戰均屬非常用命臣
等彙單請獎因接仗太多亦不能拘定以某日之功屬某軍惟
據各營官開單稟保臣等反覆核定悉準至公既不敢吝賞屯
膏亦不敢稍涉冒濫惟冀就中遴拔將才數人或得偏裨之才
數十人以補異日疆場之選則臣等區區所以仰答
聖慈於萬一也所有第二次彙單請獎緣由謹會同湖南撫臣
駱秉章恭摺由驛馳奏伏乞

皇上聖鑒訓示遵行謹
奏

請飭陝西解餉來營片

咸豐四年九月初七日

再臣等水陸進剿斷不敢稍涉遲悞惟慮餉項不能應手卽有掣肘之虞從前由南省半月解銀一次目下省庫已竭道途復遠水路千餘里風信靡常又無專辦糧台之大員均由臣等設法支持深恐貽誤軍行幸荷

聖慈屢念屢

飭川廣江西協濟此軍昨復奏請

飭諭江省籌解十月分餉銀八萬兩未知能應時解到否此後深入賊地必須有巨款足敷兩三月之需方敢放心前進合無仰懇

皇上天恩飛飭陝西撫臣王慶雲籌銀二十四萬兩派員徑解
臣等行營俾敷三月之用則臣等雖孤軍深入亦有恃而不恐
不勝迫切待命之至謹附片請
旨

謝 恩仍辭署鄂撫摺 咸豐四年九月十三日

奏爲恭謝

天恩再行瀝陳下情仰祈

聖鑒事本月十一日准兵部火票遞到咸豐四年九月初五日
內閣奉

上諭塔齊布曾國藩奏水陸大軍同日克復武昌漢陽一摺此
次運籌決策深合機宜允宜立沛殊恩以酬勞勩曾國藩著賞
給二品頂戴署理湖北巡撫並加恩賞戴花翎欽此竊臣辦理
戎務過多功少屢次陳奏在案武漢克復有提臣塔齊布之忠
奮有李孟羣羅澤南之謀略有楊載福蕭捷三等之勇鷺故能

將士用命迅克堅城

微臣

實無勞績至於縱火多順風之時西

岸得荆兵之助廿三剿洪山之賊廿四燒裏河之船事機之順處處湊泊則由我

皇上憂勤所積默挽

天心非

臣

籌謀所能及尤無勞勩之可言荷

溫諭之褒嘉祇慚悚以無地至奉

命署理湖北巡撫則於公事毫無所益而於私心萬難自安有不得不瀝陳於

聖主之前者水師前幫業於初七日啟行沿途搜剿已過黃州以下臣率後幫亦擬卽日起行鄂垣善後事宜旣不能一爲兼

顧轉瞬出鄂入皖湖北巡撫之關防仍須委員賁回武昌此所謂於公事毫無裨益者也臣母喪未除葬事未妥若遽就官職則外得罪於名教內見譏於宗族疑微臣兩年練勇造船之舉似專爲一己希榮徼功之地亦將何以自立乎上月謝

恩摺內申明前奏不敢仰邀議敘本月初九日奉到

硃批殊不必如此固執等因欽此臣亦知

聖主垂訓之殷恐微臣涉於好名之念臣更厯憂患屢經敗挫

又常奉

聖諭以好名爲誠豈有漫不省察之理顧自維纍然素絰遽綰符綬大義虧損何以臨民康熙間奪情之案李光地爲彭鵬所

劾于養志爲陸隴其所劾載在

國史懷然可畏揆之大防返之方寸均覺悚皇無已此所謂於

私衷則萬難自安者也

臣與督臣

楊需熟商恐出境在即關防

交替徒費展轉是以不敢接受仍由督臣將關防收存並籲懇

皇上天恩簡派賢員接任湖北巡撫以重疆寄俾臣得專力東

征感荷

生成實無既極倘藉

聖主如天之福此後勦辦得手廓清江面不致隕越則微臣供

職之年尙富受

恩之日方長斷不敢矯情要譽上負

聖慈諄諄之訓所有

微臣


感激下忱並瀝陳辭免署撫各情謹


繕摺附驛具奏伏乞


皇上聖鑒訓示施行謹

奏

硃批覽朕料汝必辭又念及整師東下署撫空有其名故已降
旨令汝毋庸署湖北巡撫賞給兵部侍郎銜汝此奏雖不盡屬
固執然官銜竟不書署撫好名之過尙小違旨之罪甚大著嚴
行申飭欽此







PL
2728
.A1
1876
v. 5

曾文正公奏稿

卷之四目錄

陸軍克興國大治水師蘄州獲勝摺

咸豐四年九月二十七日

第三單保案摺

全日

擬先攻半壁山破賊橫江鐵鎖片

縷陳鄂省前任督撫優劣摺

全日

陸軍踏破半壁山賊營水師續獲大勝摺

十月初七日

請飭江西開局製造火藥鉛彈片

白人虎陣亡請卹片

劉若珪殉難請卹片



謝兵部侍郎銜

恩摺

全日

代奏羅澤南謝

恩摺

全日

陸軍奪半壁山斫斷鐵鎖水師繞出賊前摺

十月十四日

覆陳不克隨時知照江南片

官軍攻破田家鎮逆船燒盡收復蘄州摺

十月二十一日

請飭各路統兵大臣督撫擇要防堵片

水師前隊已至九江片

抄呈賊中偽牘片

武漢克復保案摺

十一月初六日

陸軍克廣濟縣水師九江獲勝摺

全日

固原提督桂明畱駐黃州片

魏作霖請卹片

調張丞實帶勇片

陳明服闋日期片

陸軍雙城驛大捷克黃梅縣摺

十一月十一日

水師小勝並陳近日勦辦情形摺

全日

羅澤南濯港勝仗片

官軍濯港大捷潯郡江面肅清摺

十一月二十一日

調胡林翼來潯助勦片

水陸屢勝圍偏潯城摺

十二月初三日

奏稿卷四
潯城逆黨兩次撲營均經擊敗摺

十二月十四日

陸軍克興國大治水師蘄州獲勝摺

咸豐四年九月二十七日

奏爲陸軍分途大捷克復興國大冶兩城水師在蘄州大獲勝仗恭摺由驛奏

聞仰祈

聖鑒事竊照水陸三路進兵業經奏明在案南路之師臣塔齊布率湖南將弁十三日自鄂省拔營由武昌縣一路進剿大冶之賊署湖北提督佈克慎副將王國才揀發游擊阿達春從之以行候選道羅澤南亦於十三日拔營起行由金牛堡一路分剿興國州之賊游擊彭三元都司普承堯等從之以行北路之師副都統魁玉總兵楊昌泗等於十七日拔營起行固原提督

臣桂明已自楊店先至黃州水師前幫於初七日起梃二幫於

十三日起梃

臣

國藩於二十一日舟次黃州與北軍一會卽飭

魁玉楊昌泗於二十二日西出蘄水進剿蘄州之賊此分路先後進兵之大略也十七日羅澤南等由金牛堡進至大冶縣探聞逆匪知官軍兩路進剿遂從田家鎮糾黨六千餘人半由興國分抄大冶堵拒武昌一路官兵半踞興國州城堵拒金牛一路官兵羅澤南等於二十日已刻馳抵興國境內之鹽埠頭地方急截大冶賊黨歸路並禦興國之匪使不得合爲一隊該逆分三路來撲有眾約三千人黃旂徧野羅澤南等登山審視扼險排陣如不欲戰者然該逆馳下山岡由田壠進撲我師羅澤

南彭三元由田隴中路進攻普承堯由傍山左路進候選直隸州李續賓由沿河右路進四面圍抄鎗礮刀矛並舉呼聲震天殪其前鋒數人賊遂奔潰半棄軍械而走我軍追殺十里之遙共斃賊三四百名生擒五十三名內有偽總制汪茂先偽師帥二名旅帥四名兩司馬八名皆髮長尺餘立即梟示奪獲大小黃旗六十餘面抬鎗鳥鎗百餘件馬十二匹子藥軍裝無算該逆因我軍扼截要路不能前赴大冶是晚薙髮逃生者十之四五餘多回竄興國州城二十一日五鼓羅澤南等派隊六成仍分三路前進直薄州城城外盤踞之賊悉數狂竄飛龍飛虎偽旗及軍械子藥皆委之而去官軍由南門入克復州城搜獲偽

知州胡萬智爲賊中僞進士力守州城希圖再舉者供詞狂悖至死不悔當卽凌遲梟示復捕獲餘匪二十餘名就地正法該知州保忠亦帶近鄉練勇回城會同安撫難民其大治之賊臣塔齊布於二十日由武昌縣拔營馳勦二十一日已刻抵大治城外之五里牌該逆約四五千人整隊來犯臣塔齊布率湖南弁兵及阿達春等由中路進王國才等帶領雲南弁兵由南路進佈克慎等帶領湖北弁兵在於北路埋伏該逆勢甚猖獗官兵鏖戰逾時殺賊多名尙抵死抗拒臣塔齊布怒馬衝陣將逆首立斬馬下中路之賊當卽敗退左右兩路亦隨奔潰各路兵勇及埋伏之兵乘勝施放火箭火彈燒燬賊營二座煙燄迷漫

詎料敗竄之匪拚死復來左路另有伏賊突起臣塔齊布正在
揚鞭督陣忽被數匪撲來刺傷坐馬幸親兵數人立前刺取伏
匪之悍者四路短兵相接賊復大潰尸橫遍野我軍由縣城北
關追出南關復分兵截賊之腰共斃賊約一千餘名奪軍械千
餘件騾馬二十七匹餘賊爭橋過河遠竄人數擁擠橋忽折斷
墜橋死者近一百人後至者爲追兵所逼無路可逃全數落水
溺斃又千餘名與八月二十三日洪山追賊入湖層累踐踏大
致相似各營生擒逆匪一百三十四名因其擄掠姦淫肆毒已
久僅予梟首不足蔽辜概令剜目凌遲以洩居民之憤此陸軍
二十一日同時克復興國大冶兩城之實在情形也各營水師

分紮蘄州上游之蒜花塹道士汰漳源口一帶十八日探聞蘄州賊黨窺我水軍深入距兩岸陸營在三四百里外希圖乘隙來撲我水師升用參將楊載福候選同知彭玉麟等會商定計與其待賊至而迎敵不若及其未至而擊之遂於十九日督同千總秦國祿等各帶長龍三板自蒜花塹出隊行抵蘄州對岸賊見我軍將近將船百餘號先行開出放礮迎敵並於高岸搖旂開礮以護未開之船我軍奮勇轟擊該逆船勢不能支卽行下竄我軍分戰船一半追赴下游趨至距田鎮十五里之骨牌磯先後燒燬三十餘號轟斃賊匪無數其一半則攻擊未開之賊船該逆轟礮擲火抵死抗拒岸上賊復開礮助之子如雨下

我軍習戰已久俱以避子爲恥愈擊愈奮自午至酉酣戰數時始將未開之船六十餘號一概燒盡轟斃逆黨甚多北岸陸軍未到州城未能卽復收隊回營時已五更計奪獲旗幟鎗礮共數百件而陣亡受傷者亦不少此水師蘄州獲勝之實在情形也伏查鄂省逆匪以興國崇陽兩處之賊爲最兇悍自去年田鎮失防興國大冶該逆久已踞爲老巢上達崇通下達九江製造子藥嘯聚黨羽皆以興國爲總匯之所該逆聞七月在鄂城開科取士興國之人應試者最多是以臣等於克復武漢以後卽決計先剿興國大冶茲幸仰仗

皇上天威兩城同日克復惟殲斃溺斃雖逾二千之多而逃竄

尙復不少探得該逆畏南軍之勁從下游渡竄北岸於田家鎮多築土城掘濠數重又以木簰橫截江面阻我舟師分賊數千踞守蘄州城內亦於臨江一面築壘安礮拒禦水師臣塔齊布督同羅澤南尙在南路痛剿餘匪臣國藩現紮道士洑相機審度如果北岸之賊負隅抗拒仍當令南軍渡江會剿以期一鼓殲除仰慰

宸廑此次水陸二軍分途獲勝克復堅城所有出力員弁兵勇合無仰懇

皇上天恩准臣等擇尤保獎以作士氣其陣亡兵勇亦卽查明照例辦理所有陸軍分路大捷克復兩城並水師獲勝各緣由

謹會同湖廣督臣楊需恭摺由驛六百里馳奏伏乞

皇上聖鑒訓示謹

奏

第三單保案摺

咸豐四年九月二十七日

奏爲遵

旨彙保出力員弁兵勇仰懇

恩施以昭激勸事竊照水陸各軍自岳州剿賊轉戰至金口一帶大捷十餘次欽奉六次

諭旨准將出力員弁兵勇擇尤保獎臣等悉心酌核分作三起開單請獎每起多者百餘人少者數十人業經兩次彙奏均奉恩旨俞允當卽恭錄行知各將士無不感激思奮本月十四日復奉

寄諭出力將士尤須及時酌保不可使有缺望若能從九江安

慶直抵金陵使長江數千里盡蕩妖氛則從征將弁朕必破格施恩以酬懋績欽此

臣

等跪聆之下仰見我

皇上鼓勵戎行之至意莫名欽佩比卽傳知各將弁傳諭各兵勇莫不感頌

皇仁權聲雷動茲將第三單酌定恭呈

御覽仰懇

天恩獎敘以作士氣而勵將來查李孟羣所帶廣西水勇於閏七月初一日以後始行開仗是以列入此單八月初三四等日陸軍克復崇陽大戰咸甯等處亦卽彙入此單不另具奏所有第三次彙單請獎各緣由謹會同南撫

臣

駱秉章恭摺由驛具

奏伏乞

皇上聖鑒訓示施行謹

奏

擬先攻半壁山破賊橫江鐵鎖片

日

豐四年九月二十七

正封摺間適接探報該逆於田家鎮江面橫安鐵鎖二道相距約十數丈鐵鎖之下排列小划數十隻以鎗礮護之北岸築土城多安礮位專防我軍戰船該逆屢次大敗之後而氣力尙凶橫如此殊堪痛恨臣等擬先攻田鎮對岸之半壁山奪其要隘則鐵鎖一岸無根當易拔去理合附片陳明謹

奏

縷陳鄂省前任督撫優劣摺

咸豐四年九月二十七日

奏爲博採公論縷陳鄂省前任督撫優劣恭摺奏

聞仰祈

聖鑒事竊

臣

國藩自入鄂城以來撫卹遺黎採訪輿論據官吏

將弁紳庶僉謂武漢所以再陷之由實因崇綸台湧辦理不善

多方貽誤百姓恨之刺骨而極稱前督

臣

吳文鎔忠勤憂

國殉難甚烈官民至今思之卽於前撫

臣

青麐亦尙多哀憐之

語無怨恨之辭蓋緣吳文鎔於上年九月十五日到鄂卯刻接

印未刻卽聞田家鎮兵敗之信閤城逃徙一空官弁倉皇無計

眾心渙散吳文鎔傳集僚屬誓以死守卽日移居保安門城樓

隨身僅一僕一馬無書吏幕賓無親兵夫役晝夜手治文卷衣不解帶者兩月由是人心稍定潰兵稍集賊匪仍退下游不敢徑犯鄂垣若堅守不懈未始不可轉危而爲安乃崇綸因偶懷私怨輒劾奏吳文鎔安坐衙齋閉城株守其實該前督日夜住宿城樓並未在衙齋少住片刻也賊匪所恃以駭人者全憑船隻之多萬帆颺忽千礮雷轟官軍若無舟師雖有陸兵數萬亦熟視而無可如何自上年田家鎮失防以後吳文鎔江忠源二人與_臣往來書函皆以籌辦水師爲第一要務_臣在衡州試造戰船吳文鎔屢函熟商言造船配礮選將習戰之法精思研究每函千餘字忠盡之忱溢於行間_臣愚竊嘆以爲不可及其言

湖北現僅雇小划擺江之類不堪戰陣必待臣處舟師辦就駛至鄂中始克會同進剿亦係實在情形乃崇綸茫焉不察動稱船礮已齊譏督臣畏憚不出吳文鎔素性剛介深以畏憚爲恥遂發憤出征以屢潰雜收之兵勇新募未習之小划半月不給之餉項倉皇赴敵又居者與出者不和事事掣肘遂使堵城之役全軍潰敗湖北府縣相繼淪陷蓋未始非崇綸參劾傾陷有以致之也尤可異者當參劾之後吳文鎔毅然出征崇綸復率僚屬力阻其行我

皇上曾嚴飭其自相矛盾迨堵城旣敗吳文鎔殉難閤省軍民人人皆知而崇綸以不知下落入奏不惟排擠於生前更復中

傷於死後正月十九日崇綸遣守備熊正喜至衡州一帶催臣

赴鄂救援偽造吳文鎔之咨文借用布政司之印信咨內但稱

黃州賊勢猖獗並不言堵城已敗督臣已死種種詐偽故作疑

似之詞無非謂吳文鎔未能殉難誣人大節始終妬害誠不知

其是何肺腸臣國藩於九月二十一日至黃州二十二日躬詣

堵城察看當日營盤地勢並祭吳文鎔之靈細詢該處居民言

吳總督自到營以來雨泥深數尺日日巡行各營激厲士卒正

月十五日見賊踏營盤四座知事不可爲乃於雪泥之中北向

九叩首痛哭大呼曰無以仰對

聖朝遂自投塘水而死其塘去營門遠不過六七丈土人言其

平日之勤苦臨終之忠憤至今有流涕者亦可見公道之不泯也吳文鎔受

三朝恩遇爲督撫二十年前此海塘潰決尙且慷慨激烈投海捐軀豈有全軍覆敗反肯濡忍偷生之理幸賴

聖明鑒照優加

卹典

賜予美諡吳文鎔得雪斯恥永銜感於九原否則名節誣墮雖死猶有餘憤矣吳文鎔旣沒青麀幫辦軍務崇綸又與之百端齟齬求弁兵以護衛而不與請銀兩以製械而不與或軍務不使聞知或累旬不相往還青麀在長沙時與臣言及崇綸之多

方掣肘台湧之坐視不救輒爲之椎胷痛恨怒皆欲裂未知曾否入

奏大抵治軍譬如治家兄弟不和則家必敗將帥不和則軍必敗一人而怨詈眾兄弟者必非令子一人而排擠眾將帥者必非良臣上年張亮基欲以全力防田家鎮崇綸既阻撓而不合繼又傾擠吳文鎔旋又忌害青麀皆使銜恨於地下平心而論鄂省前後潰敗決裂之由不能不太息痛恨於崇綸也自賊踞漢陽漢口爲老巢由是西至宜昌北至德安南犯湘省三次攻陷岳常澧州縱橫百餘州縣蹂躪殆遍廬舍蕩然寸草不留崇綸閉坐一城置罔聞知土匪擄掠亦置不問所失

國家土地並不一一詳奏百姓之言皆曰青巡撫在此尙有兵
勇驅賊之擄掠尙有告示憐民之疾苦崇巡撫並告示而無之
全不恤我等爲大清之赤子矣積怨如此我

皇上優容臣下僅予革職崇綸稍有天良亦當以一死圖報乃
六月初二日武昌城陷崇綸隨眾軍逃出展轉偷生反稱革職
回

京已於前一日先出鄂城呈請轉奏身爲封疆大臣無論在官
去官死難是其本分卽不死亦不妨明言何必倒填月日諱其
城破逃生之罪劾人則雖死而猶誣之處已則苟活而故諱之

豈非無恥之尤者哉臣自入湖北境內以來目擊瘡痍博訪輿論莫不歸罪於崇綸以年餘之成敗始末關繫東南大局不敢不據實縷陳其應如何聲罪嚴究

聖主自有一定之權衡

微臣

不敢擬議所有博採公論縷陳鄂

省前任督撫優劣情由恭摺附驛奏

聞伏乞

皇上聖斷施行謹

奏

硃批另有旨欽此

陸軍踏破半壁山賊營水師續獲大勝摺

咸豐四年十月初七日

奏爲陸軍踏破半壁山賊營水師續獲大勝恭摺由驛奏

聞仰祈

聖鑒事竊水師在蘄州獲勝陸營克復大冶興國業經馳奏在案查逆黨全力占踞田家鎮自蘄州至該鎮四十餘里沿岸增築土城安設礮位江面用鐵鎖橫亘阻截舟師其南岸之半壁山富池口均令重兵駐守兩岸之賊舟楫往來我軍欲破田鎮必須先奪南岸上年田鎮失防因半壁山富池口爲賊所據勢遂不支故南岸爲必爭之地臣等在鄂省時已經籌及是以克復興國大冶後卽定議占據半壁山富池口兩處臣塔齊布於

二十八日自興國拔營進紮富池口新授浙江甯紹台道羅澤南進紮半壁山是夜宿挑港初一早整隊進發羅澤南自帶湘勇九百合以游擊彭三元都司普承堯所帶寶勇九百各派七成隊爲前敵而以三成護輜重居中升用直隸州李續賓帶湘勇九百以三成護輜重前行而以七成居後防賊抄尾已刻行抵馬嶺坳距半壁山賊營二三里見該處孤峯峻峙俯瞰大江與田鎮諸山相雄長上紮大營一座小營四座挖溝深丈餘闊三四丈不等引內湖之水環灌之溝內豎立礮台木柵溝外密釘竹籤木椿其堅固與前次花園賊壘相埒而地險過之羅澤南等登高審度形勢正欲紮營賊忽以數千人來撲其田鎮之

賊渡江助戰者又數千人藏匿民房者亦紛紛突起約共萬餘人半壁山至馬嶺坳湖汊紛錯惟兩隄可通行人我軍列陣以待擬俟李續賓到後開仗賊恃人眾遽來搦戰寶勇居左向前迎敵被害數名諸勇盡退羅澤南恐一潰之後不可復救自帶敢死之士數十人匹馬衝去奮力堵殺賊眾退歸隄北羅澤南復由右隄衝出殺賊數人藍翎千總何如海手刃僞丞相一名與六品軍功彭稱祥併力向前從左隄殺出斃賊數十名突被高阜之賊拋擲石塊擊中何如海額端登時陣亡彭稱祥趕救一同遇害左隄湘勇亦稍卻退羅澤南從右隄回馬衝入左隄督勇截住賊眾愈殺愈多礮子雨下火箭噴筒交集兇猛異常

我軍進則賊稍退我軍卻則賊復前如此者數十次血戰三時之久賊雖屢挫尙拚死抵拒適李續賓帶湘勇後隊趲來救應軍氣益振羅澤南與候選知縣李杏春從左隄衝進李續賓從右隄衝進殲數十名賊眾大敗乘勝直逼賊營從木椿竹籤中踰溝而入縱火焚燒煙燄蔽空焚斃以數百計彭三元分途截殺普承堯亦從右出圍住賊營各勇追至江岸賊卽登舟我軍搶入舟中殺斃近千人江水盡赤覆舟溺斃者亦不下千人浮尸蔽江僞秋官丞相林紹璋被湘勇追至舟邊殺於馬下賊懼我軍飛渡自將浮橋拆斷生擒四十餘名據供除林紹璋外又有僞將軍陳姓僞指揮彭姓及僞官十數名均已就戮奪

獲黃旗百餘面馬三十餘匹子藥軍裝無算申刻收隊查明各
勇陣亡者計十三人此初一日陸軍羅澤南等在半壁山大獲
勝仗之實在情形也水軍自十九日戰勝後分紮漳源口之兩
岸與蘄州賊船相距二十餘里二十九日辰刻澄海營營官白
人虎定湘營營官段瑩器駕戰船十餘號往下遊巡哨風平水
溜忽近蘄城該逆猝出船百餘號圍擊澄海營被燒船一號被
擊破一號我軍小挫一面迎敵一面轉舵回營該逆見官軍卻
退遂乘東風大作飽帆來追凡尾追十餘里乘勢上犯直近老
營左營彭玉麟右營楊載福親往救應中營秦國祿清江營俞
晟嚮導營孫昌國各率快蟹長龍等大船盡出逆風開鎗排轟

而下哨官任星元李陞元鮑超等傍南岸而行衝至蘄州以下之釣魚台先包賊尾然後逆擊而上將賊船裹入中段該逆先乘順風上犯倉猝不能退轉又見官軍上下圍抄遂紛紛棄船登岸我軍自上而下者攢礮以轟登岸之賊自下而上者縱火焚釣魚台之賊船是日上犯之船悉數焚奪無得脫者計延燒賊船近八十號奪獲賊船大小四十六號巨礮六十三尊抬鎗鳥鎗旗幟號衣子藥偽書無算白人虎因初時小挫後得大勝憤極戀戰戍初猶未收隊被岸上之賊以抬鎗中傷額角卽夕殞命當逆船來犯時陸賊千餘人亦沿岸上撲護衛水師之陸勇先派八十餘人放哨突遇賊至鼓勇格鬥傷亡十餘人各營

始出隊救應前任江西巡檢石熾然偕浙江監生徐國本急稟請親勇十餘人奮往助陣石熾然刺倒大旗賊目復手刃六賊乘勝進追樹林內伏匪突出石熾然徐國本同時遇害賴大隊前往救應水軍復向岸轟擊始將陸賊擊退此二十九日水軍先挫後勝之實在情形也初一夜該匪乘北風甚勁前來驚我水營以小划十餘亂拋火毬而於北岸施放火箭臣國藩以黑夜風厲一經開動必至自相撞擊急傳令軍中曰船不開動者該哨官立即奏保其開動者立即責革各營堅壁不動手持水斗見火毬落船即時撲滅該逆射火箭數百枝僅燒一船餘俱無恙次日查明開動之船僅十餘號此外皆堅坐不動此初一

夜大風驚營之實在情形也伏查該逆自武漢敗竄卽全數防守田家鎮蓋以南岸之大冶興國北岸之蘄州廣濟向爲眾賊之淵藪而田鎮與半壁山又實爲天然之關隘故上游之賊併萃於此復自下游江皖糾集滿髮老賊來此拚拒阻我東下之師現在鐵鎖尙牢繫江心兩岸賊眾尙近四萬計日內必須大戰數次臣等謀定後發斷不敢稍涉疏虞此次與該逆爭此關隘幸仗

聖主天威水陸獲勝所有在事出力員弁兵勇仰懇

天恩容

臣

等酌量保獎以示鼓勵至陣亡各員除白人虎另片

請卹外藍翎千總何如海自岳州以來身經數十戰爭先陷陣

奮勇被戕合營皆爲痛哭克復武昌案內擬保守備尙未出奏
應請從優照守備例

賜卹前任江西馬當司巡檢石熾然膂力剛強膽勇俱壯因眾
寡不敵遇害碎首屠腸死事最烈應請

飭部議卹監生徐國本襄辦營務明敏勇敢武昌案內擬保從
九尙未出奏此次助陣捐生尸首無獲合無仰懇

聖恩卽照從九例議卹藉以昭激勸而慰忠魂所有水陸大捷
各情由謹會同湖廣督臣楊需恭摺由驛六百里馳奏伏乞

皇上聖鑒訓示施行謹

奏

請飭江西開局製造火藥鉛彈片

咸豐四年十月初七日

再臣等軍中所需子藥前後用至數十萬斤之多概係湖南省局支應不特撫臣等竭力籌解卽委辦後路糧台之保升道員裕麟保升知府厲雲官等均能設法預籌或水路虞其阻滯忽改陸路或前批尙未起行接辦後批委官委紳絡繹不絕實屬勉力供支無誤要需惟目下全軍將出楚境距南省千數百里江湖阻隔風信靡常此後殊難應手且南省供億經年力量不繼亦賴協濟於鄰封湖北殘破之餘竟難措辦相應請旨飭下江西撫臣陳啟邁遴委幹員籌款開局監製火藥鑄造鐵子鉛彈由湖口運解出江就近接濟庶可無誤軍行俟江省

子藥辦成解到後即可漸紓湖南省局之力理合附片具
奏請
旨

白人虎陣亡請卹片

咸豐四年十月初七日

再澄海營官白人虎籍隸華容剛正嫉惡本年三月十七日逆
首王光鼎丁魁生等聚匪千餘人逐官踞城白人虎捐貲募勇
與生員白明月等帶勇千餘往剿及賊戰於萬庾市殺賊七十
餘名白人虎右骹受傷復手刃二十二賊遂乘勝收復縣城生
擒匪目尹其正等追賊至石首縣境之招商河殲斃九十餘名
逆黨恨甚旋於五月初二分三路悉數來攻眾寡不敵縣城再
陷知縣宋昌期殉節義勇死者七十人白人虎遂赴荊州請兵
偕李光榮黃鵬程等援石首並攻華容十二日白人虎先驅及
賊戰於板橋殺匪千餘人再復縣城倡辦團練經荊州將軍官

文咨賞五品頂戴未知會否入奏復勦捕巴陵陳家林土匪殺
催貢之匪目楊大連易正清生擒王光鼎之父六月二十二日
逆船二百餘號在九都焚掠復帶勇勦斃五百餘名燒船二十
四號旋於華容石首監利三邑交界之塔市驛搜捕丁魁生家
口殺之義聲所倡各團響應該縣雖數月無官合邑士民咸奉
白人虎爲依歸土匪終不敢肆虐卽粵匪往來荊州岳州之間
不敢多擾華容亦賴白人虎保護之力臣國藩札調來營華容
士民畱之嗣令其招集水勇修理船礮駐紮新灘口以防裏河
之賊白人虎晝夜辛勤自家運米二百石以佐該營之用所得
公項銀兩盡數分給士卒其義俠廉正均不可及臣等方以國

士期之武昌克復案內擬保守備尙未出奏遽力戰捐軀深堪
慟惜該營官歿後其部曲揮涕如雨皆思爲之報仇其義憤亦
尙可用合無仰懇

皇上天恩俯念該營官徒手倡義功在地方卽照守備陣亡例
飭部議卹以示

旌異而慰忠魂

臣

等爲激厲人心起見是否有當謹附片

奏

聞請

旨

劉若珪殉難請卹片 咸豐四年十月初七日

再臣克復武漢卽派員查明殉難官紳下落據已革湖北鹽法武昌道劉若珪家丁趙升呈稱竊家主前在署黃州任內值粵匪數萬來攻孤城無援遂至失守當經投環自盡被眾家丁挽救復甦時以苟延殘喘爲恥鬱鬱不樂嗣經部議發遣因道梗難行粵匪復又上竄鄂省戒嚴奉崇巡撫札委巡守小東門夙夜在公不遑安息原冀戴罪自効稍贖前愆不料六月初二日省城再陷家主感憤愈甚卽在蛇山望闕叩頭懸樹自盡家丁見其情詞激烈不敢勸救又恐逆黨殘毀其尸隨負至寓所後院煤房掩厝用瓦礫標識卽縋城躲避

鄉間昨大軍攻克武昌家丁趨回原寓查看家主口身雖腐面
目如生呈懇奏明請卹等因據此當卽委員前往查驗無異仍
飭妥爲棺殮搬回原籍查革道劉若珪係前任大學士劉權之
之子由知府補授鹽道世受

國恩自去年以來屢以前事爲疚憤不欲生卒能一死殉城克
完初志我

皇上表章節義凡獲譴之員但能遂志捐軀均獲

加恩賜卹此外鄉紳義勇有因殺賊捐生者雖一命未膺猶蒙
恩卹屢奉

通飭欽遵在案今劉若珪引義自裁深堪憫惻合無仰懇

皇上逾格

天恩飭部議卹以勵臣節而慰忠魂所有據呈請卹緣由理合
附片奏

聞請

旨

謝兵部侍郎銜

恩摺

咸豐四年十月初七日

奏爲恭謝

天恩仰祈

聖鑒事九月二十七日准兵部火票遞到咸豐四年九月十三日內閣奉

上諭曾國藩著賞給兵部侍郎銜辦理軍務毋庸署理湖北巡

撫欽此竊

臣墨經從戎毫無勞績前荷

恩綸畀以封疆重寄

臣因母憂未除義不忍遽綰符綬且出境

東征於地方公務尤難兼顧是以具摺叩謝

天恩并辭巡撫之任迺前摺尙未賁到卽蒙

聖慈垂念

體卹周詳免其署理巡撫俾臣內不虧於名義外得効乎馳驅
凡私衷不敢上達之隱無一念不在

洞鑒之中感激涕零莫可言喻至頭銜之

寵錫尤慚悚之交增未展寸功叨司九伐責任愈重報稱愈艱
現在師抵蘄州水路兩獲勝仗又幸有半壁山之捷擬即將田
鎮老巢併力攻破以便直搗下游臣益當慷慨誓師枕戈待旦
拯生民於水火紓

宵旰之憂勤以期仰答

高厚鴻慈於萬一所有

微臣

感激下忱謹繕摺附驛叩謝

天恩伏乞

皇上聖鑒謹

奏

硃批知道了欽此

代奏羅澤南謝

恩摺

咸豐四年十月初七日

奏爲據情代奏叩謝

天恩事據新授浙江甯紹台道羅澤南呈稱九月二十九日在興國行營接奉行知咸豐四年九月十五日內閣奉

上諭浙江甯紹台道員缺著羅澤南補授欽此竊澤南湘中下士才識迂愚值粵匪擾及鄉閭倡辦本邑團練猥蒙保薦由廩生候選訓導嗣於勦辦桂東土匪案內經湖南巡撫保擢知縣上年六月帶勇赴援江西勦平吉安秦和股匪案內經江西巡撫保升同知直隸州畱於江西補用並請

賞戴花翎均未接奉部覆十二月勦平郴州永興土匪案內經

湖南巡撫保升知府請仍畱湖南帶勇奉

旨交部議覆亦未奉到部文本年七月岳州剿賊案內奉

旨羅澤南著以知府儘先選用並賞戴花翎欽此八月內克復

武漢奉

旨候選知府羅澤南著記名以道員用欽此自惟草茅寒畯驟玷崇班初無汗馬之勞徒切濡鵠之愧茲復渥荷

恩綸備員東浙初登仕版遽躋監司凡此非分之殊榮實爲夢想所不到捐糜頂踵豈足云酬惟有勉策駑駘誓殲醜逆蹈湯赴火所不敢辭庶冀稍答破格

殊恩於萬一除當設香案望

闕叩頭外呈懇代謝

天恩等情據此查該道荷蒙

超擢例應叩謝

聖恩既據呈請代奏理合轉達

天聽惟現當勦辦喫緊之際該道爲臣軍中萬不可少之員不能卽赴新任仍懇

皇上天恩簡員署理該缺俾得併力東征則感激益無涯矣所有代謝

天恩並請將該道畱營勦辦各緣由謹專摺附驛奏聞伏乞

皇上聖鑒謹

奏

硃批羅澤南著仍畱軍營欽此

陸軍奪半壁山斫斷鐵鎖水師繞出賊前摺

咸豐四年十月十四日

奏爲南路陸軍大捷斃賊約萬餘人斫斷江中鐵鎖水師繞出賊前屢獲勝仗恭摺奏祈

聖鑒事竊前月二十九日水師獲勝本月初一日陸軍大捷業經馳奏在案初二日餘賊聚集湖汊扛抬賊屍忽出數千人搖旂搦戰甯紹台道羅澤南因各勇久戰力疲不令出隊臣塔齊布自興國拔營本與羅澤南分爲兩路羅澤南西往半壁山臣塔齊布東往富池口初一日夜宿南村初二日行至軍山觜值該逆分數股來撲隨督參將周鳳山等奮力擊退焚燒富池口賊營一座卽在軍山觜紮營與羅澤南之營相去十餘里中隔

小河初四日

臣

塔齊布遣人搭造浮橋以通兩營之路羅澤南

派隊接應橋尙未成忽逆黨千餘人阻遏渡處而江中賊船忽

以數千人上坡排列半壁山之左北岸田家鎮之賊渡江者又

數千人排列半壁山之右其占踞舊壘之賊亦皆搖旂出隊羅

澤南急登高阜瞭望見僞官坐擁將台高聲發令龍旂黃傘氣

燄甚張數路賊黨約共二萬餘人我軍以

臣

塔齊布之師無橋

可渡僅羅澤南等湘勇寶勇二千六百人眾寡懸殊軍士恇怯

臨時逃去三人候選直隸州李續賓遣人飛馬追回此三人者

揮涕而手刃之慷慨誓厲人心始固羅澤南與眾將士約曰賊

眾我寡當以堅忍不發勝之卽督勇駐紮高阜之左李續賓駐

高阜之右游擊彭三元等排列江岸都司普承堯等排列馬鈴山左均防賊反奔賊眾屢次來撲我軍突起大呼衝陣連斃執旗賊目餘眾盡靡回奔半壁山舊營該處孤峯拔起惟後路有級可登前瞰長江下臨絕地我軍乘勝追殺飛上山巔逆黨無路可逃被剿千餘人從峭壁之上橫墜而下死者數千人冑石挂樹血肉狼籍餘賊奔江覓船我軍亦緣壁下擊呼聲震山谷有十餘舟因人數過擠自行沈溺有數十舟未及遽開被我軍躍入悉數撲水卽已開之船亦戰慄不能鼓棹我軍復用火彈火箭縱橫延燒卽合營之長夫餘丁亦各執械爭出或一人殺十餘賊平地血流崖有殷痕江之南岸水皆腥紅白湘潭岳州

以來陸戰數十次未有斃賊如此之多者也該逆大敗之後賊船概歸北岸我軍將南岸賊營盡數焚燬遣壯士百餘縋崖而下將橫江鐵鎖六條竹纜七條盡行斫斷日暮收隊是日臣塔齊布亦隔港分擊斬獲頗多忽有賊千餘人自下游富池口沿岸而上冀抄我軍之後臣塔齊布親率將弁回頭截擊該逆敗竄江邊亦被我軍追逼溺斃百餘人與上游溺賊繼續而下前此閏七月初二陳陵磯之役八月二十三洪山之役九月二十一大冶之役皆以追賊落水溺斃甚多未有如此次之慘者是夕浮橋始成該逆經此大創猶復積憤思逞初五日復從田家鎮渡江來犯約三千餘人意圖搶過浮橋先撲臣塔齊布營

壘當率游擊阿達春守備李新華等先過浮橋迎擊酣戰良久
羅澤南李續賓由左路出半壁山下彭三元扼截江岸普承堯
據守馬鈴山一路賊忽以千餘人搶踞山岡火毬連擲燒斃湘
勇二名前隊盡退羅澤南奮力衝截李續賓由山坡抄來賊始
敗潰乘勝追至江邊臣塔齊布亦已追至兩軍夾擊殺賊四百
餘名溺斃二百餘名內有黃馬褂及黃龍風帽之賊四名我軍
仍列隊江干以俟該逆見官軍盡赴下游遂開船百餘號從上
游登岸轟擊意欲徑撲羅澤南之營幸彭三元等奮勇堵截添
派三成隊登堤協剿該逆復揚帆上行數里至牛灌磯對岸蠡
擁上坡各勇亦沿江追擊數里羅澤南等復從半壁山下游趨

來援應斃賊數十名溺斃四五十名焚賊船三隻該逆始悉數敗歸此初四初五陸軍大捷斫斷鐵鎖之實在情形也訊據生擒賊供稱初四日登將台指揮者爲僞燕王秦曰綱憤岳州武漢之敗率滿髮老賊新來扼守田家鎮初一日該逆泊舟彭塘觀陣見官軍數止五六千人意甚輕之初四日挾全力來犯冀以一股遏臣塔齊布之軍使不得渡以一股圍撲湘勇寶勇各營不期大敗初五日興憤極復仇之師思一股先攻下游誘我軍全隊下擊別以一股從上游潛渡撲營不圖屢戰屢敗從此賊計已窮不敢復窺南岸而半壁山遂爲我軍所有矣水師自二十九日大捷後賊船灣泊蘄州城下以岸上之鎗礮護之我

軍屢次誘擊堅匿不出臣國藩與各營官熟商曰蘄州賊船不
過百餘而牽綴我軍不得直攻下游初四初五半壁山大戰我
水師不能前往援應此賊之詭計也我畱水師之少半與蘄州
賊船相持而以強半直衝下游與半壁山陸軍相合則不墮賊
計之中而賊船裹在中段亦自無可逃矣初八日左營彭玉麟
後營蕭捷三等因移營之便順攻蘄州之賊船轟礮數千賊尸
徧地逆船堅伏不出惟岸上土城之礮與船上之礮兩層環擊
與我相持官軍受傷亦多哨官蕭世祥中礮殞命鏖戰之際鈞
魚臺下有逆船數十號開竄我軍分船追剿拋擲火彈燒燬賊
船二十餘號奪獲二號乘勝追下遂進紮骨牌磯衝過賊營之

下十五里初九日復用小划誘賊出戰而以大隊圍擊蕭捷三營燒賊船八隻各營共燒十餘隻賊舟仍堅伏不出然上下皆官軍戰船該逆船裹入中段大小不滿六十號萬無久駐之理遂以初十夜乘大風挂帆遁去此初八九等日水師疊勝繞出賊前逆船夜竄之實在情形也伏查該逆以東西梁山爲江南門戶以田家鎮爲安徽門戶併力與我爭此關隘臣等定計先奪南岸之半壁山次攻江面之船然後合攻北岸之賊茲幸仰託

皇上天威南岸業經奪取北兵不甚得力俟江面勦辦得手卽當調南兵渡江會勦務期速破此關庶退可以固守兩湖進可

以規復江皖此次水陸鏖戰將士用命應請立沛

恩施以昭激厲候選直隸州李續賓手刃逃勇臨陣誓師有名將之風應請

記名以知府用並

賞加勇號升用游擊彭三元於全隊下擊之時獨能力堵上游偷營之賊進退有方應請以參將升用寶慶協都司普承堯以少擊眾膽力堅定應請以游擊升用先換頂戴其餘出力員弁兵勇仰懇

天恩俯准臣等擇尤保敘以勵戎行卽補外委蕭世祥屢著戰功武昌克復案內擬保千總此次奮勇捐軀深堪憫惻應請

飭部從優照千總陣亡例議卹所有陸軍奪取半壁山水師疊
勝各緣由謹會同湖廣督臣楊需恭摺由驛六百里馳奏伏乞
皇上聖鑒訓示施行謹

奏

硃批獲此大勝皆因汝等和衷共濟調度有方故能將士用命
以少擊眾朕披覽之餘感慰莫能言喻仍另有旨欽此

覆陳不克隨時知照江南片

咸豐四年十月十四日

再臣於九月二十三日在黃州行營欽奉

寄諭著隨時知照江皖各撫及托明阿向榮等四路兜擊以期直擣金陵等因欽此自應欽遵辦理惟自岳州以下久爲逆匪占踞軍中信息實有難於常通者臣國藩自辦理軍務以來於偵探文報二事亦嘗認真講求不敢稍涉疏忽在衡州時曾遣人探至安徽金陵一帶及至本年五月始歸又曾買船裝炭用重金雇人放至下游使賊擄去以探彼中消息前後放去炭船四隻共擄去二十七人現在逃回者止六人餘或業遭殺害或杳無音信至遣人專探賊情亦多遇賊被害或被官兵盤拏或

被鄉團捆獲皆因口音不符卽示以護票而不見信前遣三人至江西卽被高安縣鎖拏昨遣四人至安徽又被英山縣鎖拏雖經飛札飭放而橫被拘戮者尙多所遣探卒現有數人未歸此偵探之難也武漢未復以前臣營奏報均專差送荊州交驛三月內遣外委劉培元送摺赴荊歸途被賊擄去兩月始獲逃歸嗣遣外委陳金鼇赴荊復被土匪攔搶行李川資僅以身免凡被賊州縣驛站俱廢往往迂道數日中途忽又折回八月初四日克復崇陽二十四日大燒襄河賊船相去將近一月而臣報克復崇陽一摺與督臣楊需報襄河燒船一摺同日奉到諭旨緣一由楊店發行一由金口送荊州轉遞遂至遲速懸殊

此文報之難也至與長沙通緊要文件均須專差前往卽與半壁山陸營通信所過之地居民尙蓄髮盈尺使者疑畏動輒迂迴數日曰下臣營摺報仍須專人送至漢口方能交驛臣等深慮奏報不能迅速上厪

聖慮然道途多梗辦理實形踧蹙至與金陵揚州各營通信則須專差赴江西轉由浙江繞道前進動須數月之久前聞粵省紅單船已至東西梁山不勝欣喜頃聞忽又折回江浦爲之疑慮屢經查探終未深悉其詳合無仰懇

皇上天恩凡江南揚州各營現在情形及紅單船現泊何處飭令軍機處於

諭旨交寄之便隨時示知一二其安徽廬州等處臣卽廣遣差探時通消息以期無誤軍事所有江南不克隨時知照情形理合附片陳明謹奏

官軍攻破田家鎮燒盡逆船收復蘄州摺

咸豐四年十月二十一日

奏爲官軍大破田家鎮賊防燒燬賊船四千餘號田家鎮及蘄州兩處之賊悉數潰竄恭摺馳奏仰祈

聖鑒事竊官軍與逆賊力爭田家鎮一關初四初五等日陸軍大戰斫斷鐵鎖奪占南岸業經馳奏在案該逆安置鐵鎖之法與吳人成法不同吳人於兩岸鑿石穿鐵江中無物承之故一處鎔斷全鎖皆沈該逆則節節用小船承之中用木簰三架承之船與簰之頭尾皆用大錨鉤於江底鐵鎖四道橫於船簰之上以鐵碼鈴之故雖南岸斫斷一節而其餘數十節仍牢繫如故自初六以後該逆復將南岸一節續行鉤聯於半壁山下簰

上安礮船上置鎗以防我舟師之進逼礮上鋪沙船中貯水以防我火彈之延燒自鐵鎖以上皆賊之戰船大小約三四十號自鐵鎖以下皆賊之民船灣泊約六十里大小約五千號亦時放鎗礮以助聲威其北岸則於田鎮街外築一土城長約二里街尾爲吳王廟賊營一座繫鐵鎖北岸之根僞燕王秦曰綱駐其中街之上爲老鼠山賊營一座又上爲磨盤山賊營一座又上爲牛肝礮賊礮台一座自牛肝礮下至吳王廟長約六七里皆密排礮眼向江心轟擊全力以防舟師南岸自初四初五大敗之後不敢復於半壁山上紮營僅於山下十里富池口紮營三座以護下游之賊舟此該逆設防之實在情形也我軍戰船

自初九日進紮蘄州之下十二日遂進紮見峯觜去田家鎮僅九里右營參將楊載福左營同知彭玉麟等密登南岸至臣塔齊布及羅澤南營內共商大舉破賊之策楊載福彭玉麟歸船傳知各營官哨官曰明日破賊當分戰船爲四隊第一隊專管斬斷鐵鎖凡炭鑪鐵剪大椎大斧之類皆備第二隊專管攻賊礮船與之對相轟擊第三隊俟鐵鎖開後直追下游大燒賊船第四隊堅守老營以防賊船冒死上犯十三日辰刻戰船出隊臣塔齊布督同羅澤南周鳳山等率陸軍六千人排列江之南岸以助水師之聲威該逆自牛肝磯礮台以下直至吳王廟盡銳抗拒千礮環轟子落如雨我水師第一隊哨官劉國斌萬瑞

書等循南岸急槳而下一礮不發徑赴半壁山下鐵鎖之前賊以礮船開近救護我軍第二隊環圍擊之燒其快蟹船二號該逆不敢復護鐵鎖劉國斌等椎斷船上之鐵碼船卽自鎖下抽出哨官孫昌凱繼以洪鑪大斧且鎔且椎須臾鎖斷各三板飛槳駛下該逆見官軍衝過鐵鎖驚顧失色卽時旂靡眾亂解上放礮之賊已駕小划而遁下游賊舟倉皇揚帆下竄我軍三板追及縱火焚之楊載福等先夕與各哨官議曰先燒在上者則在下者開竄遠矣不如窮追數十里從下游延燒而上至是各哨船梭穿於千百賊船之中迅如飛鳥礮聲雷動申酉之際追至三十餘里之武穴地方乃縱火大燒煙燄蔽天仰託

皇上威福

蒼穹默佑是時東南風大作賊舟不能下行紛紛撲水號哭浮
沈昏懵無知或反攀戰船求救輒被官軍刺斃或緣登賊舟賊
亦抽刀斫之不能相顧其悍賊開駕下竄或被勁風吹還撞近
南岸陸路之軍又從而縱火焚燬其火藥大船最多往往衝入
重霄碎板亂飛當水軍衝過鐵鎖之時臣塔齊布卽督飭陸軍
從半壁山飛馳而下呼聲震天與戰船礮聲相應將近富池口
賊營二三里該逆并不抵敵出營大潰尙有二三百人逃竄不
及者全數追逐落水陸軍與水勇爭前刺殺縱火燒其營盤自
半壁山以至富池口中間沙洲數里前此初四初五之戰尙有

千餘賊屍未收至是焚溺半死之賊復混雜於沙際水濱殘骸
堆積斷肢漂流目不忍睹楊載福劉培元洪定陞李成謀等見
鄔穴以上焚燒略盡鄔穴以下尙有賊船復率十餘舟鼓棹窮
追又三十里至龍坪時已三更凡燒船約四千餘號百里內外
火光燭天皆該逆歷年所擄民船同歸浩劫楊載福至次日已
刻始行歸隊以竟日不食積勞嘔血各勇奪獲賊船至五百餘
號之多彭玉麟恐船隻太多爭奪貽誤又恐眾勇飽則思颺遂
將奪回之船一弁焚之臣等一軍陸路殺賊之多無過初四半
壁山之戰水路燒船之多無有過於是日者該逆舟楫被燬無
巢可歸無糧可食無子藥可用遂於十三夜四更自焚營壘而

遁此水師大破田家鎮賊防之實在情形也至蘄州陸賊雖與
田鎮之賊爲一而兩路抗拒各有頭目踞田鎮之逆首爲僞燕
王秦曰綱僞國宗韋俊等踞蘄州之逆首爲僞檢點曾鳳傳陳
玉成等各有真賊數千脅從數萬田鎮之賊力爭南岸之半壁
山南軍破之於前水師焚之於後蘄州之賊與北軍相持日久
本擬調羅澤南渡江會剿因臣塔齊布兵力單薄未敢分兵北
渡臣國藩屢飭魁玉楊昌泗等深溝高壘暫主守而不主戰並
飭署黃州府許廣藻等扼要駐守遏賊上竄之路又有南軍護
衛水師之陸勇二千人亦飭扼守北岸爛泥灘一帶十二日都
司楊名聲教諭唐訓方等率護水師之二千人移營柵欄山十

三日田鎮鏖戰之時蘄州賊忽出數千人來撲楊名聲等督勇迎敵接戰逾時該逆忽從左側山後抄出一股各營驚潰陣亡四十餘人營棚被燬逆黨尾追水師戰船向岸開礮轟斃大旗賊目數名賊始退入蘄城十四日賊黨三千人復偷搭浮橋從牛馬坳來撲魁玉等各營別由東路菩提壩分股抄尾並撲至曹家河劫搶糧米營盤亦被焚燬楊昌泗等分途抵禦許廣藻李玉田等併力策應始將該逆擊退蘄州之賊兩次上撲北岸各軍尙不知田鎮老巢已破逆舟已焚遂爾猖獗自恣旋聞下游大敗頓失所恃遂於十四夜三更棄城而逃竄往廣濟一帶此北岸官軍雖挫蘄州之賊聞敗逃竄之實在情形也伏查該

逆以田家鎮爲金陵咽喉并力爭此關隘臣等以南岸山高早經籌定先攻南岸次攻江面然後合攻北岸不圖鐵鎖一破焚舟數千不特田鎮之賊不戰自潰卽蘄州乘勝之賊亦膽破宵遁此皆我

皇上憂勤惕厲上格

天心故能使風伯助威祝融效命且大戰數日傷亡亦並無多臣等實念不到此現已飛飭水師全隊乘勝進攻九江臣塔齊布等卽日由陸路前進此次水陸將士非常出力應請立沛破格

恩施以勸將來副將銜升用參將楊載福卽選同知彭玉麟共

定四隊進兵之議眾船大戰條理不亂楊載福徹夜追賊勞苦無比應請

記名以副將用仍加總兵銜彭玉麟將奪獲之船燒盡禁貪息爭紀律尤嚴應請

記名以知府用並

賞加勇號浙江甯紹台道羅澤南謀勇俱備奪占半壁山爲此次第一功績應請

賞加按察使銜保升游擊普承堯首先撲營應請

賞換花翎守備用劉培元守備銜千總秦國祿孫昌國外委洪定陞各帶本營戰船奮勇衝陣窮追下游四十餘里劉培元武

漢之役身受重傷擬保都司尙未出奏此次仍請以都司升用並

賞換花翎秦國祿武漢案內擬保都司尙未出奏此次仍請以都司卽補並

賞戴藍翎孫昌國請以守備補用洪定陞武昌之役頭面受傷擬保千總尙未出奏蘄州兩戰最爲奮勇此次請以千總卽補加守備銜並

賞戴藍翎其餘出力員弁兵勇仰懇

天恩容

臣

等開單保獎以勵軍心陣亡兵勇查明照例辦理所

有官軍攻破田家鎮燒盡逆船收復蘄州各緣由謹會同湖廣

督臣楊需恭摺由驛六百里馳奏伏乞
皇上聖鑒訓示遵行謹

奏

硃批另有旨續獲此勝皆因汝等籌畫盡心朕甚廑念欽此

請飭各路帶兵大臣督撫擇要防堵片

咸豐四年十月二十一日

再逆賊經屢次大創前後焚燬逆船約計萬餘號長江之險我已扼其上游金陵賊巢所需米石油煤等物來路半已斷絕逆船有滅無增東南大局似有轉機然閱看賊中文卷並細詢逃出各犯知其頭目傷亡者無多而兇悍亡命之黨爲數實尙不少臣等初慮江面不清或成割據之勢若剿辦得手又慮江面一清或成流賊之患蓋水師一入皖境燬其舟次之巢穴失其飄忽之長技分支四竄乃事勢之所必至臣等一軍以肅清江面直搗金陵爲主設該逆旁竄他縣陸軍竟難兼顧相應請旨飭下諸路帶兵大臣及各省督撫擇要堵禦預防流賊之患

其不臨江之府縣或爲該逆盤踞官軍所必爭之地臣等亦必迂道往攻斷不肯舍難就易稍誤事機理合附片陳明謹奏

水師前隊已抵九江片

咸豐四年十月二十一日

正封摺間接據稟報水師前隊彭玉麟等十九日已追賊至九江沿途續焚賊船百餘號九江城外已無賊踪城內賊亦無多惟十三夜逃出賊戰船八號尙泊九江之北岸其田鎮蘄州之賊概由北岸竄至黃梅孔壠驛一帶臣塔齊布於二十日率羅澤南等渡江至田鎮巡北岸而下擬至九江對岸與水師一會再行相機勦辦理合附片奏

聞謹

奏

卷之四

四

抄呈賊中偽牘片

咸豐四年十月二十一日

再水師奪獲偽燕王秦曰綱座船內有偽奏牘稟稿二冊偽文
卷無數查悉秦逆於九月內經偽東王傳令專守田家鎮與已
革偽豫王胡以晄偽佐天侯陳承鎔偽國宗韋俊石鎮崙韋以
德石鳳魁偽丞相羅大綱黃再興等統帶賊眾併力拒守韋以
德石鳳魁黃再興係武漢逃出者亦令帶罪協防黃再興曾具
稟勸回九江秦逆以偽東王疊次諭詰田家鎮爲金陵咽喉不
許退行一步現在踞安慶者爲偽翼王石達開踞九江湖口者
爲偽丞相何潮元羅瓊樹偽指揮賴桂英等其韋以德石鎮崙
及偽指揮黃鳳岐偽承宣吉志元偽將軍梁修仁陳文金陸鍊

福等則於初四初五等日伏誅茲將偽稟奏鈔

呈數件以見賊中文案之大概該逆偽憲書大月三十一日小月三十日並不置閏不相符合故用紅紙簽出又訊據賊供秦逆統帶老賊數千脅從數萬惟老賊被誅者見諸稟牘餘皆隱匿不報以諱其敗故偽稟中言就戮者爲數極少合并附片陳明謹

奏

硃批覽奏均悉鈔單畱覽欽此

武漢克復保案摺

咸豐四年十一月初六日

奏爲遵

旨酌保克復武漢興冶各城之出力員弁兵勇懇

恩獎敘以勵軍心事竊照水陸官軍於八月二十一二十二三等日攻克武漢二十四日搜剿襄河埽平巢穴各營官如李孟羣羅澤南楊載福等當蒙

優擢其餘出力員弁兵勇欽奉

恩旨著臣等查明保奏嗣水師於九月十九日在蘄州大獲勝仗陸軍於二十日克復興國州城二十一日克復大冶縣城復

奉

諭旨准將在事員弁兵勇擇尤保獎欽遵各在案伏查武漢之役血戰三日夜蹋賊營十九座焚賊船千餘號次日搜剿襄河復焚船千餘號共斃賊萬餘人解散以數萬計南路進剿興冶蕩平賊巢省府州縣城池先後克復水師復有蘄州之捷各將士以寡擊眾奮不顧身實屬出力我

皇上俯念此軍關繫東南大局疊沛

恩綸岳州保獎兩單及自岳以下沿途十餘戰保獎一單均蒙俞允各營無不同聲感頌嗣因羅澤南

特簡浙江道員楊載福

超擢常德副將

聖主用人破除資格各將士逃聽之餘尤覺鼓舞奮興爭先恐後今將武漢興冶蘄州各戰之出力員弁兵勇悉心酌核開單共三百四十人進呈

御覽伏懇

天恩賞准以作士氣而勸將來所有欽遵兩次

諭旨開單請獎緣由謹會同湖廣督臣楊需恭摺附驛具奏伏

乞

皇上聖鑒施行謹

奏

名

陸軍克廣濟縣水師九江獲勝摺

咸豐四年十一月初六日

奏爲官軍陸路在北岸蓮花橋大獲勝仗克復廣濟縣城水師在九江開仗獲勝恭摺馳奏仰祈

聖鑒事竊官軍大破田家鎮賊防收復蘄州業經馳奏在案該逆自經痛剿後蘄州之賊爲僞檢點陳玉成等所統者竄踞廣濟縣城田家鎮之賊爲僞燕王秦曰綱所統者竄踞黃梅縣城及九江對岸之小池口等處而僞冬官丞相羅大綱又新自安徽帶滿髮老賊萬餘來援亦分布黃梅境內各要隘臣塔齊布督同羅澤南等陸軍自田家鎮全數渡江凡三日渡畢繞至蘄州二十五日進紮去蘄三十里之菩堤壩二十六日羅澤南率

後隊亦至營壘未定賊黨已至蓮花橋距我師五里分兩路來
撲臣塔齊布派參將周鳳山等爲前鋒自帶各營爲後勁由北
路迎擊羅澤南列陣南路以防抄尾賊從北路沿途設伏以輕
騎搦戰前隊交鋒賊卽佯敗退至數里之遙伏賊突起蜂擁而
來鏖戰時許前隊皆卻賊眾返追逾四五里勢甚兇悍臣塔齊
布後隊踵至匹馬衝截陣斬大旂悍賊各勇始回戈向敵賊遂
大潰我軍乘勝追殺百餘名忽北路之左又有賊黨埋伏冀圖
抄襲臣塔齊布復督敢死之士移衝左路立斬黃衣騎馬僞官
殲賊無數追不數里該逆又回頭反撲我軍愈進愈厲該逆仍
不能支且戰且退先後擊敗三次羅澤南等在南路中隔山岡

行十餘里始聞北路開仗小挫急由山腰橫截而北正值賊眾大敗之時會合追剿追至二十里外之朱雲鋪栗木橋地方共計殺賊一千二百名尸橫徧地是夜賊入廣濟五更候盡數逃竄遺棄米穀軍械無算二十八日官軍收復廣濟縣城嚴諭居民薙髮此陸軍大捷克復廣濟之實在情形也水師自十九日前隊已抵九江見江中之賊僅戰船八號惟兩岸營壘較多因駐泊二套口俟隙進剿詎該逆見官軍猝至兩岸營內賊眾頓集併力固守又自湖口趕來大小戰船堅守江面仍用陸路之賊穩護江心之船南岸則郡城老賊與湖口賊營相通北岸卽小池口秦曰綱與羅大綱之黨所共踞守者也二十五日營

務處李孟羣偕各營帶船進剿履勘形勢見南岸九江城外設礮台三座附城泊大戰船六隻雜船十餘隻北岸小池口賊營三座礮台三座江心沙洲營盤一座高建望樓密排礮位洲尾有巨簾橫亘數十丈攔截江面上環木城安礮兩層以大戰船數隻雜船百餘隻護之我軍兩路進發南岸之賊開礮拒敵子飛過江我船衝出其下直向木城攻擊又循北岸鼓棹而還岸賊呼聲震天我軍若罔聞知雖眾礮雷轟往來自如凡斃岸賊百餘名申刻收隊此水師履勘賊營接仗獲勝之實在情形也二十六日李孟羣坐長龍船督陣協同後營都司蕭捷三中營守備秦國祿清江營州同俞晟等直抵九江城下城上賊搖旂

放礮傍岸賊船亦同時轟擊我軍冒險仍衝出下游回舵急攻礮無虛發賊眾紛紛墜水立焚數船該逆棄舟奔竄焚其快蟹二隻雜船十餘隻岸上之賊猶據牆開礮我戰船沿岸而上盡斃數十名始竄入城中李孟羣見南岸雖已得手而北岸沙洲賊營甚固箴上之木城岸上之礮台傍箴之大船傍岸之小划層層依護將欲攻奪其堅必須由下游兜剿而上乃復與各營順流直下衝過七八里之遙始行急槳回攻該逆水陸攢礮子落江心密如撒豆我勇受傷愈多眾船愈厲哨官蘇勝鄭沐等由下包抄閔世慶等砍悍賊落水隨焚燒北岸賊船二十餘隻惟快蟹屢燒不然黃正良躍入賊舟斷其舵槳猶復拚死不退

麥保擊斃黃衣賊目其陣始動眾賊紛紛向內奔走而木簾大
船之賊仍堅悍如故李孟羣移船親自往攻各哨隨之誓必奪
其大船眾礮對轟羣子亂落濃煙蔽江咫尺不辨旗幟一巨子
由李孟羣身旁飛過擊中親丁骨折旋又擊穿艙板又中守備
何越珽右腳船多穿孔江波鼎沸各船始暫停以觀其變該逆
旋將大戰船開動下駛附以小划數隻我軍竟不能奪之也各
船衝下過遠者歸途單弱蘇勝中礮殞命鄭沐被戕落水吳隆
礮傷左腿李金樑三板被礮擊沈人船俱失各哨官憤極復力
進轟擊卒得追焚賊船七隻奪回一隻秦國勝至上岸與賊爭
拖一划人人奮怒如報私仇李孟羣因日暮戀戰恐有挫失飭

令收隊凡血戰四時之久燒燬兩岸賊船四十餘隻礮斃砍殺
水陸賊匪五六百名搶獲黃旗黃傘紅衣鎗礮子藥不計其數
而官軍傷亡亦殊不少此二十六日水師苦戰大勝之實在情
形也伏查該逆水中屢次大敗皆因民船太多被我燒燬頓失
所恃賊眾奔潰此次民船甚少純用大小戰船抵死抗拒又以
兩岸及洲中營盤木簰互相保護局勢爲之一變欲攻江中之
船必先破北岸之賊欲攻北岸之小池口必先破黃梅大河埔
孔壠驛之賊臣塔齊布督同諸陸軍惟當攻克黃梅掃蕩諸處
速至江岸與水師會合夾擊一俟勦辦得手再行渡江會攻九
江郡城此次水陸將士均極用命特懇

天恩容

臣

等擇尤保獎以示鼓勵守備銜千總蘇勝把總鄭沐

六品軍功

李金樑由粵赴楚以來無戰不奮均屬衝鋒敢死之

士武昌田

鎮兩案蘇勝擬保守備鄭沐擬保千總加守備銜李

金樑擬保

藍翎外委今俱力戰捐軀深堪慟惜合無仰懇

皇上逾格

鴻恩蘇勝鄭沐均准照守備例李金樑准照外委例

飭部議卹

以慰忠魂其餘傷亡弁勇查明照例辦理所有陸軍

克復廣濟

水師大捷各緣由謹會同督

臣

楊需恭摺由驛六百

里馳奏伏乞

皇上聖鑒訓示施行謹

奏

固原提督桂明禹駐黃州片

咸豐四年十一月初六日

正封摺間據報陸路官兵克復廣濟後於十一月初一日在離
黃梅十五里之大河鋪地方大獲勝仗殺賊三千餘人蹋破賊
營五座係逆首羅大綱之黨其開仗情形卽日縷晰奏報現查
黃梅縣孔壠驛及江岸之小池口悍賊尙多日內當有數次大
戰_臣等陸軍單薄惟當步步謹慎謀定後進不敢稍涉大意至
固原提督_臣桂明一軍_臣國藩曾與督_臣商定咨令桂明駐紮
黃州以防賊由蘄水抄襲後路是以該提督未能同赴下游會
剿緣奉兩次

諭旨垂詢謹附片陳明謹

奏

奏和卷四

四

魏作霖請卹片

咸豐四年十一月初六日

再蘄州克復後據州判魏作霖之子候選訓導魏孝儒呈稱竊職父係四川成都府新都縣人由廩貢生歷任忠州學訓導復由海疆議敘選授今職於道光二十九年到任本年九月內奉魁都統楊總兵札委親赴各鄉勸捐兵米蘄州自被賊以後居民市肆焚掠已空惟職父素得民心採辦尙易大兵到蘄經月口糧皆其籌濟不期十月十四日解米回營值大股賊撲至卽與都司咸恆帶兵出禦至野塘觜地方職父奮力督勇殺賊二名該逆愈殺愈多我軍寡不敵眾職父身受矛傷被賊圍去執至蘄城先挖雙目繼以酷刑職父罵不絕口被支解而死十五

日賊退蘄民收拾殘骸代爲殮厝時職亦奉委在鄉採買米石
聞變痛不欲生籲懇據情轉奏等情據此伏查蘄州州判魏作
霖由敎職擢任州佐蒞蘄數載士民愛戴茲因罵賊被戕慘遭
屠戮實堪憫惻既據伊子具呈前情臣等覆查無異合無仰懇
皇上天恩

飭部議卹以慰忠魂理合附片陳明伏乞

聖鑒謹

奏

調張丞實帶勇片

咸豐四年十一月初六日

再湖南永州府知府張丞實樸實勇敢志切憂時上年壬子歲召對時曾請殺賊自効久邀

聖鑒臣國藩駐紮衡州該守屢以從軍爲請時方署理衡永道地方緊要未便遽行

奏調茲道篆早經交卸臣等出境剿賊正在需員差委之時昨已咨商南撫臣飛調該守來營將現在添募之湘勇左營交該守管帶與羅澤南李續賓聯營進剿行止相依以厚兵力所有調員帶勇緣由理合附片陳明伏乞

飭部查照辦理謹

奏

硃批著照所請欽此

奏和卷四

五

陳明服闋日期片

咸豐四年十一月初六日

再臣國藩於咸豐二年六月出差江西七月二十五日在安徽太湖縣途次聞訃丁母憂回籍本年十月二十五日服闋例應入

京叩請

聖安茲臣辦理軍務不及赴

京謹已遵

制釋服理合將服闋日期附片陳明謹

奏

陸軍雙城驛大捷克黃梅縣摺

咸豐四年十一月十一日

奏爲官軍在雙城驛大獲勝仗追至大河埔踏燬賊營旋在夏新橋大獲勝仗克復黃梅縣城恭摺馳奏仰慰

聖懷事竊照陸路官軍在蓮花橋獲勝克復廣濟縣城業經馳奏在案該逆以黃梅一縣爲湖北安徽江西三省總匯之區必併力死守拒我東下之師僞燕王秦曰綱率田家鎮大股僞檢點陳玉成等率蘄州大股僞丞相羅大綱率安慶新到大股及太湖宿松小股皆集於黃梅一縣其守黃梅也不守城而守險不守一隅而分拒數處以萬餘賊拒江岸之小池口抗我水師以數萬賊據城西二十里之大河埔拒我陸軍以萬餘賊安營

北城之外以數千賊往來孔壠驛如游擊之兵與諸處相爲聯絡賊營年二十以上者謂之牌頭二十以下者謂之牌尾十月三十日賊將牌尾送入城內牌頭悍賊盡畱大河埔營中大河埔凡立營五座其最大者二座一在龍頭寨山上一在古義豐縣廢城之南小者三座夾立於左右深溝堅牆木椿竹簽與田鎮相似臣塔齊布與羅澤南商用該處蓄髮之民直入賊壘探明情形三十日自廣濟拔營行三十里駐紮荊州鋪十一月初一日已刻進至雙城驛離大河埔十里許紮營拏獲賊探僞將軍蘇政春一名立予斬梟賊乘我軍初至營壘未定率眾來撲雙城驛地方中係田壠廣數千畝左右高峰森列賊分三路而

來用聲東擊西之法先以數千人排列於右路山巔搖旗搦戰復以數千人伏於左路山岡之下計乘我兵前進從後抄尾其由中路而進者亦分三路共二萬餘人漫山遍野旌旗蔽日臣塔齊布與羅澤南急登高岡審明形勢亦分三路擊之臣塔齊布率各標兵勇及湘勇右營左營居中路以禦田壠之賊周鳳山彭三元等率道州勇寶勇辰勇出左路以防岡下之伏羅澤南率湘勇中營及湖北參將札拉罕等之兵勇八百出右路以禦山巔之賊右路賊吹角放鎗迭次進撲我軍以高阜難於仰攻按兵不動奮登山尖賊眾反在其下右路之賊先潰左路周鳳山等亦奮登山岡衝殺而出岡下之伏賊亦潰惟中路賊黨

排列溪岸死守不退鏖戰良久我兵勇躍溪而過刺取悍賊數人右路之追賊者漸繞出中路之後該逆知抵敵不住回旗狂奔三路分追呼聲震天追至十里之遙直逼大河埔賊壘其守壘之賊又從營內衝出抵禦敗賊亦回旗來撲我軍因逐北太遠隊伍稍亂羅澤南等令按旗少息待各路齊集大呼直前無不以一當百將賊營五座立時蹋破盡數焚燬煙燄迷天各路共斃賊約三千餘人生擒九十四名就地正法奪獲旗幟馬匹軍械無算該逆所聚之糧亦皆爲我所有此初一日戰勝雙城驛追至大河埔蹋毀賊營之實在情形也初二日雨雪不能進兵初三日由雙城驛拔營未刻抵黃梅城西四里之夏新橋駐

紮臣塔齊布與羅澤南率兵勇至城外周歷高岡審視形勢以定進攻之策黃梅城東南依山高峯排列一溪環繞城根西面溝港錯雜水深泥爛惟二橋可渡北面則高阜疊起有險可據爲攻城必由之路賊於北門外紮大營三座牆壁堅固營外悉掘梅花陷坑深逾丈餘布以地雷竹簽冀陷我師其精銳萬餘人悉萃其中西門紮小營一座又拆民房磚石將城增高數尺滾木擂石四面環布誓相死守以日暮不能進攻焚西門外小賊營而歸初四日辰刻派參將周鳳山守備李新華帶道州勇攻西門楊名聲呂克生黃玉芳等之勇助之臣塔齊布率撫協各標兵羅澤南率湘勇中左右三營彭三元普承堯等率寶勇

會攻北門恆泰札拉罕率湖北兵勇助之直逼賊壘因二橋逼
窄過去恐爲賊所邀截彭三元等列陣橋西以待臣塔齊布與
羅澤南繞北面溝港之中擇涸處取道而入賊眾萬餘人排立
營柵搖旂放鎗火箭疊施東北隅林中多設伏兵圖抄我師之
後因與諸將議曰賊以逸待勞以高拒卑攻之未易得手須以
前茅仰擊更番迭進俟其少疲後勁從而乘之可立破矣乃以
辰勇湖北兵勇紮東北隅岡上防林中之伏而使各營迭進擊
之鏖戰良久臣塔齊布督同候補知府李續賓先進逼賊木柵
立斬大旂賊目數名羅澤南與蔣益澧帶湘勇中左二營隨進
彭三元普承堯亦從西面越二橋而來呼聲震天地諸勇從柵

門冒險躍入縱火焚燒賊勢大敗辰勇湖北勇從東南而來道
州各勇從西南而來是時魁玉楊昌泗亦率兵勇由大河埔繼
進聞戰迅至以爲後應四面圍剿賊見火起倉皇無計由營壘
潰出墮入陷坑者以二千計坑固深峻又有木椿極銳我師從
坑上刺之如刺死豚宛轉哀號鮮得脫者遂乘勝直逼北門城
根城上之賊鎗礮齊開木石紛擲賊之緣城而走者反爲所擊
諸勇冒險追殺連斃千餘人口填盈溝水爲腥赤城外餘賊悉
奔赴城東南馬尾山城中之勢不能自固諸勇或肉薄而上或
乘梯而登入城復殺數百人城內賊黨遂從小南門化龍門縫
城而出亦奔東南山谷中當登城之時城上木石紛擲我兵勇

亦多傷亡臣塔齊布頭受石傷血流滿襟卽補千總王映軫躍

馬救護扶回營中王映軫被城上礮傷落馬匪黨執去立遭戕

害諸將旋亦收隊不復窮追而賊黨已全數遠竄矣是夜臣塔

齊布仍裹創巡行營壘以安士卒之心初五日偕羅澤南等入

城安撫難民諭令薙髮此黃梅城西北大獲勝仗克復縣城之

實在情形也現在賊之小股下竄宿松太湖其大股仍屯踞孔

壠驛小池口以圖盡力抗拒我師臣國藩飛咨督臣楊需及提

桂明卽日整隊東來於梅濟交界之處擇要紮駐以堵西竄

之路臣塔齊布頭傷已愈卽日進擣小池口與水師會合先剿

北岸次清江面然後渡江以圖攻克九江郡城此次官軍深入

賊地逆黨拚死來爭我軍以寡擊眾並不用虛聲奇計專以紮
硬寨打死仗爲能士卒益加用命守備銜千總周友勝手執大
旗爭先陷陣殺賊最多應請以守備補用

賞換花翎補用守備余星元滕國獻每戰衝鋒不避矢石均請
免補守備以都司補用其餘出力員弁兵勇容

臣等核實保獎

仰候

恩施臨湘汛把總藍翎升用千總王映軫屢立戰功田鎮案內
擬保守備茲因情切救援帶傷落馬被戕最慘仰懇

天恩卽照守備例

賜卹以慰忠魂此外陣亡兵勇查明照例辦理所有陸軍連捷

奏稿卷四

克復黃梅縣城緣由謹會同湖廣督臣楊需恭摺由驛六百里
馳奏伏乞

皇上聖鑒訓示施行謹

奏

水師小勝並陳近日剿辦情形摺

咸豐四年十一月十一日

奏爲水師初一日開仗小勝並附陳近日剿辦情形恭摺具奏
仰祈

聖鑒事竊照前月二十五六等日水師開仗情形業經奏報在案嗣據探報二十八日江西戰船在姑塘地方被賊撲營小有挫失我軍水師防範愈嚴十一月初一日該逆用小划數十隻及快蟹等船水陸并進前來撲營左營彭玉麟副左營劉培元後營蕭捷三暨孫昌國段瑩器等出隊迎敵李孟羣駕長龍隨後督陣該逆甚爲汹涌兩岸賊巢並木障大船三面礮子密如驟雨復以小划往來江中欲圖抄襲彭玉麟等督勇圍攻轟斃

賊匪無數其小划敗退下竄其戰船亦收近北岸與陸賊營壘相依護各哨官銳意欲奪其快蟹焚其木簾鏖戰三時卒不能奪該逆兩岸礮台簾上木城攢礮相迎各營弁勇被羣子中傷多人彭玉麟座船被礮傷者三名因鳴金收隊回營伏查我軍初到九江之時僅見該匪大戰船八隻旋在湖口趕來賊船百餘號我師兩次苦戰卒未能大挫凶鋒皆因兩岸賊營太多水陸依護抗拒甚力而我師與陸軍隔絕孤懸大江介處賊營之中晝夜戒嚴該逆每夜以火毬火箭近岸拋擲連日雨雪交加師船泊中洪則爲風波所撼泊岸邊則爲陸賊所撲故日來水軍勞苦有倍過於田鎮以上者臣等細察近日勦辦情形有可

恃者數端而可慮者亦有數端凡覘軍事之勝敗先視民心之從違前此官兵有騷擾之名賊匪有要結之術百姓不甚怨賊不甚懼賊且有甘心從逆者自今年以來賊匪往來日密搶劫日甚升米尺布擄掠罄空焚燬屋廬擊碎釜缶百姓無論貧富恨之刺骨其自遭家難既有創深痛鉅之情其追溯

皇恩遂有挾髓淪肌之感

臣

等一軍所到之處民間焚香頂祝

夾道歡迎紮營之地或送薪米或送猪羊蓄髮之民願爲偵探願爲嚮導賊匪雖嚴刑禁殺百姓不甚畏忌猶殷殷輸誠於官軍我

國家深仁厚澤二百餘年不當此大亂之後不知感人之深一

至於此_臣等適逢其會而食其報而今年兩湖三江又皆年穀
順成豐收三倍萬民樂業翹首望治視往年官兵過境無物可
供買辦無人可爲嚮導者氣象爲之一大變此民心之可恃者
一也此軍初起餉項支絀幾有朝不謀夕之慮自蒙我
皇上殷勤垂念

飭令湖南供支又

飭諭四川廣東協濟又

飭江西陝西籌解鉅款又頒發部監各照_臣等所請者仰邀

聖慈俞允_臣等所不及請者亦蒙

特旨飭催今湖南江西捐項日形踴躍陝西已解到六萬四川

又續報三萬前此之餉無欠臘月之項有著軍士有飽騰之象
臣等鮮意外之虞此餉需之可恃者一也軍興以來多以意見
不合將卒不和貽誤事機臣等一軍勇逾萬餘兵僅數百其管
帶之員文職多擇取士紳武職多拔取末弁有夙昔之恩誼無
軍營之氣習不特臣國藩臣塔齊布二人親如昆弟合如膠漆
卽在事人員亦且文與武和水與陸和兵與勇和將與卒和糧
台官紳與行間偏裨均無不和全軍二萬人幾如家人骨肉之
聯爲一體而無纖芥嫌隙之生於其間此臣等秉承

聖訓和衷共濟亦可恃之一端也江西水師本可藉以協助臣
軍頃據德化縣知縣稟報自前月二十八孤塘失利退紮吳城

該匪水陸來撲江省戰船四十餘號盡被搶奪旂幟礮械皆爲
所有等情又據探報該逆在安徽仿照我軍船式新造戰船三
十餘號意圖西上拒禦官軍等情該逆前次屢以民船致敗自
至九江專用小划夾護戰船緊貼岸營臣等方反覆籌思不得
所以破之之法今又益以江西搶去之船與安徽新造之船賊
踪益增其氛益熾若使屯踞湖口梗塞於鞋山孤塘之間內窺
江西外拒我軍地形險隘勢難遽下我軍與江西咫尺隔絕不
能相通其可慮者一也陸路賊黨北岸固多而南岸亦復不少
屢據稟報九江府城之賊出撲總兵居隆阿營盤湖口之賊分
竄饒州臣等陸軍單薄在南則不能顧北岸渡北則不能顧南

岸卽欲渡江亦須繞至上游迂迴百餘里三四日乃能渡畢而該逆愈勦愈多愈擊愈悍我師皆長征之卒無生力之軍轉戰千里筋骨勞困若更往來頻渡卽令全不挫衄亦恐疲於奔命銷磨銳氣其可慮者一也軍事以練將爲最要臣等一軍皆招選鄉勇本乏將弁苟有翹出之材臣等不惜破格超保儲爲將領乃甄擇已久求其獨當一面者殊難其選求其雖遇敗挫仍能擋拄者尤難其選今水師營中楊載福以積勞致疾何越珽以受傷出營陸路諸將亦皆勇多謀少設一遇敗挫無曉事之將領以擋拄之則恐潰散而無以自立此又臣等隱以爲慮之一端也目今之計惟有力攻孔壠驛小池口之賊紮營江岸使

奏稿卷四

三

水師得所依護待督臣楊需率師至黃梅後北路足資堵禦然
後臣塔齊布與羅澤南全師渡江以圖攻克潯郡步步謹慎不
敢稍涉疏虞以期仰副
聖主委任之意所有水師續獲小勝及近日剿辦情形恭摺附
驛具奏伏乞
皇上聖鑒訓示施行謹
奏

羅澤南濯港勝仗片

咸豐四年十一月十一日

正封摺間接據稟報羅澤南等於初七日由黃梅先行拔營行
二十里至濯港地方適逆首羅大綱率賊眾二萬餘人撲至我
軍分途迎擊大獲全勝殺賊一千四百名俟各營到齊後卽
當馳勦孔壠驛一帶除接仗情形另摺詳晰具報外合先行附
奏以慰

聖廑謹

奏

奏稿卷四

奏稿卷四

奏稿卷四

官軍濯港大捷潯郡江面肅清摺

咸豐四年十一月二十一日

奏爲官軍在濯港大捷旋即攻破孔壠驛小池口賊營夜遁水師焚燬艤船潯郡江面肅清現在進扼湖口恭摺由驛奏聞仰祈

聖鑒事竊陸軍踏破大河埔賊營旋在夏新橋大捷克復黃梅縣城業經馳奏在案自我師北渡後該逆三次大敗皆僞燕王秦曰綱僞檢點陳玉成兩股居多其僞丞相羅大綱率安慶新到之賊尙盤踞孔壠驛小池口一帶與潯郡之賊對江而營使逆船得依岸久踞老我水師本月初七日甯紹台道羅澤南督同候選知府李續賓參將彭三元游擊普承堯等共四千人拔

營前進行二十里至濯港地方突遇大股賊二萬餘人由孔壠
驛至時彭三元普承堯尙未齊集羅澤南登高審視自駐西岡
令李續賓及教諭唐訓方等駐中岡候選從九蔣益澧等駐東
岡濯港一小市東面爲田壠廣千餘畝西面瀕池長數里水深
岸峻池外多湖汊賊眾排立市北搖旗搦戰羅澤南自與此賊
接仗以來專用以靜制動之法每交鋒對壘賊黨放鎗數次大
呼數次而我軍堅伏不動如不敢戰往往以此取勝是日羅澤
南仍飭諸軍堅伏不起相持五六刻該逆分一枝從田壠繞山
撲我東岡之師一枝從湖尾撲我西岡之師而由中路進者獨
多直逼岡前我東岡之勇一鼓而下斃大黃旗賊數名西岡諸

勇旋亦衝出西路賊潰分途追殺中路悍賊鏖戰良久前者已死後者不退東西官軍進至市前漸抄中路之尾賊黨始三路同潰追入濯港市內斃賊四百餘名逼溺市西池中者八九百人賊尸積累幾與半壁山相等其大股循市南奔逃我兵以眾寡難敵不欲窮追卓旂小駐賊輒回馬搦戰乃復追之又駐則賊又搦戰而又追之如是者四五次追至十里外之中路菴地方沿途斃賊百餘人其小股由湖汊之西逃者湘勇分數隊往追寶勇繼之追及數里有伏賊緣樹林中突出勢甚兇猛諸勇退卻陣亡三名李續賓等率勇由湖中橫隄抄過湖邊之賊又潰追殺百餘人共斃賊約千四五百人生擒八十五名奪獲旗

幟鎗械子藥無算該逆自孔壠而來中途猝遇我軍解衣出戰行李盡存市店既敗之後羅澤南等令堆積衣物悉數焚之故各勇一心追賊無稍遲者此初七日自黃梅拔營至濯港遇賊大獲勝仗之實在情形也初九日臣塔齊布冒雪拔營至濯港十一日雪霽進駐白湖渡偕羅澤南親至孔壠驛附近審視形勢孔壠南通小池口東繞溪港西則稻田萬頃北去白湖渡十里長隄一綫兩旁皆寒流泥淖賊首羅大綱及偽丞相曾姓賴桂英等踞孔壠市中東面憑水爲固西南北三面環築土城密安礮孔搭蓋望樓竹簽木椿密釘無間十二日我軍八千人全師進攻以北路單隄太窄不能布陣乃至烏魚金壩訪有小路

可繞賊巢之西南因商定列陣之法臣塔齊布帶各標及參將周鳳山都司李新華之勇從北路隄上入羅澤南帶湘勇中左右三營及參將彭三元游擊普承堯之寶勇教諭唐訓方之常勇從西南烏魚壩分路而入殺斃前隊賊匪數名追至孔壠驛賊見我兵三面環至負牆施放鎗礮子如雨下其悍者出牆迎戰勢甚兇猛我軍奮不顧身一擁而前悍賊亦入牆抵禦木石紛擲鎗礮愈急我軍跟蹤乘之突入土城或不由牆門三四人以肩爲梯互乘而入其尤勇者卓矛於地一縱躍入土城者已多而城外仍合成長圍賊黨無處可逃偪入東面寒流泥淖之中溺死者以千餘計奔入市中被諸勇追殺者近二千人其

餘或匿民樓或緣登屋脊拋擲瓦片因縱火大燒街市煙燄彌天會西北風作孔壠市中數百家須臾灰燼諸勇環守賊眾鮮得脫者生擒長髮七十九名內有右副丞相余福勝一名總制陳姓雷姓二名師帥軍帥十餘名立予正法此十二日在孔壠驛大獲勝仗之實在情形也臣國藩以孔壠既破小池口之賊必不能支卽飛飭水師進擊升用道李孟羣候選知府彭玉麟等於十四日卯刻進攻而小池口陸賊已於十三夜全數奔竄矣餘賊爭駕小划南渡我軍急起直追賊划駛近南岸岸上賊開礮護之中營都司秦國祿嚮導營守備孫昌國等衝煙進擊賊眾紛紛墮水擊沈賊划七八隻傍岸賊船恐被包裹開竄下

游我軍追擊轟燒數號見北岸洲尾大木簾一座賊船十餘隻
遂回舵北攻簾上賊鎗礮齊施我軍冒死前進船上之賊先逃
轟斃溺斃者約近百名哨官吏久立劉瑞麟等截擊下游賊船
使不得搶護木簾用火彈百餘乘風擲去立刻燔盡餘船皆燬
復延燒洲上賊營一座遂縱火徧燒小池口陸路賊營煙燄蔽
空彭玉麟乘勝追至新港又見大木簾一座賊船數十隻卽揮
旗圍擊南岸賊礮子如雨各哨船雷轟而前斃黃旗賊目一名
賊遂披靡簾上賊亦登划奔竄彭玉麟躍入賊簾奪獲大礮十
三位尙有二千斤大礮不能移動遂縱火焚簾岸上賊癡立毒
罵不能救護此十四日水軍焚燒船簾肅清潯江之實在情形

也臣國藩卽於是夜泊紫九江城外十五日臣塔齊布亦至小池口水陸會合該逆於西門出數百人向江心施放鎗礮李孟羣飭前營廣勇二百餘人上岸追殺各戰船復轟礮助之賊始奔潰廣勇連擲火毬燒燬龍開河木城一座彭玉麟蕭捷三秦國祿劉培元俞晟等遂率大隊是日直下湖口至扁擔夾洲邊見有賊船大小四十餘號分途圍擊悉數燒燬並燒城草棚二座追及鄱湖匯江之所逆船悉泊湖口縣城下有木簾三座戰船數十號民船近千號搶去江西之戰船礮位亦均攔截內河見我軍驟至遂將民船數十號開出下竄我軍從中截擊燒燬二十餘號賊皆撲水內有大紅船三號輜重山積概予燒訖各

營遂分泊口內並口外之梅家洲八里江等處緊扼要隘此十五日水師獲勝進紮湖口之實在情形也連日據生擒之賊與投誠之賊供稱僞燕王秦曰綱自黃梅大敗竄往舒城僞丞相羅大綱自孔壠大敗卽日竄至小池口率其死黨千餘渡江連夜奔至湖口僞丞相林姓現踞九江與湖口相犄角將爲死守抗拒之計臣塔齊布於郡城上游渡江繞出南路羅澤南於郡城下游渡江將圍攻東路水路扼截湖口務使賊所搶奪江西船礮全數兜剿不許竄出大江免遺後日無窮之累三路痛殲以期上復潯城下清湖口一制劇賊之命此次水陸兵勇廓清摧陷轉戰無前補用守備朱南桂冒險衝陣連撲賊營應請免

補守備以都司補用都司童添雲每戰摧鋒不避矢石武漢案內已保游擊此次應請以參將升用其餘出力員弁兵勇請由臣等核明保獎仰候

恩施其陣亡兵勇查明照例辦理所有陸軍濯港孔壠連次大捷水師攻燒簾船肅清潯江進扼湖口各緣由謹會同湖廣督臣楊需恭摺由驛六百里馳奏伏乞

皇上聖鑒訓示施行謹奏

調胡林翼來潯助剿片

咸豐四年十一月二十一日

再臣等一軍陸路實尙單薄北渡則不能兼顧南岸南渡則不能兼顧北岸曾經奏明在案屢欲添調兵勇然非實在得力之軍則無益而反有損是以加倍審慎現在由小池口南渡上則圍攻潯城下則剿辦湖口已屬不敷調遣而北岸宿望潛太等縣尤須有得力之員協剿方無顧此失彼之虞查湖北按察使胡林翼識略冠時所帶之勇曾經訓練臣國藩前與督臣楊霽往返咨商札飭該臬司帶勇二千駐防田家鎮外助大軍之聲援內固鄂省之藩籬中則搜剿匪黨以靖興冶蘄黃之餘孽酌畱礮船以巡江楚接壤之河面該臬司接札後卽馳至廣濟之

鄔穴籌議設防事宜鄔穴去潯僅九十里臣等現圍攻九江陸
兵太單因就近飛調胡林翼來潯助剿一俟克復郡城攻破湖
口再行飭回楚境駐防田鎮至北路黃梅太湖等縣鄂皖毗連
北通舒廬東接宿望必須有重兵分布查鄂省有副將王國才
都司畢金科樸實勇敢馭軍有法臣國藩咨商督臣楊霨卽酌
撥勁旅札飭該副將都司交臣等調遣擬俟鄂境肅清卽由臣
塔齊布督帶出境東征至皖省各員查有池甯太廣道何桂珍
現帶勇千餘人督同革職知縣李沛蒼在六安等處防剿四品
銜臧紆青亦帶勇至霍山疊准袁甲三函開該道等齊集英山
俟臣等一軍入皖卽可會合進剿等因在案今臣等攻破黃梅

已逾半月而何桂珍臧紆青等尙無來會之信現值勦辦喫緊急須併爲一軍乃能呼吸靈通首尾相應擬卽就近札調何桂珍李沛蒼臧紆青由英霍南出潛太併入此軍概歸臣等調遣合無仰懇

皇上天恩飭諭鄂省之王國才等皖省之何桂珍等概入此軍歸臣等調遣其所帶之兵勇由臣等簡汰分別辦理庶兵力稍厚於大局更有裨益所有暫調臬司胡林翼來潯助剿及就近添調鄂皖各員緣由理合附片奏

聞謹

奏請

旨

孝和卷四

亥

水陸屢勝圍偏潯城摺

咸豐四年十二月初三日

奏爲湖口水師屢勝破賊火船陸軍圍偏潯城焚蹋賊壘並現
等攻剿情形恭摺奏祈

聖鑒事竊陸軍在濯港孔壠連捷遂破小池口賊營水師肅清
潯江進扼湖口業經馳奏在案逆黨被剿後僞丞相羅大綱奔
踞湖口與現踞九江之僞丞相林鳳祥僞檢點林啟容等遙相
犄角牽制我軍其小池口敗賊由彭澤渡江繞道赴潯者約近
萬人增壘濬濠爲死守計湖口之賊自搶得江西戰船後聯檣
結筏攔截內河東岸爲湖口縣城依據獅子山連紮數營西岸
爲梅家洲連紮二營木城礮台緊相依護我水師左營彭玉麟

嚮導營孫昌國等直紮湖口以內前營李孟羣後營蕭捷三中營及各營戰船分扼由湖出江之口扁擔夾梅家洲及北岸之八里江一帶層層關鎖如犬牙之交錯自十五接仗後十六日李孟羣等復燒沿途未盡之船十餘隻各營均派三板進攻內河逆黨水陸開礮抵禦鏖戰逾時之久焚其小划三十餘隻轟斃岸賊數名十七日各營番休出隊岸賊轟拒如故我戰船衝鋒直入擊斃多名燒燬賊踞民房十餘間收隊後仍泊原處是夜賊於老岸添築土城一座洲尾添築一座又挖地窖藏人放礮冀圖兩岸驚偏水軍十八日各營入口泝流攻擊李孟羣率二百人循大江南岸攻其新營其內河賊船泊於湖口城下者

擱淺不動惟岸賊開礮抵禦各戰船駛近岸左轟斃黃旂賊目一名一面排舟江邊開礮指擊一面派勇登岸助攻賊巢數伏數起爭先搶近遂燒焚其新營二座賊從地窖開鎗失火又燒傷數人時洲上一營之賊已經退走見我軍由後攻來復分途抵拒前營開放鳥鎗斃賊十數名賊遂大潰洲尾之營亦燬忽有數賊跪地乞降我軍恐係詭計不令近前日暮收隊各營受傷者共十九人此十六十七十八等日水師屢捷焚燬賊營之實在情形也十九日卯刻河口左右兩小營賊忽撤退李孟羣派勇立將空營燒盡探係羅大綱查知該二營賊欲投誠故撤移城外賊營之後然賊黨中竟有棄械直奔軍船求救者概予

免死二十日夜二更後風順水流忽見上游火光衝天礮聲雷動該逆用小船百餘號或二三隻一聯或五隻一聯堆積柴草實以硝藥灌以膏油分十餘起縱火下放礮船隨之兩岸出隊千餘人呼聲鼎沸兼放火箭火毬時彭玉麟孫昌國兩營之泊內河者早經準備屹然不動李孟羣蕭捷三劉培元俞晟等各駕三板迎擊秦國祿段瑩器洪定陞等繼進撥開火路將已然之船用篙桿撐入中流向空溜下我戰船反迎火光而上向岸賊開礮放箭之處併力攢擊斃賊無數且攻且追追至木簰之側忽又擁出火船數起火藥不時轟發我軍不爲驚擾反疾趨而進燒賊礮船十五六號賊黨紛紛墮水隨火船同付東流當

賊放火舟之時天陰月黑三更後月明如晝該逆油葦之船與我軍焚賊之船火光照耀秋豪畢現賊黨計窮四更收隊我軍一無所傷此二十夜破賊火船百餘號之實在情形也陸路官軍自十五日與水軍會於小池口十八日臣塔齊布從上游琵琶亭渡江次日移營南門外適湖北按察使胡林翼帶勇二千人馳至分紮要隘二十一日羅澤南從下游白水港渡江以期上下夾擊是日辰刻該逆趁我軍尚未渡完突出數千人由北門及小東門分路來撲羅澤南一面派夫守護營帳一面列隊迎擊該逆揮旂搦戰分三起埋伏羅澤南督同候選知府李續賓從九蔣益澧等分途迎剿時賊眾我寡官軍殊死戰殪其前

鋒賊遂敗退伏賊繼進移時又敗羅澤南從寶塔灣進追沿途
趕殺百餘名逼溺老鸛塘內者約二百餘名追奔十里之遙其
接渡之戰船亦遂泝江而上向岸轟礮斃賊甚多軍功蔣菖梧
係督臣楊需從漢川招撫者也久在賊中驍勇敢戰臣等咨調
來營自帶精勇百人矢志殺賊自効是日追賊尤奮匹馬衝突
行在羅澤南之前焚燬城外賊營二座追及九華門門外賊營
一座尤爲堅固各勇大呼撲入拋擲火彈火毬斃賊無數逆黨
奔竄聲若潰隄詎該逆暗埋地雷於營內延燒所及烈燄轟騰
我軍之撲營者猝被燒傷十餘人敗賊之奔入北門者城內賊
目持刀督截賊黨衝出名勇見我軍前隊被燒而賊眾回頭來

撲遂相率退奔蔣葛梧率精勇十餘急登小划被賊追擊落水
各營驍將追賊最猛者陣亡三十餘人羅澤南見大勝之後有
此小挫卽勒馬小駐揮令在後者無許續追在前者無許再退
且駐且戰回至岳師門外我軍退則賊復尾追我軍住則賊仍
卻顧如是者數次羅澤南右臂及手指再受石傷力靡諸勇衝
進殲賊十數名賊眾盡靡乃從容收隊紮營白水港各勇忍饑
鏖戰帳房均未渡畢夜間雨雪交加多露立於風寒泥淖之中
此二十一日湘勇渡河未畢開仗獲勝焚蹋賊營二座之實在
情形也二十七日水師各營會合出隊舟抵湖口城邊見該逆
於城下沙洲密排巨木橫繫筏纜數道聯絡於對岸賊營之下

戰船數十隻排列纜邊開礮抵禦子如雨密各三板回舵收泊示之以弱別遣奮勇數舟衝入賊隊誘令出巢該逆開船迎敵各營遂揚帆疾進攢礮聚攻前隊三板衝過賊簾之前斫斷巨纜乘勢轟擊斃賊無數該逆力不能支紛紛鳧水上岸各船追逼直抵南岸洲尾轟斃岸賊尤多賊遂棄營內奔惜陸兵未到未踴其營時上游忽有賊船救應依附營牆之下木簾之旁鎗礮更密我軍從煙燄之中搶入迎擊斃賊約百餘名燒其戰船二隻賊始全數敗回傍晚收隊各營陣亡十餘名帶傷四十餘名二十八日各營仍復出隊岸賊見船至卽走追殺多名逆船堅匿不出自此賊以舟師不敢拒敵夜夜以陸師千餘火箭火

毬大呼驚營我軍徹夜戒嚴不敢安枕此又二十七八等日水師鏖戰之實在情形也伏查官軍自大破田鎮之後私擬九江一郡指日可破不料陸軍北渡掃蕩廣濟黃梅濯港孔壠一帶轉戰六百餘里奔馳二十餘日而九江湖口兩處之賊守備日固人數亦日增迨十四日水軍將潯城河下之船隻木簰盡數焚燬二十以後陸軍南渡四面攻圍而該逆尙能負固死守其堅悍兇頑實出意計之外連日陸軍攻城傷亡甚眾因攻具未備擬卽先剿湖口孤塘之賊翦其羽翼水軍在湖口與賊相持李孟羣之意欲縱令賊船放出大江下游免其內竄江西分我兵力彭玉麟之意以爲賊奪江西船礮縱之出江其禍愈烈必

欲嚴扼此關聚而殲諸鄱湖之內俟陸軍到時再行相機辦理
此次水陸兵勇冒險深入奮不顧身籲懇

天恩由

臣

等擇尤保敘以固士氣藍翎千總會獻成藍翎把總

周福友藍翎外委羅嘉典追賊過猛力戰捐軀深堪憫惻應請
飭部從優議卹以昭激勸而慰忠魂傷亡兵勇查明照例辦理
所有水師屢勝破賊火船陸軍圍逼潯城焚蹋賊營各緣由謹
會同湖廣督

臣

楊需恭摺由驛具奏伏乞

聖鑒訓示施行謹

奏

潯城逆黨兩次撲營均經擊敗摺

日 咸豐四年十二月十四

奏爲潯城逆黨兩次撲營均經擊敗官軍分剿湖口兩戰皆捷水師夾擊焚賊艗船現仍併力攻剿恭摺奏祈

聖鑒事竊湖口水師破賊大船陸軍圍逼潯城焚踏賊壘業經馳奏在案潯城北枕大江東北有老鸛塘白水港西南有甘棠湖西有龍開河獨東南多山爲姑塘入城要路臣塔齊布率各營扼駐其上該逆亦嚴防東南其瀕水之處率將各路挖斷其西門一路雖未挖斷而城外新壩築有大營一座木城數丈列礮三層倚龍開河以自固二十六日臣塔齊布親督兵勇及胡林翼之黔勇進攻西門逼近賊壘該逆設卡過堅大礮數十同

卷一百一十四

三

時並發我軍殊死戰傷亡甚多三進三卻相持四時不能攻入
遂行收隊定議於本月初一日四面合攻臣塔齊布由新壩進
攻西城羅澤南等攻東門胡林翼等攻南門別遣副將王國才
帶奮勇七百人由舟次登岸擬由九華門掩入部署已定卯刻
臣塔齊布師抵城西該逆連日夜加挖濠溝寬深各三丈有餘
溝外樹立木柵眾礮齊放子若飛蝗我軍毫不畏懼三次撲柵
欄斃賊十餘人柵地險而路曲難以仰攻參將童添雲攀堞而
登被礮擊穿胸膛倒地各勇搶抬而出該參將自湘潭以來身
經百戰每次單刀陷陣千人辟易諸將皆服其驍悍至是受傷
過重合營氣阻延至初八日殞命游擊阿達春頸膊亦受鎗傷

各營過於勇猛陣亡十餘人帶傷至百餘人胡林翼羅澤南等
之分攻各門者因城上鎗礮木石交施屢次搶登不能得手傷
亡亦百餘人此二十六初一等日陸軍血戰攻擣潯城未破之
實在情形也臣等以江城窮寇死守我軍攻具未備不若舍堅
而攻瑕因商派胡林翼羅澤南及永州府知府張丞實候選知
府李續賓等先攻湖口對岸梅洲賊營而調王國才及參將恆
泰等由小池口渡江與南軍合營初五日胡林翼羅澤南等拔
營前進王國才移紮臣塔齊布大營之旁恆泰及參將札拉罕
分帶兵勇七百人尙在官牌夾江邊未移近大營也逆黨探知
恆泰等人數單薄初六日寅刻突出二千人來撲孤營官牌夾

舊搭浮橋爲我軍移營之用賊眾過橋而西恆泰麾兵力抵斬
大旂賊三人自放火箭落橋東賊隊之中賊陣亂反奔恆泰過
橋力追追及二里許賊見人數過少復挾大隊回撲我軍火包
亂擲恆泰身面俱被燒傷猶負痛力戰且戰且退仍回橋西凡
殺賊四十餘人是日移營城之東南與臣塔齊布等營相聯絡
初七日逆黨四五千人分數股出撲王國才之營經王國才等
擊退一股而賊來愈眾勢將不支臣塔齊布整隊往援陣斬約
近百名賊遂分向城邊奔竄我軍鼓勇跟追直逼小東門城上
鎗子雨集兵勇被傷數十人臣塔齊布坐馬受傷遂徒步督戰
諸軍愈擊愈奮其進城不及之賊約百餘人盡爲我軍所殪其

尤驍勇者從濃煙密子之中大呼躍入月城手曳一賊而出揮
刀斬之賊遂閉門堅拒時東北城隅尙有一股敗歸我軍從老
鸛塘突出截尾沿城趕殺約二三百名追至江邊臣國藩復飭
戰船向岸指擊斃逃賊百名尸橫徧地其自西城出者另有千
餘賊攻撲居隆阿江西營盤相持良久臣塔齊布飛飭副將周
鳳山等帶勇往援一律擊退斃賊二十餘名此賊匪兩次出城
撲營初六小勝初七大勝之實在情形也胡林翼羅澤南分擣
湖口之軍於初六日已刻行抵盩山距梅家洲八里許梅家洲
之尾爲攔湖嘴江省內河出口之西岸也僞丞相羅大綱踞焉
湖口縣在其東岸僞翼王石達開自安慶統眾來援者踞焉該

逆懼我舟師進擊內河之船搜勦鄱湖之賊於口內紮大木簰一座小木簰一座東岸縣外厚築土城多安礮位西岸立木城二座高與城等礮眼三層周圍密排營外木椿竹籬廣布十餘丈較之武昌田鎮更爲嚴密掘濠數重內安地雷上用大木橫斜搭架釘鐵蒺藜其上我盩山之軍駐營甫定派隊前進胡林翼帶黔勇平江勇由洲東入羅澤南帶湘勇及唐訓方鄒壽璋等由中路入李續賓張丞實同蔣益澧等帶湘勇左右營從洲西入賊眾負固不出憑牆施放鎗礮子如驟雨我勇伏地以進逼近壘前去其竹木以水潑其地雷湘勇哨長葉楚南楊玉芳黔勇哨長姜凌浩從竹簽木椿中踰溝而前直入賊營以路窄

人少葉楚南楊玉芳姜凌浩俱爲賊刃諸勇抱憤攻之愈力曰
暮不願撤隊終以地險不能入初七日方欲進攻忽見梅家洲
賊七八千人分三路而進兩路列洲之柳林中一路由江邊繞
出盛山石嘴以攻我營之左腋而大姑塘之賊又以四千餘人
撲我盛山大營之背蓋欲誘我師進攻洲上而姑塘之賊得以
乘其後也胡林翼羅澤南等酌定以湘勇右營左營禦山後之
賊湘勇中營黔勇營禦洲上之賊賊之自獅子山來者勢甚凶
猛蔣益澧自執大旗向前抵禦以各勇未齊陣勢稍卻李續賓
率右營以進短兵截殺張永實從後督之斬悍賊十餘名山後
之賊大敗追至兜口湖賊復列陣以拒相持一時兩營分路圍

勦斃賊三百餘名賊乃大潰追奔十餘里沿途殺賊近百名至小湖而止賊眾悉由湖汊淺處涉水而過諸勇有踰汊奪賊旗幟者洲上三路之賊因見山後賊敗不敢前進羅澤南帶數百人直逼壘前誘敵佯退數次而賊終不進未刻收隊此胡林翼等分勦湖口兩次獲勝之實在情形也水師之在湖口者以內河狹窄賊簰數十丈橫亘江心簰側有礮船簰外有鐵鎖篾纜層層固護兩岸營牆百礮轟擊皆以堅守此簰百計攻之終不能衝入簰內傷亡愈多軍心愈憤初六日聞陸軍一至卽出隊夾攻彭玉麟劉培元孫昌國之紮口內者先抵木簰之下前營李孟羣後營蕭捷三及秦國祿俞晟段瑩器洪定陞等均從外

江進口攢礮環攻賊簾環以木城中立望樓亦設鎗礮計簾上與船中望樓與兩岸賊礮四發羣子噴落我軍每傷一人則拖入船艙進擊如故又傷則又入艙又進如故終無一船退縮者將其鐵鎖箠纜立時斫斷哨官劉國斌一礮轟中簾上藥箱巨煙轟發響若山頽簾已燃燒過半而未燒之一面賊仍開礮不絕尤可異者望樓之賊屹立不動直待全簾火滿望樓傾倒始自投烈燄或沒身以緣簾底良久乃自他處旋波以出其狠忍如此我軍四旁長圍人持一矛專刺梟逃之賊簾上賊二百五六十名同歸一燼無漏網者簾後賊船時猶負固轟拒我軍分一枝抄出立燒大戰船六隻民船二十餘隻賊之登岸者被李

卷四

孟羣親兵截殺十餘名羅澤南之陸勇擊殺亦眾且放火助燒
簰船水陸相輔是日血戰四時之久燒斃溺斃殲斃之賊四百
餘名奪獲大礮十餘位生擒一百一十三名內有偽將軍梁國
安偽總制熊長易偽司馬許學受偽總制熊廷詔陳經綸皆簰
上賊曰凶悍聚殲全軍爲之一快此初六日水師攻破木簰賊
卡之實在情形也伏查該逆上踞江城下踞湖口復分股盤踞
大姑塘疊擾南康府城原圖牽制我師使江西與湖口不能聯
合一氣臣等定議先攻湖口搜剿內河使鄱湖之賊舟悉滅則
潯城之外援益斷今幸攻破木簰去此大害以後水師進攻或
易得手此次陸軍攻城攻壘水師攻簰攻卡冒險摧堅受子傷

至四百餘名之多而氣不少餒藍翎守備劉國斌攻勦田鎮首先衝開鐵鎖擬保都司尙未出奏此次焚牌又係首先衝入身受子傷藍翎守備孫昌國隨同彭玉麟進紮口內第一幫屢次進攻身先士卒月餘不眠劉國斌孫昌國均請以都司卽補並賞換花翎其餘出力將弁兵勇籲懇

天恩容

臣

等彙案保獎以固士心升

用參將童添雲自隨

臣塔

齊布出征以來轉戰二千里無戰不隻身陷陣其胞弟在湘潭陣亡該將又因傷重殞命合營皆爲痛哭應請

飭部照參將陣亡例從優議卹以慰忠魂把總葉楚南田鎮案內擬保守備外委楊玉芳六品軍功黃韻南武生陳烈田鎮案

內擬保把總姜凌浩崇陽捕剿案內擬保把總均未出奏合無
仰懇

皇上天恩葉楚南准照守備例議卹楊玉芳黃韻南陳烈姜凌
浩均照把總例議卹以昭激勸其餘陣亡兵勇查明照例辦理
所有兩次擊敗潯城之賊並湖口水陸夾擊焚賊船簞連日獲
勝各緣由謹會同湖廣督臣楊需恭摺由驛六百里馳奏伏乞
皇上聖鑒訓示施行謹

奏

曾文正公奏稿

卷之五目錄

內河水師三獲勝仗摺

咸豐四年十二月二十日

水師三次獲勝兩次敗挫摺

全日

謝賞穿黃馬褂等項恩摺

咸豐五年正月初五日

陸軍勦小池口賊並陳近日軍情摺

全日

大風擊壞戰船並近日勦辦情形摺

正月初八日

潯城賊出撲營迎勦獲勝摺

全日

賊匪撲營官軍獲勝並近日軍情摺

正月二十七日

惲光宸回臬司任片



請嚴拏哨官萬瑞書片

遵旨保獎摺

全日

謝寬免處分

恩摺

二月二十七日

統籌全局摺

全日

請令袁甲三練軍出黃州片

陳明部照遺失片

請江西浙閩協餉片

謹陳水陸軍情摺

三月二十三日

陸軍攻剿弋陽克復縣城摺

四月初一日

湖北兵勇不可復用摺

全日

請部撥浙引用鹽抵餉摺

全日

請大員總理鹽餉派員協理鹽運片

派辦糧台委員片

陸軍追剿廣信股匪克復郡城摺

四月十二日

水師近日接仗情形摺

五月二十一日

塔齊布羅澤南兩軍攻剿情形片

水師勝仗奪回座船摺

六月十二日

奏參江西巡撫陳啟邁摺

全日

潯城水陸兩軍接仗情形摺

七月初六日

擬移潯軍會剿湖口片

萬啟琛畱辦餉鹽局片

奏稿卷五

內河水師三獲勝仗摺

咸豐四年十二月三十日

奏爲內河水師三獲勝仗恭摺馳奏仰慰

聖懷事竊水師於十二日焚燒湖口卡內賊船乘勝衝入內河業經另摺具奏蕭捷三段瑩器等及各營長龍三板百二十餘號挂帆上駛行至大姑塘尙無賊踪卽行宿泊十三日上至平鳳地方見賊戰船民船共二百餘號突起擊之該逆自恃在湖口卡內百里不虞我軍之猝至也大礮羣鎗抵死抗拒我軍先燒其民船賊陣旣亂乃焚其戰舟凡焚船二百餘號奪獲三十五號奪礮七十餘位各三板自先日出隊小艇不便宿食至是始得一餐十四日該逆以前夕所搶我軍之船冒爲官兵自湖

口駛上襲我內河之師輔以小划百餘號時蕭捷三段瑩器等已聞十二夜老營被燒之信矣因約各哨寂靜以待逆船撲近眾礮齊發羣子噴飛該逆立刻敗下紛紛鳧水擊沈燒去小划三板共五十餘號追至湖口見該逆搭浮橋二道舊卡一道關鎖牢固勢難衝出收隊回泊大姑塘以上各營官以十三所搶民船恐其累重爲賊所乘至是盡數焚之外既與九江大營隔絕內又與江省遠離銀兩子藥俱無所出不得已就取於南康十九日入至吳城鎮探悉逆匪由彭澤湖口而來者約有數千人竊據都昌縣城築城挖濠擄有大小船隻四百餘號停泊縣河裝載輜重二十六日水軍各營官在灌子口熟商以都昌既

有逆船竊踞倘我軍一出仍復滋擾轉不能一律肅清不如趁此時燒盡因派定三板划船四十餘隻營官蕭捷三孫昌國段瑩器賀虎臣鄧翼升親督之於二十七日五更卽開行並派熟悉河路之翟秉懋前往指引是晨煙霧迷漫嚴戒各船不准放一礮出其不意突而襲之已刻抵都昌縣見逆船排於河面大小數百號黃旗飄拂該逆尙未驚覺各營蜂擁而前鎗礮齊施火毬火箭並發時值東南風頃刻之間火光貫日將逆匪輜重船數百號燒燬淨盡賊匪擊死者撲水死者不計其數生擒五十一名卽時正法餘匪奔入縣城因無陸兵不敢上岸窮追師還路過雞公湖有小划船三百餘號各營官帶勇下水概行燒

盡免爲賊有此搜剿都昌河內大獲全勝之實在情形也伏查
水師自衝入內河日夜辛勤三獲全勝搜洗鄱湖支河勞勩可
嘉然冒險衝入與外江水師相隔疏失實甚目下外江苦乏小
船卽擬趕添民划內河水師飭令決戰衝出兩面會剿以期力
破湖口一關所有內河水師屢勝緣由謹會同江西撫臣陳啟
邁恭摺由驛馳奏伏乞

皇上聖鑒訓示施行謹
奏

水師三次獲勝兩次敗挫摺

咸豐四年十二月三十日

奏爲水師三次獲勝兩次敗挫恭摺馳奏仰祈

聖鑒事竊水師攻破賊獮陸軍在梅家洲獲勝業經馳奏在案
初十日胡林翼羅澤南等銳意欲攻破梅家洲賊壘負布袋囊
土人持火包一擁而前衝突於賊礮攢簇之間前者雖傷後者
猶進逼近賊牆超躍而入已入數十人矣拋擲火包誤傷同入
之侶以數人負送而出在外者誤認爲敗退適南頭一壘賊隊
衝出西路官軍相率退奔入壘者恐外隊挫失亦卽退出奔潰
至三四里之遙始行卓旗駐立迴軍與戰該逆亦反奔我軍追
之更急殺賊三十餘人該逆遁入堅壘固匿不出水師自初六

日攻破賊艗後該逆連夜將大船鑿沈江心實以砂石僅西岸
畱一隘口攔以篾纜初十日陸軍攻壘之時約水師同攻此卡
彭玉麟孫昌國蕭捷三等督三板各船斬纜衝入焚其戰船三
十餘號民船三百餘號斃賊約數百名我軍受其隘口三面之
礮傷亡亦數十人十二日陸軍復攻賊壘攻逼終日以礮多壘
堅卒不能破水師復衝入卡內燔賊戰舟三十餘號民船約五
十號自是賊所奪江西戰舟焚燒略盡僅餘夾洲內十餘船自
湖口至姑塘四十里賊踪肅清矣此初十十二日陸軍攻壘水
師戰勝之實在情形也營官蕭捷三段瑩器孫昌國等欲肅清
鄱湖以內遂乘勝追至姑塘以上從之者各營長龍三板百二

十餘號皆輕便之舟勇銳之士揚帆內駛日暮不歸詎料該逆
窺我軍小船衝入內河卽出小划二十餘號突出卡外圍我軍
快蟹大船保升都司史久立首當其衝被圍良久船隻延燒力
戰死之是夜三更該逆用小划三四十號攢入老營燒我船
隻兩岸賊匪數千火箭噴筒迷離施放呼聲震天我軍以內河
百餘小船未歸無以禦之被焚大戰船九號小者數號雜色坐
船三十餘號各勇狃於屢勝之餘變起倉卒快蟹長龍等船挂
帆上駛李孟羣彭玉麟不能禁止次日悉回九江大營臣國藩
聞信之下不勝憤懣戰船焚失雖屬無多而百餘輕捷之船二
千精健之卒陷入鄱湖內河業被賊卡隔絕外江所存多笨重

船隻運掉不靈如鳥去翼如蟲去足實覺無以自立副將楊載福自攻破田鎮後卽在武穴養病因飛調來營十七日力疾往下游進剿行抵潯城十五里之張家洲頭賊船已分兩路上犯楊載福派哨官張榮貴陳金鼇等由新河下擊自率各哨由老河下擊澄海營官何敦五亦由老河隨剿鏖戰良久該逆敗退下竄追至老灣其快蟹船貼靠北岸陸賊護之不能奪取礮斃賊數十名我軍哨官沈光雲陣亡張榮貴等自新河下者遇賊三板及小划約三十隻我軍九船勝之追至湖口縣繞出老河與楊載福會合兩路凡焚船二十六號奪船五號四更收隊此十二夜水師敗挫十七日進剿獲勝之實在情形也自十二夜

水師失利後賊之凶談頓長梅家洲之賊夜夜往撲胡林翼羅澤南等營賴併力堅守得挫凶鋒湖口之賊渡江上犯紫營九江對岸之小池口二十一日臣等派副將周鳳山渡江擊之四更渡畢黎明開仗該逆猝不及防踏平賊營一座殺賊百餘江邊一枝追出街外堤內一枝因搶奪馬匹衣物爲賊所乘先勝後挫被追七八里之遙臣等酌商以水師旣陷於內河陸軍復挫於小池口遂調胡林翼羅澤南二軍由湖口回剿九江二十五日駐紮南岸官牌夾是夜三更潯城與小池口兩岸之賊各抬小划數十隻入江乘月黑迷漫攢入我軍船夾內火彈噴筒百枝齊放右營被燒戰船一隻各哨慌亂挂帆上駛臣國藩坐

三板督禁黑夜不許開船江闊船多莫能禁止該逆已用小划數十將臣坐船圍住管駕官廣東把總劉盛槐李子成監印官安鄉縣典史潘兆奎文生葛榮冊陣亡文案全失臣國藩遂飭各戰船與羅澤南陸營緊相依護而遣人四出追回上駛之船黎明陸續歸隊復將賊船追擊奪回船三隻此二十一日陸軍先勝後挫二十五夜水軍復挫之實在情形也伏查水師自岳州以來屢獲大捷武漢田鎮聲威尤震自至湖口苦戰經月破燔焚船費盡氣力賊舟所存無幾詎意各營長龍三板過於勇鷙衝入內河竟夜不歸而外江老營兩次爲該逆所偷襲實堪憤恨皆臣國藩調度無方所致應請

旨飭部將

臣

國藩交部嚴加議處廣東保升藍翎把總劉盛槐

保升把總李子成典史潘兆奎請交部照例議卹哨官保升都司史久立奮勇忠直爲闔營所推服請照都司例從優議卹候補把總李允升李選眾或中礮陣亡或燒傷殞命均請交部議卹藍翎軍功沈光雲田鎮案內擬保把總尙未出奏文生葛榮冊襄辦勞勩田鎮案內擬保主簿尙未出奏籲懇

天恩沈光雲卽照把總例

賜卹葛榮冊卽照主簿例

賜卹其餘查明察例辦理除內河水師屢獲勝仗另摺奏報外所有水師三勝兩挫緣由謹會同湖廣總督

臣

楊霽江西巡撫

臣陳啟邁恭摺由驛具奏伏乞

皇上聖鑒訓示施行謹

奏

謝 賞穿黃馬褂等項 恩摺 咸豐五年正月初五日

奏爲恭謝

天恩仰祈

聖鑒事咸豐四年十二月二十四日准兵部火票遞到十二月初二日內閣奉

上諭曾國藩塔齊布奏水陸官軍續獲大捷肅清潯郡江面一摺覽奏之餘實堪嘉慰曾國藩著賞穿黃馬褂並發去狐腿黃馬褂一件白玉四喜搬指一箇白玉巴圖魯翎管一枝玉靶小刀一柄火鏢一把交曾國藩祇領又白玉四喜搬指一箇白玉巴圖魯翎管一枝玉靶小刀一柄火鏢一把交塔齊布祇領以

示優獎等因欽此二十六日又准軍機處咨開十一月二十六日由

內交出年終奉

賞福字荷包銀錢銀鏤食物等件由驛遞到營當卽恭設香案望

闕叩頭先後祇領竊臣等謬典戎行毫無功績荷

生成之逾格業

甄敘之頻加迺蒙疊沛

恩綸

特頒寵賚纓影孔雀羽儀增玉管之輝袖染鸞黃華袞炫金英

之色飭容刀於琤琫攸挾拾於弢弦重以

天藻親揮

雲章下賁輦輓則

錫從

內府珍饈則嘗自

天廚凡茲逾分之殊榮實屬非常之

異數鵷濡滋愧黿戴難勝况當時局艱危適拜

殊恩稠疊恐事機之多拂力不從心念報稱之愈難感尤思奮

臣等惟有同心戮力竭慮殫精切枕戈待旦之忱以期仰荅

聖主鴻慈於萬一所有臣等感激下忱謹合詞附驛陳奏叩謝

天恩伏乞

皇上聖鑒謹

奏

陸軍勦小池口賊並陳近日軍情摺

咸豐五年正月初五日

奏爲陸軍渡江勦小池口之賊先勝後挫北岸賊蹤大股上竄並陳近日賊勢軍情恭摺奏祈

聖鑒事竊官軍水師精銳二千陷入鄱湖以內被賊隔截及內湖水師大捷外江再挫情形業經馳奏在案二十九日臣等以兩岸之賊逼處水師新挫恐難自立商派李續賓蔣益澧等帶湘勇一千二百人從二套口渡江攻勦小池口之賊辰刻渡畢恐湘勇輾轉疲勞難以取勝羅澤南帶勇二百渡江接應臣塔齊布自率親兵數十人已刻渡江督之李續賓蔣益澧從內隄入逼近賊壘鏖戰一時殺賊十餘名前鋒衝入賊營忽賊隊從

營外一枝抄出蔣益澧左營卻退江邊之賊復出數千橫截我
師羅澤南從外隄往援將江邊賊隊衝退營內之賊愈出愈多
李續賓等內隄一支且戰且退臣塔齊布恰至躍入督陣湘勇
回戈擊賊殺賊目二人數次逼入賊壘以野曠賊眾該逆從遠
處大圍包抄我軍以賊數太多眾寡莫敵後隊旗靡前隊亦不
能按住陣腳臣塔齊布匹馬衝突羅澤南李續賓亦迴馬力戰
使悍賊不得窮追有黃馬褂三人各帶十餘賊直奔臣塔齊布
馬前羣矛攢搗臣塔齊布直前斫一黃馬褂賊落地而奪其馬
又橫突而西二賊目皆落馬餘黨始靡而大隊賊自內隄出者
尙窮追不止臣塔齊布念悍賊所以苦追者止欲得一人而甘

心也因麾令湘勇大隊沿江西馳而獨勒馬至北路鄉間自是賊眾不甚西追羅澤南率湘勇收隊渡江餘賊北逐者臣塔齊布間刺殺一二賊終不敢逼日暮後始渡江歸營此二十九日湘勇北渡遇賊萬餘先勝後挫之實在情形也伏查臣等陸軍在北則不能顧南岸在南則不能顧北岸久在

聖明洞鑒之中無如南岸潯城圍攻正在喫緊而北岸小池口之賊相逼已甚不得已分渡南岸之兵擊北岸之賊士卒久勞隔江遠戰主客勢殊眾寡不敵致二十一二二十九兩次挫衄調度失宜自憤自恨該逆自臘月十六日由湖口分支來踞小池口二十五日大隊復至二十六日分千餘人上竄龍坪武穴二

十八日李孟羣礮船在武穴擊之又麾勇登岸力擊斃賊數十人餘眾敗回竟以三十日引大股賊三千人沿江上竄初一日竄至武穴初二日至蘄州聲言直犯武漢至督臣楊需廣濟一軍臘月十二及二十四等日兩次敗衄聞二十九日又被該匪撲營兵勇紛紛逃至蘄州一帶道路梗塞屢次差探未確不知督臣現駐何處黃梅廣濟股匪聞亦有四五千人上犯與沿江之賊會於蘄州一併西竄目今局勢臣等一軍進止機宜有萬難者不得不爲我

皇上陳之該逆大隊上犯武漢鄂省兵勇難資抵禦意圖抄我後路斷我餉道若擄上游無數之民船搶漢鎮新造之戰舟梗

塞江漢之間則大江千里上下皆賊臣等水軍裹於中段錢糧
子藥來源已截水勇之心斷難自固若果重踞武漢西窺荆襄
南伺湘省防不勝防其可慮者一也若使臣等一軍回駐武漢
則艱難百戰肅清江面一旦委而棄之實屬可惜且臣等水師
西旋九江湖口之賊勢必內犯江西臣等此後軍餉更難仰給
於江省且陷入內湖之戰舟百餘精銳二千從此斷難衝出與
外江水師會合年餘講求練此精華一旦置之無用之地後日
難以再振其可慮者二也陸軍屢勝之餘士氣極盛自至九江
湖口攻城攻壘傷亡健卒多至數百人銳氣挫損若使壹意前
進得勝仗數次尙不難於振刷精神再接再厲若使回軍武漢

則兵勇之雄心先滅加以遠道跋涉消磨精氣雖認真振厲亦難作其方新之氣其可慮者三也臣等反覆籌思進退兩難現派李孟羣督帶礮船至黃州一帶跟追毋使上竄之賊擄船下水如果大股賊匪占踞武漢水師當全軍回剿陸兵亦當相機返顧進止機宜關係極大此後餉項設措愈艱惟求我皇上指授方略俾臣等得所遵循不勝迫切待命之至伏乞

聖慈垂鑒訓示施行謹

奏

大風擊壞戰船並陳近日勦辦情形摺

咸豐五年正月初八日

奏爲大風擊壞戰船飭令全數開赴上游並陳近日勦辦情形
恭摺奏祈

聖鑒事竊江北賊匪上竄蘄黃業經馳奏在案正月初二日臣
等已飭李孟羣率三營戰船四十餘號回救武漢其大隊駐潯
江者欲全回武漢則恐下游江面仍爲賊有欲堅扼潯江則恐
上游船少不敷勦辦正在進退兩難之際忽於正月初四日東
北風大作巨波排擊終夜喧呖初五日早查點漂沈長龍三板
二十二號擊壞十四號延至午刻又破壞七號其存者亦俱撞
損漏裂舵折纜斷倉卒之間祇得將壞船委棄而令略好者七

十餘號全數開赴上游直趨武漢名爲速剿上犯之賊實則修整已壞之船臣國藩自二十五夜失去座船暫駐陸營本擬另辦一船督飭水師不圖逆黨上竄既不能不分軍回剿風波突起又不能不全往修理而自潯至漢數百里江面將復爲賊所有曷勝憤懣細思臣等辦理錯謬之處蓋有二端武漢克復當畱重兵駐守並當畱戰船數十號以爲後路聲援茲因江漢無戰船致該匪乘虛上竄其失一九江未破遽攻湖口冀通江西餉道弁勇冒險輕進致輕舟百餘號陷入內河一軍分爲兩截外江無小舟內湖無大船頓形薄弱其失二至兩次被襲之後更遭大風壞船則又事機不順出於意表者也目前籌辦之法

謹條列具奏伏乞

聖慈垂鑒

一回救武漢之戰船前後共百餘號被風擊壞者多其完好可戰者約不過四五十號漢口若被賊踞則修整船隻當在金口以上臣國藩曾於沔陽之新隄地方設立船廠現已飛飭李孟羣彭玉麟等卽在鄂渚紮營在新隄整船可以固荆湘之門戶可以剿竄漢之新賊第離臣大營太遠各船口糧銀兩及修整破船之費添造舢板之資概無所出應請旨飭下湖廣總督湖南巡撫迅籌餉銀交李孟羣彭玉麟水營應用

一鄂省兵勇臬司胡林翼帶二千餘人經臣等奏調來潯會剿

副將王國才帶三千餘人經督臣楊需飭令來潯會剿都司石

清吉帶千餘人經督臣飭令在富池口設防均在南岸臣等聞

賊從江北上竄之信卽飛飭胡林翼石清吉先後回援武昌矣

其王國才一軍俟江西借撥餉銀後探明鄂省確耗再定進止

一水師陷入內湖者皆三板長龍輕利之船不便宿食不能紮

營本擬俟春水生時卽與外江水師併力攻出今外江船壞全

回武漢則內湖須添造大船添募水勇各小舟有所依附乃能

自成一軍回鄂省之師船有李孟羣彭玉麟經理陷內湖之師

船無得力將領統之各勇聞老營被燒衣物全失如鳥失巢人

無固志甚不放心臣國藩擬親至吳城等處統轄此支水師重
加整頓或竟至江省一次將造船添勇事宜一一與撫臣陳啟
邁面商妥籌仍回大營

一陸軍各營銳氣尙盛現在圍攻九江開挖地道人人踴躍用
命若回軍武漢則雄心頓減銳氣銷磨以後斷難復振且湖口
九江之賊皆將內犯江西有礙大局昨經奏明在案臣等定計
月內設法破城一俟內湖水師整理就緒仍當鼓行東下直擣
金陵該逆上竄武漢攻我之所必救也我軍下搗賊巢亦攻其
所必救該逆縱復踞漢陽我軍亦不肯輾轉回顧聽其多方以
誤我也臣等自誓有進無退區區愚忱實欲一雪積憤成敗利

鈍皆不敢計

以上四條係

臣

等目前辦法及將來定局是否有富伏乞

皇上聖鑒訓示施行謹

奏

潯城賊出撲營迎剿獲勝摺

咸豐五年正月初八日

奏爲賊匪出城撲營官軍迎剿獲勝恭摺奏祈

聖鑒事竊

臣

塔齊布陸軍自紮八里坡後日夜圍攻潯城逆匪

堅匿不出我軍於東城外半里許潛開地道而令得力兵勇一百四十名帶同夫役二百名紮營其上別撥親兵百人往來巡哨本月初六日卯刻逆黨千餘人從大東門旁開洞門出城來犯逆首羅大綱從小池口率悍賊二十餘船渡江助戰一撲開挖地道之營一撲副將王國才之營我軍之挖地道者逆料賊必來犯密排鎗礮以待賊至寂然不動待其撲近營邊鎗礮齊發轟斃帶隊之黃馬褂賊目一名及隨賊數名餘賊仍抵死不

退臣塔齊布親率寶勇及升用副將周鳳山之道州勇馳往應援衝殺十餘賊追至大東門逆黨半由洞門入城半卽縋城而上被官軍鎗斃刺斃無數城上礮子如雨我軍亦傷亡十餘人遂繞城追至沿江一帶賊之分撲王國才營盤者共分三路前來該營連環開礮賊不敢逼逆黨遂以全力移撲周祿等營盤王國才飭都司畢金科帶奮勇五百人從後門潛出抄周祿營盤之左猝衝賊隊殺斃十餘人逆眾披靡適各營援兵亦至橫截之該逆腹背受敵狂奔不止我軍追至鎖江樓沿途趕殺適臣塔齊布亦從東門繞出併力追勦逆黨爭舟回渡人數擁擠翻沈四船溺斃近百人羅大綱從岳師門入城我軍奮追爲城

上鎗礮所格午刻收隊計殲斃溺斃共二百餘名生擒二十一名訊據供稱羅大綱原紮小池口屢催林啟容出撲官軍大營林啟容懼不敢出羅逆遂渡江助戰約會城內之賊夾攻現在敗奔入城等情查羅大綱兇悍詭譎因官軍堅扼潯城急欲來撲經此次敗挫我軍銳氣愈振日內仍當激勵三軍併力攻剿以殄兇鋒所有逆黨出城撲營陸軍迎擊獲勝緣由謹會同江西撫臣陳啟邁恭摺由驛馳奏伏乞

皇上聖鑒訓示謹

奏

奏稿卷五

賊匪撲營官軍獲勝並近日軍情摺

咸豐五年正月二十七日

奏爲賊匪撲營官軍轟擊獲勝並陳近日軍情恭摺奏祈

聖鑒事竊陸軍初六日獲勝水師被風壞船全數開赴上游業經馳奏在案臣等以潯城一面臨江兩面瀕湖惟東門有陸路可入逆賊負嵎固守攻之不克因於東門外小嶺下紮一新營開挖地道冀轟破城垣詎該逆業已偵知於東門內深掘濠溝添築子城東門外增修木壘暗通城內自正月十四日以後日以賊千餘由木壘潛出撲我新營夜間復以火毬噴筒拋擲營前我軍穴地負土日夜巡防不勝其擾臣塔齊布與諸將熟商地道原以攻其無備今該逆築子城掘內濠備我甚嚴攻之必

難得手不若乘其屢來撲營設計陷之遂於十八日停工將新營器物夜中運歸佯以百人守之營內暗藏地雷火礮掩以茅草賊眾果於十九日黎明乘霧未收於木壘中出賊千餘人撲我地道新營又於小東門出賊二千餘人上平嶺冀撲副將王國才之營又於小池口渡賊二千餘人由城北寶塔嶺潛伏松林冀襲諸營之後其來撲我地道者猝抵營前守營之兵勇佯退賊眾突入營中徧擲火毬一時地雷火礮齊發燒斃賊匪二百餘人賊眾敗潰臣塔齊布督令參將彭三元都司周岐山率各營兵勇追襲其後復殺斃賊匪四十餘人其自平嶺來攻者王國才率四川練丁禦之浙江甯紹台道羅澤南遙見地道火

起帶領湘勇自東路直抵平嶺斃賊八十餘名安慶府知府李
續賓自北路繞出平嶺之後斃賊七十餘名兩路夾攻將賊包
入中段復殲斃數十名追至城根賊眾遁入木壘其伏於寶塔
松林中者羅澤南分湘勇往撲斃賊目數名王國才川勇從而
乘之斃賊百餘名松林之賊盡由老鶴塘奔入九華門三路共
斃賊四百餘名生擒十二名以我軍尙未晨餐已刻收隊此地
道停工設計陷賊大獲勝仗之情形也水師之陷入內湖者輕
舟百餘精卒二千本向來所藉以衝鋒陷陣者也然三板小艇
只利戰陣不便宿食皆另有座船以資栖止以備食具一旦與
老營隔絕座船被燒弁勇露處半月饑凍備嘗自臘月二十七

攻焚都昌賊船以後開赴江西省河撫臣陳啟邁給以口糧優以犒賞眾心始安繼聞外江被風戰船回鄂老營之相離愈遠內湖之軍心愈搖幾有潰散之虞臣國藩奏明馳至江省親自統帶而安輯之以三板艇不便宿食與陳啟邁商定將江省現造之長龍三十號先撥臣軍應用又慮春夏水盛江湖並漲非巨艦不足以壓浪而立營擬再造快船大船十餘號酌派員弁回楚續招水勇自成一軍先將湖內支河賊踪剿滅淨盡一俟鄱陽春漲衝出湖口擊破賊卡以期與外江水師會合夾攻此內湖水師重加整理之情形也湖北副將王國才一軍共三千餘人前經奏明俟借撥江西餉項探明鄂省確耗再定進止嗣

經探得湖廣督臣楊需於初五日回至漢口逆匪於初七日數
百人竄入漢鎮臣等卽飛飭王國才回援武漢又據探報逆黨
勾結興國州匪徒復行滋擾並圖竄入江西武甯縣境內撫臣
陳啟邁與臣國藩熟商王國才回鄂之師若取道沿江一路則
賊卡太多而米糧不便若取道武甯山路則免其蔓延江境而
繞出興國之背勦辦亦易復經札飭王國才由武甯興國勦洗
回鄂此湖北來潯會勦諸軍先後旋鄂之情形也伏查臣等陸
軍以轉戰千里往返渡江銳氣稍挫目今攻圍潯城除出隊接
仗外臣塔齊布仍日日操練以期蓄養英銳振將乏之氣而使
之作新水師一軍分爲兩截惟有分投整飭各自成軍庶幾轉

敗爲功仍不墮屢勝之威區區愚忱但於士氣軍情細察其可用與否縷晰入奏以期仰慰

宸廑於萬一所有賊匪撲營誘剿獲勝並陳近日軍務各緣由恭摺由驛具奏伏乞

皇上聖鑒謹

奏

惲光宸回臬司任片

咸豐五年正月二十七日

再江西臬司惲光宸自上年督帶兵勇剿平武甯各屬逆匪節經撫臣陳啟邁奏報在案嗣於冬月移營九江與鎮臣居隆阿合營復奉疊次

諭旨歸臣等就近調遣惟該臬司出征半年之久本任事件係糧道鄧仁堃代辦現在造船鑄礮及支應各局均由鄧仁堃一手經理其糧道本任事務已繁又代辦臬司秋審事件實難兼顧撫臣陳啟邁與臣國藩熟商曰下九江帶兵大員不少惲光宸所帶信新勇三百名業經歸併居隆阿統轄擬即檄調該臬司回任趲辦秋審事件俾鄧仁堃得以專辦造船鑄礮等要務

庶不致以叢脞滋誤除陳啟邁自行具奏外臣等有就近調遣之責理合附片陳明謹奏

請嚴拏哨官萬瑞書片

咸豐五年正月二十七日

再上年臘月二十五夜賊匪用小划百餘燒襲水營各戰船紛
紛開動其糧台各所雇用民船益覺倉皇失措水手驚逃上岸
有全船無一人看守者右營哨官萬瑞書竟敢至糧台空船上
搬搶銀兩三十日臣等飭令永州府知府張承實至該哨官船
上搜出銀一千一百餘兩正擬分別首從嚴訊究辦詎該哨官
於初二日開船上駛查該哨官久在水營出力曾經咨保外委
田鎮破鎖亦在應保之列乃不自愛惜喪心昧良乘危亂之際
搬搶糧台銀兩實屬法無可貸現在外江水師各營業已全數
遣回武漢萬瑞書一船或尚在武漢或竟回湖南均未可知臣

等遠隔九江難遽拏獲相應請

旨飭下湖南巡撫臣駱秉章在於水師營內及湘陰原籍嚴拏

萬瑞書到案卽行正法以肅軍令謹附片具奏請

旨

遵 旨保獎摺

咸豐五年正月二十七

奏爲欽遵五次

諭旨將出力員弁兵勇懇

恩獎敘以昭激勸事竊照上年十月初一初四初五等日陸軍
蹋破半壁山賊營水師屢捷十三日水陸大破田家鎮收復蘄
州二十八及十一月初一初四等日陸軍克復廣濟黃梅均經
先後馳奏在案營官羅澤南楊載福李續賓彭玉麟等當蒙
優擢並各

賞加勇號其餘出力員弁兵勇欽奉五次

諭旨准其核實保奏仰候

恩施各等因當卽恭錄轉行水陸各營茲據各營官開單請獎前來臣等覆覈無異伏查自武漢以來轉戰千里軍士用命無堅不破可謂極順自陸軍南渡攻圍潯城而北岸黃梅廣濟蘄州等屬復爲賊蹤往來之地水軍精銳二千陷人內河外江老營兩次被襲一次遭風全數掣回武漢而江面田家鎮道士洑等處復爲賊踪往來之地前此戰功竟成空虛可憤可恨然事機之不順調度之失宜咎在臣等而將士血戰十餘次傷亡千餘人其勞勩究不可沒且營中賢愚不一其詭滑者見事勢稍拂輒懷退志其忠樸可恃之人率皆前此力戰受傷之人創痕未復見事勢稍拂愈憤極思戰惟不沒其旣往之功乃益作其

將來之氣臣等謹遵五次

諭旨開單彙奏籲懇

天恩俯如所請以資激勸所有彙單保獎緣由恭摺附驛具奏
伏乞

皇上聖鑒訓示施行謹

奏

奏稿卷五

謝寬免處分

恩摺

咸豐五年二月二十七日

奏爲恭謝

天恩事本年二月十七日承准軍機大臣字寄咸豐五年正月十二日奉

上諭曾國藩自出岳州以後均能與塔齊布等協力同心掃除羣醜此時偶有小挫尙於大局無損曾國藩自請嚴議之處著加恩寬免等因欽此竊臣殺賊有心治兵無術上年十二月十二日因水師乘勝攻入內河汴流迎剿欲淨洗鄱湖以內之船該逆將隘卡加築以致內外隔絕被賊划焚襲老營臣治軍年餘當聲威稍振之後忽有此挫上廑

宵旰之憂勞調度乖方罪無可逭迺荷逾格

天恩寬免處分

皇上之鑒原愈摯

微臣

之感激愈深惟有殫竭血誠力圖補救

或可稍贖愆尤現在造船添勇將次就緒卽當親督出湖水陸

痛勦迅掃逆氛冀仰答

高厚鴻慈於萬一所有

微臣

感悚下忱理合繕摺叩謝

天恩伏乞

皇上聖鑒謹

奏

統籌全局摺

咸豐五年二月二十七日

奏爲統籌全局將

臣等

一軍應辦事宜分條馳奏仰祈

聖鑒事竊正月十九日用地雷轟斃賊眾及內河水師重加整
理情形業經奏明在案自後該匪未敢出城二月十二日逆賊
約出千餘分路來擾四處山腳廣爲埋伏我軍不動聲色暗自
隄防該匪之兇悍者一股進前猛撲臣塔齊布分道抄去賊眾
敗竄斃四十餘名生擒十二名當予凌遲梟示屢接各路文報
及探卒稟報臣等兩次所遣回李孟羣彭玉麟等礮船於正月
初七初九先後到鄂共船一百三十餘號分泊武昌城下屢次
開仗獲勝北岸之賊其由黃梅廣濟攻撲督臣楊需營盤而上

犯者已於初七日竄至漢口其由小池口武穴沿江岸而上犯者初九日始竄至黃州自黃州以下各市鎮如巴河蘭溪蘄州武穴隆坪等處現均有賊盤踞南岸初本無賊北岸之賊分千餘人由富池口南渡至興國州擄人數千攻陷興國通山崇陽通城等州縣現尙分屯崇陽咸甯興國時擾江西武甯境上九江之賊於新垸添築磚城對岸小池口亦築磚城爲死守抗拒之計其在鄱湖以東者湖口之賊虐役鄉民增高城堞梅家洲大築土城長逾三里賊卡浮橋至今未拆上蓋木板加以土石都昌之賊攻撲饒州又有匪黨自東流建德而來並集於饒州分擾樂平石鎮街屯聚於景德鎮合計七八千人又東竄祁門

休甯並有攻陷徽州之信僞翼王石達開僞丞相羅大綱久踞
九江湖口兩處而饒州賊黨亦張羅大綱之旗幟意將侵擾廣
信窺伺浙江各等情此近日探報各路賊情之大略也以湖北
安徽江西三省全局論之陸路須有勁兵四枝水路須有勁兵
兩枝乃足以資剿辦北岸自蘄水廣濟黃梅以達於太湖宿松
是爲內一路自漢口黃州蘄州田鎮武穴濱江而下以達於小
池口望江縣是爲外一路南岸自九江以上興國通山崇陽武
甯等屬皆土匪勾結粵賊之淵藪是爲西一路自湖口以下由
東流建德饒池徽甯四府皆逆匪覬覦浙江之要途是爲東一
路北岸之黃梅太湖前臨大江後枕潛岳一山綿亙數縣屏蔽

舒廬爲該逆必爭之地南岸池州雖瘠區而大通鎮殷家匯水陸交衝南窺徽嚴東障蕪湖亦爲該逆必爭之地故南岸以東一路爲最要而西路次之北岸以內一路爲最要而濱江一路次之此四路者須陸兵四枝缺一不可者也水師自武昌以達湖口爲上一枝自小孤山逾東西梁山以達太平采石爲下一枝乃與紅單船相接兩枝各自成軍分段肅清庶免首尾不顧腹背受敵之患亦缺一不可者也今臣等水軍陷入鄱湖之船百餘號回救鄂省之船百餘號業已分爲上下兩枝似有因禍得福之機然內湖一軍臣國藩來江整理造船添勇無難就緒回鄂一軍以被風擊壞之船當將士疲勞之後與漢口新竄之

賊相持臣等又不能分身前往統領日夜懸念每聞春風之怒
號則寸心欲碎見賊帆之上駛則繞屋徬徨不知李孟羣等果
能添置小船復振軍威否至陸路須勁旅四枝而臣等祇此一
軍欲分爲兩枝則立形單弱欲常聚一處而事勢所迫有不得
不分者又不敢過於持重致失機宜也謹就目前之急務度臣
等力之所能辦者分條布置爲我

皇上陳之

一現在賊竄饒州樂平分擾景德鎮祁門徽州等處所謂東路
者也爲江浙轉餉之路亦爲奏報入京之路關係大局非輕臣
等分派羅澤南統帶湘勇三千由江西省城繞出湖東攻剿饒

州之賊又與撫臣陳啟邁合募平江勇四千同剿東路俟饒郡克復卽引兵直下或趨景德鎮或由建德進攻池州此路有重兵使安慶之賊大爲震動則浙江之患可以少紓臣等前摺所謂賊攻我之所必救我亦攻賊之所必救也

一悍賊石達開等堅守九江及對岸之小池口臣塔齊布一軍

仍畱五千人穩駐潯郡伺隙攻城使賊不敢全數上竄武漢亦不敢奔突他處惟前此攻圍潯城至萬五千人之多兩次派胡林翼王國才回援鄂省者六千餘人此次派羅澤南馳剿饒州者又三千人存潯官軍過形單薄俟籌添兵勇續行具奏

一正月二十八日

臣國藩派水師船六十餘號至康山地方駐

紮外防大江之賊駛船入湖內防饒州之賊擄船出湖其餘并
勇尙在江省修船日內修完大隊進紮南康青山一帶其湖口
賊卡浮橋既堅鋪以木板填以土石人力難以遽破俟春江盛
漲水陸并攻卽當力破浮橋衝出大江

一臣國藩來江已逾月餘日內船隻修齊卽駐紮鄱陽湖內四
處游繹西近臣塔齊布九江一軍聲息常通東近羅澤南饒州
一軍調度亦便兩軍相隔已在六百里外全賴水師在湖中遞
接信息庶幾首尾相應如東路攻剿得手能至彭澤東流等處
將來水師出江乃得所依護而無孤懸之患

以上四條就目前之急務臣等力之所能行者籌商辦理是否

有當伏乞

皇上聖鑒訓示施行再臣等正月初五初八二十七日三次奏

報均未奉到

硃批此次改由湖南繞出荊州驛遞進京合併聲明謹
奏

請令袁甲三練軍出黃州片

咸豐五年二月二十七日

再摺內言陸路須有四枝勁兵臣等進剿饒州樂平祇能辦南岸之東一路其西一路興國崇通拊武昌之背者已不能兼顧矣至江之北岸尤非臣等一軍所能爲力然論中原之大勢則江北重於江南論此賊力爭長江堅守廬州之情亦必須梅太舒桐一帶有一枝堅強可恃之兵然後內可以克廬郡外可以清江面也此時江北縱不能籌備兩軍亦斷不可不添置一軍伏查鳳陽之臨淮關由壽州光固以達於麻城黃州程途不過八百餘里壽州光固雖屬兩省而風俗略同民氣强悍自武備久弛官兵怯弱萬不得已而出於募勇之一途則必擇其素所

熟習者訓練而用之庶幾流弊較少副都御史袁甲三在臨淮駐紮年餘與壽州相隔咫尺光固亦其桑梓之地若令該副都御史招募二處之勇練成五千勁旅由麻城出黃州之背不過十餘日可到人地既熟道途無梗出其不意邀而擊之則蘄黃各屬可復皖鄂兩省之氣可通也舍此一策更無他處可添江北一軍若徵調太遠愈久則愈蔓延矣臣國藩愚見請

旨飭下副都御史袁甲三招募壽州光固之勇由麻城迅出黃州以全江北大局不勝至願若袁甲三能至湖北則上游李孟羣等之水師卽歸該副都御史統領水陸相輔尤有裨益至臨淮關亦係要隘現聞高唐連鎮勦辦將次完畢可否分撥北師

南下防禦臨淮之處出自

皇上聖裁

微臣

未敢擬議所有謀增江北一軍冀通皖鄂兩省

聲息緣由謹附片奏

聞請

旨

陳明部照遺失片

咸豐五年二月二十七日

再上年十二月二十五夜賊匪用小划燒襲老營臣國藩座船亦被焚奪文卷全失當經奏明在案其遺失部照因清冊無存未將數目查確未經聲明臣所請部照除江西湖南四川各領一千張外臣行營實領祥字號一千張當將癸丑年在衡州勸捐各生填寫部照三百七十號專差送衡又於漢口設局分撥部照廣爲督勸自文卷冊照全失後倉卒無從查考臣卽專差至漢口分局查覈冊籍數目以憑續報不料行至鄂省而北岸之賊業已竄至漢口捐局遷徙湖南難遽查悉計船上失去花翎照二張藍翎照一張各項職銜監照約二百餘張除俟查明

漢局簿冊並行文各州縣詳查捐生領照號頭核對再行咨部
外理合附片陳明謹
奏

請江西閩浙協餉片

咸豐五年二月二十七日

再臣等一軍曾經奏請江西湖南四川三省勸捐助餉今賊匪占踞漢口臣軍遠隔下游糧道已斷四川湖南之餉不能運解來營卽去歲奏准陝西協餉下欠十二萬兩亦不復能解至臣軍矣僅恃江西一省捐項臣等水陸萬餘人殊不足以資接濟相應請

旨飭下江西撫臣陳啟邁在於四年漕折項下每月酌撥銀兩以濟臣軍如江北添一枝勁兵臣等奏准川陝之款卽可撥歸江北一軍應用惟上游西通川陝北通河南來源尙廣臣軍僅取給於江西來援太隘勢難久支不揣冒昧請

旨飭下福建督臣王懿德浙江撫臣何桂清每月各籌銀二萬

兩解赴臣軍俾兵勇口食不匱免生他虞臣等不勝迫切待

命之至謹附片具奏請

旨

謹陳水陸軍情摺

咸豐五年三月二十三日

奏爲謹陳水陸軍情遵

旨覆奏仰祈

聖鑒事咸豐五年三月十四日臣國藩在江西內河舟次准兵部遞到承准軍機大臣字寄二月十二日奉

上諭曾國藩等前因戰船損壞全數開赴上游修理又因陸軍銳氣尙盛仍欲鼓行東下直擣金陵原以逆匪上竄牽制我師若輾轉回顧不但前功可惜且恐兵勇之氣不能復振是以諭令該侍郎等攻克九江卽合軍東下惟現在賊踞漢口漢陽武昌情形關係緊要設有疏失該逆勢踞上游我兵仍係腹背受

敵應如何設法協濟武昌而于攻剿九江大局仍無妨礙著會國藩等體察現在情形或該侍郎帶兵自行前往仍令塔齊布會同江西兵勇攻剿九江務當統籌全局斟酌辦理楊需曾國藩接奉此旨即將如何籌辦情形迅速具奏以慰廑念等因欽此又於三月十七日兵部遞到承准軍機大臣字寄二月十四日奉

上諭曾國藩等進攻九江連日不知勝負若何或酌分陸軍以救武昌東路或再添派水師沿江而上協濟李孟羣等之師使得進剿襄河則上游可冀得手於潯郡事機亦有裨益著卽妥爲籌酌迅速奏聞等因欽此伏查江西東路饒州廣信等處被

賊竄擾安徽池州徽州等屬賊勢猖狂臣等酌派羅澤南帶兵
前往廣饒一路進剿業經奏明在案目下臣等一軍分爲四枝
陸路兩枝臣塔齊布駐紮九江羅澤南分剿廣饒相去已在六
百里外水路兩枝臣國藩整理陷入內河之水師駐紮鄱湖李
孟羣等回援武漢屯紮金口相去更在八百里外兵合則力厚
分則力薄陸軍之分猶斟酌再三而後析爲兩股水軍之分其
初本無意於分也自去臘十二日輕舟百餘衝入內湖被賊卡
塞斷遂與外江老營隔絕猶冀內外夾攻仍可合而爲一自正
月初三日飭李孟羣等回援武漢外江之船愈少初五日彭玉
麟等因大風壞船全數開赴上游遂與內河一軍相去日遠逮

至武漢再陷沿江兩岸數百里復被賊踞而金口水師與鄱湖一軍乃不復可以遽合矣今水陸各軍之在江西境內者傷者平復勞者休息羸弱者汰遣添換仍可復去秋壯盛之氣足以仰慰

宸廑惟金口一軍與

臣

等相隔太遠當轉戰積勞之後值兩次

敗挫三次遭風之餘以未經修整之船禦武漢方張之賊撐持數月之久不得一日休息此兵家之所大忌而臣等之所深以爲慮者也屢據稟報彭玉麟等回漢之師一面與賊接仗一面修整破船次第完好湖南撫臣駱秉章復以百餘船前往接濟差足重整軍威而陸軍單薄餉項缺乏岌岌乎有潰散之虞論

天下之大勢則武昌據金陵上游爲古來必爭之地論行兵之
常道則上下皆賊而臣軍坐困於中段亦決非萬全之策是以
臣等一聞武昌淪陷之信卽再四籌商思所以爲回剿之計顧
回剿之策有難言者潯郡據長江之腰膂宜有重兵駐守其閒
一經撤退則九江湖口小池口之賊皆肆然無所顧忌內犯江
西上竄鄂岳均不可知軍士進則氣勝退則氣歉卽剿辦得手
未知何日始能重至九江其難一也正月初八日一摺言賊之
上竄不過意圖牽綴使我軍回救耳我軍鼓行東下不爲其所
掣動賊攻我之所必救我亦攻賊之所必救等語其時未知上
竄之賊果至漢口與否亦未知回救之船卽不可以復下也今

該逆不特攻陷武漢而且窺伺襄樊自金口以下上下江面皆爲賊踞內河水師若徒株守鄱湖不出江面則保護一隅無濟大局若乘此春漲由湖出江則不難於衝出湖口而難於出江之後一軍孤懸四面無依上不能遽合金口之水軍下不能速剿安慶之賊艇其難二也湖南用兵已久庫款旣空捐項亦竭本年賊蹤上竄胡林翼王國才等之陸軍李孟羣彭玉麟等之水軍皆仰給於湖南弁勇萬餘嗷嗷待哺有月餘未給餉者有兩三月未給餉者事機愈挫來源愈斷現在金口一軍口糧不繼卽有潰散之患臣等欲再率六七千人前往江西旣難於供支湖南更無可籌撥大抵兵勇之積習久住不戰口糧尙可展

緩若有行役之苦有戰陣之危則不可一日而無餉狡者藉詞鼓譟樸者亦無鬥心患有不可勝言者其難三也兼此三端實乏良策臣等調度乖方上負

皇上委任之意下負蒼生企望之情終夜以思不覺泣下刻下若分兵往鄂則已無可再分矣若臣等自行回剿則須預籌兩月之餉臣國藩上年曾奏請四川勸捐助餉頃已札委前任湖南常甯縣知縣祥麟兼程赴蜀守催餉銀十二萬兩如此項有著即可恃以爲回剿之用若其無著則姑駐江省境內與其千里馳逐卒以餉匱而致意外之虞又不如堅扼中段保全此軍猶得以供

皇上之驅策瞻望北闕翹切待

命臣等微悃萬言莫訴所有近日軍情遵

旨覆奏緣由理合繕摺馳奏伏乞

皇上聖鑒訓示施行謹

奏

陸軍攻勦弋陽克復縣城摺

咸豐五年四月初一日

奏爲陸軍攻勦弋陽連獲大勝克復縣城恭摺馳奏仰祈

聖鑒事竊饒州賊匪於三月初四分股由樂平德興竄擾弋陽

先期由撫

臣

陳啟邁派委署撫州府知府林福祥帶兵防勦暨

與

臣

國藩商派赴饒勦匪之羅澤南統帶湘勇三千五百餘人

先至弋陽會勦各情均經

臣

等及撫

臣

先後奏

聞在案緣廣信河口地方商賈輻輳財貨充牣且係通浙江要
區爲逆賊所覬覦林福祥等前在石鎮街與賊相持兵分力單
總未大挫賊鋒嗣浙江游擊常海在貴溪接仗陣亡賊勢尤張
臣等卽飭羅澤南兼程前進相機速勦茲據羅澤南會同林福

祥稟稱三月十九日該道等由貴溪拔營駐宿水門埠二十日
向弋陽進發羅澤南與安慶府知府李續賓帶湘勇中右兩營
爲前隊候補從九蔣益澧帶湘勇左營候補知縣唐訓方帶訓
字營爲二隊林福祥與趙如勝率捷勝軍爲三隊前安福縣知
縣文明偕藍翎千總戴正才伍連魁率寶勇爲四隊卽選訓導
鍾世楨率志同軍候選通判程迪昌率安全軍爲五隊合以六
成隊迎敵畱四成隊保護輜重前隊至大水橋爲入弋陽城之
要道前多水田無駐營之地羅澤南方相度形勢傳詢土人突
見賊三四千人由五里亭揚旗吹角而下李續賓卽以右營堵
截大水橋羅澤南督帶中營由橋北繞出陳家山上冀抄賊後

且擇安營之處不意該逆見我兵初至營盤未築復以四五千人列於陳家山下瓦夕塘橋之南又以四五百人由弋城北門而出圖抄我營之尾與五里亭之賊共爲三股黃旗蔽野呼聲震天羅澤南飛飭蔣益澧唐訓方迅速來援林福祥督諸軍繼之堵北門一路之賊賊之在陳家山瓦夕塘橋者大隊扼住橋上鎗礮排列悍賊疊出搦戰羅澤南率中營湘勇拒之堅與相持如不欲戰俟諸營畢至往堵北門然後以中營進攻直逼橋上鎗礮之後繼以刀矛斃賊二十餘名賊潰遂踰橋而南追殺百餘人竄入村莊者以火焚之死者不可勝計餘賊俱由西門外之西江橋入城先是賊於橋上砌一石門僅容一人出入原

以防我師之進攻至是我兵從後追之賊眾擁擠驟不能入橋門墜水死者以數百計生擒長髮賊十二名內有偽總制程禮周稽老呂王富德訊明立予正法斬梟賊之在五里亭者李續賓率右營由大水橋蹙之羅澤南從上截擊殺斃百餘人該逆見陳家山敗賊擁塞橋頭無路可歸也遂從五里亭之南上竄江邊右營乘之追入湖汊殺斃者百餘人溺死者不可勝計湖水爲赤餘賊竄至西江橋李續賓復督諸勇截之生擒長髮賊十八名賊之由北門出者蔣益澧唐訓方先到奮力抵禦林福祥速督捷勝軍踵至分數路圍剿戴正才伍連魁鍾世楨程迪昌諸軍從而薄之共殲斃百餘名賊潰追至北門城外賊於城

內復出大隊眾寡不敵我軍稍卻賊眾來追我軍返戈擊之各營四成隊之護輜重者亦皆執刃以逐賊復大敗追至城根賊多溺死港中生擒三十四名內有僞將軍王姓一名此二十日三路擊賊第一次大勝之實在情形也羅澤南以軍未午餐飭令收隊急修營壘以自固詎料賊敗之後復挾全力來撲其由北門出者以萬計直抵陳家山東大松林內分三大股排列一股之中復分數股旗幟之多眾目爲眩李續賓以右營禦於松林之南唐訓方副之羅澤南以中營禦於松林之北蔣益澧繼之各分數股以待賊屢衝突我軍屹然不動乘其氣竭一呼而進殺斃大黃旗賊數十名賊狂奔不止乘勝追之溺斃港中者

以數百計直抵北門之下賊閉城以守其由西門出者約二三千人林福祥督率捷勝軍寶勇志同軍安全軍堵之踰橋奮擊賊屢衝屢截無敢越港者追至西江橋共殺斃賊數十人生獲十五名以日暮收隊此第二次截擊北門大股賊匪及西門堵剿獲勝之實在情形也是日兩次鏖戰分路圍剿諸營無一以當百殺斃焚斃溺斃之賊不下三千餘名奪獲旗幟軍裝無算查點士卒湘勇候補藍翎把總張以德千總易傳武喻能益均受礮子傷殞命兵勇亦傷亡數十名二十一日五更羅澤南督同李續賓蔣益澧唐訓方等攻西門林福祥督同文明戴正才伍連魁鍾世楨程迪昌等攻東門廣信府知府袁泳錫亦自

上游馳至率同弋陽縣知縣王蘭并力圍攻該逆於二十日大敗之後被擄之民盡皆逃散長髮亦多潰走其在城者猶閉城自固湘勇先登諸軍繼入擒獲長髮賊二百餘名逃竄出城者復截拏三百餘名內有僞指揮劉姓僞總制余姓及師帥八名奪獲僞盤龍冠金龍袍等件黃旗五百餘面大小鎗礮刀矛數百件適署德安縣知縣劉希洛帶平江勇至弋助剿亦沿途搜捕敗賊多名訊據生擒賊犯供稱弋陽賊目有檢點三人長髮老賊三千餘人浮梁樂平德興裏脅土匪二萬餘人將上攻河口廣信以扼江浙咽喉之路不意遽爲大兵所敗逃遁各賊多由北門而出此二十一日克復弋陽縣城之實在情形也伏查

廣信爲江西富饒之區奏報必由之路保全廣信則內可以屏蔽撫建外可以進攻饒州茲幸仰仗

天威弋陽股匪就殲大挫兇鋒卽當跟蹤追剿肅清江西東路以期漸偪皖境所有此次出力員弁兵勇容臣等擇尤奏請獎敘以資激勸藍翎候補把總張以德候補千總易傳武喻能益奮勇捐軀懇

恩飭部照陣亡例議卹傷亡兵勇查明照例辦理所有連獲勝仗克復弋陽緣由除江西撫臣陳啟邁另行奏報外恭摺由驛馳奏伏乞

皇上聖鑒訓示施行謹奏

湖北兵勇不可復用摺

咸豐五年四月初一日

奏爲湖北兵勇不可復用大江北岸宜添勁旅敬陳管見仰祈
聖鑒事竊查武漢兩城三次淪陷固由守禦不善而兵勇積習
之壞亦實有萬不可用者蓋鄂中兩府一鎮繁華甲於天下督
撫兩標之兵習於淫侈偷惰已久不可用矣自咸豐二年粵匪
至鄂迄今不滿三載而全兵覆敗大潰者五次其間小潰小敗
不可勝數二年臘月初四日粵匪以地道轟破城垣逆旗猶未
登城而城內外兵勇已狂奔四竄逃匿各縣是爲第一次大潰
三年春間署督臣張亮基等招復潰兵添招練勇擊粵匪於團
風勦土匪於通城廣濟稍有起色九月十三日田家鎮失防水

陸兵勇同時棄甲回奔是爲第二次大潰其時臣函致前督臣

吳文鎔謂鄂省之兵視奔潰爲故常不宜再行收集必須改弦

更張另募額兵另招練勇而後可以成軍而後可以言戰吳文

鎔未及更改卽被崇綸參劾倉卒出師四年正月十五日堵城

之役十三營均被蹋毀將弁兵勇盡數逃散是爲第三次大潰

崇綸青麀等收復潰兵并廣募湖南四川之勇支持數月餉盡

援絕六月初二日奸細竊發賊旗入城青麀率兵勇奔赴湖南

沿途逃散大半是爲第四次大潰臣與提臣塔齊布等奉

命東征仰仗

天威倖復武漢督臣楊霈復收潰兵又招湖北河南之勇新舊

兵勇數近三萬兵力不爲不厚楊需屢次奏報咨文亦自敘其戰功之多士卒之勁意謂可簡練精銳頓改舊規矣不圖廣濟一敗退至蘄水又退至漢口又退至德安棗陽萬餘兵勇或從之以行或星散無歸是爲第五次大潰夫古今所以激勵軍士者重賞以鼓好勝之心嚴刑以誅奔潰之卒故可用也今湖北兵勇既不好勝又不畏刑視潰散爲常行之道恬然不以爲怪若因循不改其可笑必更有甚於今日者臣愚以爲宜變易前轍掃除其迹而更張之凡標兵之求歸行伍者一概不收凡練勇之曾經敗潰者亦不復用大抵山僻之民多獷悍水鄉之民多浮滑城市多游惰之習鄉村多樸拙之夫故善用兵者嘗好

用山鄉之卒而不好用城市近水之人臣愚以爲欲另募湖北額兵宜在襄陽鄖陽等屬深山窮谷之中招選寒苦力作之民擇其英鷙者編入兵籍假以時日而訓練之與武漢德安等府遠相隔絕使向來之潰兵潰勇浮游無歸者不得改名而混入其中然後可得一旅之勁兵而免致虛糜數萬之餉古之謀大事者克一二名城不以爲喜得一二良將數千精卒則以爲大喜失一二名城不以爲憂失一二良將損傷數十壯士則以爲憂卽素稱精勁之師或積勞而疲或餉匱而散或不和而驕蹇則愈引以爲憂今日湖北之事省城不遽收復尙不足患惟通省無一勁兵精卒乃爲無窮之患雖調他省之兵幸而克復而

本省無強兵守之亦終非可久之道臣愚以爲湖北之急務在於另募額兵另招新勇目前之收復鄂垣在此異日之保守楚疆亦在此效雖稍遲而事屬至切前者二月二十七日臣具奏江北宜添兩路勁兵外一路沿江岸而下內一路循潯嶽之麓由蘄廣而出宿太請

旨飭下副都御史袁甲三募壽州光州之勇出漢黃之背不知我

皇上已俞允否如未蒙

允准則江北千里極爲空虛無論江面不能清武昌廬州不能復即使徼倖而肅清恢復而流賊四散旁出橫逸截我後路已

清之江面不旋踵而梗塞已復之城垣不旋踵而復失去冬之事卽前車之鑒不可不早爲之所也伏乞我

皇上塵念南服

神算獨操縱袁甲三不克西上亦懇

飭籌一枝勁旅疾出黃州之背並懇

飭下湖北督撫另立新軍將前此潰兵潰勇一概革除盪滌舊

習重整軍威使江之北岸得兩路足恃之兵可合可分可內可

外不特有益於大局卽臣等南岸之陸兵上下兩處之水師亦

皆得所憑藉得所聯絡有恃以不恐矣所有請撤湖北兵勇另

立新章江北一岸宜添勁旅緣由恭摺附驛馳奏伏乞

皇上聖鑒訓示施行謹
奏

請部撥浙引用鹽抵餉摺

咸豐五年四月初一日

奏爲請撥浙引用鹽抵餉以充軍用以濟民食事竊臣等一軍水陸萬數千人上游運道已斷餉項缺乏久在

聖明洞鑒之中二月間奏請福建浙江兩省協濟

臣

軍嗣聞浙

省因徽州戒嚴難濟急需閩省亦係積疲之區難籌協款惟奏請動撥江西四年漕折銀兩稍紓眉急特爲日甚長爲數較巨漕折一項亦難久於供支既處孤立之勢又有坐困之虞欲捐則無可再捐欲撥則無可指撥中夜以思良深焦灼伏查國家歲入之款鹽課爲一大宗自賊踞金陵長江阻塞淮南鹽務片引不行場產堆積如山而江西湖南無鹽可售民憂淡食

淮南之鹽奸民偷送賊營粵匪賤售於各口岸大獲其利江西南路食粵私北路食賊之私鹽湖廣南路食粵私西路食川私東北亦食賊之私鹽以

國家富有之物產不克設法行銷自食之而自利之而反資以爲賊之利誠可惜也伏查近年各路軍情或以鈔抵餉或以米抵餉或以大錢抵餉無非通融辦理以濟銀兩之不足臣等一軍懇

恩飭下戶部撥給浙鹽三萬引用抵餉銀由臣招徠紳富自備場價自備運腳自行運至江楚兩省而銷售之以浙省之鹽斤行淮南之引地浙省正雜錢糧邀

恩豁免淮綱正雜錢糧則虛納而虛解在戶部不以爲所撥者
鹽也仍令臣軍向鹽務衙門虛報納課掣一憑批卽與撥銀無
異矣在臣軍不以爲所領者鹽也仍令鹽務衙門向臣糧台虛
報解餉掣一憑批卽與領銀無異矣伏查上年江西缺鹽經撫
臣張芾陳啟邁先後奏請借行浙鹽四萬引是浙鹺可行於淮
南引地已有明證本年二月浙江撫臣何桂清咨明江西巡撫
浙江各場存廢鹽斤尙多商人顧源興等情願認辦浙鹽三萬
引運赴江西行銷等語是浙場存鹽之富又有明證合無仰懇
天恩飭下戶部准撥浙鹽三萬引聽臣設法自運自銷於淮引
口岸以濟軍餉之不足不勝企幸如果運銷暢旺有裨軍食則

奏稿卷五

吳

可免鄰省協濟之艱可減民間捐輸之苦臣當續行奏請添引
售銷如其行銷不暢流弊滋多臣亦必奏明停止臣爲請撥餉
銀起見非爲變通鹽法起見倘其稍損於鹽務無益於軍餉臣
權衡輕重斷不敢有片刻之回護絲豪之遷就也除運鹽條目
縷晰咨商戶部外所有請撥浙引以鹽抵餉緣由恭摺具奏伏
乞

皇上聖鑒飭部迅速議覆施行謹

奏

硃批戶部速議具奏片併發欽此

請大員總理鹽餉派員協理鹽運片

咸豐五年四月初一日

再臣奏請以鹽抵餉如蒙

聖恩俞允則不難於到岸行銷而難於招商領運蓋緣東南數省現當干戈擾攘之時道路多梗人心驚惶殷實之家率多隱匿不出孰肯挾貲出爲鹽商西省去浙千有餘里楚省去浙二千餘里有風鶴之警有虧折之虞又孰肯挈數萬金之成本求不可必得之利若輕險之徒冒死逐利影射官鹽自作私梟臣又斷不敢招徠此輩以滋弊端招商一事殊屬不易臣之愚見欲仍以勸捐之法行之勸令地方紳富湊助成本倡首領運庶票商可期踵至查在籍刑部侍郎臣黃贊湯上年奉

旨派令在江西勸捐會同撫

臣陳啟邁

督勸至四五十萬之多

官紳交孚物望允協若蒙

聖慈諭令在於江西臨江府屬之樟樹鎮設局交該侍郎總理西楚兩岸鹽餉事務各屬紳富當可響應惟樟樹鎮以督銷為主浙江督運事件仍須有大員綜理方昭慎重查前任浙江學政禮部侍郎臣萬青藜才優心細辦事穩實丁憂在浙未能回籍若蒙

聖恩諭令在於浙江督辦鹽運事務必能與江西總局一氣呵成當此寇亂未平之際大小臣工或督兵或籌餉苟可自效皆當力竭血誠以圖涓埃之報况該侍郎等二人位望較崇夙懷

忠悃每與臣往返函商常以受

恩深重未能報稱爲恥如經理鹽務仿唐臣劉晏成法引用士人招集紳富悉心經畫自可有利無弊至西楚兩省引地寬廣所有配引分運截角緝私等事非一二人所能督辦查江西有現署鹽法道之南昌府知府史致謬明而能斷候補道萬啟琛精細篤慎堪以協理西省鹽運事件湖南有總辦後路糧台之署鹽法道裕麟辦理團練勸捐之候補知府黃廷瓚臣等奏保堪以協理楚省鹽運事件三萬引爲數無多而微臣欲請二品大員兩人督理又請派兩省官紳道府四人分理者蓋有治人無治法得其人而董之則軍餉可漸期充裕而淮南數千

里引地爲賊私粵私川私侵佔者可以反而爲官引之地不得其人董之則卽此三萬引者亦不免暗滋流弊而仍無益於軍餉是以與兩省官紳反覆熟商莫不謂以鹽抵餉之舉必須多求實心任事者以經理之也倘蒙

飭部議准合無仰懇

天恩飭下前任刑部侍郎

臣

黃贊湯前任禮部侍郎

臣

萬青藜

總理鹽餉事務并

飭派史致謬等四人協理兩省鹽運事件於鹺政餉項均有裨補謹附片具奏請

旨

派辦糧臺委員片

咸豐五年四月初一日

再湖北在籍禮部主事胡大任係奉

旨回籍幫辦團練之員自上年閏七月在新隄起卽隨同

臣軍

辦理沿江團練辛勤督勸頗著成效武漢收復委令在漢口勸

捐并辦理

臣

軍轉運糧台該司員深明大義志在急公本年賊

竄漢鎮於萬難措手之時猶復拮据籌畫接濟軍餉又江西在

籍禮部主事甘晉丁憂服闋應卽赴部江西撫

臣

畱該司員辦

理捐輸事件

臣

到西省因陸軍兩枝水軍一枝相距太遠必須

於省城設立後路糧台支應三路糧餉軍火方免缺乏之虞當

經會商撫

臣

陳啟邁飭令甘晉與湖南候補直隸州知州李瀚

章綜理其事該司員品端才裕委管糧台藉資臂助軍事方殷
難遽赴部當差相應請
旨飭下吏部查照辦理謹

奏

硃批吏部知道欽此

陸兵追剿廣信股匪克復郡城摺

咸豐五年四月十二日

奏爲陸兵追剿廣信股匪疊獲大勝克復郡城恭摺馳奏仰祈
聖鑒事竊饒州賊匪由樂平德興竄擾弋陽謀攻廣信河口
等派委羅澤南林福祥等先後馳剿克復弋陽情形業經奏報
在案嗣據羅澤南等迭次稟報二十一日克復弋陽後餘匪竄
踞興安北門外民房街市盡被焚燬當以興安爲入廣信要道
不可不急爲撲滅兼恐餘匪匿藏山谷乘虛回撲因畱林福祥
率帶諸勇及德安縣知縣劉希洛所帶之平江勇暫駐弋陽而
羅澤南卽帶湘勇訓字營勇共三千五百人由貴溪馳赴興安
駐營城西十里二十三日辰刻抵興安城外訪知該縣之賊係

另股由安徽婺源而來與弋陽之賊共攻廣信並擄船百餘
將分股以掠河口二十一日初至興安是日我兵破賊於弋陽
該逆尙未之知也既聞弋賊大敗興安股匪不及待弋賊之來
會已於二十二日五鼓由北門逃竄被脅者仍徑回德興凶悍
者東上廣信徑至府西三十里之坑口大路口一帶羅澤南率
師入興安縣城綏輯難民搜擒餘匪卽以二十四日五鼓由興
安馳赴廣信函商林福祥由弋邑移駐興安以爲我軍後路聲
援別令劉希洛帶平江勇八百倍道前進與湘勇合上廣信此
克復弋陽後跟蹤追剿收復興安迅赴廣信之實在情形也二
十四夜羅澤南駐大路口探聞廣信郡城已於先一夕淪陷矣

蓋緣此股竄匪不下萬餘人半係長髮老賊星奔飈至迅疾莫測二十三日早抵廣信四面圍攻城內施放鎗礮奮力堵禦賊不敢近黃昏之際大雨淋漓鎗礮莫施賊冒雨緣梯而上攻陷郡城羅澤南聞之憤甚卽於二十五日帶湘勇訓勇馳三十里辰刻抵廣信城西之烏石山其地孤峯高聳俯瞰一切賊之出入莫能隱遁羅澤南駐營山下飭安慶府知府李續賓營於山左候選知縣唐訓方從九蔣益澧營於山右防賊數路夾擊賊見我兵突至築壘未就遽統大眾來撲始以數千人由西門出攻我軍之中營繼由北門出數千人爲一股攻右營又以一股由南繞出攻左營訓勇營黃旂滿谷呼聲震天勢極梟悍我勇

惟自整營盤若不知賊之已至相持二時之久賊愈逼愈近各營始整隊以出排列山岡不速與戰俟賊屢衝力竭然後振鼓而前賊之强悍者鏖戰良久初無退志諸勇立前斃大黃旂賊十餘名賊稍卻乘勝而進賊大潰追至城西共擊斃八百餘名髮長尺餘內有竈黃馬褂賊鬚長八寸不知是何賊目其餘溺死城西池內及焚死民房者無算奪獲大小黃旂五十餘面偽印六顆大小鎗礮七十餘件是日劉希洛帶平江勇自貴溪倍道前進日暮來營助剿此抵廣信後痛剿獲勝之實在情形也二十六日辰刻我軍方欲整隊攻城賊眾萬餘忽分三路而出又以數千人捲旗息角埋伏於樹林深密之處羅澤南登高瞭

望知賊伏所在卽飭蔣益澧帶湘勇左營隱伏右路之高岡下
劉希洛帶平江勇踞右路之平岡排陣以待遏賊不得徑逼右
路湘勇中右兩營及訓字營飭令勿出營盤誘賊近前然後接
戰又派精銳之勇約百餘人爲一隊分途潛往截其埋伏之路
約俟大旂招展四出齊應賊之三路來者於營前一里許放鎗
大呼來衝數次見我兵不動又自中止旋又大呼相持已久羅
澤南知彼竭而我盈也遂督湘勇中營由中路出唐訓方帶訓
字營從中路之右出李續賓帶湘勇右營從左路出逼近賊前
賊鎗連施我軍仍銜枚無聲如是者又片時大旗一搖三營齊
進殺斃長髮悍賊千餘人劉希洛蔣益澧之勇皆從大路繞出

賊之藏伏樹林者亦爲我伏所襲賊眾大敗乘勝追勦沿途殺斃者又千餘人匿民房者燒之墮池中者刺之所奪黃旗鳥鎗刀子不可勝計諸路之賊四竄其擁擠入城者城上賊開放大礮轟斃者皆入城擁塞之賊我兵反一無所傷賊遂閉城以拒忽大雨如注溝澮皆盈城上礮不能開我軍四面圍攻植立雨中無一退者日暮收隊防賊宵遁暗使敢死之士四路巡邏二十七日五鼓飭令各營再行圍勦諸勇奮躍登城刺殺數百人賊潰從東門逃出又於鄉間捕勦四百餘人克復郡城安撫子黎弔恤文武殉難之員被殺百姓填街塞巷目不忍睹捐貲收瘞招民復業此廣信連日攻勦克復府城之實在情形也接據

探稟賊於二十八日由玉山北門而遁駐七都口三十日入淞
江開化縣之華埠其地東近常山北接婺源西鄰德興尙不知
賊意之所向羅澤南林福祥等暫駐信都審明賊蹤觀釁而動
伏查該逆自饒州內犯江西兼窺浙江以大股占踞弋陽抗拒
官軍以另股由興安徑撲廣信扼浙之吭隘而固皖賊之藩籬
其計狡毒已極臣等二月具奏三省全局一摺言南岸之東一
路須有一枝勁兵蓋嘗籌慮及此調羅澤南等東趨饒廣漸偪
皖境茲幸仰仗

天威屢獲大勝要郡堅城三日克復按察使銜甯紹台道羅澤
南轉戰千里審機度勢謀深勇沈每於未築營壘之際猝遇賊

至常能從容鎮定以寡勝眾應請

旨交部從優議敘其餘出力員弁兵勇容

臣等擇尤保敘以資

激勸廣信城陷時殉難之文武各官由江西撫

臣查明請

卹除陳啟邁另行具奏外所有疊獲勝仗克復廣信郡城緣由

恭摺由驛馳奏伏乞

皇上聖鑒訓示施行謹

奏

水師近日接仗情形摺

咸豐五年五月二十一日

奏爲水師小挫一次小勝二次五月十三日大戰獲勝恭摺奏

祈

聖鑒事竊

臣

國藩於三月十三日自江西省城登舟在吳城駐

紮半月飭令前隊進紮南康府城四月十三日

臣

國藩移駐南

康前隊戰船進泊青山地方南康之爲府前有彭蠡後有匡廬

背山面湖去罐子口四十里自罐子口而上由都昌以達於饒

河爲東鄱湖由瀦溪以達於吳城爲西鄱湖自罐子口而下直

至府城爲宮亭湖自府城以下爲土目屏峯青山姑塘鞋山等

處凡九十里而至湖口縣南康之與九江中僅隔一廬山山北

爲潯郡山南爲康郡下游青山姑塘及湖口對面之灰山皆廬山之支麓也我水師老營駐泊南康下則攻湖口之賊冀欲力破此關上則防都昌之賊擄船而襲我後路四月十九日青山前隊水軍蕭捷三鄧翼升孫昌國等方在操演之際該逆已由姑塘揚帆上犯約礮船百餘號小划數十號雁列而來其船亦皆快蟹長龍三板之類長短大小盡倣我軍製法槳枝之密礮位之備旗幟之鮮明一一效法我軍視去年之賊礮船無多水戰較鈍者迥不相同我軍弁勇見之不覺驚駭與之接戰轟礮數輪該逆自西岸斜行而上渡至東岸我軍亦斜行東渡排礮攢擊鏖戰兩時該逆忽出小划數十沿西岸而下將及青山我

戰船皆在東岸力戰青山駐紮之所僅有雇坐民船數號例不出隊致被焚奪該營坐船既失東岸戰舟亦稍忙亂無心戀戰倉卒收隊該逆追逐十餘里我軍船駛回上游至火燄山紮泊此十九日水師三營接仗小挫之實在情形也二十一日臣國藩以都昌尙有陸賊恐其擄船來襲有上下夾攻之患派定湘營何啟長前往搜剿二十二日抵馬家堰該逆匪裝運輜糧船隻一百餘號見官軍忽至揚帆疾走各哨奮往力追圍繞焚燒無一存者嗣至徐家埠復燒賊船五十餘號又至都昌城下燒賊船一百餘號何啟長偕護都司李逢春入城諭令百姓薙髮又上至土塘燒賊船四十餘號合計焚燒大小船三百有餘

該逆擄以運糧接濟湖口者奪獲短刀十九把生擒長髮五之
被焚溺水者數十名二十四日收隊仍泊南康五月初八日
逆匪復在都昌擄船擄糧又派孫昌國前往搜剿燬船二十餘
號其新擄者呼百姓而還之此都昌等處搜燒賊擄民船兩次
小勝之實在情形也五月十三日我軍派船九十餘號至青山
一帶放哨適值賊船自姑塘揚帆上犯我軍停棹小泊觀釁而
動該逆復用十九日之故智自西岸斜上渡至東岸隊伍整齊
氣勢驍悍我中營賀虎臣定湘營何啟長帶船三十餘號渡至
東岸迎敵而畱蕭捷三陳炳元鄧翼升三營各船於西岸將欲
抄賊之尾該逆全力撲我東岸兩營千礮對轟力絀不支哨船

間有退者賀虎臣何啟長揮旗苦戰該逆稍卻又見西岸各營
來抄其尾賊舟卽回注西岸攢礮對擊鏖戰兩時之久羣子雨
落傷賊約計三百人西岸之賊敗北東岸之賊亦敗是日巳刻
臣國藩聞下游接仗鑒於四月十九日之失派都司孫昌國及
各營添派船六十號馳往接應風順水溜片刻行三十餘里當
東岸賊敗之際我接應之船恰至該逆眩亂失措我軍列礮環
攻追奔二十餘里至鞋山以下燒燬賊船三隻始行收隊此十
三日眾船大戰獲勝之實在情形也伏查該逆去年專恃民船
數千震眩耳目其能戰者不過戰船數十號小划數百號而已
十月間始聞其在安徽修造礮船操習水戰曾經臣等奏明在

案不謂數月之久遽已操練成熟梟悍異常爲我軍所驚駭去
賴內湖水師多久經戰陣之士將弁屢受

天恩感激思報十三日之戰蕭捷三等慷慨誓眾期與該逆決
一死戰仰仗

天威倖獲全勝所有出力員弁籲懇

天恩容臣等擇尤保獎傷亡兵勇查明照例辦理所有內湖水
師近日接仗情形恭摺由驛馳奏伏乞

皇上聖鑒訓示施行謹

奏

塔齊布羅澤南兩軍攻剿情形片

日 咸豐五年五月二十一

再五月初二日准兵部遞到承准軍機大臣字寄四月十四日奉

上諭塔齊布攻剿九江近日情形未據奏及豈爲賊氛阻隔竟不能聲息相通耶并著隨時奏報以紓懸系等因欽此伏查臣國藩前在江省月餘隔日與臣塔齊布通信一次自至吳城南康每日與臣塔齊布通信一次九江與南康僅隔一廬山臣等二人屢次約會匹馬相見因潯城之賊時時窺伺意欲撲我陸營湖口之賊時時窺伺意欲撲我水營故臣等二人皆不敢遠離營盤雖相距僅數十里而彼此不得會晤兩地寸心同深焦

灼潯城之賊每次出隊撲營臣塔齊布輒出隊邀擊小有斬

斃賊數人或數十人不等近日賊船由上游駛下者甚多灣泊

潯江聲言大舉撲我陸營臣塔齊布日夜嚴防務保無虞若能

趁該逆出巢大戰乘勢破城則尤所甚願也至甯紹台道羅澤

南一軍自克復廣信府城後聞賊匪大隊屯聚景德鎮羅澤南

馳赴景德追剿該逆又由祁門婺源竄擾徽州等處浙江巡撫

臣檄調羅澤南往徽會剿臣等以此軍去徽太遠聲勢阻隔飭

道難通飛飭羅澤南仍回饒州都昌與水師會攻湖口方擬俟

羅澤南軍至湖口東岸不特可與水師會台並可與九江陸營

聯爲一氣三路合師軍威無難復振矣乃忽於十七日淮江西

撫臣陳啟邁咨稱義甯州失守省城震動飛調羅澤南回省以
固根本等情是羅澤南之師仍不能由都昌進剿湖口東岸既
無陸兵則水軍之孤懸可慮三路之會合無期事機不順處處
牽掣當二月調羅澤南赴饒州之時實不料數月之久尙未能
繞出湖口也所有臣塔齊布陸軍在潯晝夜嚴防及羅澤南一
軍不克會剿湖口緣由理合附片具奏仰慰

聖廕謹

奏

水師勝仗奪回座船摺

咸豐五年六月十二日

奏爲水師開仗獲勝奪回拖呂大船恭摺奏祈

聖鑒事竊四月十九日水師小挫五月十三日大戰獲勝業經
奏報在案五月三十日賊船上犯至姑塘青山一帶我水師出
隊迎敵該逆從西岸魚貫而上將近我軍逆船斜渡東岸隊伍
甚整其領隊頭船係拖呂大船臣國藩去年之座船臘月二十
五夜被賊划襲奪者也其第二號係長龍花船僞右十二承宣
胡鼎文黃文奎李繼遠賊目三人者均在此兩船中揮旗督戰
揚帆直上礮聲如雷意欲由東岸轉抄我軍之尾我軍循西岸
而下一礮不發千槳齊施從逆風中駛至下游將近賊船之末

乃渡向西岸包抄賊尾羣礮攢轟子如驟雨鏖戰兩時之久賊
後隊紛紛敗退前隊數十船陣腳亦亂我軍合長圍以包之各
將弁誓死力戰必欲奪回拖罟大船以雪積憤該逆知難出重
圍卽用三板數隻將僞承宣胡鼎文等飛槳逃脫而畱僞功勳
張百長於拖罟船上與我苦戰我軍四面環攻船上五十餘賊
或撲水或中礮須臾傷斃四十餘人獨張賊凶悍異常手持刀
叉身懷火彈我軍搶登者多被張賊殺傷各哨官繞舟齊登不
撓張賊落水然後奪回拖罟大船生擒長髮十六人其第二號
花船亦同時奪獲外又奪得三板三號小划二號奪大礮十八
尊方賊目胡鼎文等駕三板逃脫之時我軍一面圍攻拖罟一

面追逐賊目急礮排轟羣子亂落該逆紛紛梟水計礮斃淹斃
二百餘人因天黑無月卽行收隊次早始回老營查點我軍右
營哨官蘇光彩中子陣亡各勇傷亡十餘人伏查水軍自去歲
湖口失利以來陷入內湖各船與外江水營隔絕卒與將離兄
與弟隔小船之素附大船者皆隔絕而不得相見臣國藩特至
江西造船添勇另立新軍方慮士氣已傷難期再振幸仗我
皇上威福兩次獲勝奪回拖罟大船積憤爲之稍申軍心爲之
一振若使此軍果足自立則扼斷長江之腰膂上有金口水軍
以擊其首下有紅單戰船以擊其尾二千餘里之江面分爲三
段勦辦或有肅清之期此次將弁兵勇踴躍用命籲懇

奏稿卷五
天恩容臣等擇尤奏保以昭激勸保升外委蘇光彩力戰陣亡
李

請
旨交部照例議卹所有水師開仗大勝奪回拖罟座船緣由恭
摺馳奏仰慰

宸廑伏乞

皇上聖鑒謹

奏

奏參江西巡撫陳啟邁摺

咸豐五年六月十二日

奏爲江西巡撫陳啟邁劣跡較多恐誤大局恭摺奏

聞仰祈

聖鑒事竊惟東南數省賊勢蔓延全賴督撫得人庶幾維持補救轉危爲安臣至江西數月細觀陳啟邁之居心行事證以輿論實恐其貽誤江省並誤全局有不得不縷陳於

聖主之前者已革總兵趙如勝係奉

旨發往新疆之員上年奏畱江省效用陳啟邁派令管帶戰船百餘號水勇四千餘人大小礮位七百餘尊十一月初五紮泊吳城鎮一聞賊至趙如勝首先逃奔各兵勇紛紛獸散全軍覆

奏稿卷五

沒船隻礮械盡爲賊有其實賊匪無多民間至今相傳僅長髮
九十餘人耳聞風先逃殊可痛憾乃陳啟邁入奏之詞則曰趙
如勝奮不顧身力戰終日其所失船數百餘礮數七百並不一
一奏明含餉欺飾罔恤人言又派趙如勝防堵饒州等處正月
間敗逃三次賊破饒州陳啟邁含混入奏不惟不加趙如勝之
罪並其原定新疆罪名亦曾不議及始終怙非袒庇置賞罰經
紀於不問已革守備吳錫光係被和春參劾奉

旨正法之員吳錫光投奔江西籲求救全陳啟邁奏畱江西効
用倒填月日謂畱用之奏在前正法之

旨在後多方徇庇虛報戰功既奏請開脫罪名又奏保屢次超

升又奏請

賞給勇號吳錫光氣質强悍駕馭而用之尙不失爲偏裨能戰之才至其貪婪好淫縱兵擾民在南康時軍中婦女至百餘之多過樵舍時將市肆搶掠一空實爲遠近紳民所同惡而陳啟邁一力袒庇顛倒是非正月二十九日吳錫光縱其麾下貴州勇無故殺死龍泉勇一百八十七名合省軍民爲之不平陳啟邁旣不奏

聞又不懲辦乃於武甯縣囚內取他勇之曾經犯案者假稱貴勇縛而殺之以掩眾人之耳目而眾人愈積憤於吳錫光道路以目矣饒州之賊屯聚於四十里街三月二十八日吳錫光攻

勦饒州僅殺賊數十人此紳庶所共見共聞而陳啟邁張皇入奏謂克復饒郡殺賊三千焚船百餘吳錫光與其子姪均保奏超升卽素在巡撫署內管帳之胡應奎亦隨摺奏保義甯州之陷實係興國崇通等處土匪居多長髮尙少吳錫光驕矜散漫倉卒敗亡並非有大股悍賊與之交鋒也乃陳啟邁粉飾入奏則曰鏖戰竟日殺賊千餘吳錫光薪水口糧較別營獨多且帶勇七百支領八百人之餉此陳啟邁所面囑司道總局者乃入奏則曰係自備資斧種種欺飾實出情理之外自軍興以來各路奏報飾勝諱敗多有不實不盡之處久爲聖明所洞鑒然未有如陳啟邁之奏報軍情幾無一字之不虛

者茲風不改則

九重之上竟不得知外間之虛實安危此尤可慮之大者也

臣

等一軍自入江西境以來於大局則慚愧無補於江西則不爲

無功塔齊布駐九江防陸路之大股

臣

國藩駐南康防水中之

悍賊羅澤南克復一府兩縣保全東路此軍何負於江西而陳

啟邁多方掣肘動以不肯給餉爲詞

臣

軍前後所支者用侍郎

黃贊湯礮船捐輸銀四十餘萬兩奏准漕折銀數萬皆

臣

軍本

分應得之餉並非多支藩庫銀兩即使盡取之江西庫款凡餉

項絲毫皆

天家之餉也又豈陳啟邁所得而私乎乃陳啟邁藉此挾制三

次咨文疊次信函皆云不肯給餉以此掣人之肘而市己之恩

臣既恐無餉而兵潰又恐不和而誤事不得不委曲順從羅澤

南克復廣信以後臣本欲調之折回饒州都昌以便與水師會

攻湖口陳啟邁則調之防景德鎮又調之保護省城臣均已曲

從之矣旋又調之西剿義甯臣方覆函允從而陳啟邁忽有調

往湖口之信臣又覆函允從而陳啟邁忽有仍調義甯之信朝

令夕更反覆無常雖欲遷就曲從而有所不能二月間臣與陳

啟邁面商江西亦須重辦水師造船數十號招勇千餘人以固

本省鄱湖之門戶以作楚軍後路之聲援庶與該撫正月之奏

案相符陳啟邁深以爲然與臣會銜札委南河候補知府劉于

潯董理其事業已興工造辦忽接陳啟邁咨稱江西本省毋庸
設立水師停止造船等因臣既順而從之矣因另札劉于潯在
市汊設立船廠專供臣軍之用忽又接陳啟邁咨稱欲取廠內
船隻交吳錫光新募之水軍又飭令廠內續造十五號船廠委
員亦遵從之矣迨船既造成陳啟邁又批飭不復需用倏要船
倏不要船倏立水軍倏不立水軍無三日不改之號令無前後
相符之咨札不特臣辦軍務難與共事卽爲屬員者亦紛然無
所適從數年以來

皇上諭旨諄諄飭各省舉行團練類皆有虛名而鮮實效臣所
見者惟湖南之平江縣江西之義甯州辦團各有成效兩省奏

牘亦常言之以本地之捐款練本地之壯丁屢與粵賊接仗殲
斃匪黨甚多故該二州縣爲賊所深恨亦爲賊所甚畏也去年
義甯州屢獲勝仗捐款甚鉅事後論功陳啟邁開單保奏出力
者不得保捐貲者不得保所保者多各署官親幕友陳啟邁署
中幕友陳心齋亦得保升知縣義甯州紳民怨聲沸騰在省城
張貼揭帖謂保舉不公團練解體賊若再來該州民斷不捐錢
亦不堵賊等語陳啟邁不知悛悔悍然罔顧迨四月間賊匪攻
圍州城該州牧葉濟英疊次稟請救援陳啟邁亦不撥兵往救
困守二十餘日州城果陷逆匪素恨團練殺戮至數萬之多百
姓皆切齒於巡撫保舉之不公致團散而罹此慘禍也去年四

月塔齊布在湘潭大戰獲勝餘賊由靖港下竄岳州其敗殘零
匪由醴陵竄至江西萍鄉萬載等縣並皆失守萬載縣知縣李
皓棄城逃走鄉民彭才三等或以馬送賊或以米餽賊冀得免
其劫掠賊過之後舉人彭壽頤倡首團練糾集六區合爲一團
刊刻條規呈明縣令李皓批准照辦乃彭才三愚而多詐謂餽
賊可以免禍謂團練反以忤賊抗不入團亦不捐貲遂將團局
攪散反誣告彭壽頤一家豺狼恐釀逆案等語縣令李皓受彭
才三之賄亦袒庇彭才三而誣陷彭壽頤朦混通稟該舉人彭
壽頤恨己以剛正而遭誣以辦團而獲咎遂發憤訐告李皓棄
城逃走彭才三餽賊阻團控訴各衙門袁州府知府紹德深以

彭壽頤之練團爲是彭才三之餽賊爲非嚴批將李皓申飭巡撫陳啟邁批詞含糊不剖是非興訟半年案懸未結今年正月臣至江西省城彭壽頤前來告狀臣以軍務重大不暇兼理詞訟置不批發而觀其所刊團練章程條理精密切實可行傳見其人才識卓越慷慨有殺賊之志因與陳啟邁面商言彭壽頤之才可用其訟事無關緊要擬卽帶至軍營效用兩次咨商陳啟邁堅僻不悟不特不爲彭壽頤伸理冤曲反以其辦團爲咎不特以其辦團爲咎又欲消弭縣令棄城逃走之案而坐彭壽頤以誣告之罪顛倒黑白令人髮指自粵匪肆逆所過殘破府縣城池動輒淪陷守土官不能申明大義與城存亡按律治罪

原無可寬各省督撫因失守地方太多通融辦理寬減處分亦常邀

諭旨允准卽以本年江西而論饒州廣信兩府失守鄱陽興安等縣失守陳啟邁通融入奏寬減府縣各守令之處分均蒙諭旨允准此係一時權宜之計

朝廷法外之仁並非謂守土者無以身殉城之責也該縣令李皓棄城逃走陳啟邁能奏參治罪固屬正辦卽欲寬減其處分亦未始不可通融入奏乃存一見好屬員之心多方徇庇反欲坐彭壽頤誣告之罪此則紀綱大壞臣國藩所爲反覆思之而不能平也鄉民劫於粵匪之兇威或不敢薙髮或不敢練團或

餽送財物求免擄掠名曰納貢此亦各省各鄉所常有其甘心從賊者重辦可也其愚懦無知者輕辦可也不辦亦可也彭才三以財物餽賊既經告發陳啟邁自應酌量懲治何得反坐彭壽頤以誣告之罪使奸民得志烈士灰心頃於五月二十九日陳啟邁飭令臬司惲光宸嚴訊勒令舉人彭壽頤出具誣告悔結該舉人不從嚴加刑責酷暑入獄百端凌虐並將褫革參辦在陳啟邁之心不過爲屬員李皓免失守之處分耳至於釀成冤獄刑虐紳士大拂輿情卽陳啟邁之初意亦不自知其至此臬司惲光宸不問事之曲直橫責辦團之搢紳以伺奉上司之喜怒亦屬諂媚無恥方今賊氛猶熾全賴團練一法以紳輔官

以民殺賊庶可佐兵力之不足今義甯之團旣以保舉不公而毀之萬載之團又以訟獄顛倒而毀之江西團練安得再有起色至於殘破府縣縱不能督辦團練亦須有守令蒞任以撫恤難民而清查土匪乃臣駐紮南康兩月陳啟邁并不派員來城署理南康府縣之任斯亦紀綱廢弛之一端也臣與陳啟邁同鄉同年同官翰林向無嫌隙在京師時見其供職勤慎自共事數月觀其顛倒錯謬迴改平日之常度以致軍務紛亂物論沸騰實非微臣意料之所及目下東南賊勢江西湖南最爲喫重封疆大吏關係非輕臣旣確有所見深恐貽誤全局不敢不瑣敘諸事瀆陳於

聖主之前伏惟

宸衷獨斷權衡至當非

臣下所敢妄測所有江西巡撫陳啟邁

劣跡較多恐誤大局緣由恭摺縷晰具奏伏乞

皇上聖鑒訓示施行謹

奏

潯城水陸兩軍接仗情形摺

咸豐五年七月初六日

奏爲潯城陸兵開仗獲勝水軍在徐家埠獲勝一次湖口小挫一次恭摺馳奏仰祈

聖鑒事竊水師前在姑塘獲勝奪回坐船業經奏明在案六月十一日據探潯城逆匪在於新垵添築礮台龍開河泊有賊船四百餘隻臣塔齊布於十二日輕騎前往查看地方新垵之東爲甘棠湖西爲龍開河中間隄塍約寬箭餘該逆於新垵街口堅砌石卡添修礮台卡外濠溝二道寬約丈餘中引湖水注之十三日飭令升用副將周鳳山等分帶道勇新田勇明攻東門爲聲彼擊此之法各營兵勇掩旂息鼓於四更時急赴西路以

攻新垣飭九江鎮居隆阿等伏兵於三川嶺之左候補守備長
春等伏兵於三川嶺之右臣塔齊布率參將彭三元阿達春等
攜帶板片搭造浮橋搶過濠溝時已五鼓我軍一面搖折卡外
木椿一面拋擲火彈延燒賊船二隻賊眾驚覺紛紛抗拒攻未
片時城中之賊隨亦擁出約二千餘人我軍開放連環鎗礮斃
賊雖多該逆因恃水陸併拒殊無怯意天已將曉臣塔齊布以
我軍在於一線隄塍分攻水陸用力過苦陸賊恃卡死抗賊船
更番來迎彼逸我勞勢難取勝因令兵勇佯爲退走該逆見我
軍無多出卡追襲我軍且戰且走誘過濠溝二道地面稍寬遂
令嶺左伏兵起抄賊尾嶺右伏兵同時並起佯退之兵回旗轉

戰鎗礮齊施短兵夾擊賊眾大潰隄隘賊黨擁擠爲濠所阻約計擊斃三百餘名墜濠溺湖者甚多爭舟情急覆船三隻溺水之賊約近百人升用副將玉山都司畢金科等先攜大礮伏於龍開河上之水府廟比見逆船退出連礮環轟亦斃數賊彭三元阿達春等見水陸之賊均已披靡乘勝撲卡卡內賊礮子密如雨彭三元右胸受傷阿達春子傷左臂天氣酷熱均未晨餐隨傳令收隊將生擒之賊十三名就地挖目凌遲查點我軍陣亡四名受傷二十餘人撫標儘先守備黃明魁提標外委李芳祥均因撲卡傷亡其周鳳山等攻東門之賊相持四時亦於午刻收隊此十三日潯城陸兵大獲勝仗之實在情形也

奏稿卷五

三

國藩駐紮南康兩月有餘下游湖口之賊礮船甚多上游都昌之賊雖無礮船而所擄民船小划動逾百數亦常有侵襲老營上下夾攻之患曾於四月二十二五月初八等日派船前往都昌搜洗賊舟均經奏明在案特以東岸無陸兵故陸賊添擄划船終難淨盡都昌之下有徐家埠去湖口六十里爲僞監軍姜萬祥盤踞之所催民納貢誅求極酷上游馬家堰有小河直達徐家埠爲各處奸民與賊通商之路六月十二日臣國藩派令水師中營賀虎臣酌帶長龍三板二十號千總李逢春帶小划四十號前往徐家埠搜洗賊巢並派試用知縣李錕帶陸勇四百會剿十三日寅刻賀虎臣等由馬家堰駛入小河所過木橋

賊卡拆毀六座已刻到埠該逆以河身淺窄我軍船難於轉旋
卽出陸賊三百人前來抗拒李逢春帶水勇登陸迎勦賀虎臣
繼之排鎗轟擊斃賊二人賊眾紛紛奔潰我軍一面追逐一面
燒燬河下賊船逐北數里李錕所帶陸勇亦至乘勝窮追傷斃
賊匪十餘人生擒七人焚燬偽監軍衙署一所守棚望樓數座
偽聖糧館五處焚燒賊船八十餘隻水陸屯聚賊糧數千石盡
數燒燬奪獲旗幟軍械無算次日仍渡湖回南康大營此十三
日搜洗徐家埠賊巢水陸獲勝之實在情形也水師前幫自進
紫青山以後本擬俟陸勇東渡會合進勦六月十五日各營派
二十餘船前往湖口探看賊營形勢弁勇冒險貪功衝出梅家

洲賊卡卡外賊船與卡內湖汊賊船齊出我軍二十餘船三面被圍續到二十餘船亦尙單弱賊眾我寡鏖戰兩時適值南風大作不能駛回被賊圍去長龍一號三板三號千總洪建勛把總李文田同時陣亡勇目五十餘人有被擄遇害者有鳧水逃歸者姑塘大隊前往救應該逆始畏怯反奔日暮收隊仍泊青山此十五日弁勇衝出湖口賊卡開仗小挫之實在情形也查水師自至南康以來與湖口悍賊四次接仗兩勝兩挫論船礮之精戰陣之法官軍實遠勝於賊特該逆水戰兩岸皆有陸賊護之我軍兩岸皆無陸兵水營孤立終不宜冒險出卡致涉疏虞陸軍儘先守備黃明魁屢次打仗奮不顧身去歲岳州之

役僞秋官正丞相曾添養係其手刃此次力戰陣亡應請

飭部從優議卹水營藍翎千總洪建勛把總李文田五月兩次
血戰獲勝均擬開單奏保此次衝鋒陣亡均請

飭部從優議卹其餘傷亡弁勇查明照例辦理所有近日水陸
接仗情形謹繕摺由驛馳奏伏乞

皇上聖鑒訓示施行謹

奏

擬移潯軍會剿湖口片

咸豐五年七月初六日

再臣國藩塔齊布自正月一別不相見者半年六月二十七日約會於青山言及頓兵江境老師糜餉上負

主恩下失民望兩人愧憤交集哽咽難言刻下潯城之賊時多時少臣塔齊布之師若分剿他處則恐大營單薄反爲逆賊所乘若合聚一處則五千之眾久無成功日對堅城徒深焦灼而湖口水軍無陸兵以護之彼此俱不能得手羅澤南進攻義甯是否仍能折回湖口正未可知不得不思所變計以求有濟於大局擬於七月以內臣塔齊布移至青山渡湖之東會剿湖口如能攻破此關全局固有轉機卽不能遽破亦當由彭澤而下

直趨建德東流以期與下游池太之師聯爲一片是亦大局轉

旋之一策也是否有當伏乞

聖慈指授機宜俾有遵循附片具奏請

旨

萬啟琛畱辦餉鹽局片

咸豐五年七月初六日

再新選湖北督糧道萬啟琛上年隨同在籍刑部侍郎臣黃贊湯勸捐礮船軍餉最爲出力曾經奏奉

恩旨交部議敘本年三月臣國藩奏請借行浙引撥鹽抵餉

萬啟琛協理西省鹽運事件旋經戶部議覆奉

旨允准亦在案茲接據部文萬啟琛新選湖北督糧道例應
赴新任惟查浙鹽充餉事屬創舉該道廉明詳慎辦理易於
緒欲改行奏派一時實乏得力之員相應請

旨勅下吏部查照畱萬啟琛在樟樹鎮總局協理鹽餉事件暫
緩赴湖北糧道之任謹會同侍郎臣黃贊湯附片奏

聞謹

奏

PL
2728
A1
1876
Y.9

曾文正公奏稿

卷之六目錄

提督塔齊布因病出缺摺

咸豐五年七月二十四日



潯軍兩獲勝仗片

水陸三路均獲勝仗片

八月初七日

攻剿義甯克復州城摺

全日

水陸進攻湖口獲勝摺

八月二十一日

湖口陸營迭勝水師小挫摺

全日

派羅澤南一軍由崇通回剿武漢摺

派周鳳山接統潯軍片

派員護送塔齊布靈柩片

彙報何桂珍在江北勝仗摺

全日

請令何桂珍辦楚皖團練片

克復廣信等案保獎摺

九月初五日

請催浙江協餉片

請令羅澤南奏報軍情片

師久無功自請嚴議片

羅澤南軍克復通城縣摺

九月二十二日

鄂軍由胡林翼轉奏片

遵保堪勝總兵人員摺

全日

羅澤南分剿崇陽彭三元陣亡摺

十月二十日

彭三元童添雲附祀塔祠片

謝補授兵部侍郎

恩摺

全日

謝寬免嚴議

恩摺

十一月二十一日

九江湖口水陸接仗情形摺

全日

新昌萬載逆匪攻陷瑞州臨江摺

全日

九江湖口水陸勝仗摺

十二月十二日

李錕劉希洛請

贈卹片

報周鳳山軍克樟樹片

水陸會克樟樹鎮及新淦縣摺

十二月十九日

彙保義甯湖口兩案摺

全日

湖南提督塔齊布因病出缺摺

咸豐五年七月二十四日

奏爲湖南提督塔齊布因病出缺

微臣

馳赴九江大營料理喪

事兼統陸軍恭摺馳奏仰祈

聖鑒事竊

臣

與提

臣

塔齊布

六月

二十七日

在青山

地方會晤

言及潯城

未破頓兵

已久憤恨

同深

微臣

之意謂宜

移師東渡

會剿湖口

掃蕩東流

建德一帶

長驅直下

期與下游

蕪湖之師

會合塔齊

布之意謂

自六月以

來攻城之

具增置完

備七月以

內卽行大

舉攻剿誓

當力破此

城以雪積

憤如環攻

不破七月

底再行移

師東渡商

酌已定曾

於七月初

六日附片

具奏在案

其後塔齊

布益廣置

攻具備雲

梯數百布

袋四千紮

草人以緣

城結竹筏以渡水各營弁勇皆自備攢牌竹盞之屬無一不齊

專俟月黑陰雨之夜大舉攻城臣在南康亦派平江勇三千餘

人渡湖之東攻勦湖口訂期十五以後兩城同攻水陸並進不

料七月十八夜潯城陸營專弁飛報南康言塔齊布於辰刻傳

令出隊攻城尙未出營陡患氣脫之症昏迷不醒竟於午刻

病出缺臣聞信之下不勝悲愕伏查提臣塔齊布純誠報

國忠勇絕倫自其爲都司時毅然有殺賊立功之志上年蒙

恩超擢提督出師岳州途次於左臂涅刺忠心報

國四字每戰匹馬當先麾下士卒附從輒麾之使後不令出已

之前或他營被賊圍困輒躍馬馳往救援凡相度戰地及察看

賊營情形嘗以單騎清晨獨往不使將士得知屢被賊眾狙伺追逼從容禦之臣以不宜冒險迭次勸阻諸將亦日日諫止而塔齊布氣吞凶逆不爲怯懼屢瀕危險常有奇緣得免於難湘潭之戰被賊圍攻縱身越牆得脫崇陽黃梅兩次受傷均以麾下易馬扶去得脫小池口之戰羣賊曳其馬尾揮刀斫之卒能縱橫衝突轉敗爲功賊中驚以爲神而該提督雍容恬退未嘗一語自伐其能宅心仁厚所得薪水銀兩盡以犒賞士卒或深夜呼兵勇與之絮語家事親如父子洪山之戰圍逼賊眾溺水其中幼孩甚多塔齊布大哭立即傳令不殺幼孩救出數百人資送回籍紀律嚴明不許兵勇騷擾民間有違犯者秋毫必懲

身歿之後軍士百姓同聲悲泣不獨臣軍失此名將大損聲威

卽東南眾望所推亦均恃爲長城之倚遠近官紳並深驚悼臣

於十九日馳赴九江陸營照料該提督喪事二十一日丑刻送

其靈柩出營派副將玉山守備長春提標撫標官兵三百五十

名護送至江西省城臣卽暫駐潯城統領陸兵拊循士卒保此

勁旅仰慰

宸廑惟念提臣塔齊布出師二年日夜憂勞賁志長逝並無子

嗣家世清貧上有老母其兄弟三人季弟去年陣亡合無仰懇

天恩交部從優議卹湘潭岳州之戰保全湖南爲功甚鉅籲懇

天恩準於湖南省城建立專祠以慰忠魂而洽民望其湖南提

督遺缺請

旨迅賜簡放以重職守所有提

臣塔齊布因病出缺

微臣馳

九江料理喪事兼統陸軍各緣由恭摺由驛馳奏伏乞

皇上聖鑒訓示施行謹

奏

潯軍兩獲勝仗片

咸豐五年七月二十四日

再臣至九江陸營因士氣傷沮恐賊匪探知前來撲營嚴飭各營加意防守二十一日丑刻將塔齊布靈觀送出數里卽歸營大加操演會操甫畢該匪自西門出隊搦戰臣派廣東羅定協副將周鳳山統領全軍督率將弁出隊迎敵都司岳炳榮率辰勇由東路前進周鳳山率道勇督戰鎗礮之後繼以刀矛該逆敗退我軍追至新垠傷斃賊匪六七十人逼溺湖水者十餘人攀登賊船各勇追擊沈船二隻未刻收隊查點我軍陣亡一人受傷十餘人幸獲全勝二十四早各將官告請奮勇大舉攻城銳氣百倍已緣登矣該逆擲燒全桶火藥礮子瓦石如雨傷

數十人雖未克攻破潯城而將士忠憤有爲殊屬難得當統軍
新易人心危疑之際得此二仗此支勁旅可無渙散之虞足以
仰慰

宸廑謹附片奏

聞

水陸三路均獲勝仗片

咸豐五年七月二十四日

再前據甯紹台道羅澤南具稟七月初八日在義甯州之梁口
大獲勝仗又據游擊蕭捷三等稟七月十四日水師在鞋山大
獲勝仗尙未具奏臣卽於十九日前來九江陸營旋於二十二
三等曰疊據羅澤南稟稱十三日在乾坑大戰十四日在鼇嶺
大戰十五日在城西大戰均獲全勝十六日克復義甯州城又
疊據統帶平江勇之李元度等稟稱攻勦湖口之師十五日在
徐家埠接仗獲勝十八日在文橋接仗獲勝二十一日在蘇官
渡大戰獲勝各等因前來當名將新失之際而事機甚爲順利
仰託

皇上威福庇蔭臣軍聲威尙足自振除將水陸三路屢次獲勝
情形續行詳敘奏報外謹附片先行具奏仰慰

聖懷謹

奏

攻勦義甯克復州城摺

咸豐五年八月初七日

奏爲攻勦義甯疊獲大勝克復州城恭摺馳奏仰祈

聖鑒事竊義甯州城被賊攻陷都司吳錫光陣亡江省震動飛調甯紹台道羅澤南統帶全軍馳往勦辦業經奏明在案嗣據羅澤南疊次稟報該道於六月二十四日自江省起程七月初五日駐營義甯州之梁口地方訪明州城形勢及進兵之路擬由四都高鄉迂道五十里攻州西門初八日辰刻突報州城賊匪由梅嶺來撲該道督同安慶府知府李續賓候選縣丞蔣益澧登山瞭望見賊七八千人屯聚抱子石之下忽分兩支一支循修江南岸而下約四五千入旌旗蔽野漸偪營前分作三路

排列岡阜一支循左路山岡而下約三千餘人潛行林閒掩旂
息鼓以鈔我營之後其旗幟多係所奪州城兵勇之物假冒團
練冀混官兵其後路之埋伏者復不一而足該道等辨認清晰
飭李續賓帶湘勇右營候選知縣唐訓方率訓字營三哨從營
後繞出山阜爲奇兵而擊循山之賊又令訓字營二哨埋伏山
阿以備策應該道親率湘勇中營蔣益澧率左營排列營前爲
正兵以擊沿江之賊部署既定按兵不動示之以弱相持一時
知賊氣已竭中營左營始揚旗振鼓大呼而進擊斃騎馬悍賊
十餘名賊敗右營及訓字營三哨悄悄從山後繞出橫衝直突此
路之賊原冀鈔我之尾不料我兵反抄其後擊斃長髮悍賊八

九名此股亦敗我軍奮力追殺莫不一可當百共計各路斃賊七八百名屍填載道賊之沿江而逃者忽爲我軍繞前截住偏賊馮河而渡水深浪急溺斃無數追逐二十里前值一溪羣賊爭渡並拆斷橋板以阻我師因未午餐始令收隊生擒三十餘名奪獲旗械子藥無算時候補知府林懋勳帶勇駐紮對河之三都山上聞賊攻梁口營盤亦率所部及團勇循三都北岸而上賊之浮江而過者悉爲林懋勳兵勇阻截殺斃多名此初八日賊來梁口撲營迎勦獲勝之實在情形也十一日由梁口拔營迂道四都十二夜駐高山之棋盤嶺查該處入州有二道一經杭口攻州城之西門擺爲正道惟倚崖瀕水勢難並進一經

乾坑度小南嶺鼇嶺攻州城之西門坑爲閒道南鼇二嶺各高二里許從萬山中盤旋而入羊腸鳥道人皆視爲畏途該道探聞小南嶺尙無賊踞親率敢勇百人同該州舉人李炎攜土人爲嚮導登小南嶺瞭望形勢鼇嶺雖高其上猶可駐營賊據之則杭口一路可以詭道橫截我據之則俯瞰州城居高臨下且我師不度南嶺而自四都以達棋盤嶺已有由杭口直搗州西之勢賊必注意杭口而忽視鼇嶺則鼇嶺可以乘虛而入因與李續賓等定計由鼇嶺進發十三日巳刻飭中右兩營前進輜重居中左營訓字營居後時聞賊來杭口者甚眾知必乘我之後密諭管帶左營蔣益澧待輜重盡行卽整隊緊守乾坑隘口

賊來雖多但守此隘必不敢與我敵卽小路之通杭口者守此亦足以禦之復飭知州銜候選知縣李杏春候選從九蕭積仰與蔣益澧相爲援應該道與李續賓前進掩旂度小南嶺從樹林中登鼇嶺守嶺之賊不料我之猝至酣臥亭上驟見旂開紛然四竄我兵奮勇而上斃賊百餘名疾據其巔該道方籌度營基喜我之得據要地也忽報賊果由杭口來撲追至乾坑以大股偏坑之左精悍搗坑之右又以賊二千人由小路踞乾坑山脊以臨之蔣益澧已先駐乾坑隘口旗幟閒雜林中賊莫測其虛實唐訓方率訓字營登山以禦小路之賊蕭積仰率左營後哨助之蔣益澧率左右兩哨當先奮擊先敗坑右之賊其小路

之賊亦爲唐訓方蕭積仰衝敗賊之精銳在此兩股故中路賊雖眾而不敢前李杏春乃率左營前哨衝出中路賊亦敗諸勇乘勝跟追賊屢拒屢卻斃賊六百餘人屍遍山谷生擒二十餘人該道在鼇嶺聞報馳回救援迨至棋盤嶺見蔣益澧等已獲勝收隊遂率各營同駐鼇嶺此十三日移營鼇嶺後隊在乾坑接仗大獲勝仗之實在情形也鼇嶺距州城僅七里南面高踰四五里左爲南嶺大山蜿蜒而至城北之鳳凰山爲州城之主峯右爲雞鳴峯其下卽西門擺城外菁華之所聚也蔣益澧駐嶺左防鳳凰山一路唐訓方駐嶺右防雞鳴峯一路鼇嶺中支峯上峻下平可以四應該道率中營駐之其次嶺長而脊瘦僅

足搭一二棚李續賓率右營駐之陣如長蛇又前一峯高而銳與鳳凰山相埒搭望樓其上賊之來蹤莫能隱遁左右有坑坑深莫測由嶺踰坑一升一降約二十餘里鳥道蠶叢險踰蜀道大軍駐此賊來攻我甚難我攻州城之賊則有建瓴之勢十四日辰刻方擬進擣州城詎意城內賊約數萬人五更出隊分五路而來一從鳳凰山直抵南嶺大山欲撲我左營一從西門擺踞雞鳴峯與左路鳳凰山之賊如張兩翼其中路由西門坑來者則分三路一由兩坑之會合處跨嶺而上直抵望樓之前搖旗放鎗以號召兩翼之賊一從坑左大路而上多係精銳直抵中右兩營之左一埋伏坑右樹林中冀攻中右兩營之右布置

周密該道與李續賓登高審視飭唐訓方攻右路蔣益澧攻左
路別分數哨擊右坑之賊登雞鳴峯分路以截右賊之尾又分
數哨擊左坑之賊依鳳凰山以截左賊之尾飭右營前中二哨
踞銳峯以擊望樓下之賊部署既定嚴飭不可躁進必俟各路
賊已逼近然後分路迎剿時中路之賊見我兵伏營不出搖旗
呐喊愈逼愈前左坑賊亦拋擲火箭火毬已及營盤諸勇乃整
隊大呼而出賊抵敵不住回旗奔走我軍截之斃賊數百望樓
下之賊亦爲亂石所擊蜂擁而退墜崖死者以數百計乘勝追
之兩路之賊卓旗於兩坑會合處計誘我兵前進不料復爲我
所襲上下夾擊諸賊無路可逃攀緣絕壁登而復墜及藏匿叢

莽閒者皆爲我兵搜殺約千餘人屍填溪澗水爲之赤該道中路之兵旣已獲勝擬循鳳凰山麓徑攻州城因聞雞鳴山諸賊未潰懼乘我後中路兵遂先收隊其左路之賊依鳳凰山而來者見左坑賊敗我兵窮追欲循山而下以橫截之而左坑之敗賊數百先奮躍登山冀與左路會合併力堵禦見左坑跟追之勇亦捫石扳藤牽連而上賊不能走蔣益澧復率諸勇由南山大嶺橫過直偪賊前奮力相殺又得左坑之勇自下而上以截殺之賊遂望鳳凰山返奔我勇追殺斃賊近千許餘悉逃入州城其右路之賊排列於雞鳴山者見各路賊敗諸勇窮追不敢回城惟踞峯巔以待此峯極峭我兵不能仰攻以十數人誘之

賊乃循崖而下徐度數峯冀撲訓字營唐訓方率勇奮力迎殺賊以火毬亂石傷我兵數人諸勇仍前奮力殺斃悍賊數十人賊敗疾登峯頂諸勇猱升而上思尋閒道以分鈔之賊畏包裹反從峯側以走諸勇更出峯上賊氣益餒墜死峭壁者數百人我兵復從雞鳴峯下循脊而上分道鈔之李續賓亦由雞鳴峯左繞道截之賊無一脫者殺斃跌斃者無數未刻收隊殺賊之多未有如此役者數路共計斃賊約五六千人生擒二百七十餘名中多長髮老賊奪大小旗四百餘面馬十餘匹此十四日鼇嶺數路分剿大獲勝仗之實在情形也該道等既有此大勝欲熟審形勢進攻州城十五日午後飭蔣益澧率勇登營左之

鳳凰山一帶觀州城東北之路唐訓方率勇登營右之雞鳴山
一帶觀州城西門擺之路該道與李續賓由西門坑審視復分
登左右各山以望之正擬歸營不意賊疑搆戰遽出大隊以數
千人立鳳凰山巔擲木滾石阻我左路以數千人聚西門擺山
坡揚旂放鎗阻我右路其中路之西門坑於兩山交互處設卡
三重橫跨溪上各高丈餘外砌木石內灌土砂密排礮眼以萬
餘人守之我師突與相遇見日色將晡進退未決各營踴躍請
戰遂乘賊隊未整急以擡鎗橫排卡外連環施放輕捷者援兩
岸之峭壁以擊之賊不料我速進氣爲之奪所設堵卡皆一呼
而破死於火器刀矛者以數百計乘勝追至西門城根將江邊

賊壘悉數焚燒左路鳳凰山之賊見中路諸卡已破不能自持紛紛下竄諸勇奮臨其巔乘勝追殺賊墮崖死者數百人山上賊營立時焚盡右路雞鳴峯諸勇見兩路並進亦揚旗直下訓字營繼之賊之被截殺者不下三百人西門擺所設望台木城一時灰燼火光四起賊無路可歸浮沈修江中者以千餘計城中之賊閉門死拒先是南贛鎮總兵劉開泰帶兵分勦修江之南岸十三日由黃沙橋移營湘洲已南商該道約期南北夾攻是日正欲收隊忽聞南岸礮聲震天火箭噴筒交加豬婆灘諸賊營相繼火起知劉開泰之兵已至急遣親兵相與定約於十六日五更出隊劉開泰統帶各弁兵由南岸渡河該道督飭李

續賓帶湘勇右營自雞鳴峯攻西門唐訓方率訓字營蔣益澧率湘勇左營攻北門該道親率湘勇中營攻東門又知府林懋勳先守南嶺彭姑要隘防賊東竄十五日亦自南嶺赴州隨同攻勦諸兵勇不顧礮石四面圍攻或乘梯而登或肉薄而上登時克復州城殺斃長髮賊千餘名生擒三百餘人訊明正法義甯被虜之民七八千人審明釋放奪獲僞書僞印器械無算敗匪乘夜散入各鄉多爲團練格殺或送營正法此十五十六等日進攻獲勝會同南岸官兵克復州城之實在情形也餘匪由杭口一帶潛逃現已督飭兵勇嚴行追捕等情前來臣伏查義甯居萬山之中形勢險阻地連湖北湖南一隅不靖三省戒嚴

自逆賊攻陷憑險負固日聚日眾茲幸迅速克捷江西湖南兩省肘腋之禍已紓而湖北崇通賊藪亦已聞風膽寒所有此次出力員弁實屬奮勇爭先出奇制勝除劉開泰一軍由江西撫臣另摺奏保外按察使銜甯紹台道羅澤南專善察看山勢迂道數十里力爭鼇嶺嬰隘殺賊之多與去年半壁山相等前此克復廣信府此次克復州城並關係數省大局爲功甚偉可否准加布政司銜出自天恩安慶府知府李續賓樸誠勇敢戰必身先應請交軍機處記名以道員請

旨簡放知州銜候選知縣李杏春候選知縣唐訓方均請以同

知直隸州不論雙單月卽選候補縣丞蔣益澧請以知縣補用並加同知銜其餘出力人員容俟詳查開單請獎陣亡弁勇查明分別辦理所有攻勦義甯疊獲勝仗克復州城緣由恭摺由驛馳奏伏乞

皇上聖鑒訓示施行謹

奏

奏稿卷六

水陸進攻湖口獲勝摺

咸豐五年八月初七日

奏爲水陸兩軍進攻湖口疊獲勝仗已入縣城湖內賊船焚燒將盡恭摺具奏仰祈

聖鑒事竊鄱湖水師未能攻破湖口一關必須東岸有陸兵夾攻乃能得手疊經奏明在案七月十四日賊船數十號由鞋山分兩路來撲我青山水營蕭捷三等佯爲弗知堅泊不動該匪東岸各船直趨沙灣欲截我軍上流其西路一股已抵青山礮子落我船頭我軍排成一字仍堅泊不動直待賊船逼近我船百餘號一齊起旋眾礮同轟併力圍鈔轟沈該逆舢板三隻燔燒二隻賊敗捩舵回奔各營擊鼓揮旗追近鞋山賊忽回頭抵

敵我軍追擊在前者停槳少待復整全陣轟沈賊船二隻追至
阜湖又圍截賊船二隻直追至上鍾山凡四十里因逼賊巢日
暮收隊生擒賊十五名奪礮七尊旗幟刀矛多件此十四日水
師在鞋山接仗獲勝之實在情形也陸軍欲攻湖口必由徐家
埠文橋蘇官渡等處節節攻破賊卡乃可規復湖口七月十四
日候選同知李元度江西候補知縣李錕劉希洛等帶平江勇
三千餘名由南康渡湖十五日行至段家鋪三道齊進李錕繞
出賊前斷賊歸路該匪踰嶺奔逃殲斃五名生擒三名搜拏僞
監軍旅帥等十一名訊明正法奪獲黃旗刀矛百餘件十九日
李元度進至文橋聞僞總制劉得勝僞指揮張立旺與徐家埠

敗賊皆聚於此李錕彭斯舉胡蓋南吳齊源等分作四路包鈔該逆開礮轟拒我軍併力衝入斃賊百四十餘人生擒僞總制劉得勝等十一名凌遲梟示奪獲賊械尤眾二十一日進攻蘇官渡中途探知湖口逆首僞承宣胡鼎文親率悍賊千人來撲我軍三路迎勦行至曹均橋見賊馬三十餘匹駐阜瞭望彭斯舉卽令開礮先斃一賊又殲大旗賊四名哨官丁峻李慶雲飛馬衝隊手刃二人各勇殲斃三十餘人該逆退奔四五里仍駐山坡卓旗搦戰彭斯舉丁峻等追及鎗礮齊施鏖戰一時陣斬騎馬賊目僞總制蘇秀成僞旅帥杜得勝等五名斃賊百四五十名該逆復退奔五里至蘇官渡過埧復駐山岡卓旗搦戰李

錕劉希洛各揮勇衝殺哨官李錫發併力馳擊追至三家市陣
斬穿黃馬褂賊一名又斃賊百五六十名尸橫道左是日該逆
三次卓旗駐隊三次敗北共追奔二十里斃賊三百餘名奪獲
賊盔旗幟器械無數此陸軍由徐家埠進攻文橋蘇官渡三戰
獲勝之實在情形也二十三日李元度等拔營直趨湖口劉希
洛攻大嶺段瑩器繼之彭斯舉攻黃土嶺李錕攻小嶺胡蓋南
居後策應三路並進由大嶺入者各哨爭先鼓勇踰越險隘殺
斃守卡賊二十餘名遂乘勝入城其由小嶺入者至西門外於
陷坑內見賊埋伏大礮遂躍坑而過奪其礮位並將守門悍賊
立時斫殺由黃土嶺而入者亦將守險之賊擊斃十餘人餘眾

潰散我軍一擁齊登立破馬房嶺賊營一座拋擲火毬斃賊無算餘賊覓船逃竄我軍追殺直抵湖壩賊舟用礮回擊傷我弁勇數十人我軍抵死不退用擡礮轟斃入船之賊多名其城內賊營溝寬丈餘鎗礮猛烈各勇從礮煙中一躍而進踏毀營牆斃賊及蹂踐死者三百餘人隨將城內火藥局礮局糧局一概焚燒煙焰蔽天我軍旣入湖城踏平賊營二座勇氣百倍惟瀕湖下鐘山賊壘尙存牆極堅固地尤險峻中藏悍賊千餘我軍大呼躍近連擲火毬該逆亦以礮石火彈相擊拒戰數時殺賊百餘人我軍傷亡數十人是日水師各營亦抵湖口北風甚勁浪立如山遙見陸兵已臨城下皆奮勇直進兩岸賊船向前迎

敵我軍開礮轟擊逾時賊堅持不退我船輪番出隊衝過賊艘夾擊圍攻突進者數次後營營官都司蕭捷三見賊兇悍揮旗大呼陷陣諸船隨之並進意欲乘勝直下不料下鐘山及梅家洲兩岸賊牆排礮齊發蕭捷三中礮陣亡我軍雖折一將各營尤奮力向前戰逾數時逆船不敢抵敵退紮賊牆之下憑險負固水陸死守環而攻之不能得手適後營長龍船失火賊意我軍慌亂蜂擁而來各營喜賊舟出巢趁勢衝入千礮齊發羣槳如飛頃刻之間衝出賊卡駛至大江之外賊敗船亂或逃出八里江或竄入扁擔夾或回泊下鐘巖賊牆之下我軍環攻賊舟近前拋擲火彈將下鐘巖賊礮船二十五隻立時燔爲灰燼其

民船裝載火藥者亦皆燬滅煙薄重霄又分軍追八里江之賊
逐北二十里薄晚水軍泊梅家洲陸軍遂宿城內之月台山通
夕猶數出隊驚擾賊營二十四日陸軍舁銅礮數尊對下鐘山
賊牆轟放賊情窘迫突開南門出數百人登山劫礮我軍圍殺
六賊各勇預持草把擬填壕破卡賊忽以二股出禦又殺其數
人始退我軍追近賊壘亦爲逆礮所傷是日水師見八里江賊
船十餘隻上駛復衝出卡外追燒賊船三隻紮泊八里江此水
陸兩軍會攻湖口直入縣城蹋毀賊營焚燒湖口賊船之實在
情形也二十五日李元度等以下鐘山賊卡急難攻克我師接
戰兩日一夜精力已疲遂仍紮離縣十二里之蘇官渡水軍復

出卡外游繹見八里江僅有賊船聞礮卽遁莫由追剿因亦折
回分泊青山螺絲港等處臣在九江陸營聞湖口開仗蕭捷三
陣亡卽親帶陸勇四百名馳抵青山據水陸各營陸續稟報前
來伏查該逆久踞湖口恃有下鐘山與梅家洲對峙據險築卡
堅如石城水軍經過輒爲叢礮所擊莫敢逼近日下陸軍雖入
縣城水軍雖衝出大江而兩岸賊牆未破必須厚添勁旅先奪
下鐘山之卡使梅家洲賊卡勢成孤立然後水師紮出外江乃
操勝算現復籌添陸兵前往助剿惟此次殺賊千餘名受傷弁
勇至二三百名之多實屬勇敢出力籲懇

皇上天恩容

臣

擇尤保敘以示鼓勵水師營官游擊銜湖南都

司蕭捷三去年在外江力戰數十次沈毅摯勇中礮殞命使臣
頓失指臂之助深堪憫惻本年在內湖打仗屢勝日夜以攻破
湖口肅清江面中段爲念忠憤內蘊疊擬超保副將尙未出奏
可否

飭部照副將例議卹出自

皇上逾格天恩陣亡弁勇俟查明另行辦理所有水陸兩軍進
攻湖口疊獲勝仗已入縣城燒燬湖內賊船緣由恭摺由驛馳
奏伏乞

皇上聖鑒訓示施行謹

奏

湖口陸營迭勝水師小挫摺

咸豐五年八月二十一日

奏爲水陸兩軍攻勦湖口陸勇疊戰獲勝水師小挫一次小勝一次恭摺具奏仰祈

聖鑒事竊七月二十三、四等日水陸兩軍會攻湖口連日血戰大勝已入縣城蹋破賊壘兩座湖內逆船焚燒將盡等情業經奏明在案二十七日聞賊由彭澤運來火藥船數隻並戰船十餘隻在流澌橋小河停泊李元度派令胡蓋南吳齊源帶勇焚勦賊見我軍驟至紛紛開駛我軍連放擡鎗斃賊數名復拋火毬焚其火藥船戰船數號二十八日探得離湖口五里之柘磯與八里江遙對有僞關一座係僞點聖庫黃賊把守征收船稅

屯匪數百名派從九彭斯舉等馳往勦辦該逆棄關上船逃竄
卽將僞關署及附近賊巢一併焚洗正欲收隊忽下鐘山賊壘
突出二三百人來援我軍整隊迎擊先刃悍賊一名餘匪敗退
後路之賊尙分數股鈔截彭斯舉先衝迎頭一股擒斬數名適
李錕劉希洛之勇亦分擊鈔後之賊殲斃多名是日蘇官渡亦
有賊撲老營別伏數百人於山凹塘坳之間李元度派兵先搜
其伏截賊歸路飭胡蓋南從蘇官渡過埧一擁而前呼聲震天
賊敗退至五里橋被我軍橫截殺賊百餘人追至大嶺與彭斯
舉之勇相合遂結隊而旋八月初三日探知安慶有賊千餘來
援湖口初四日辰刻有騎馬賊二十餘人帶賊數百來蘇官渡

搦戰黃旗蔽野我軍出隊逾時見賊已過埧距營百餘步其埋
伏山後者賊數尤夥密派吳齊源從間道鈔賊之後度其將至
然後以大隊過埧迎擊礮斃二賊餘眾稍卻我軍空壁馳入大
呼而進手刃大旂賊五名黃馬掛賊四名搜出偽印照知係偽
總制秦加訓及僞旅帥功勳等賊正敗走而接應之賊踵至拒
戰一時敗賊齊奔是日共殺賊三百餘人生擒十四名羅澤南
自義甯馳至南康僅帶親兵六十人臣飭其東渡湖口督率平
江勇痛加攻勦初八日約會水師併攻下鐘巖賊壘由黃土嶺
大嶺小嶺分三路並進經馬房嶺及舊城賊營二處前爲我軍
踏毀者已復爲賊所踞我軍分股搶登武生鍾輔朝等首先躍

入舊城連殺數賊匪眾潰退守下鐘山我軍登嶺焚其望樓遂
升月台山昇礮輪轟賊巢忽三百餘賊拚死衝出登山奪礮我
軍併力截擊手刃十餘賊賊敗退回各勇疾馳跟追已及下鐘
山營門將乘勢衝入賊閉門死拒門外尙有三十餘賊未得入
壁悉爲我勇殲斃此七月二十七八等日陸勇焚燒流澌橋賊
船柘磯僞關及八月初四初八等日接仗獲勝之實在情形也
初八日陸路約會水師併攻湖口後幫五營各船開赴湖口紮
泊上鐘山自二十三日水軍大勝賊船盡竄之後該逆僅賸三
十餘號是日又在九江添來十餘號分泊梅家洲兩岸午刻南
風大作賊船約五十號由兩岸衝上開礮齊轟抵敵逾時因風

急水流船勢直趨下游賊船進則包鈔我軍我船進則流入賊卡弁勇慌亂遂各捩舵回奔而賊船已乘勢上追各哨見賊逼近或推礮入湖鳧水而遁或擲火彈焚船登岸聞有殿後被賊圍困力戰捐軀者共失去長龍舳板二十一號初九日五鼓賊乘勝來撲我水軍前幫之泊青山者因一湖之隔不及救應後幫各營新敗之後通夕巡邏嚴陣以待賊至我船排列一字萬礮對轟一時之久賊揚帆返舵佯爲退卻我軍嚴立不動賊船果復回駛猛勇衝突我軍各礮飽食羣子愈擊愈奮鏖戰三時轟沈賊船二隻落水死者以百計始紛紛敗竄追逐四五里收隊此初八日水師因風順失利棄船及初九早接仗獲勝之實

在情形也據水陸各營先後稟報前來臣伏查湖口僅贖下鐘山及梅家洲二卡石牆堅固屢次血戰不能攻破惟有籌派勁旅再圖力勦至水師因風順失利棄船多隻貽誤事機去年靖港陳陵磯之敗均因南風太大不能收隊嗣後臣諄諄戒飭不許順風開仗乃各弁勇不能遵守教令致陷覆轍殊屬輕進該五營營官保升都司秦國祿已革翰林院編修吳嘉賓均撤去營官秦國祿失船較多並請旨卽行革職保升花翎都司孫昌國藍翎把總何啟長藍翎縣丞賀虎臣於次早賊匪撲營時尙能奮勉堵剿轟沈賊船保全老營應免其斥革均請

旨革去翎枝暫畱營官之任以觀後效其餘失事各哨分別審辦以示懲戒哨官葛惟柱五月十三三十等日屢戰獲勝擬保千總尙未出奏此次力戰捐軀請

旨照千總例

賜卹所有水陸兩軍攻勦湖口陸勇疊戰獲勝水師小挫一次小勝一次緣由恭摺由驛馳奏伏乞

皇上聖鑒訓示施行謹

奏

三

調派羅澤南一軍由崇通回剿武漢摺

咸豐十一年

五年八月二

奏爲調派羅澤南一軍由崇通一帶回剿武漢恭摺覆奏仰祈
聖鑒事咸豐五年七月二十四日准兵部火票遞到承准軍機
大臣字寄七月初一日奉

上諭駱秉章奏湖南鄰省賊氛四逼兵力不敷請飭調回湘勇
以資防剿一摺前因羅澤南一軍爲賊牽制未能卽歸九江諭
令曾國藩等俟義甯剿辦得手後卽將該道調回與該侍郎等
併力會剿茲據駱秉章奏稱兩廣之賊竄陷郴州東安等處永
州寶慶一帶處處緊急楚北之賊復窺伺平江等處又有黔匪
滋擾西路該省兵勇旣多調赴在外復須防剿黔粵楚北江西

五省之匪不敷分布必須羅澤南一軍折回湖南防剿自係實在情形惟昨據陳啟邁奏現籌調集兵勇進攻武甯已咨羅澤南等妥速攻剿該道能否卽折回湖南助剿之處著曾國藩等酌量現在情形妥籌分撥迅速具奏至江省軍務或先克九江或先將鄱湖賊船掃除仍著遵照前次諭旨迅籌剿辦將此由六百里加緊諭令知之欽此遵

旨寄信前來竊

臣

前於提

臣

塔齊布淪逝後卽飛

函至義甯令

羅澤南來營面商大局羅澤南得信由義甯之杭口直至南康

連日熟商剿辦事宜上而武漢下而湖口皆東南所必爭之地

湖口破則扼截長江之腰臂使安慶賊舟不能與湖廣相通武

漢破則雄據長江之上游使金陵賊巢百貨皆絕其來源而有日就窮蹙之勢故論古來爭關奪要之道則湖口之與武漢其輕重亦略相等而論目前形格勢禁之道則必力爭武漢而後可以保全鄰省能保全完善之省而後可以規復被陷之區羅澤南於二十九日抵南康臣卽飭令渡湖帶親兵數十人督率平江勇於初八日攻勦湖口一次仍以下鐘巖石壘過堅未能遽破恐頓兵日久老我勁旅羅澤南亦具稟數千言規畫詳明慨然以援鄂爲己任遂決定回勦武漢之計已於八月十六自南康起程由義甯進擣崇通一帶西上武昌矣伏查駱秉章原奏所稱鄰氛四逼者西防黔匪東防義甯今義甯克復黔匪亦

靖則東西兩路均可弛防惟南路有兩粵之士匪竄入永郴北路有鄂賊之分枝上犯岳郡二者相衡北路更爲喫重今羅澤南一軍由崇通橫截而出仍自蒲咸掃蕩而下則鄂賊不敢上犯岳州是卽所以紓湘省北路之憂也湖北一省

欽差大臣西凌阿總督官文兩軍均在北岸惟巡撫胡林翼一軍向在南岸近聞移師北渡進紮漢陽南岸極爲空虛設武昌之賊逸出由紙坊上犯蒲咸則勾結蔓延爲患方長得羅澤南一軍由崇通截出直搗武昌是又所以救鄂省南岸之疏也臣反覆思維權衡緩急姑舍湖口而不攻令羅澤南回勦武漢取道較便而所全較廣羅澤南所統湘勇訓練勇僅三千六百人臣

又在九江陸營撥參將彭三元都司普承堯寶勇一千五百名
足成五千之數其餉項由江西酌撥漕折捐輸銀兩交該道親
行賁帶臣又咨札編修孟培楨主事胡大任王柏心等在荊州
勸捐以資接濟暫可無虞缺乏惟羅澤南一軍將領多諳練老
成士卒亦久征慣戰回武漢以勦粵匪則可回湖南以勦土匪
則不可方今東南大局卽不能遽破金陵犁庭而掃穴亦當力
爭江面拊背而扼吭湖南爲臣桑梓之邦豈不思所以保全特
不力挽大局則一鄉一邑亦終無獨全之理合無仰懇
皇上天恩飭下兩湖督撫諸臣羅澤南一軍不得調回湘省其
麾下五千人亦不得分支調撥致兵力單薄難以圖功一俟湘

奏和卷六
省北路肅清武漢剿辦得手臣仍飛調羅澤南前來會師以圖
進取所有調派羅澤南由崇通回剿武漢緣由恭摺由驛覆奏
伏乞

皇上聖鑒訓示施行謹

奏

派周鳳山接統潯軍片

咸豐五年八月二十一日

再提臣塔齊布病故後潯軍猝無統屬臣札派廣東羅定協副將周鳳山統領全軍七月二十一日該逆撲營經周鳳山督率各營擊退二十四日督勇攻城極爲出力均已奏明在案嗣二十六及八月初十日周鳳山率各勇分路與賊打仗連獲勝仗查潯城一軍除將寶勇千數百名撥歸羅澤南統帶會攻武昌外尙有三千餘人皆經塔齊布訓練已久足稱勁旅理合奏明歸周鳳山統領以一軍心而資堵剿惟塔齊布聲威炳耀士卒親附後來殊難爲繼周鳳山新領此軍臣飭令止重防守不圖進取現在江西境內惟九江彭澤兩城湖口梅家洲兩壘被賊

占踞而我軍西扼潯城東扼湖口水師扼駐青山如果三路防守嚴密賊不能內犯一步江省土地均可不被蹂躪所有派委周鳳山統領九江陸軍緣由謹附片奏

聞

硃批知道了周鳳山既能統屬仍應相機進取欽此

派員護送塔齊布靈柩片

咸豐五年八月二十一日

再前任九江鎮標後營游擊降補守備長春於咸豐三年五月
防守江西省城身受重傷不時舉發請假醫治半年未痊經江
西巡撫照例咨明兩江總督准其回旗調理正在候咨起程本
年二月臣在江西因九江乏員差遣見該守備病愈飭令前赴
提督塔齊布軍營當差七月據長春稟稱該守備父母年逾八
旬現接家信知親弟長祥前在天津府獨流地方打仗陣亡父
母年老家無承丁懇乞俯念孤子賞准回籍養親等情適塔齊
布病故臣派湖南提標撫標官兵三百五十名護送靈柩正需
委員沿途照料長春告養回旗臣卽派定護送回京并派府經

歷喬宗岳把總陶藻一同護送相應請
旨飭下該部該旗查照辦理謹附片奏
聞

彙報何桂珍在江北勝仗摺

咸豐五年八月二十一日

奏爲道員何桂珍在江北攻剿英山蘄水羅田股匪疊獲勝仗
謹彙前後稟報補行具奏仰祈

聖鑒事竊

臣於上年十月奏調安徽道員何桂珍來營助剿欽

奉

諭旨飭催該道歸併_臣等一軍當卽轉飭遵照嗣因賊匪回竄
江路復梗該道派委前署貴池縣知縣李沛蒼來營稟商帶兵
會合之路李沛蒼中途遇賊繞越漢口金口以上馳赴江西二
月間始到_臣營何桂珍在江北不能渡江併入_臣軍卽屯紮英
山蘄水等屬皖楚交界之處與賊匪接戰十餘次屢獲勝仗常

雇長毛探卒渡江來臣營遞送稟報往往中途沈失五月以後續據該道補鈔英蘄各案具稟前來查該道係皖省之官其勦賊在皖楚交界之地又係奉

旨調歸臣軍之員理合將前後各戰摘敘入奏仰慰

聖懷緣何桂珍去秋招集開化合肥等勇勦辦豫省捻匪降其頭目李兆壽馬超江等卽以投誠之豫勇三千名歸李兆壽馬超江統帶在於蘄英等縣往來堵勦正月初六日該道由英山督率員弁兵勇行抵羅田縣境適聞逆匪攻破蘄水之信十七日我軍抵蘄水之蔡家河飭署桐城縣知縣任春和代理太湖縣知縣婁業仕率帶李兆壽馬超江之豫勇安徽候補知縣劉

兆彭帶開化勇懷甯縣知縣許垣馮元霍帶合肥勇敎諭李培帶英霍蘄水諸勇十九日分路進攻殺賊二百餘名乘勝破城而入又殺賊五百餘名出其不意一鼓克復此正月十九日攻克蘄水縣城之一案也二月初二日英山縣稟報有太湖賊數千入境該道率同任春和婁業仕劉兆彭等帶勇往勦時英城賊共五六千人我軍分道齊進奮力夾擊安徽守備阿克敦亦帶兵繼進賊翻山逃竄追殺十餘里斃賊千餘生擒七十九名旋聞蘄州土匪勾結逆賊數千欲由蘄水蔡家河進撲羅田二月初六日飛調阿克敦等與合肥勇進攻賊爲鎗礮所傷敗奔上山我軍仰攻賊全股撲下殺賊四百餘人相守一夜次早賊

遂奔潰豫勇與開化勇跟踪夾擊追至蘄水縣之松柏坳此二月初二英山城外擊賊獲勝初六蘄水蔡家河擊賊大勝之二案也後蘄賊復欲來撲英邑該道飛調各勇趕回英山二月十七日賊聲言將攻太湖該道知其詭計專力扼守英城嚴陣以待賊果三路來攻馬超江奮力急進刺殺僞總制田金爵一名田金爵爲蘄黃一帶巨魁到處斂錢募丁以助虐燄自上年臘月受僞東王印照勾結匪黨數千常有悍賊百餘隨之以行黃衣黃帽乘坐綠轎自該逆被殺賊卽大敗竄自彭家畈屯踞山頭我軍圍攻賊敗分路竄逸追二十餘里直過大畈河轟斃溺斃之賊不下千人滾崖落港者死傷枕藉生擒七十餘名內有

僞總制僞司馬二名此十七日彭家畝戰勝殲劇賊田金爵之一案也三月二十一日探聞賊眾復聚蘄水欲攻英山爲田金爵復仇該道於英蘄交界之陳家坂紮營並分兵埋伏聞賊由朱陽河蜂擁而來我軍迎擊殺三百餘人追至數里外忽見數處火起知有匿賊四路兜剿斬首一百四十六級生擒三十四名嗣聞逆賊踞查兒山爲負隅之計該道以賊匪恃險死拒難以力爭卽揚言由查兒山進攻而潛師由雞鳴河進襲洗馬畝相踞二里賊始聞知我軍分爲三路直搗巢穴燬營三處斃賊四五百人乘勝追賊過河時大雨如注我軍溺斃數人斬馘及生擒賊匪共一百三十二名五月初一日蘄賊復糾約土匪萬

餘假冒鄉團併集英城該道親督光州勇暨任春和等諸勇迎擊斃其頭目共十七人殺賊無算追至大畋河擒斬過半餘皆拋棄兵械逃回蘄境此三四五等月在朱陽河雞鳴河大畋河擊賊獲勝之三案也五月初六日蘄賊復竄英境該道親率光州合肥諸勇駐城防守並派任春和劉兆彭帶豫勇開化勇分防彭家畋大畋河等處十一日蘄賊萬餘分路來撲經豫勇開化勇擊退十二日該逆乘五鼓大雨攻豫勇營盤我軍拒戰逾時殺賊多名因李兆壽腿受刃傷被賊圍困豫勇扶掖潰圍而出陣亡百餘人時馬超江之勇亦敗紛紛散回該道聞報帶勇出城接應兼堵南口任春和等亦繞出賊前分路扼截該道猝

遇多賊來衝馬被矛傷墜地見賊眾我寡勢難取勝次日遂同英山縣知縣蘇秀槐飛調羅田各屬團練會剿時賊已入城我兵爲賊所隔不能進攻豫勇絕糧三日散走過半李兆壽已受傷遂飭其督帶豫勇回籍該道一面招聚散卒一面號召諸路團練計隨營聽調者不下萬餘人二十六日分數路由英山西南北三門進攻該逆突圍而出被我軍鎗斃千餘人登時收復縣城敗賊躍河逃竄復截殺數百人奪獲賊械無算此五月十二日官軍小挫英山被陷二十六日大獲勝仗克復英山之二案也伏查該道自正月以來大小十餘戰屢挫凶鋒克復蘄水英山兩城陣斬渠魁田金爵勞績尤著惟據前後稟稱所帶各

勇從征半年未給口糧屢次血戰不惟賞卹無貲甚至日鮮一飽每勇日給白麪四兩或兩日領米一升該道與各委員並有斷炊之事迭派許垣婁業仕等分途勸捐米石往往爲賊所阻不得入城必俟賊退二千餘人始得一飽三月內曾分別遣散五月閒豫勇飢疲過甚竟以小挫致潰等情臣接閱之下不勝感喟何桂珍以二千疲勞之卒當羣盜出沒之區數月無餉轉戰不休在該道受

恩深重自當力圖報效其從征員弁兵勇勞苦倍於他軍合無仰懇

天恩准

臣擇尤保奏以作士氣抑或歸於皖楚各督撫保奏之

處伏候

聖裁所有何桂珍在江北攻勦英山蘄水羅田股匪疊獲勝仗緣由理合彙案補行具奏伏乞

皇上聖鑒訓示施行謹

奏

奏和卷六

請令何桂珍辦楚皖團練片

咸豐五年八月二十一日

再查蘄黃英霍當皖楚之交萬山迴互匪黨最多康熙年間于成龍辦蘄黃之賊驅除數年斬夷無算始就肅清近年以來南岸之大冶興國北岸之蘄水蘄州黃梅廣濟土匪尤眾一經粵匪勾結羣起響應動滿數千幸羅田麻城黃岡黃安等縣紳民好義團練殺賊歷有成效英山之民亦多深明大義敵愾同仇該道何桂珍往來皖楚之界已近一載各屬紳耆信義相孚每遇匱乏之時鄉里常以簞壺犒軍屢次勦賊獲勝亦賴團練之力微臣愚見擬令何桂珍總辦該處團練以皖省言之太宿則莠民較多英霍則良民較多以鄂省言之黃廣二蘄則莠民較

多羅田麻城則良民較多此時辦法練數縣之良民殺數縣之
莠民用該處之錢辦該處之事目前能殺一著名之匪將來大
軍到日卽少數百從賊之人實屬裨益不淺惟匪徒在楚境最
多而團練亦惟楚境之羅麻等屬最爲可恃合無仰懇

天恩飭下湖北安徽各督撫轉飭何桂珍督辦羅田英山麻城
等屬團練嚴清皖楚各屬土匪所需費用准在各屬勸捐俾該
道有專責之事而於大局亦有無窮之益一俟武漢克復羅澤
南一軍勦賊東下該道與之會合仍可歸併臣軍遵照前次
諭旨辦理所有擬請何桂珍督辦皖楚交界團練緣由謹附片
具奏請

五

五

五

考和卷六

克復廣信等案保獎摺 咸豐五年九月初五日

奏爲遵

旨奏保陸軍克復廣信及水師疊獲勝仗出力弁勇開列清單
懇

恩獎敘恭摺奏祈

聖鑒事竊三月間賊踞弋陽分股竄興安經 臣檄調甯紹台道

羅澤南前往勦辦二十一日克復弋陽二十三日收復興安縣

城聞賊已攻陷廣信府羅澤南趕至郡城連日痛勦殺賊數千

二十七日克復郡城均經 臣奏明奉

旨准將出力員弁擇尤保敘在案至水師屢次獲勝全湖肅清

疊奉

諭旨允准開單酌保除廣信案內江省會勦之在事員弁由江西巡撫另行請獎外謹遵

旨核實保敘彙列清單籲懇

恩施伏乞

皇上聖鑒訓示施行謹

奏

請催浙江協餉片

咸豐五年九月初五日

再臣二月間奏明閩浙兩省按月撥銀二萬兩接濟臣軍入夏以來閩省僅解銀二萬兩昨據督臣王懿德鈔摺咨會該省應撥餉銀業經奏明免其按月籌解浙江應解之款據撫臣何桂清覆奏於四月起每月由藩庫籌銀一萬兩運糧二庫合籌銀一萬兩委解接濟在案嗣據該省將四月分銀以一萬兩爲運鹽成本以一萬兩解到臣營稍紓眉急而五月以後報解之數尙無消息八月初五日何桂清爲協撥滇餉一案附片聲明江西軍餉無款可動現在籌議浙鹽運銷江右卽以鹽課抵撥曾國藩軍營餉需俟議定章程再行具奏等語該撫鈔片咨送前

來伏查臣軍奏請借撥浙引用鹽抵餉至今已滿半年尙未運鹽到江將來能否銷行暢旺殊難懸揣若浙省再議行鹽撥餉則自定議之日以至銷售之日更屬遙遙無期而臣軍萬餘人嗷嗷待哺江省獨力難支中夜思維萬分焦灼浙江物力富饒迥非閩省支絀可比合再籲懇

皇上天恩飭下浙江撫臣迅將五月以後未解餉銀如數源源補解俾此軍不以餉潰而致他虞感荷

聖慈曷有涯極謹附片具奏不勝迫切待

命之至謹

奏

請令羅澤南奏報軍情片

咸豐五年九月初五日

再臣接據稟報金口南岸陸軍被該逆於八月初二日蹋毀營盤署撫臣胡林翼北岸陸軍亦於初八日被逆匪蹋毀營盤羅澤南援鄂之師計此時尙在崇通一帶若勦辦得手進至咸甯江夏等縣去臣營在八百里以外出入賊地信息難通羅澤南營中大小軍情若仍由臣處奏報往返耽擱動逾一月此時鄂事孔棘我

皇上盼望捷報愈速愈妙胡林翼收集潰兵尙在江北能否與羅澤南文報常通不爲賊氛所隔正未可知微臣愚見擬令羅澤南自行具摺每遇開仗之後迅速繕摺奏報專差由閒道送

至荊州或送長沙交驛馳遞仰慰

聖廕較之由

臣

處轉奏可期速到一月伏查會典定例司道原

有奏事之責近歲各路糧台均由司道專摺奏事羅澤南統領一軍尤應權宜辦理如蒙

俞允請

旨飭下羅澤南大小軍情自行奏報庶慰我

皇上盼捷急切之意謹附片請

旨

師久無功自請嚴議片

咸豐五年九月初五日

再臣自抵江西整飭水軍本擬四五月閒水陸會剿攻破湖口一關緣義甯州失陷羅澤南率師回救不能赴湖口會剿繼而與塔齊布面約移師東渡攻剿湖口該提督又遽爾殂謝後飭平江勇往攻湖口二十三日水陸大戰極爲得手而下鐘山石壘堅固異常竟不能破自辦理內湖水師已逾半年鄱湖以內雖已一律肅清而未能橫截江面終無裨於大局轉瞬霜降水涸攻剿愈難師久無功餉項虛糜應請旨將臣交部嚴加議處惟臣調度乖方咎無可辭而助臣辦理軍務實有勞績不可泯滅者亦不敢壅於上

聞侍郎臣黃贊湯自去歲督辦捐輸已逾六十餘萬兩孳孳勸諭毫無抑勒紳民爲之感動其致臣書函有云軍務一日不竣辦捐一日不息其致羅澤南書函有云如餉項緊急則傾家破產亦所不恤等語實屬力拯大局公爾忘私南昌府知府史致謬於九江廣信湖口等軍支應諸件晝夜叢冗毫無貽誤水軍所需子藥輒動數萬觔亦能措置裕如綜理繁劇舉重若輕候補直隸州知州李瀚章自去歲辦理糧台每於艱難挫折之際逶迤經營不激不隨今年在江西與禮部主事甘晉應付各路軍需亦能權衡緩急毫無浪費至外江金口水營正月初三日李孟羣等赴援武昌僅礮船五十餘號初五日彭玉麟等赴援

武昌亦僅礮船八十餘號尙有被大風損壞舵折楫摧者到武漢後又復三次遭風臣時深慮外江水師不克撐持曾於奏牘內言之賴湖南巡撫臣駱秉章一力維持接濟船礮撥給餉項添募水勇俾金口水師危而復安弱而轉強以保湘省卽以衛大局該撫署內幕友候選同知左宗棠於外江水師尤爲殷勤保護一船一礮一哨一勇皆苦心照料勞怨兼任一面在長沙操練一面發往鄂省力挫水賊兇鋒候補知府彭玉麟於大風壞船之後督率舟師赴援武昌其時賊勢方張我軍氣餒彭玉麟一面修整破船一面鏖戰悍賊與李孟羣同心協力目不交睫八十餘日竟能保守金口水軍復振其堅忍之力殊屬難得

禮部主事胡大任自賊氛再犯武漢以後在於新堤地方勸捐助餉安定民心接濟軍火歷艱險而不渝現復往荊州勸捐籌濟援鄂之師前任知府黃冕專辦湖南礮局前後造礮至六百餘尊之多不特外江水師借此大振軍威卽臣在鄱湖亦提來礮位一百零二尊其所造皆精練光瑩與洋礮無異所製竹筒炸彈之類亦皆具有精心利於攻勦實屬有用之才不敢不一瀝陳於

聖主之前侍郎

臣

黃贊湯巡撫

臣

駱秉章受

恩深重自應竭誠報

國李孟羣職任兩司亦不敢仰邀

獎敘其史致諤等以下各員擬卽歸入義甯州案內開單保奏
籲懇

恩施所有微臣師久無功請交部嚴議及助益臣軍勞績較多
各緣由謹附片具奏請

旨

卷之八

七

羅澤南一軍克復通城縣摺

咸豐五年九月二十三日

奏爲羅澤南一軍由義甯進剿獲勝克復通城縣城恭摺馳奏
仰祈

聖鑒事竊甯紹台道羅澤南克復義甯後駐軍杭口輕騎馳抵
南康與臣熟商由崇通援剿武漢之策八月十六日復由南康
起程回營各情業經奏明在案嗣據羅澤南稟報八月二十七
八日率湘勇五營訓字營暨參將彭三元游擊普承堯所帶之
寶勇次第由杭口拔營九月初一日抵通城界之南樓嶺下阻
雨二日初四日由嶺拔營初五日駐通城之東南山上管帶平
江勇五品銜卽選知縣李源濬何忠駿藍翎卽選知縣黃崇策

藍翎千總方城等亦於是日趕到駐營通城之西南山上賊之
在通城者初止四五千人鍾姓賊首自義甯敗後懼我軍進攻
崇陽屯聚萬餘人於崇陽之桂口嗣聞我軍進勦通城亦於九
月初四五等日陸續來賊六七千人於城之西門外山上築大
木城兩座層布礮眼深掘重濠濠外竹籤木椿縱橫密釘冀以
抗拒我師該道駐營後自帶勇敢之士數百人沿城審視形勢
旋由城之西南登山瞭望該逆見我軍無多忽出大隊追襲諸
勇回旂擊之殺斃騎馬賊目三名生擒七名賊敗歸壘負固不
出初六日辰刻方集各營會議進攻部署甫定平江勇分三路
直撲城外賊壘賊於壘中以大礮轟擊該道急飭各營繼進記

名道李續賓率湘勇右營候選訓導劉蓉率湘勇副右營候補
直隸州李杏春率湘勇副中營攻城外賊營與平江勇接應該
道率中營繼之攻城西北參將彭三元游擊普承堯率寶勇與
唐訓方率訓字營蔣益澧率湘勇左營攻城東南值平江勇進
勦喫緊我軍乘之殺斃當先悍賊數十人乘勝奪入賊壘縱火
焚燒壘中諸賊悉由西北渡溪而奔諸勇分路截殺積屍溪中
水爲之赤時城中各門皆閉惟畱北門通桂口之路畱西門通
城外賊壘壘中賊爲我勇所截拚死逃竄仍由西北二門奔入
城中諸勇奮力尾追直逼城根守城之賊以磚石下擊我勇多
受重傷皆冒死奪門而入東南路諸勇亦攀援而上將南門賓

陽門拆開各營之勇繼之而入殺斃城中賊無算城中之賊挺而走險盡從北門蜂擁而出城門半啟值我軍衝入共相擁擠賊踐死於甕城者甚多我軍亦有爲賊踐傷者該道見眾匪猶踞城樓以巨石拒抵因飭各營分伏北門外之樹林中俟賊大隊奔出四路截殺有未出者我軍又退俟其再出而再殺之如是者六七戰城中賊盡追至十餘里外鮮得脫者前後斬馘約三千人內有穿黃褂長髮賊數十人生擒共三百五十餘名奪獲大小旂幟百餘件馬百餘匹軍械穀米無數隨訊生擒諸賊供稱鍾姓賊首因受湖北賊目僞諭令其力守通城遏我師北下俾武漢之賊得以徑窺岳州等語狡譎已極該道入城後招

撫難民搜捕餘匪待稍綏定卽行進剿崇陽桂口等情前來臣
伏查鍾逆自義甯敗後防我師直取崇陽卽屯匪眾萬餘人於
桂口極力堵禦嗣見我師先趨通城復移桂口之賊併力救援
經羅澤南諸軍痛剿殺賊三千一鼓克復實足以寒賊膽而奪
崇陽桂口之氣所有在事出力員弁俟查明彙案請獎以昭鼓
勵把總李懋勳首先登城奮不顧身以致陣亡並請
敕部從優議卹陣亡各勇查明照例辦理所有克復通城縣城
緣由專摺馳奏伏乞

皇上聖鑒訓示施行謹
奏

鄂軍由胡林翼轉奏片

咸豐五年九月二十三日

再羅澤南由崇通回勦武漢去

臣軍營漸遠稟報往返稽延動

逾旬月

臣前請

旨飭下羅澤南准令專摺自報軍情業於九月初五日附片奏明在案旋據探稟湖北撫臣胡林翼駐紮嘉魚之六溪口係在大江南岸與羅澤南崇通之師聲息可期常通此後鄂省大小軍情或由羅澤南奏報或由撫臣胡林翼轉奏臣卽不復具奏矣除分別咨行外謹附片奏

聞

硃批已有旨歸胡林翼奏報欽此

孝和卷六

四

遵保堪勝總兵人員摺

咸豐五年九月二十三日

奏爲遵

旨保舉堪勝總兵人員恭摺具奏仰祈

聖鑒事五月十五日准兵部咨開咸豐五年四月十二日內閣奉

上諭各省保舉堪勝陸路總兵人員現經用竣著各該督撫於陸路副將內卽行遴選曉暢營務堪勝總兵酌保數員送部引見候朕記名以備簡用並著各路統兵大臣於軍營副將內察核保奏其參將游擊都司守備各員如有才能出眾勇敢有爲者該督撫大臣一併核實開單具奏欽此行令

臣欽遵辦理等

因到臣伏查軍中將領各有偏長而足畀方鎮之寄者頗難其選臣接奉

諭旨詳加體察查有總兵銜湖南常德協副將楊載福廉明愛士深得眾心每戰衝鋒陷陣賊黨披靡湖南弁勇所以奮發敢戰者陸路賴塔齊布爲之倡水路賴楊載福爲之倡現經胡林翼奏明統領外江水師又廣東羅定協副將周鳳山紀律嚴明與士卒同甘苦每戰調派隊伍防賊鈔襲埋伏現經臣奏明統領九江陸營尙能和協將弁力遏賊鋒又保升參將彭三元曉暢營務爲士卒所悅服前提臣塔齊布素加器重現經臣派令隨羅澤南援勦武漢此三人者似皆足以勝總兵之任所有遵

旨保舉緣由恭摺具奏伏乞
皇上聖鑒訓示施行謹
奏

羅澤南分勦崇陽彭三元殉難摺

咸豐五年十月二十日

奏爲羅澤南一軍分勦崇陽援賊在壕頭堡獲勝一次敗挫一次參將彭三元等殉難旋在羊樓崗接仗續獲大勝恭摺具奏仰祈

聖鑒事竊羅澤南一軍克復通城縣城進攻崇陽情形經臣奏明在案當以羅澤南去

臣

軍營漸遠附片聲明嗣後湖北軍情

准令羅澤南專摺奏報或由湖北撫

臣

轉奏

臣

卽不復具奏矣

九月十四日羅澤南督率諸軍克復崇陽縣城一案經該道就近稟明楚省各督撫諒已專摺奏

聞茲復據該道稟稱九月十七日在崇陽聞湖南官兵進勦羊

樓崗失利退守岳州該道懼賊乘勝上窺岳郡直犯長沙因派
記名道李續賓訓導劉蓉知縣蔣益澧直隸州知州唐訓方游
擊普承堯等分率各勇於十八日黎明由崇陽拔營十九日駐
羊樓崗以防西路上犯之賊羅澤南與參將彭三元知州李杏
春等暫駐崇陽以資彈壓擬卽兩路合攻蒲圻適崇邑官紳以
僞總制楊萬年率敗賊七八百人據梯木山爲老巢騷擾壕頭
堡地方冀乘我師一去復陷崇陽稟請勦辦羅澤南以壕頭堡
離縣四十里賊僅八百可以一鼓殄滅免貽後患二十二日派
彭三元李杏春往勦行抵道口突遇賊二百餘人爲我師擊退
駐營塘泥嶺二十三日李杏春率湘勇前行彭三元率寶勇繼

之捫藤扳石至梯木山見賊二百餘人搖旗放鎗我勇分路追殺斃賊數十名縱火悉燒楊逆之宅收隊循原而下忽報僞冀王石達開帶悍賊六七千人將至登山望之黃旂漫野喊聲震天我軍分三路應之左中兩路之勇分途疾進殺斃當先悍賊賊潰諸勇或尾追或腰截戮屍徧地右路松林內黃旗愈集愈多李杏春復馳馬登山督勇整隊以俟該逆爲山岡所隔不知中路左路之賊已潰揚旗吹角而至勢甚凶猛諸勇分路雕剿連斃大旗悍賊八九名賊反走彭三示督勇橫截之殺賊尤眾餘向白羊山奔投咸甯而去日暮收隊計三路斃賊八九百人內有僞將軍僞指揮二名奪獲僞印二顆大小旗幟馬匹僞冠

服無數據生擒之賊供稱僞翼王由金陵水路至武昌縣登岸取道金牛統賊二三萬人昨夜宿咸甯今日交戰係其前隊之賊等語此彭三元等分兵勦壕頭堡初次接仗獲勝之實在情形也二十四日彭三元等擬拔營回崇陽羅澤南亦以書促之歸甫傳令閒倏聞翼賊大隊遽至約二萬人勢極兇惡鎗礮火箭噴筒連環施放彭三元李杏春見眾寡不敵飭諸勇不得輕進擇隘堵截賊眾麤至與戰二三十合彭三元左耳受礮傷血流滿襟猶率勇力戰如故自卯至未鏖戰五時之久賊黨始退前後斃賊約百餘人二十五日黎明翼賊由咸甯率大股盡數趕至崇陽土匪又從而益之將營盤三面圍

彭三元李杏春

誓以身殉各跨馬分路堵禦相持二時之久屢卻屢進忽賊從後路繞入營盤拋擲火毬勒馬回收賊眾尾追彭三元大呼衝突手刃黃馬掛賊一名遂爲羣賊刺於馬下李杏春見彭三元已死義不獨生遂殉難把總蕭馥山始終隨李杏春不離爲賊所殺其胞弟把總李光熾居營守輜重聞其兄遇害亦死之哨長守備銜候補千總彭獻傑把總劉碧山獨當一路與賊力戰及營中火起猶執旗衝入賊中同時死難諸勇知無能爲且戰且卻整隊而歸羅澤南在崇陽聞壕頭堡危急之信於先一夕派李續宜率勇往援又調蔣益澧由羊樓往援二十五卯刻復自率五成隊疾馳救援距營十里見諸勇潰歸已無及矣因督

隊排列山岡賊不敢窮追此壕頭堡突遇大股悍賊參將彭三元等殉難之實在情形也羅澤南回至崇陽因與蔣益澧商議我師分紮崇陽羊樓兩路兵力皆單新挫之後不如仍合爲一以固軍心遂於是夜五鼓拔營午刻抵羊樓崗與李續賓劉蓉等併爲一營探知僞國宗韋俊自鄂省率賊萬餘由紙坊而上二十四日已至蒲圻矣二十六日羅澤南甫抵羊樓方令傳餐突報蒲圻賊大股來攻羅澤南與李續賓登山瞭望見賊屯聚峯頭爲二大支一支薄山而下踰田隴旋分三支直逼我營是爲賊之正兵一支捲旂息鼓埋匿七里沖各山內深藏不見是爲賊之奇兵冀誘我師禦其正兵卽以奇兵從後乘之撲入營

盤羅澤南會各營商定以我師自崇陽至者久戰之後疲於進
行不令應敵飭劉蓉擊田隴賊陣之腰李續賓從左路石山抄
田隴賊陣之尾唐訓方以三哨當田隴之賊以二哨搜賊營前
山內之伏普承堯之勇令分二路以搜七里沖諸山之伏時壕
頭堡新敗收集之勇各欲爭先出隊報仇雪憤羅澤南許之令
其策應各路田隴賊見唐訓方人少銳意直前鎗礮火箭齊至
我兵不動誘賊漸逼營前以擡鎗擊之繼以短兵鏖戰逾時賊
不能支劉蓉率勇從中段截之賊亂反旗而走爲諸勇所包不
得出賊之在後者回奔峯巔李續賓已先繞至截殺之蔣益澧
亦分路策應賊之正兵大敗其伏於山內者不知田隴之賊已

敗急思出戰普承堯諸勇或繞出山巔或從山口分路殺入賊之奇兵亦敗分途追殺至十里之遙日暮收隊各路共殺斃九百餘名多係長髮老賊內有僞總制黃姓僞指揮李姓身懷僞印生擒七十餘名殺之以祭壕頭堡陣亡將士諸勇猶痛憾切齒爭啖其肉此羊樓崗續獲大勝之實在情形也羅澤南以壕頭堡兩營失利方思休息數日緩圖進剿得此勝仗士氣復揚擬稍加振厲卽當相機尅期會攻等情前來臣伏查壕頭堡餘匪無多羅澤南分兵剿洗覆巢殲賊已除後患不料僞翼王石達開大股由金牛閒道猝至致遭挫衄良將賢員相繼淪喪誠堪憫惻至羊樓崗爲湖南接壤之區日前官軍潰退楚疆岌岌

可危該道分軍扼要堵守或可重振軍威規復鄂垣保升參將彭三元忠勇明練屢著戰功克復通城案內擬保副將而九月

二十四日

臣遵

旨保舉堪勝總兵人員一摺亦以彭三元曉暢營務足勝專閫之寄茲矢志殉節請

旨飭部照副將例議卹以慰忠魂候補直隸州知州李杏春韜略熟諳深明大義通城案內擬保知府茲力戰捐軀請照知府例從優議卹其餘殉難各員守備銜候補千總彭獻傑把總蕭馥山李光熾劉碧山均請從優議卹陣亡勇目查明照例辦理其羊樓崗獲勝出力員弁由羅澤南彙案稟請獎敘所有分勦

崇陽援賊接仗各緣由謹專摺馳奏再此次軍情應由楚省具報緣殉難彭三元係臣軍屢戰得力之將未便沒其忠績是以仍行奏報合併聲明伏乞

皇上聖鑒訓示施行謹

奏

彭三元童添雲祀塔祠片

咸豐五年十月二十日

再保升參將彭三元向隸提臣塔齊布軍營戰功疊著爲塔齊布素所賞拔茲以兵單挫衄猶負傷血戰誓以身殉忠勇之槩偏裨中實爲罕儔臣前奏請湖南省城爲塔齊布建立專祠欽奉

諭旨允准應並請以彭三元入祠祀祀俾義烈幽靈得所依附益昭

聖代褒節勸忠之意又參將童添雲隨塔齊布轉戰二千里每戰隻身陷陣去臘在九江受傷殞命合營皆爲痛哭經臣奏明請照參將例從優議卹亦蒙

允准在案此次並請祀塔齊布祠宇以慰忠魂合并陳明謹
附片具奏請

旨

謝補兵部侍郎

恩摺

咸豐五年十月二十日

奏爲恭謝

天恩仰祈

聖鑒事九月二十七日准兵部火票遞到咸豐五年九月初四日內閣奉

上諭兵部右侍郎著曾國藩補授曾國藩現在督辦軍務兵部右侍郎著沈兆霖兼署欽此竊臣賦性拘迂謬膺重寄覬烽煙之不靖元惡稽誅愧軍旅之未嫻愚忱徒抱白水師半入鄱湖重加整輯頻煩摩壘之勞難奪負嵎之險已閱時而經歲覺功少而過多迺復渥荷

溫綸補授斯職以本兵而司撻伐任似負山以薄植而履艱危
臣惟恪遵

情深蹟埵訓飭殫竭血誠永獨矢夫冰心稍申墜露輕塵之報誓廓清平
江面仰答

高天厚地之恩所有微臣感激下忱謹專摺附驛馳奏叩謝

天恩伏乞

皇上聖鑒謹

奏

謝寬免嚴議

恩摺

咸豐五年十一月二十一日

奏爲恭謝

天恩仰祈

聖鑒事十月十九日准兵部火票遞到咸豐五年九月二十六日內閣奉

上諭曾國藩奏師久無功自請嚴議等語兵部侍郎曾國藩督帶水師屢著戰功自到九江雖未能迅卽克復而鄱湖賊匪已就肅清所有自請嚴議之處著加恩寬免欽此竊臣自入內湖整輯水師意在攻破湖口力扼長江中段使上下游之賊不得相通區區微志久在

聖明洞鑒之中乃五月初調羅澤南會攻湖口旋以義甯赴援
不克前來七月底調李元度環攻湖口已復縣城又以石壘未
破不克成功前與塔齊布會晤之時議將九江陸軍長驅東下
會合向榮蕪湖之師而該提督倏爾淪謝遂乏慷慨同志之人
近聞廬州克復之信擬將內湖水軍衝出大江會合和春北岸
之師而潯城陸軍撤入腹地南岸又無依傍之處機不遽順謀
不克成累月曠時師老餉匱中夜以思慙憤交併自以調度無
方應獲嚴譴乃蒙

天恩曲宥寬免嚴議處分祇聆之下感悚難名臣惟有殫竭愚
誠激揚士氣不敢偷安片刻不敢浪費一錢俾銳氣之常新翼

逆氛之速靖庶以仰答

高厚鴻慈於萬一所有

微臣

感激下忱謹專摺附驛馳奏叩謝

天恩伏乞

皇上聖鑒謹

奏

九江湖口水陸各軍接仗情形摺

咸豐五年十一月二十一日

奏爲九江湖口陸軍勦賊先後獲勝青山水師兩次接仗情形恭摺具奏仰祈

聖鑒事竊九江兵勇自派副將周鳳山統領七月八月與賊接仗四次均獲小勝暨湖口水陸各營八月會攻下鐘巖賊卡各情業經分別奏明在案嗣九月二十七日二十一日九江逆匪分股來撲屢經我師擊退迨十一月初五日賊眾約二千名由九江東北兩門繞城行至八里坡高嶺地方分爲六股排列嶺之東西各三股卓旗吶喊西門亦出賊約三四百名由楓樹灣前來復有賊由南門湖內用船登岸撲我軍西面周鳳山

見賊黨四面麤至出八成隊迎敵以嶺東賊較多派參將阿達
春帶勇衝擊嶺東左路之賊都司畢金科帶勇衝擊嶺東右路
之賊周鳳山親率都司滕國獻滕代清千總張登雲滕加洪彭
開科諸勇衝擊嶺東中路之賊另派都司李新華周岐山帶勇
共擊嶺西三股而令辰常兩營迎擊西門一股時九江鎮總兵
居隆阿亦派隊出擊湖內之賊各路官兵分股迎擊賊在八里
坡正欲前行經阿達春之勇由左繞至刀矛並舉首先衝鋒斃
賊十數名滕國獻率帶官兵亦至鎗礮齊施呼聲震谷衝殺嶺
東中路畢金科之勇亦由嶺東右路衝入各斃賊數十名賊敗
嶺東三股齊退入東門樹林內抗拒二時之久我軍見城上鎗

礮如雨不敢近。偪周鳳山遂令阿達春等分股往湖邊鈔賊。後路賊見我兵鈔襲始行奔至北門江邊。欲乘船而逸。滕國獻乘勢追逼賊上船不及溺斃者計數十人。蓋嶺東之賊係由小池口渡江而來。故敗後仍竄江邊也。時都司李新華、周歧山等帶勇在嶺西各敵一股。殺賊數十名。奪獲旂械多件。賊敗退走入東門城上。大礮連轟我軍。遂不敢進。其西門賊一股經守備岳炳榮等辰勇分左右夾擊。各有斬獲。至南門湖內之賊係大礮船四號、小划十餘號。已駛進甘棠湖。袁家嘴等處上岸焚擄。經總兵居隆阿用礮轟沈大船一隻、小划二隻。擊斃淹斃之賊十餘名。賊敗駛出湖外。時已申刻。各路依次收隊。是日共殺賊二

百餘名黃馬褂賊四名溺斃尤多此十一月初五日九江陸軍
勦賊大勝之實在情形也初七初八該逆復出城來犯均經擊
退小有斬馘湖口下鐘山賊黨自屢創後堅匿不出十月底三
次來犯我軍出隊追擊飛奔回巢皆未窮追十一月初五六日
聞下游來援賊千餘人添集鐘山初七日巳刻分五股來犯直
抵蘇官渡北岸搖旗放鎗同知李元度傳令飽餐不許輕動候
賊氣已疲遣守備羊瀛率右營從馬影橋東路包鈔從九彭斯
舉率中營前營從勞家渡西路截擊知縣胡蓋南訓導吳齊源
率左營從中路直衝三面兜勦殺斃當先賊一名賊退追過五
里橋突起伏賊二百餘人我軍眾礮抵敵傷賊十餘名逆首偽

承宣黃文金騎馬衝陣經投誠之蔣文煥等指認遂令各哨圍擊直取賊渠該逆狂竄追至三家市逆眾回匿下鐘山我軍登大小嶺各據山椒麾勇焚其卡房望樓七所直偪下鐘巖石牆之下又殺賊七名逾時見逆船從梅家洲渡賊至東岸皆新到之賊時已日晡各營收隊捲塘而歸詎黃文金復率眾來追勢極兇悍彭斯舉羊瀛等分路衝截往復十餘次輒有斬馘因日暮不敢戀戰徐徐收至三家市忽逆黨千餘人傾巢尾追各營且戰且退至五里橋我接應兵畢至直衝向前李元度催兵返鬪彭斯舉羊瀛等望見逆首黃文金遂率擡礮指擊該逆被轟落馬賊眾拖曳我軍乘勢反攻立斬二十餘賊奪旂三桿逆黨

奔潰不復成軍各營仍追至三家市乘月收隊歸營是日殺賊
不過四十三名礮傷不過數十名而往返追逐鏖戰竟日該逆
凶悍狡詐殊難輕視查點我軍受傷陣亡十一名此十一月初
七日湖口陸軍久戰獲勝之實在情形也水師久駐青山九月
二十七日賊船五十餘號竄至姑塘我軍列陣禦之與賊相持
該逆佯往東路退敗我軍乘勢進攻賊復分船開向西岸鎗礮
連施時青山陸營亦已出隊至姑塘見匪船近岸用擡鎗火箭
轟射賊不敢近我船一齊駛近猛攻賊始敗竄將抵鞋山我軍
追擊賊又回舵迎敵我船分左右包鈔賊復敗北追至盍山日
暮收隊是日礮傷賊匪甚多我軍僅受傷三名十月二十七日

賊船數十號來至東岸螺絲山申刻各營會商恐逆船潛匿二十八日我軍前右兩營循西岸新中嚮導兩營循東岸均近鞋山中流灣泊先派哨船巡探該逆瞥見我軍哨船兩岸出隊我哨船且戰且走引至鞋山賊見我船陣勢嚴整鎗礮猝發卽行敗走右前兩營由西岸尾追風急水湍頃刻追及湖口賊忽回船拒戰我軍因順風窮追隊伍稍亂勢少退卻營官劉國斌往復苦戰每戰一合輒麾大船捲塘先退小船殿後右營長龍船一隻因灘乾擱淺不能駛回被賊圍奪退至鞋山東岸二營近前接仗搥鼓助威萬礮齊集悍賊始振柁回奔我軍又復尾追數里日暮收隊是日鏖戰四時雖斃賊以百餘計我軍亦傷亡

三十餘人此水師九月二十七日及十月二十八日接仗之實在情形也據各營稟報前來伏查周鳳山一軍士卒新附臣每飭其加意防維相機進取茲該逆以大股數路來犯幸分投抵禦大挫兇鋒我軍士氣爲之一振湖口陸營經李元度設計招降離其黨羽陸續投誠之僞官僞書記已七十餘人此次逆首受傷稍攄積憤臣惟有督飭各路堅壁固守伺隙而動以期力破賊壘戰亡兵勇查明照例辦理所有九江湖口水陸各軍接仗各緣由恭摺馳奏伏乞

皇上聖鑒訓示施行謹奏

新昌萬載逆匪攻陷瑞州臨江摺

咸豐五年十一月二十日

奏爲新昌萬載逆匪分股攻陷瑞州臨江逼近省垣急調副將周鳳山九江全軍馳往堵剿並抽撥水師嚴防省河情形恭摺馳奏仰祈

聖鑒事竊

臣

迭接署江西巡撫陸元烺來咨及官紳函稱義甯

股匪竄入新昌安福股匪初竄分宜繼陷萬載十一月初十一等日復分股將瑞州臨江兩府城池攻陷江西候補縣李錕劉希洛所帶之平江勇在瑞州與賊接仗亦多傷亡李錕劉希洛俱無下落續調新授贛南道耆齡帶饒州防勇二千名回省防剿並囑

臣

酌派楚師勁旅赴援等語又據各路探報李錕劉

希洛俱已陣亡並稱此次賊犯江西實係僞翼王石達開僞豫王胡以晄僞翼丈黃姓僞丞相曾姓張姓率眾二三萬人大舉內犯九月間從安慶上竄湖北樊口登岸取道金牛西上九月二十五日濠頭堡之挫參將彭三元等殉難十月初五日通城之挫知縣李原濬等殉難十五日義甯之挫總兵劉開泰殉難此次瑞州之挫知縣李錕劉希洛等殉難係與石逆大股相遇該逆往來於湖北湖南江西三省交界之區蹂躪猖獗逆氛極惡萬載股匪自湖南茶陵而來者已與粵匪合而爲一各等情臣查石達開爲賊中著名驍悍之魁上年在湖口與臣軍水陸接仗詭計百端卒挫我師今乃大舉內犯又附以茶陵股匪自

非厚集勁旅不足以資堵剿謹就臣愚見調遣布置分條具奏
伏乞

訓示

一臣處陸路兵勇除羅澤南一軍業經奏明調赴鄂省外惟副
將周鳳山九江一軍久征慣戰較爲得力臣接瑞臨失陷之信
卽於十五日飛調周鳳山統帶全軍前往堵剿已於十八日自
九江拔營由江西省城進攻瑞州矣臣亦知潯防喫重不宜輕
撤柰石逆大股竄踞瑞州恐其肆擾腹地江省難以抵禦臣處
別無重兵不得不先其所急暫解九江之圍移剿瑞臨之賊
一江省水師係河南候補知府劉于潯統帶八九月閒隨臣紫

泊南康後因茶陵股匪竄至安福臣調劉于潯帶水師至吉安
防堵旋因萬載新昌先後竄陷署撫臣陸元烺又調劉于潯至
樟樹鎮防堵今石逆大股攻陷瑞州臣恐江西水軍過於單薄
又在青山楚軍水師內抽調賀虎臣一營帶戰船三十號駛赴
省河與劉于潯協同防守梭巡上游一帶無使該逆東渡直薄
省城

一羅澤南一軍係兩湖巡撫奏調奉

旨飭赴湖北勦賊入楚以後克復通城克復崇陽大捷羊樓崗
克復蒲圻戰功屢著茲石逆大股猝來江西內郡恐周鳳山一
軍尙難迅速撲滅江省官紳皆思調羅澤南回江會勦以壯聲

援臣思湖北通城縣爲三省適中之地與湖南之巴平湖北之崇蒲江西之義甯州相去皆在百里內外已飛飭羅澤南在於通城地方駐紮俾石逆大股有所牽掣顧忌不敢深入江西腹地三省有急可以兼顧如周鳳山一軍不敷勦辦再調羅澤南由義甯回江助勦以爲後勁之繼如瑞臨之賊迅就撲滅則羅澤南由通城回攻武昌亦不過二百餘里

一贛南道耆齡督同游擊遮克敦布帶贛勇二千在饒州防堵聯絡紳團屏障東北深得民心署撫臣調耆齡至吉安義甯等處防勦饒州士民來臣營兩次稟請該道畱饒以重東路之防情詞至爲懇切旋因瑞事愈急署撫臣飛檄飭催耆齡令遮克

敦布先帶贛勇一千馳赴省城今瑞臨并陷九江重兵已撤赴省城局勢大有變更則遮克敦布之兵自應仍回饒州以嚴東北之防查江省入九十月以後土匪自湖南茶陵而來粵逆自湖北通城而來西邊吉袁瑞臨四府並遭蹂躪此時惟當防守東北力保饒廣撫建四府庶錢糧有可徵之處奏報有可通之路保全半局冀以挽回全局

臣

屢次函商署撫

臣

陸元烺 附者

齡久駐饒州無庸調往他處近又兩次咨商請飭遮克敦布帶贛勇仍回饒州防堵東路以免疏虞

以上各條謹就目前情形酌量布置是否有當伏乞

皇上聖鑒訓示指授機宜再本年自三月以後奏報均由湖南

馳遞此次臨江失陷道途梗塞奏報仍由浙江馳驛呈遞合併
聲明謹
奏

九江湖口水陸勝仗摺

咸豐五年十二月十二日

奏爲九江陸軍拔營賊乘閒來攻接仗獲勝潯軍旣撤賊眾分撲湖口青山陸營我軍兩次大勝恭摺具奏仰祈

聖鑒事竊瑞臨兩府失陷飛調副將周鳳山九江全軍由省城馳往堵剿業經奏明在案臣料九江撤營之時該逆必出城猛撲旣撤之後該逆必合攻附近之青山陸營與湖口陸營均經諄飭嚴防詎該逆探知周鳳山將於十八日拔營十七日潯賊由東門約出八九百人分股擾犯我軍迎擊賊退至城根周鳳山戒勿遠追將次收隊賊又回敵南門湖內亦出賊划多隻各營旋追旋伏每追則賊卽退回如是者數次該逆忽前忽卻意

在罷勞我師周鳳山與都司滕國獻畢金科商定分兵要截遂帶勇由中路首先衝鋒並調參將阿達春都司李新華帶勇由左路進剿守備岳炳榮千總黃玉芳呂國恩帶勇由右路進剿分途鈔襲伏兵齊起沿途共殺賊二百餘名呂國恩亦受礮傷殞命賊眾敗退入城其時南門湖內賊划開礮拒戰都司周歧山唐得陞帶勇由湖汊施放連環鎗礮擊沈賊船二隻斃賊十餘名船隨駛出湖外申刻收隊查點兵勇傷亡二十九名此十七日九江陸軍拔營賊乘閒來攻接仗獲勝之實在情形也十八日潯師既撤之後潯賊千餘人與湖口梅家洲之賊三處聚集大舉而犯湖口李元度之營二十日黎明分七路來撲其由

山家市三股至蘇官壩者爲賊之正兵由酒坊嶺斜趨馬影橋者爲賊之疑兵由菱角塘勞家渡列三路直趨營前隄岸者爲賊之奇兵合眾三千餘人黃旂遍野馬數十匹往來衝突我軍堅持不動賊以正兵直犯蘇官壩逼近營牆燒更棚一座左營開礮轟斃三賊該逆仍悍立不退李元度以賊氣方盈戒勿輕動賊之奇兵千餘人愈逼愈近時我軍於營前築兩隄蓄水環護以爲外壕賊近隄首至涌而前我軍隔港鎗礮輪轟該逆不敢過隄忽別股從下游躍馬揭衣而渡搶近山巔勢極凶猛李元度令從九彭斯舉率各哨突從山下包鈔知縣胡蓋南率左營分路圍截前營各哨李大雄等亦怒馬衝鋒短兵相接三路

合擊立將過港之賊殺斃二十餘人奪馬三匹逆黨梟水奔逃
彭斯舉等渡港跟追隄上之賊亦敗李元度遂率諸軍過橋將
大股正賊擊退追至五里橋適守備羊瀛率右營遙從馬影橋
包鈔而至前後夾擊殺賊二百餘名賊之在洲堤者猶轟礮抵
禦我軍奮力死戰呼聲動地陣斬騎馬賊十餘名轟斃殺斃三
百餘人賊遂狂奔不復成隊我軍乘勝追殺屍橫十餘里填坑
滿谷直至山家市接應之賊踵至各營轟礮抵禦迴合十餘次
彭斯舉率勇復繞路圍鈔羊瀛胡蓋南各截一路賊復大敗追
至大嶺黃土嶺餘賊退奔入巢其潛匿民房者搜殺二十餘人
我軍捲塘收隊仍分三路振旅而還是日殲賊約七百餘名生

擒十一名奪獲號褂旗械四百餘件此二十日潯湖賊眾合攻湖口大戰獲勝之實在情形也青山陸營與湖口李元度之師夾湖而軍本以護衛水師臣派同知林源恩都司黃虎臣兩營同駐該處與水師相依陸勇僅及千人距九江四十里前此專恃潯軍以爲聲援自潯師既撤青山陸營單薄無援深以爲慮二十日湖口戰勝之後卽調軍功胡應元管帶平江勇六百人渡湖合駐青山以資堵禦十二月初三日九江小池口梅家洲三處之賊約二千餘人攻撲青山陸營逆舟四十餘號同時上犯賊之正兵據姑塘蔡家嶺其東一路沿湖岸而上西一路屯集廣信橋黃旗漫山勢甚兇猛黃虎臣林源恩等商定各帶隊

向穆家埂分途進剿黃虎臣先敵廣信橋一股潛派二百餘人
伏於左側松林內約聞號礮卽行截殺林源恩直趨蔡家嶺別
遣兩哨循湖岸繞出姑塘之背廣信橋之賊見我軍猛進列陣
抵禦號礮一發松林內伏兵衝出呼聲震天包鈔賊尾黃虎臣
合師圍剿短兵相接各勇冒死陷陣銳氣百倍殲斃悍賊四百
餘名內有僞先鋒謝姓僞將軍鄧姓二名餘賊狂奔自相踐踏
我軍追及斃匪多名林源恩方在蔡家嶺與賊相持大呼登山
賊旋下嶺抵敵我軍直衝而入賊隊散亂立斬騎馬賊二名賊
敗竄又追殺十數名胡應元扼守要口見兩處賊敗乘勢邀擊
亦殺數賊計陸軍殺賊將及五百人奪獲旗幟軍械六十餘件

是日逆舟上犯辰刻已抵姑塘我水軍戰船駛下鎗礮輪轟相持不決陳炳元令各水營佯爲敗退俾賊尾追誘至湖寬水深之處回棹大戰萬礮齊轟約三時之久該逆紛紛敗竄我軍追奔三十餘里至盛山月出始行收隊此初三日青山水陸接仗獲勝之實在情形也據各營先後稟報前來臣伏查九江湖口梅家洲小池口四處逆匪分合靡常善於避堅擊瑕知我軍拔營倥偬不暇迎敵則先一日出徧師以疲我知潯陽大營已撤湖口青山兵勇單薄則合全力以乘我詭計百端不可究詰茲幸三次獲勝潯賊不敢出巢內犯或可保全江省之北路陣亡藍翎千總呂國恩請

奏稿卷六
三
敕部從優議卹傷亡兵勇查明照例辦理所有九江陸軍拔營
賊乘閒來攻接仗獲勝及湖口青山兩次大勝緣由恭摺具奏
伏乞

皇上聖鑒訓示施行謹
奏

李錕劉希洛等請贈卹片

咸豐五年十二月十二日

再江西前署宜春縣知縣李錕前署德安縣知縣劉希洛經前撫臣陳啟邁飭委管帶平江勇各一營春間賊陷弋陽廣信劉希洛帶勇八百名隨同羅澤南往剿克復兩城李錕之勇則隨臣駐紮南康五月令往剿洗都昌馬家堰一帶賊巢七月望後同知李元度進攻湖口李錕劉希洛之勇均令同往在段家鋪文橋蘇官渡等處屢戰獲勝七月二十四五等日分路夾剿攻破湖口縣城該令等親冒礮石屢著戰功方冀再加歷練可成勁旅詎九月底茶陵土匪肆擾吉安之永新安福萬載等縣而義甯石達開股匪復竄踞新昌署撫臣陸元烺迭次咨商調李

錕劉希洛之勇由湖口先後馳赴援剿旋因瑞州緊急調往堵禦紫營離城二里之高岡十一月初十日賊眾數千來犯我軍迎擊殺賊五六百名生擒七十餘名賊退駐十五里外其夜新昌悍賊畢至十一日黎明賊萬餘人來瑞州分五路撲營劉希洛率把總李進發分途出剿斃匪四百餘名賊愈聚愈多四面圍逼劉希洛親執桴鼓督陣各勇鎗礮輪轟繼以刀矛自辰至申血戰數時火藥俱竭劉希洛叱呼親勇衝突賊陣數次身受矛傷血流被體坐馬亦受傷倒地棄馬步戰手刃三賊力竭遇害李錕亦被賊圍數時以鎗礮前後抵禦賊圍逼愈緊拋擲火蛋焚燒營盤李錕手劍突圍而出率親兵數人苦戰逾時賊湧

如潮矛戟叢刺亦力竭陣亡伏查劉希洛李錕均由拔貢舉人署理江西知縣素著循聲臨危慷慨忠勇可嘉其殉難情形業由陸元烺具奏請

旨優卹在案惟該令等疊戰出力均擬彙案保獎尙未出奏據劉希洛之家丁及李錕之子李蔭雯來營具稟理合據稟奏聞可否將劉希洛李錕各加贈知府銜之處出自

天恩又據稟稱劉希洛之胞兄祁陽生員劉希濂於咸豐四年七月在德安力戰陣亡相應請

旨飭部一併議卹以慰一家之忠魂而作全軍之士氣謹附片具奏請

旨

奏和名

奏

報周鳳山軍克樟樹片

咸豐五年十二月十二日

正封摺間接據省信周鳳山一軍於初四日在樟樹鎮大獲勝
仗踏平兩岸賊壘殺賊千餘人水師拆毀浮橋盡燒賊船立將
樟樹鎮克復日內進兵臨江府勦辦大股賊匪等因除查明開
仗情形詳細

奏報外合先附片仰慰

宸廑謹

奏

大

時

時

時

時

時

時

水陸會克樟樹鎮及新淦縣城摺

咸豐五年十二月十九日

奏爲周鳳山一軍會合水師大獲勝仗克復樟樹鎮旋收復新淦縣城恭摺具奏仰祈

聖鑒事竊水陸兩軍攻克樟樹鎮焚燒賊營賊船臣甫得捷報卽經附片先行奏

聞在案茲據周鳳山劉于濬等先後稟稱十一月二十七日周鳳山在江西省城探聞賊中藤牌手最爲凶悍卽預製鉤連槍明定賞格有殺斃藤牌手者予以重賞本月初三日行抵臨江界距樟樹鎮十五里與水師劉于濬賀虎臣等會商次早進剿探知逆匪於該鎮西南岸紮營五座高牆深濠密釘竹簽以拒

陸師對河東北岸搭浮橋有賊營一座兼築礮台以抗水師須分投夾擊使賊首尾不能兼顧庶可制勝初四日黎明周鳳山派都司滕國獻周歧山唐得升李新華守備黃玉芳等帶勇攻西路賊壘三座參將阿達春都司畢金科岳炳榮等攻南路賊壘兩座劉于潯與經歷賀虎臣各帶師船分攻東北岸一股水陸並進該匪傾巢而出約三四人周鳳山諸將奮勇當先鎗礮刀矛輪轟叢刺鏖戰數時賊之藤牌手驍勇善戰急難取勝周鳳山調鈎連槍數隊疾進破之殺賊五六百人賊眾奔潰我軍追擊擲放火彈火箭立將賊巢五座燒燬又斃數百人其藏匿民房者未及窮搜當於該鎮兩頭縱火焚賊無數餘匪突圍

而出由浮橋逃竄我軍追至匪眾皆斃水逃命時東北岸一股
堅拒逾時我軍僅有水師無陸兵接應劉于潯等與賊鎗礮對
轟急難攻破令軍功李廷棟疾駕小划首先登岸用火彈噴筒
遶賊營後路拋擲登時火發千總蔡康業李逢春率諸勇蜂擁
衝入賊棄營逃走李逢春等搶登礮台將守礮賊殺斃奪礮三
尊立將賊營燒燬餘賊或逃入村莊或爭渡浮橋當派千總余
化南與賀虎臣等將戰船排成一字連放鎗礮對橋轟擊該逆
窮蹙自相踐踏死者不下百餘人我水師立時斫斷浮橋直衝
而過焚燒賊船百餘號並奪新改之戰船數號一併燒燬賊之
奔匿村莊者陸軍又搜擒二十餘名均卽正法是日水陸共殲

賊一千餘名屍橫遍野奪獲僞印旗幟軍械無算此十二月初四日克復樟樹鎮蹋平兩岸賊壘拆橋燒船之實在情形也初八日周鳳山行抵灌溪聞新淦縣城有賊千餘人盤踞該縣爲通撫州府及省城要道若舍此徑剿臨江恐賊由東岸竄擾蔓延撫建必須先克新淦乃無後路牽制之虞遂於初九日約同水師星夜進攻適臨江府知府史麟善署新淦縣知縣李作士代理清江縣知縣金漢帶勇會剿我軍銜枚疾進詎該逆聞風懼怯卽於初十日黎明在縣城四門放火紛紛渡竄臨江我軍跟蹤追擊斃賊十餘名水師拋擲火毬燒燬浮橋亦斃賊多名其登岸之賊狂奔遠遁我軍入城安撫居民此初十日水陸各

營會攻新淦收復縣城之實在情形也臣伏查僞翼王石達開占據臨江府匪黨分布瑞州新昌新淦奉新及袁吉各屬又以精銳屯聚於樟樹鎮扼省城之咽喉意在蠶食腹地窺伺省垣且攻陷樟鎮未久卽已仿造戰船謀占上游逆計實爲凶狡周鳳山初統此軍驟當大敵臣深恐其難遽得手茲幸先破樟鎮次收新淦仰仗

天威軍聲已振刻下進攻臨江臣飭其加意謹慎勿因勝敵而驕力求自固以殲巨寇此次水陸弁勇奮猛出力籲懇

皇上天恩容臣擇尤彙保以示鼓勵傷亡各勇查明照例辦理所有水陸兩軍克復樟樹鎮及收復新淦縣城緣由恭摺馳奏

奏稿卷六
伏乞

皇上聖鑒訓示施行謹

奏

彙保義甯湖口兩案摺

咸豐五年十二月十九日

奏爲遵

旨彙保陸軍克復義甯州城暨攻破湖口縣城出力員弁兵勇
開單請獎恭摺奏祈

聖鑒事竊七月間逆匪攻陷義甯州城甯紹台道羅澤南督帶
湘勇馳往堵剿在梁口接仗獲勝遂由閒道至乾坑鼇嶺等處
連日血戰殺賊六七千名克復州城當將出力人員奏請彙保
奉

旨允准在案又七月間候選同知李元度等由段家鋪文橋蘇
官渡等處與賊接仗疊次獲勝會同水軍攻破湖口縣城僅餘


下鍾巖石壘未破奏明請獎亦奉

諭旨准保在案至江西湖南辦理軍務之官紳如南昌府知府
史致諤等七員臣曾附片奏請歸入義甯案內一併請獎除禮
部主事胡大任金華府知府彭玉麟業由署湖北撫臣胡林翼
另案奏保外茲據羅澤南等開單稟保前來理合彙列清單恭
摺籲懇

恩施伏乞

皇上聖鑒訓示施行謹

奏



曾文正公奏稿

卷之七目錄



疊奉 諭旨縷陳各路軍情摺

咸豐六年正月初九日

周鳳山陸軍分兵小挫摺

正月二十二日

黃虎臣等攻九江隘仗片

請抽上海釐金片

會籌各路堵剿情形摺

二月二十一日

單舟晉省途次聞警片

水軍先勝後挫請將營官參處片

調羅澤南回援江西片

請撥上海關稅片

全日

謝年終 恩賞摺

全日

請頒給捐生執照摺

糧台委員丁憂畱營片

請給營員 封典片

三月初一日

周鳳山陸軍回紮省垣摺

撫州失陷調回水陸各軍片

平江營克進賢縣城摺

三月二十六日

吳城水師勝仗摺

全日

劉長佑援師克萍鄉縣城摺

全日

近日江省賊情片

全日

分別保獎水師摺

官軍克東鄉縣進剿撫州摺

四月二十一日

克復建昌縣城摺

全日

江西士民請建羅澤南專祠摺

全日

江西近日軍情片

仍請撥上海關稅片

官軍攻剿撫州迭獲勝仗摺

五月二十三日

饒州防剿勝仗摺

全日

派兵赴建昌助剿摺

全日

水師吳城勝仗克豐城縣片

陳明鄰省援兵協餉片

分別失守員弁處分片

疊奉

諭旨縷陳各路軍情摺

咸豐六年正月初九日

奏爲疊奉

諭旨縷陳各路軍情恭摺覆奏仰祈

聖鑒事竊

臣

疊次承准軍機大臣字寄咸豐五年十一月二十

四日奉

上諭御史蕭浚蘭奏江西省南北被擾請擇要嚴防一摺據稱
在籍侍郎黃贊湯所帶兵勇及曾國藩營練勇四千名皆駐紮
固江鎮僅顧吉安一面等語著曾國藩陸元烺體察情形分布
要隘勿令竄匪四出滋擾等因欽此臣伏查石達開大股賊匪
由湖北竄入瑞臨係在十一月初十以後茶陵另股土匪由湖

南竄入吉袁係在十月以前其時臣並未調派兵勇前赴固江

黃贊湯專辦捐務鹽務亦並無帶兵之事假令固江鎮有此項

兵勇臣與陸元烺黃贊湯等斷無不會摺馳奏之理此該御史

蕭浚蘭所奏傳聞失實者也又准十二月十二日奉

上諭臨江踞城之賊亦應急籌分剿現派兵勇均係前往瑞州

尚未計及臨江本日廉兆綸奏稱臨江竄匪漫無制遏裹脅日

眾尤恐其互相掎角牽綴我軍著曾國藩陸元烺妥籌兼顧等

因欽此竊臣前調周鳳山一軍飭令先攻瑞州後剿臨江以瑞

州逼近省垣僅百二十里也厥後周鳳山至省與陸元烺等熟

商瑞臨在河之西與省城尚有一水之隔樟樹鎮在河之東於

省城尤爲肘腋之患遂舍瑞州不攻改爲先攻樟樹次勦臨江之策迨克復樟樹一鎮新淦一縣本可渡河以勦臨江矣因吉安被圍緊急司道等移文周鳳山囑其赴援以解吉安之圍而臬司周玉衡知府陳宗元在吉安圍城之中亦飛書請援於周鳳山迫切待命往返耽延遂逾二旬現臣與撫臣文俊商省城爲根本之地瑞臨爲切近之災決計先勦臨江無得以四處告警東瞻西顧徒延時日此周鳳山一軍未克遽赴瑞州與臣前奏不符之實情也又奉

上諭曾國藩現駐南康存營兵勇共有若干能否嚴扼九江之衝卽著妥籌布置不可專顧一路等因欽此伏查九江爲陸路

入省之驛道南康爲水路通省之總匯青山距兩府城各四十餘里臣之水軍久駐青山兩岸皆以陸軍護之實與九江呼吸相通自周鳳山潯軍撤去之後九江小池口湖口梅家洲四處之賊日夜環伺十一月二十日東岸湖口大戰臘月初三日西岸青山大戰幸獲全勝均經奏明在案厥後又有土匪二千餘人自湖北興國州而來竄據德安縣城去來不定聚散無常臣處青山老營防禦五處之賊陸路存營之數除江西協防兵勇及湖口紳士捐勇外不過二千九百人水路存營之數除撥赴省河及分巡吳城外不過二千三百人兵力至爲單薄而地形又覺散漫此臣處勉力支撐之情形也伏念臣軍自岳州而下

水陸萬餘人合併一支從未分散去歲以來陸軍分爲三支羅澤南率援鄂之師五千人爲一支周鳳山接統塔齊布之舊部四千人爲一支李元度等率平江各勇三千人爲老營之一支水軍分爲兩支武昌十營楊載福所統者爲外江一支鄱湖八營臣新調彭玉麟來此統帶者爲內湖一支旣已分而爲五矣而李元度駐湖之東又抽撥平江勇虎勇千餘人駐紮西岸是陸軍三支之外又分一小支外江則李孟羣帶船六十號別入襄河內湖則前撥船三十號外臣又飭彭玉麟帶船三十號馳赴臨江是水師兩支之外又分二小支愈分則人數愈寡愈析則氣勢愈弱其在湖北者距臣八百餘里在臨江者距臣五

百餘里雖欲急圖合併而勢有所不能至於行軍之道擇將爲先得一將則全軍振興失一將則士氣消阻甲寅年秋冬之間臣軍所以長驅千里勢如破竹者以陸路有塔齊布羅澤南水路有楊載福彭玉麟諸人軍中士卒皆以塔羅楊彭爲法沿江村市亦知有塔羅楊彭之稱故能旌旗生色席捲無前不幸塔齊布中道歿謝而羅澤南楊載福彭玉麟三人者又分往湖北臨江不克遽聚一處而後起之才如周鳳山李續賓李元度數人者又未知果能血戰成名仰邀

眷否臣久困一隅兵單將寡寸心焦灼愧悚難名惟當督飭營水陸嚴防五路之賊一俟湖北臨江兩處勦辦得手再圖

會合歸併一軍掃蕩羣醜以期仰慰

宸廑於萬一所有疊奉

寄諭縷陳各路軍情恭摺由驛五百里覆奏伏乞

皇上聖鑒訓示施行謹

奏

奏稿卷十

匹

周鳳山陸軍分兵小挫摺

咸豐六年正月二十二日

奏爲周鳳山陸軍分兵小挫一次旋以全隊與賊接仗大獲全勝樟樹水師戰勝三次恭摺馳奏仰祈

聖鑒事竊周鳳山一軍紮駐新淦因吉安被圍迫切請援遲疑未定撫臣文俊與臣函商以瑞臨逼近省垣決計先勦臨江業經奏明在案當撫臣與臣往返函商之際周鳳山未經奉札之前陸軍在新淦縣水師在樟樹鎮中隔七十餘里兩軍不相聯絡周鳳山因撥岳炳榮黃玉芳帶辰勇常勇八百人回駐樟樹護衛水師二十八日到鎮詎臨江之賊偵知官兵分支人數單薄遂於除夕元旦由上游偷渡悍賊四五百人初二日寅刻來

撲岳炳榮等之營岳炳榮隨塔齊布日久素稱驍健匹馬衝突
十餘次柰眾寡懸殊漸退入營該逆層層包圍自卯至午火藥
罄盡營盤被陷鍋帳全失士卒傷亡二百餘人岳炳榮衝出重
圍奔至豐城收輯餘勇此陸軍分支初二日挫衄之實在情形
也該逆乘勝直上新淦冀撲周鳳山之大營周鳳山聞警亦率
全軍折回樟樹初三日與賊遇於瓦山地方該處地勢寬敞東
有山嶺數處下爲平原西邊沿河長隄一道隄內係大樹林樹
之左旁民房頗密該逆分爲六股隄上二股樹林四股周鳳山
傳令各營先據山嶺紮住營盤以高擊下自督都司滕國獻畢
金科擊樹林之左兩股都司周岐山唐得陞擊樹林之右兩股

參將阿達春都司李新華擊隄上兩股各營迎頭截尾奮勇向前六處逆賊鎗礮火箭火毬紛紛擲放我軍奮不顧身衝入賊隊刀矛對搥鏖戰逾時共殺賊一千餘名賊眾敗竄沿河逃奔各營奮力追勦將二十里一路殲斃又三四百名逼入河中溺斃者無數生擒八十餘名訊明正法奪獲翼拾承宣僞印一顆黃馬褂多件鎗礮刀矛旗幟號衣各數百件騾馬十四匹訊據生擒賊犯供稱此股賊匪四千人內有長髮老賊一千五百餘名皆係能戰好手僞翼王石達開特調令過河打仗歸右拾承宣張賊管帶初三之戰被我兵斬馘殆盡脫逃得歸臨江者實已無幾此初三日陸軍在瓦山大戰獲勝之實在情形也當初

二日賊撲樟樹陸營之時水賊亦有戰船順流而下西岸又有陸賊二千人助之統帶江軍水師南河知府劉于濬派千總李逢春蔡康業擊江中之賊舟柰化南等擊東岸之陸賊吳步鼈等擊西岸之陸賊旋見陸營火起岳炳榮等陸兵失利劉于濬自上戰船直前接應喊聲雷動分南岸窮追細數賊船大小三十五號我軍四圍包裹賊抵敵不住紛紛斬斷礮索棄船下水溺死者不計其數在船者盡被殲斃奪得長龍賊船四號燒燬三號西岸賊築礮台二座我軍齊礮攻擊賊死守抗拒劉于濬傳令有人奪礮一尊者賞銀二十兩弁勇奮不顧身蜂擁登岸各手刃數賊奪大礮十一尊火藥十餘石偽印一顆刀矛旗幟

號衣無數此初二日劉于潯水軍獲勝之實在情形也臣自初
聞瑞臨二府失守之信卽派賀虎臣戰船三十號馳往與劉于
潯水師同防河面之賊旋聞賊在瑞臨峽江等處隨地造船恐
我水軍單薄又飭記名道彭玉麟帶二十餘船繼往先後奏
聞在案彭玉麟初四日抵樟樹鎮初七寅刻賊用破舊大船自
上游放下意圖衝動我營而戰舟與小划繼之彭玉麟督同都
司孫昌國帶舢板十餘號前進賊舟退卻進逼臨江河口賊之
戰船民船數十號岸上賊壘三座以大礮擡鎗護之我軍連環
轟擊賊以小划抵敵而其人者盡退入口內挽絳上行我軍盡
奪小划擊斃多賊乘勝衝過賊壘追入內河搶賊糧船三隻拆

毀浮橋奪杉木千餘株初九日彭玉麟督同孫昌國賀虎臣至臨江河口攻打賊壘羣子如雨斃賊甚多該逆棄壘逃退入城各水勇登岸踏毀賊牆三座望樓一座此水師初七初九兩次戰勝之實在情形也伏查瑞臨袁州三府淪陷吉安被圍西路業已糜爛省城與撫建各府在贛水大河之東久爲該逆所窺伺幸去臘有樟樹之克今春有瓦山之捷賊匪兩次東渡均被我軍擊敗水師扼泊樟鎮疊獲勝仗東岸當可保全無虞日內浮橋造成陸師西渡卽當激勵將士迅克臨江以慰

聖主睠懷南服之意所有陸軍分兵小挫周鳳山全隊大勝暨水師戰勝三次各緣由恭摺由驛馳奏伏乞

皇上聖鑒訓示施行謹
奏

黃虎臣等攻九江勝仗片

咸豐六年正月二十二日

再臣駐紮南康水師前隊紮泊青山陸軍則黃虎臣等紮西岸之青山李元度等紮東岸之湖口防禦九江小池口湖口梅家洲四處之賊兵數較寡勉力支撐情形兩次

奏明在案入春以來黃虎臣等熟商與其株守老營示之以虛弱不如進攻九江示之以不測遂於正月十八日丑刻分兩路進攻九江府城都司黃虎臣同知林源恩率虎勇平勇由東路周家嶺進武生黃之一由西路吳障嶺進九江後營游擊曾昭麒帶官兵二百繼之辰刻行抵東城多方挑戰該逆負隅不出黃虎臣飭哨官李大雄伏於左詹永清伏於右自帶小隊近前

誘敵飭哨官張隄同各勇佯爲敗退該逆始由小南門開壁而出有自大東門縋城而下誘至路逕歧隘之處黃虎臣督各弁回馬大戰兩路伏兵衝出勇氣百倍該逆回奔追至城根柰城上礮石過多僅殲二十餘賊當東城接仗之時西門之賊出隊三百餘由接官亭至鳳凰山意圖鈔東路官軍之尾黃之一自西突出率弁勇衝入賊隊短兵接殺連斃三十餘賊並殺僞十五軍副總制搜獲僞印一顆賊遂潰散乘勢直追該逆復糾悍賊五百餘賊船八號水陸猛撲我軍且戰且誘佯爲退走俟與曾昭麒接應兵近亦回旗大戰奮不顧身復入賊營殺賊八十餘名溺水者不計其數奪黃旗十四面小鎗刀矛數十件未刻

收隊此次兵勇僅及千人進攻潯城悍賊以少擊多兩路均以
佯敗取勝可否獎拔數人歸於樟樹鎮案內彙保之處出自
天恩理合附片奏報謹
奏

請抽上海釐金片

咸豐六年正月二十三日

再臣軍在江西境內者萬一千人每月需餉六萬有奇而入款約有三端一曰奉

旨允撥之漕折二曰黃贊湯督辦之捐輸三曰借行浙引之鹽務今賊匪大勢全注江省西路四府蹂躪殆遍漕折難以催徵捐輸不能措辦鹽引甫經到岸無處銷售三者來源俱竭岌岌有坐困之勢臘月餉項卽係搭放鈔票一半當此攻勦喫緊口食不繼深恐饑疲潰散大局決裂而不可復振查近年各處籌餉惟抽取釐金尙屬有利無弊如揚州之仙女廟浙江之北新關及湖南湖北各市鎮行貨抽釐接濟軍餉均經

奏明在案目下賊氛逼近無處可以抽辦近省惟江蘇之上海縣商賈雲集貨物山積並未抽取釐金合無仰懇

天恩敕下該省督撫卽飭上海道及府縣等官曉諭紳民商旅按貨抽釐撥送臣處專濟楚軍之餉如蒙

俞允請

旨敕下現在浙江辦理釐務之前任杭嘉湖道顧椿江蘇松江府知府袁芳瑛駐紮上海專司其事若得此項釐金接濟臣營不特現在江西境內之兵勇可以贍給卽將來羅澤南楊載福水陸兩軍與臣會合亦無虞餉項之缺乏微臣才薄智疏若得專心於戰守機宜不復以籌餉之事分縈憂慮亦不復以請餉

之奏屢瀆

聖聰感激

天恩曷有旣極所有上海抽取釐金專濟楚軍餉項緣由謹附

片具

奏請

旨

硃批另有旨欽此

奏和卷十

會籌各路堵剿情形摺

咸豐六年二月二十一日

奏爲會籌各路堵剿情形遵

旨覆奏並請

敕下廣東迅撥重兵防守贛州恭摺奏祈

聖鑒事二月初五日承准軍機大臣字寄咸豐六年正月十七日奉

上諭文俊奏江西各屬賊勢蔓延請飭催兵撥餉一摺已諭知葉名琛柏貴何桂清趕緊籌款撥解並諭知駱秉章添調兵勇速飭劉長佑出境應援矣江西逆匪久踞瑞州臨江分擾袁州吉安各屬賊勢披猖人心惶惑兵單餉絀固係實在情形文俊

甫經到任於該省地勢軍情一時未能周悉現當萬分棘手之時儻布置稍疏難免貽誤會國藩自抵江西爲時已久賊情亦所深悉此時江西匪蹤幾欲蔓延全省旣不能處處調兵又不能顧此失彼自應擇其最要之處先爲攻勦現在瑞州臨江袁州吉安四府究竟何處賊情最爲凶悍周鳳山一軍旣由新淦進兵自應急勦臨江瑞州以殄賊渠周汝筠一軍現阻泰和尤應設法疏通俾得迅抵吉安劉長佑一軍離楚後應由何路進勦方能扼要著會國藩卽與文俊妥速會商務籌全局不可徒事張皇亦不可專顧一處軍情變幻靡常大勢所關應從何處下手則身在行間者必能挈其綱領該侍郎與該撫酌度機宜

卽著會同馳奏以慰廛念至德安縣城據文俊奏稱已被潯城賊匪竄踞是否周鳳山全軍遠撤致有疏失抑或居隆阿等堵剿不力致該逆復有竄出此路一有疏懈關係長江大局該侍郎等近日如何布置並著速行奏報將此由六百里各諭令知之欽此仰見

聖主睠懷南服宵旰焦勞

指示機宜燭見萬里臣等欽佩之下尤切悚惶伏查江西全省以贛水爲中路之經上發於贛南二府下達於鄱陽一湖吉袁瑞臨及極北之九南兩郡皆在贛水與鄱湖之西廣饒撫建及省會甯都州皆在贛水與鄱湖之東一水中分而兩岸州縣之

多寡地形之大小蓋略相等其袁州臨江二府之河名曰袁江至樟樹鎮而匯於贛河樟樹鎮者西近瑞臨東接撫建兩岸之關鍵省城之咽喉

諭旨垂詢最要之處

臣

等以爲此時形勢實以樟樹鎮爲最要

臣

國藩飭周鳳山陸軍彭玉麟水軍紮駐該鎮

臣

文俊又調周

尊彝林葆等之陸軍劉于潯之水師隨同駐紮用全力扼守樟樹鎮以保東岸以衛省垣前此正月初六日周鳳山由新淦回駐樟樹鎮之時本擬迅速西渡進攻臨江因搭造浮橋甫成爲二十一日狂風所壞而東岸無重兵扼守又恐一經渡河頓兵堅城之下反增東顧之憂此水陸嚴扼樟樹鎮未遽西勦之情

形也

諭旨垂詢何處賊情最爲凶悍一節查各路探報並搜獲賊中文書據稱金陵逆匪由湖北通城入江境者以僞翼王石達開爲首僞檢點賴裕新攻陷瑞州僞翼貴丈夏姓僞豫王胡以晄攻陷袁州僞春官丞相張遂謀夏官副丞相曾姓先攻臨江後攻吉安粵東另股土匪由湖南茶陵等處入江境者以周培春人數爲最多又有賊目葛耀明陳守鄧象盧緯等均於瑞州投入石逆大股之中賊目關志江陳植槐等均於臨江投入石逆大股之中賊目王義潮劉夢熊分屯吉安泰和亦已與石逆合併爲一又據周鳳山等稟稱吉安府城於正月二十五日失守

石賊於正月前赴吉安二月初十日復回臨江分遣賊黨攻圍
贛州又有鄂省新到之賊及興國土匪於二月初八日攻撲武
甯縣臣等細心察看石賊久踞臨江爲上下適中之地凶悍之
賊必萃於此南則窺伺贛州南安以通兩粵之餘匪北則踞守
武甯新昌以通九江之歸路全勢注於江西意圖盡披枝葉困
我省會凶謀詭計實可痛恨此賊匪各路分布之情形也

諭旨垂詢劉長佑一軍應由何路進剿一節查劉長佑在楚追
賊至道州因接札甚遲正月十五始回湖南省城旋帶兵由醴
陵前進月餉不敷起程稍遲道途梗塞尙無入江確信臣等愚
見擬令劉長佑先攻袁州俟克復後卽由分宜新喻直下與周

鳳山一軍會合以攻臨江不必先往吉安恐孤軍深入腹背受敵東不能抵江省西不能返湖南文報不達餉道不通有進退維谷之患此劉長佑一軍酌籌進剿之路也至德安縣城被賊竄踞一節上年臘月十七日有瑞昌興國州土匪竄入德安縣城賊目係武甯之葉至華興國之劉宗魁劉大中及炎九將軍林姓匪徒約二千人該縣與瑞昌毗連賊蹤來去不常聚散無定春初僅贖數百人正月十三日全數竄出嘯聚於瑞昌武甯之間二月初二日竄入武甯縣內被該縣兵勇追剿四散初八日有湖北新到賊股合之興瑞土匪攻撲縣城據湖北巡撫胡林翼專差咨稱武昌城內分出賊五六千人竄往下游恐入江

西等語不知攻撲武甯之賊是否卽武昌分出之股此土匪先在德安後竄武甯併入粵匪之情形也至周汝筠一軍設法疏通一節查搜獲僞文書內稱粵東賊目王義潮統賊萬餘阻禦泰和使周汝筠之師不得進援吉安臣文俊前因其救援不力曾經奏參摘去翎頂另調游擊遮克敦布統率各勇四千由樂安永豐一帶取道援吉詎遮克敦布起程數日卽得吉安失陷之信臣等卽令遮克敦布扼駐樂安屏蔽撫建擬令周汝筠退回贛州防守該府贛郡天然雄鎮爲古來必爭之地儻有疏虞則兩廣積年之零股湖南郴桂之餘匪皆將以贛州爲巢穴後患不可勝言臣等一面飭令駐贛文武設法防禦一面飭周汝

筠折回郡城協同環守惟賊眾兵單不得不急求外援相應請
旨飭下兩廣總督廣東巡撫迅派兵勇三四千人直赴贛州會
同戰守保此重鎮庶足顧全大局除吉安失陷文武殉難各情
另由臣文俊查明具奏外所有遵

旨會籌各路堵剿並請撥廣東援兵防守贛州緣由恭摺由驛
六百里覆奏伏乞

皇上聖鑒訓示施行謹

奏

186. 10. 1872. 10. 1872. 10. 1872.
 187. 10. 1872. 10. 1872. 10. 1872.
 188. 10. 1872. 10. 1872. 10. 1872.
 189. 10. 1872. 10. 1872. 10. 1872.
 190. 10. 1872. 10. 1872. 10. 1872.

單舟進省途次聞警片

咸豐六年二月二十一日

再_臣等自奉會籌軍務之

旨_臣文俊函請_臣國藩晉省面商一切_臣國藩以青山湖口水

陸兩軍外則關係長江大局內則爲本省東北藩籬未敢遽行
抽身赴省二月十八日接據省信樂安陸軍挫損賊蹤已近撫
州上游十分緊急等語不得已卽於是日單舟由南康起程赴
省十九日行至吳城鎮地方接周鳳山十四日樟樹勝仗之信
二十日行四十里又接周鳳山十七日勝仗十八日大敗之信
係由彭玉麟專函飛稟據稱周鳳山陸軍四十七連日血戰
俱幸獲勝十八日賊黨數萬層層圍逼我軍疲勞過甚眾寡不

敵全軍挫失營盤亦被撲去等語臣伏查我軍水陸全力扼守樟樹鎮雖陸軍僅四千餘人而勁旅已萃於此一旦挫敗所關極大該逆若直犯省城深爲可慮臣國藩一面單舟晉省會商城守事宜一面飛調湖口青山水陸各軍同回省城以固根本除勝敗各戰情形另行具奏外所有臣國藩單舟進省會商途次聞警緣由謹附片奏

聞

水軍先勝後挫請將營官參處片

咸豐六年二月二十一日

再正月二十九日青山水師赴下游姑塘一帶測探水勢猝遇賊船六十餘隻中兩岸駛上營官陳炳元等見賊開放鎗礮亦將各船分兩岸抵敵眾礮輪轟傷賊約數十名賊船紛紛敗退我軍追勦賊復回頭衝突我軍亦回擊賊又敗退鏖戰數時傷賊不少忽哨官彭雲漢船礮炸裂擊傷陣亡各船遂撤隊收回南風驟長賊船乘勢來鈔我軍且戰且走因有舢板船在後淺閣沙洲賊用挽鈎搭住船艏短兵相殺諸哨駛回搶救賊以多船包圍哨官周華堂奮勇突陣身被重傷猶手擒長髮互相投水爲他賊所殺別有三船亦不能救出共失舢板船六號傷亡

三十餘名伏查水師以南風爲大忌蓋以順風順水往則順而歸則逆進則易而退則難臣軍因南風致挫先後已經五次臣國藩諄諄誥誡屢次嚴行札飭此次各營擅違戒令南風出隊且各營哨並未會商隊伍錯亂未便因其挫損無多稍事寬容應卽嚴加參處營官藍翎知州銜選用知縣陳炳元花翎補用游擊劉國斌均請革去翎枝畱營以觀後效陣亡把總周華堂請

敕部議卹傷亡弁勇查明照例辦理所有水軍出隊先勝後挫請將營官參處緣由附片具奏伏乞

聖鑒訓示施行謹

奏

奏稿

調羅澤南回援江西片

咸豐六年二月二十一日

再石逆初陷瑞州臨江之時臣等奏請羅澤南帶兵回剿先後奉

上諭俟武漢克復酌量催調等因欽此現在賊氛日熾爲軍興以來各省所未見周鳳山等軍斷難翦滅疊接胡林翼等來函稱武漢之賊堅守不出我軍攻城不與賊兵鬪但與礮子鬪傷亡甚多攻堅良苦等語是羅澤南在鄂一時尙難得手臣等伏思軍情有緩急利害有輕重兩害相形則從其稍輕者假令武漢功在垂成亦斷不敢顧此失彼墮賊牽綴之計今旣勢難遽克與其頓兵堅城攻遙遙無期之湖北不如移師腹地救岌

奏稿卷一
五
宸將殆之江西武漢兩岸三萬餘人卽無羅澤南一軍亦尙足
敷防勦江省西南與湖南廣東接壤若不迅速殄除實爲三省
無窮之患除臣國藩苗商胡林翼等酌調湘勇回勦外謹合詞
陳懇請

旨飭下湖北撫臣速令羅澤南兼程來江援勦實有裨於大局
理合附片具奏請

旨

硃批另有旨欽此

請撥上海關稅片

咸豐六年二月二十一日

再江西餉項支絀各省道路梗塞惟江浙餉道可通查上海縣商賈雲集財物殷阜關稅極旺臣國藩昨奏請於該處抽取釐金尙未奉到

硃批目下需饗甚迫若待抽辦釐稅實屬緩不濟急合無仰懇天恩敕下兩江總督江蘇巡撫於上海關稅項下借撥銀十萬兩迅解江西以濟眉急如將來該處釐金辦有頭緒尙可扣還歸款謹合詞附片具奏請

旨

硃批戶部速議具奏欽此

藝
稿
卷
四

謝年終

恩賞摺

咸豐六年二月二十一日

奏爲恭謝

天恩仰祈

聖鑒事咸豐六年正月十五日准軍機處咨開咸豐五年十一月二十七日由

內交出年終奉

賞福字荷包銀錢銀鏹食物等項由驛遞到營當經

恭設香案望

闕叩頭祇領竊

臣

猥以庸愚謬司撻伐愧愆尤之叢集荷

覆載之優容迺以歲籥更新復蒙

恩膏特沛覩

雲章之藻麗福自

天申識寶氣之瑤煌品徵夏貢歡擎

賜果更頒珍饌於

天廚瑞迓

錫鞶共沐殊施於

內府凡此非常之

寵賚實爲逾分之光榮未靖烽煙彌覺駒光之虛度渥承

雨露倍驚鼇戴之難勝臣惟有所宵惕勵殫竭血誠以冀仰答

高厚鴻慈於萬一所有微臣感激下忱恭摺附驛馳奏叩謝

天恩伏乞

皇上聖鑒謹

奏

孝和卷一

三

請頒給捐生執照摺

咸豐六年二月二十一日

奏爲捐輸實官人員開單彙奏請

旨敕部注冊頒給執照仰祈

聖鑒事竊

臣

咸豐三年奉

命肅清江面奏明隨地勸捐其捐職銜者業於請頒空白部監
各照內隨時填給其捐實官者例須專摺奏明咸豐四年十二
月二十五夜大江襲營之役

臣

之座船文案全行遺失所有衡

州等處捐生履歷清冊一併失去遲延未及具

奏旋經行取各屬捐生補送履歷前來理合彙繕清單請

旨敕部注冊卽將應得議敘頒發執照遞交

臣

營轉發各捐生

祇領至勸捐助餉理應迅速獎敘臣具奏遲延請

旨將臣交部照例議處所有捐輸實官各員開單請獎緣由恭

摺具奏伏乞

皇上聖鑒訓示施行謹

奏

硃批戶部覈議具奏單併發曾國藩著改爲交部察議欽此

糧臺委員丁憂畱營片

咸豐六年二月二十一日

再臣軍糧臺提調湖南補用知府李瀚章委員湖北補用知縣張秉鈞隨臣三年管理軍餉綜畫靡遺勾稽詳慎洵爲得力熟手先後在營聞訃丁憂又直隸藁城縣知縣黎福疇在任丁憂經臣調赴軍營襄辦糧臺事件現值軍務喫緊該三員辦事妥協應令畱營當差張秉鈞黎福疇聞訃之時曾經回籍經臣札調來營李瀚章並未回籍該提調綜理全局實無他員可以替換應請照上年臣奏畱李孟羣成案俾得終始其事實於臣軍大有裨益除該員丁憂日期業由本籍及任所分別呈請咨部查核外附片奏明請

旨敕下該部查照辦理謹

奏

硃批該部知道欽此

請給營員

封典片

咸豐六年二月二十一日

再軍營出缺向例先儘在軍人員拔補臣軍多係勇目出身營中無缺可補所有保至參游都守千把等官均未補有實缺文職由道府以至佐雜亦未能赴選得缺頃接胡林翼來咨布政司銜羅澤南鹽運司銜李續賓以戰功尤著請給予二品三品封典欽奉

特旨允准在案伏查臣軍水陸各營打仗奮勇者實不乏人恭逢上年十月二十日

覃恩慶典該員等以未經補缺不得仰被

榮施合無籲懇

皇上天恩准照羅澤南李續賓之例容臣擇其尤爲出力者照保舉之升階咨部請給

封典其曾經告假回籍者概不准給俾在營之士卒咸知戰陣無勇不得爲孝卽在家之父兄亦必互相訓誨勗其立功足以杜絕勇目紛紛告假回籍之陋習於鼓勵戎行之道實屬大有裨益是否有當謹附片具

奏請

旨

周鳳山陸軍回紮省垣摺

咸豐六年三月初一日

奏爲周鳳山陸軍在樟樹鎮大勝一次先勝後挫一次大敗一次現已回紮省垣恭摺具奏仰祈

聖鑒事竊臣等因樟樹鎮爲四達之地全力扼守周鳳山連日接仗各情業經附片奏

聞在案緣二月初八九日探聞石達開由吉安回臨江帶賊數千名船二百餘號屯踞永泰地方十一二日又探得臨郡賊匪由沙湖渡至東岸欲分三路來襲等語周鳳山因永泰沙湖皆距樟鎮三四十里易進難退該處東近荷湖大橋前途新淦縣復爲賊據又可由小路繞至豐城來襲我後路途徑歧雜每日

派人輪流巡哨急圖進剿嗣知橫梁荷湖兩處各有賊三四千名迨十三日賊以數百人至樟鎮隄上河邊兩路游探經彭玉麟督率水勇擊退河邊一股礮斃長髮數名陸軍繼至亦將隄上之賊擊退周鳳山以該逆逼近我營必須痛剿十四日卯刻派四成隊紮大橋以防荷湖之賊兼顧老營後路水師戰船亦紮臨江河口以遏賊船下竄周鳳山親督五營並約水師進剿橫梁黎明行過樟鎮數里至狗頸隄地方見賊四股約五千餘人以一股紮河橋一股紮隄左兩股紮河邊沙洲勢甚嚴整周鳳山急調大橋兵勇迎擊左路自督諸軍堵擊橋上一股彭玉麟見無賊船出河又慮河邊之賊包鈔隄上陸軍腹背受敵遂

令水師登岸協勦並以大礮轟擊賊亦鎗礮連環施放都司畢
金科李新華各帶兵勇併擊沙洲裏面一股賊合爲一我軍奮
勇前進刀矛並舉衝突數次斃賊百餘名賊猶抵死鏖戰橋上
之賊被斬及溺斃者數十名不能抵敵遂亦回奔我軍乘勢猛
進賊眾始敗隄左一股經都司周岐山唐得陞等擊斃及追逼
入水死者約三四百人賊亦同時敗潰我軍會合沿途復追斬
二百餘人並斬騎馬賊目三名直抵橫梁該處賊於民房外已
先紮營三座其內賊黨尙眾敗賊至此有窮奔兔脫者有藏入
民房者經我軍圍住放火焚燒羣醜屍骸悉成灰燼申刻收隊
荷湖之賊因我軍扼守來路亦未敢深入是日奪獲大銅礮一

尊擡礮鳥鎗刀矛二百餘件號衣旗幟八十餘件共殺賊七八百名我軍陣亡四名受傷四十餘名此十四日接仗大勝之實在情形也十六日石逆率眾數萬過河分據橫梁香溪一帶周鳳山聞賊以全力來撲預飭各營同心協勦十七日辰刻約水師分路馳擊行過樟鎮見賊約三千人由狗頸隄斜入香溪西路各營奮勇衝鋒殺賊百餘奪獲器械旗幟多件此股已經敗退隄上河邊復有賊兩股經彭玉麟督飭水師擊退亦斃賊多名我陸軍進徧香溪猝遇賊之大股香溪地勢寬敞東有山坡賊分四隊佔據都司滕國獻周岐山帶勇由右衝擊賊已敗退正追殺閒山左復出賊一股因守備岳炳榮千總黃玉芳等不

能抵敵滕國獻等遂率右路之勇回隊極力堵截不料大股賊匪由後蜂擁而來我軍鏖戰逾時傷亡不少此十七日先勝後挫之實在情形也十八日早周鳳山與彭玉麟商籌進攻賊匪已四路前來撲營當派七成隊迎擊參將阿達春與畢金科周岐山唐得陞等帶勇抵禦東北李新華與都司林保知縣周尊彝帶勇抵禦西南岳炳榮黃玉芳在後接應時西路隄邊彭玉麟已派礮船幫擊各營搖旗吶喊奮力衝突遙見樟鎮西南及大橋東北四面有賊十餘股畢金科周岐山等所擊東北之賊業已回奔其西南之賊亦經李新華林保等衝擊兩處各斃賊多名維時西南逆賊見東北賊敗遂向我軍之外繞沖東路鈔

在我軍之後岳炳榮黃玉芳等力難擋拄紛紛潰敗逆賊乘勢
緊逼重重圍裹致西南路各營不能兼顧轉爲大敗傷亡兵勇
幾近千人營盤全失糧臺委員前任甯鄉縣知縣馬丕慶候選
訓導林長春候選府經歷李清華罵賊捐軀此十八日接仗大
敗之實在情形也據周鳳山先後稟報前來臣等伏查該副將
自臘月初四克復樟鎮本應乘賊不備速攻臨江乃顧慮東岸
之賊未敢急進逮該逆已破吉安各路悍賊畢集樟鎮勢遂不
支此次雖因連日血戰疲憊之後眾寡不敵致遭挫衄然該副
將失機於前貽誤於後咎無可辭廣東羅定協副將周鳳山應
請卽行革職都司銜守備岳炳榮應請革職守備銜千總黃玉

芳應請革去守備銜周鳳山黃玉芳仍畱營效力以觀後效

臣

國藩奏派周鳳山接統九江陸軍保奏失實請

旨將

臣

國藩交部議處至陣亡前任湖南知縣馬丕慶請開復

原官照知縣例從優

賜卹雲南候選訓導林長春湖南候選府經歷李清華均請

敕部從優議卹傷亡兵勇查明照例辦理所有周鳳山陸軍在樟樹鎮前後開仗緣由謹合詞恭摺具奏伏乞

皇上聖鑒訓示施行謹

奏

王

...

...

...

...

...

...

...

撫州失陷調回水陸各軍片

咸豐六年三月初一日

再臣國藩於二月十八日自南康起行赴省二十一日到城與臣文俊會商防剿事宜頃據探報撫州府城於二十二日夜失陷撫州與廣信接壤難保不竄擾廣信該府爲奏報進京江浙轉餉之路一有疏虞四面梗塞後患何堪設想現調湖口李元度一軍由饒州繞回進剿撫州以保廣信調青山水師退紮吳城鎮青山陸兵調赴省城上年九江湖口水陸萬餘人今全數撤入內地長江之大局莫顧東北之藩籬遽弛前功盡棄回首心傷然腹地無兵可調舍此亦別無他策目下所望以挽回全局者在內惟李元度一軍在外惟羅澤南劉長佑二軍袁臨之

路久梗劉長佑迄無入境確耗其羅澤南一軍及廣東防剿贛
州之師請

旨再行飭催迅速來江援剿浙閩兩省與廣信建昌毗連請
旨飭下該省督撫嚴密防堵以免竄越至周鳳山一軍現在省
收集潰散臣國藩暫行統轄能否整理就緒容俟續奏所有近
日各路軍情理合附片奏

聞伏乞

皇上聖鑒指示機宜謹

奏

平江營克復進賢縣城摺

咸豐六年三月二十六日

奏爲陸軍平江營兩路在湖口羅溪先後各獲勝仗克復進賢縣城恭摺馳奏仰祈

聖鑒事竊候選同知李元度一軍自湖口調赴饒州保全東路曾經會奏在案湖南之平江縣與江西之義甯州接壤風氣強健多經歷戰陣之士臣國藩上年招募平江勇飭李元度練成一軍臣文俊到任以後又募平江勇二千餘人飭派候選知府鄧輔綸候補同知林源恩一同統帶自周鳳山樟鎮失利以後臣等二人熟商將兩處平江勇併成一軍共得六千餘人李元度自饒州而來鄧輔綸林源恩自省城而往約會於進賢東鄉

等處翼以保全廣信而規復撫建先清省東之一路方李元度自湖口拔營赴饒之時逆黨探知消息於二月二十二日出先鋒馬七騎近營窺探我軍轟礮逐之二十三日卯刻逆黨復出千餘人黃旗數百面分三路來撲我軍堅壁不動俟其逼近橋壩左營哨官賴準發轟礮連斃三賊落馬營官彭斯舉胡蓋南羊瀛吳齊源等分三路鈔擊殺賊六七十名內黃馬掛騎賊一名追至黃土嶺逆首黃文金勒馬督隊各勇排礮指擊傷其坐馬各勇攢刃立斃餘賊奔潰追入湖口沿途鎗礮傷賊約五六十名午刻收隊奪獲黃馬掛偽印官照軍械等件我軍亦傷亡十二人此二十三日李元度在湖口接戰獲勝之實在情形也

二十九日李元度一軍行抵饒州是時樟鎮新挫撫州淪陷饒屬之餘千萬年皆有賊蹤贛南道耆齡在饒州防堵兵力單薄人心震驚遷徙幾空恰值李元度之師自湖口東來闔郡爲之欣慰而餘千萬年之賊雖去饒僅數十里竟不敢直犯府城臣等因飭李元度畱駐饒州半月而令鄧輔綸林源恩自進賢一路前往東鄉以圖會合進剿三月初七日鄧輔綸林源恩自省城起行臣等又派周鳳山帶本營勇八百前往助剿十一日行抵羅溪地方該處左右皆湖中惟一路延亘二里並行可二三人方春水漲隄石衝壞險仄難行實惟進賢要隘爲賊所必爭之地該逆排立湖岸旂幟紛紛礮聲四起鄧輔綸林源恩等督

飭各營直前迅行馳過湖路該逆分三路來撲突於松林竄出千餘人賊目手執大黃旗招引眾匪都司周岐山等帶領鳳字營迎頭勦殺隨有賊千餘人由隄路鈔擊點放火箭噴筒鄧輔綸等派左營耿光宣李晉發帶領五哨沿隄截勦李晉發赤足爭先連躍數港刺賊多名旋有匪艇數十隻駛至河畔意圖鈔襲我軍右營高夢漢隨帶七哨攔河擊退繞至隄右截殺鄧輔綸等督帶中營寶勇都司畢金科接應後路該逆力不能支紛紛敗退奔回進賢縣我軍追擊十餘里始行收隊計共殺斃賊匪二百餘名取首級六十八顆奪獲旂幟刀矛藤牌擡鎗六十二件此十一日鄧輔綸等羅溪接仗獲勝之實在情形也十二

日黎明林源恩督帶中營勇五隊當先鄧輔綸領五隊繼之左營耿光宣右營高夢漢分二翼以擊其傍都司畢金科緊爲接應周鳳山督率鳳字營嚴防河畔恐賊由撫河而來襲我之後布置已定各營遶行離進賢縣城三里卽有長髮賊數千從林間蜂擁直前勢甚兇猛林源恩帶前隊疾馳迎擊我軍士氣百倍立砍斃長髮賊一百餘名內僞參贊周姓一名典糧一名奪獲龍虎旗僞印等件隨點放劈山大礮及各排鎗轟斃四五十名該逆退奔各哨急追兜擊寶勇隨同接應復共殺斃八九十名共獲旗幟刀矛二百餘件鎗礮子藥無數中營哨勇由西北角梯繩登城殺守垛賊十餘人燒燬望樓大呼同進耿光宣李

晉發由小路飛奔城下繞至東門正值該逆啟門潛逃耿光宣攔入截擊李晉發手刃僞指揮一名該逆抵死奪門爭逃我軍復掩殺八十餘名生擒僞司馬及真長髮三名奪獲刀矛鎗礮旗幟百餘件克復城池右營高夢漢戴鎮亦從西門衝入周鳳山畢金科由後路追入各有斬馘奪獲軍械甚多前後共斃賊五六百名追至二十餘里而還縣令史昌壽帶勇隨同克復卽飭料理善後事宜安撫居民諭令薙髮此十二日進勦獲勝克復進賢縣城之實在情形也伏查省東撫建廣饒四府皆以進賢爲咽喉必經之路此次兩戰克復東路漸有轉機臣等現飭李元度自饒州起程與鄧輔綸林源恩等會合迅往撫州圖克

郡城所有陸軍平江營兩路獲勝克復進賢各緣由恭摺由驛
馳奏伏乞

皇上聖鑒訓示施行謹
奏

吳城水師勝仗摺

咸豐六年三月二十六日

奏爲吳城水師三獲勝仗並各處水師分布情形恭摺馳奏仰祈

聖鑒事竊二月閒樟樹鎮陸軍失利

臣

國藩馳赴省城將青山

陸軍調至省垣紮營城外湖口陸軍調至饒州以保東路青山水師調至吳城以防下游業經奏明在案水師於二十六日行抵吳城湖口賊船亦卽尾追而上分泊於老爺廟渚磯等處而德安建昌之士匪與湖口梅家洲之老長髮聯爲一氣日夜耽耽冀圖撲我水師我水軍各營哨弁驟與臣國藩相離又與陸軍相離值風鶴迭驚之時處水陸四面皆賊之地未免中懷怯

懼臣等因調彭玉麟由樟樹馳赴吳城以資鎮攝三月初二日彭玉麟尙未到防有陸賊數百人蜂擁而來至吳城後河西岸搭造浮橋賊船亦至河口之下左營陳炳元右營鄧翼升後營丁義方以長龍船紮泊前河前營親兵營各船紮泊後河而分舢板之半由前河直下包鈔賊船以一半赴後河攻勦陸賊該匪見官軍直下賊船遂退竄渚磯而陸賊排立望湖亭對岸施放鎗礮我軍以舟中之礮擊岸上之賊未能取勝遂飭各水勇一躍登岸揮旗直前刺殺長髮十餘名陸賊紛紛敗北我軍窮追約二十餘里直至德安河口奪獲軍械大轎等件賊船之下竄者水軍亦追逐十餘里後河上通建昌縣恐有賊划藏匿復

沿河上泝將小划概行焚燒此初二日水師登陸接仗獲勝之實在情形也初四日彭玉麟抵吳城鎮飭各營嚴密防範十二日有陸賊約千人由涂家埠搭浮橋而來至吳城上游分股鈔出彭玉麟派嚮導左右三營舢板至前河上游攻擊陸賊後營舢板紮駐後河防下游之賊船仍派長龍大船之勇登岸陸戰賊之至河干者我軍舢板排礮齊發轟斃賊十餘名該逆無所遮蔽遂退入隄內鈔出直竄街市我水勇初改陸隊已至街尾與賊相遇火器刃矛兩相攻擊數進數退我軍突起直前傷斃二十餘名該匪敗北追至小港之前鳧水而遁我軍因後河陸賊尙多未及窮追後河股匪見前岸已敗亦卽回竄據生擒賊

勢和卷十

三

匪供稱是日礮斃僞檢點周姓一名該逆火箭噴筒水老鼠等件甚利係潮州之匪新投賊營等語此十二日水陸獲勝之實在情形也彭玉麟以吳城水營之患不患下游湖口之水賊而特患德安建昌之陸賊陸賊之來係由涂家埠搭浮橋而過必先清陸賊來路之源我水軍始有安枕之日並探得賊由奉新等處擄來船隻百餘號聚集涂家埠意將水陸來撲我營彭玉麟與各營熟商涂家埠去吳城僅六十里與其待賊來而應之不如我先往而擊之遂派後營嚮導營駐守吳城左右兩營前往涂家埠攻剿十四日丑刻前進飛槳疾行午刻抵涂家埠見賊浮橋二道甚爲堅固橋內灣泊賊船約百餘號我軍船一齊

駛進該逆用擡鎗抗拒鏖戰逾時我軍點放排礮子如驟雨賊勢稍卻各勇一鼓衝入砍斷錨本篋纜拆毀浮橋二道賊見我軍衝過浮橋將所擄船隻急開往建昌河而去每船有賊四五十人護衛我軍乘勢尾追賊之民船不及我戰船之輕便須臾追至拋擲火彈一船焚燬眾賊驚慌或被礮擊斃或烈燄焚燒或投水自盡或登岸竄逃我軍見賊大潰極力窮追約十餘里建昌縣城之陸賊分兩岸前來援應我軍恐深入有失漸次收隊援應之賊沿岸追趕河仄岸高不便攻擊我軍船仍回至涂家埠見河岸平坦復開放排礮攢擊陸賊轟斃數十人賊復敗退逃匿民房之內時已黃昏遂收隊夜回吳城計燒賊船數號

奪獲二十餘號生擒長髮二名旗幟器械刀矛衣物甚多此十四日至涂家埠拆賊浮橋大獲勝仗之實在情形也臣等伏查內湖水師自去歲駐紮青山姑塘以來東岸有湖口陸兵西岸有青山陸兵兩相依護聲勢甚壯一旦與陸軍遠隔駐泊吳城孤懸賊中幾有防不勝防之慮茲幸兩次登岸陸戰一次遠出迎擊俱獲勝仗從此應可堅駐該處保障下游自吳城而外臣等又分派都司金世蓮府經歷賀虎臣水師兩營駐紮饒州南河知府劉于潯游擊劉國斌水師兩營駐紮市汊把總何啟長一營駐紮省河相去均在三百里內以防上游之賊擄船衝出外江之賊駛船內犯布置尙爲周密理合一一陳明所有吳城

水師三獲勝仗並各處分布水師緣由恭摺馳奏仰慰
宸廑伏乞

皇上聖鑒訓示施行謹

奏

劉長佑援師克復萍鄉縣城摺

咸豐六年三月二十六日

奏爲道員劉長佑統帶湖南援師疊獲勝仗克復萍鄉縣城恭摺馳奏仰祈

聖鑒事竊臣等於三月二十五三月十四日先後接據統帶湖南援師卽選道劉長佑稟稱正月二十三日由湖南省起程馳赴醴陵營次所部各營兵勇分爲兩路一由瀏陽進攻萬載一由醴陵進攻萍鄉二月初四日劉長佑親督楚勇二千餘名進紮萍鄉之黃花渡地方因西南小路可鈔我軍之後遂畱守備黃三清之勇暫駐醴陵派都司田興恕守備梁開國之勇暫駐萍鄉之油塘鋪初六日往葡萄嶺相度營盤地勢行抵離萍城

十里之青山鋪探報有賊數百悉伏山後劉長佑派守備梁開國千總石有周前往偵邏擊斃二十餘賊忽城內擁出大股約三四千人分三路鈔來梁開國石有周等且戰且誘回至青山鋪劉長佑率勇由中路迎擊鎗礮齊施刀矛並舉該逆紛紛退向山坡欲助左右兩路併力來鈔我軍百長許繼衡等與黃三清祁勇由左路迎擊百長李明惠等與田興恕虎威勇由右路迎擊梁開國衝入賊隊手刃紅衣賊目許繼衡等復從松林截出殺賊百餘名左路敗退時右路之賊猶欲傍山來鈔我後勇目沈宏福等不避矢石衝上山頂該逆勢蹙多從懸崖墜斃兩路直逼城根城內賊復悉眾出巢計將乘我我軍返旗回擊將

賊隊衝爲兩段復大敗之計斃賊三百餘名割級七十五顆奪獲鎗礮旗幟刀矛無算此初六日在青山鋪與賊接仗獲勝之實在情形也初七日劉長佑飭令田興恕梁開國移營黃花渡楚勇與黃三清祁勇進紮葡萄嶺定於十一日進攻萍城方於卯刻出隊該逆已蜂擁前來撲營劉長佑派百長李明惠等出擊左路許繼衡等並黃三清祁勇出擊右路殷開選等擊中路見黃衣賊目於葡萄嶺峽撲來鄭金華身先陷陣鎗斃持令賊而前隊猶死拒不退劉長佑潛由路旁田隴橫鈔以出該逆後隊敗退首尾不能相應黃衣賊目與匪眾迫欲退走已被我軍前後裏圍時左右兩路之賊業經奔潰因賊首被圍回頭衝突

欲求救護我軍分投截殺田興恕梁開國等俱至該黃衣賊目被圍愈急與其黨悉匿賀家民房猶於牆壁鑽穴暗施鎗礮並率老長髮百餘名躍立屋上拋擲磚瓦火彈我軍百長李光祝唐三祚等短兵直入該逆放火延燒門壁其冒火衝出者悉被我勇截殺黃衣賊目脫卸衣帽口咒數遍撲火自焚賊黨二百餘人俱成灰燼時各路之賊知賊目被焚心寒膽落拋棄器械鼠竄入城我勇環攻逾時飢乏收隊是日約斃賊千數百名生擒七十餘名割首級三百八十顆奪獲器械旗幟無算劉長佑以該逆經此痛勦自應乘勝進攻迅圖克復傳令次早攻城四更時遙見城外火光四起探報土匪逃散該逆將城外各巢自

行燒燬勢將他遁卽乘月督隊前往黃三清李明惠等由城西
大路進攻田興恕梁開國等由城北小路截出該逆望風驚潰
自相踐踏我軍一面追勦一面入城安撫子黎此十一日大獲
全勝十二日克復萍鄉縣城之實在情形也其另一路之由瀏
陽進攻萬載者爲候選同知蕭啟江把總楊恆陞兩營二月初
九日紮駐萬載之株樹潭十一日察看地形分布各隊遙見株
潭南岸有賊千餘由樹林直趨平岡又有賊千餘繞出河邊欲
鈔我勇歸路復有賊二千由市口渡橋飛奔而來繞出營盤之
後把總周崇高率四哨勇與平岡之賊相持蕭啟江急馳平岡
助戰忽山下有賊千人蜂擁而至乃麾令軍功彭文德等併力

抵住而把總朱桂秋等亦馳至鈔擊賊遂潰奔蕭啟江率外委周友勝等由渡橋直趨市口回顧營盤適橋邊之賊已爲把總楊恆陞等從後追勦蕭啟江復進逼山下之賊楊恆陞亦張左右翼鈔之賊被圍紛竄我軍節節追逼逃者無幾逾時三路之賊忽合撲營壘守營之蕭啟淮等派三成隊從營中擊出四面進蹙該逆欲逃無路溺水死者不可勝紀是日約斃賊千餘人生擒五十餘名此又瀏陽一路在萬載株潭接仗獲勝之實在情形也劉長佑以萍鄉萬載之賊均經痛勦自應乘勝直取袁郡惟萍萬兩邑路徑紛歧沿途市鎮均有賊據猶恐我軍深入賊或鈔出我後致有顧此失彼之虞仍擬分派各營節節搜勦

一俟兩路會合然後併攻袁州等語先後稟報前來臣等伏查萍萬兩縣與湖南接壤山路歧雜最易藏奸長髮土匪勾聯一氣若非步步廓清卽恐深入賊地腹背受敵已批飭劉長佑節節搜剿庶免疏失所有湖南援師克復萍鄉緣由恭摺由驛馳奏伏乞

皇上聖鑒訓示施行再此案因道路梗塞稟到稍遲湖南巡撫或已先行具奏合併聲明謹奏

近日江省賊情片

咸豐六年三月二十六日

再二月二十三日賊匪竄撲撫州二十八日竄擾建昌臣等方以廣饒二府爲慮適李元度一軍自湖口來饒而大股賊匪於二十六七等日自萬年安仁竄至安徽之婺源祁門等縣據各路探報互有同異或云該逆因金陵窮蹙僞翼王石達開帶大股賊二三萬人東下救援或云廬州官軍攻勦桐城甚急石逆回救安慶之集賢關或又云石逆尙堅據臨江府城派廣東新附之賊下救金陵各等語臣等伏查石逆現在何處雖無確耗而萬年安仁等處實有賊二三萬人經過下竄婺源此則人人共見眾口一詞臣國藩已飛函馳告向榮軍營目下江西賊勢

奏稿卷十
聖
稍分勦辦較易措手臣文俊督飭司道講求城守事宜料理差
爲完備臣國藩收集潰散陸軍裁併訓練擬卽派赴西路攻克
近省各屬以冀肅清腹地所有近日江省賊情理合附片馳奏
仰慰

聖主宵旰廑系之至意謹
奏

分別保獎水師摺

咸豐六年三月二十六日

奏爲陸軍無庸保獎水軍仍遵

旨開單請敘分別奏明仰祈

聖鑒事竊臣等於上年十二月間因水陸兩軍克復樟樹新淦
請將出力人員保奏欽奉

諭旨允准凡在行間將弁自應感激

天恩益圖報效乃本年二月十八日樟樹陸軍潰敗以致賊黨
蔓延前功盡棄除周鳳山岳炳榮等業經奏參革職所有陸路
員弁應一概無庸保奏以示懲警而勵戎行至水軍三營前在
樟樹協勦屢勝現在市汊吳城饒州等處駐防經理有條並無

奏和卷十
挫衄自應遵照前

旨擇尤保奏爲此開單呈

覽籲懇

鴻恩俯准獎敘於激揚士氣之道實有裨益謹分別具奏伏乞
皇上聖鑒訓示施行謹

奏

官軍克東鄉縣城進剿撫州摺

咸豐六年四月二十一日

奏爲官兵克復東鄉縣城進剿撫州破賊五營並全軍渡河連日圍攻撫城各情恭摺馳奏仰祈

聖鑒事竊三月十二日鄧輔綸林源恩等克復進賢縣城業經奏報在案嗣據李元度稟稱三月二十日行抵安仁東鄉二縣交界之白港遇有逆黨窺探卽派哨官賴準發等追擊直至東鄉縣城時僞監軍熊近光僞軍帥錢懷榮在城盤踞並有撫州新來之賊二百餘名經賴準發等擊殺四名生擒十一名餘黨竄往撫州適署東鄉縣令吳朗亦帶團勇趕到因令入城安民此三月二十日李元度克復東鄉縣城之實在情形也二十二

日鄧輔綸林源恩周鳳山等齊到東鄉與李元度一軍會合分
紮南關外共八千餘人冀先規復撫州撫郡之賊聞官軍將至
調集醜類希圖抗拒二十三日僞指揮李逆率眾三四千人分
三路來犯我軍出隊迎擊哨官周友勝等奮力衝突立殺悍賊
數十名僞官十餘名該逆紛紛潰退追至八里外之石橋仆水
者數百人兵勇攢矛溪水盡赤逃匪之過橋者營官彭大壽等
窮追三十五里適賊在民房解甲傳餐兵勇圍勦復殺三百餘
名當斬僞指揮李逆梟其獅帽紅袍並殺黃馬褂僞官一名午
刻收隊回營查明鄧輔綸林源恩一軍殺賊六百餘名李元度
一軍斬馘三百餘名共生擒一百七名奪獲旗幟號衣軍裝無

算馬十六匹此三月二十三日撫州之賊來撲東鄉我軍迎勦大獲勝仗之實在情形也二十五日進紮汀橋距郡城十里探知城河東岸有賊營數座彭斯舉等察看地勢遇賊來撲斬獲十餘人日暮歸隊議休息一日大舉夾攻二十七日卯刻大霧迷漫我軍行近賊壘賊始知覺中路林源恩首攻橫街口賊營該逆將民房數所併爲一營增立磚城木柵左據大溪爲濠右因小港爲塹鹿角鐵菱森立環布隘口砌石成臺畱門置礮勢極堅固守備周友勝呂克生等偕勇直撲鎗礮齊施該逆從礮孔轟拒我軍且撲且進受礮傷凡數十人各勇愈加憤勵從礮石雨注之中拔地刺而入適放礮子落賊藥桶賊中火起各勇

乘勢從礮門緣入連殺百餘賊又擲火彈中賊之藥局烈焰衝霄焚勦殆盡橫街口一營旣破遂分攻正覺寺兩營耿光宣李晉發等攻迤左一營高夢漢督勇昇礮擊斃望樓之賊數人立燬其樓各勇躍入縱火該營遂破彭斯舉等攻迤右一營斬關直入亦縱火焚之賊營只立兩門緊閉千金聞火起猝不得出攀簷上屋紛紛墮烈燄中兩營相繼而破維時左直街尙有一營餘賊方欲逃入不料已爲彭斯舉等所圍先鋒唐廷健等拋擲噴筒煙燄蔽空林源恩陳大力高夢漢耿光宣等營及周鳳山之勇左馳右突圍殲立盡又有河東灣一營爲吳齊源彭大壽等繞道圍攻該逆閉門轟礮死拒哨官賴準發首從礮孔撲

入童梅華等各放噴筒賊首累累然從牆隙探望數以千計轉瞬火發有緣樹顛自擲而死者有跳牆外被刺而死者文昌橋以東五營一時盡破轟斃殺斃溺斃燒斃約共五六千人生擒百餘人奪獲三四百斤大礮五尊銅礮子母礮各二尊擡鎗刀矛旗幟號衣藤牌虎叉等物一千四百餘件查點我軍陣亡十六人受傷百餘人此三月二十七日在撫州勦賊連破五營之實在情形也賊之在城內者阻水爲固以巨礮橫截文昌橋我軍因移營南城外之千金坡擬從上游搭橋過渡四月初二日李元度督勇綰搭浮橋城內二三千賊分股來撲一從清風門過河埋伏千金坡之樹林中一出文昌橋鈔我後路一從五里

塘對岸列陣阻截造橋之處鄧輔綸派二營從右隄上鈔截林源恩率勇迎擊中路周鳳山從左邊隄上邀擊平江中營右營等過港尾追該逆紛紛退走追至文昌橋畔逆黨鼠伏亭中從石窗內開鎗抵禦相持至四時之久方鏖戰時李元度念造橋難成不若乘隙飛渡之爲先著因令左營新中營用小划木筏先濟各哨繼之大半解衣褫水不過兩時卽已渡訖其城東各營酣戰者聞渡河之師已畢始從文昌橋收隊是日楚師直逼城下與江軍夾河而營次日全軍畢渡同紮五里塘此四月初二日在千金坡禦賊乘閒潛渡之實在情形也全軍旣已渡河卽可乘勢進攻初四日定議鄧輔綸等所部各營攻南門清風

門周鳳山及寶勇等攻西門李元度所部各營攻北門均備長梯以便乘墉而上城上城下鎗礮對放斃賊約二百名我軍受傷者亦有二百餘人午後鼓勇復進而大雨如注火器盡溼遂傳令收隊初七夜分路襲城以該匪準備嚴密無隙可抵初九日進紮西南隅距城止半里許該逆出城分撲各營且紮且戰殺賊七八十名賊遂閉城拒守是夜李元度等分隊攻城輪班更替次早逆匪傾巢而來我軍短兵相接自辰至午酣戰三時周鳳山親自衝鋒唐德升尤爲驍健雖殺賊僅四百餘人而迴合苦戰誓死不退兇悍實異尋常我軍傷亡亦近百人此四月初四初七初九初十等日夜在撫郡攻城士卒奮勵之實在情

形也伏查李元度自克復東鄉以來步步爲營與鄧輔綸林源恩之師會合聲威頗壯進逼撫郡連破賊營晝夜環攻士卒洵屬用命惟城內悍賊堅守如故而建昌瑞臨之匪猶敢伺隙來援臣等現派水陸兩營扼紮李家渡地方以絕逆黨應之路仍接飭各軍激勵士心以期克復要郡先清東路所有克復東鄉縣城進剿撫州連破五營並全師渡河攻城獲勝各情恭摺由驛奏

聞伏乞

皇上聖鑒訓示施行謹奏

克復建昌縣城摺

咸豐六年四月二十一日

奏爲官軍水陸克復建昌縣城旋復進攻瑞州奉新未能得手
恭摺馳奏仰祈

聖鑒事竊南康青山陸軍調省紮營城外及吳城水師三次獲
勝均經奏明在案臣等以水師無陸兵依護恐致挫失二月十
五日札調都司黃虎臣督帶三營馳赴吳城護助水師相機攻
勦建昌縣陸軍至吳城鎮搜勦涂家埠等處二十二日約會水
師後營丁義方嚮導營孫昌國同往進攻建昌縣城該縣西南
兩門臨河前營胡應元帶弁勇從下游渡河黃虎臣李大雄帶
各弁勇從上游渡河我軍半渡之時賊匪分三路來迎南門出

賊約二千餘人排列沙洲西門出賊千餘人前抵河岸東門出賊亦二千餘人於隄上包鈔欲截我軍之尾勢均兇悍黃虎臣派李耀南朱邦武等衝擊沙洲胡應元帶勇進擊河岸李大雄帶許志清等直攻隄上水師亦開礮轟擊以壯聲勢朱邦武奮不顧身首先陷陣手刃數賊中鎗陣亡各弁勇不稍怯退發奮爭先是時哨官許志清衝鋒突陣殺一賊曰並奪其馬被他賊矛搥而墜我軍幾不能支黃虎臣與各營哨商曰今日前有堅城後有河水一退則全軍皆沒不如併力進戰幸而獲全於是人人皆知背水之險爭前血戰適黃載玉馳救許志清得脫於難須臾轉爲大勝賊眾紛紛敗北我軍追勦殲斃約四百人撲

水溺斃者不計其數黃虎臣等勒馬縈迴周城馳驟指揮環攻水師亦出旱隊協攻該逆閉城抗拒城上礮石驟如雨下火包火箭紛落烈燄蔽空我軍負傷雖眾猶復拽樹梯城至日暮始行收隊回至二里半地方駐紮黃虎臣以逆賊受此大創眾已膽寒卽與各營官計定乘夜復攻三更時攜帶火器前進五更復抵城下四面圍攻李大雄首先登城拋以火蛋焚燒賊棚各門亦先後齊登賊突北門敗走我軍一面追勦一面窮搜城內餘匪殺斃數十名城上賊棚概行燒燬東門延燒民房立卽撲救在城安撫一日仍卽收隊回省此二十二三等日在建昌大獲勝仗克復縣城之實在情形也四月初四日復由省城派黃

虎臣等營進攻瑞州府派水師之駐市汭者前往會勦大雨如注日夜不息初六日陸軍紮營距城十五里之祥符觀黃虎臣帶勇百餘名赴城下探視情形猝遇騎馬賊目亦帶匪百餘出哨我軍向前衝擊殺斃長髮及溺死者十餘名初七日進攻城垣瑞州府分南北兩城中跨一河四面環以深濠該逆負嵎堅守黃虎臣傳令佯爲退後誘其出城賊果由孚順門突出數百人勢甚兇猛我軍奮力直前殺賊三十餘人斃黃旗賊目一名正在鏖戰之際大雨傾注濠深逾丈因收隊回營初八日知府劉于潯游擊劉國斌自市汭帶領戰船到瑞會合夾攻該逆堅守如故我陸軍無可施力水軍汭流上擊兩城對峙中有石橋

相通賊於兩城及橋上均置大礮我軍深入轟擊並放火箭燒燬賊巢賊礮三面俱發我水師陣亡二人受傷二十餘人劉子潯黃虎臣等正商再攻之策忽聞豐城一帶有賊乘虛下竄水師因於初九日拔營回赴市汊陸營亦於是日拔營回剿奉新縣奉新距瑞郡六十里黃虎臣欲乘賊不備輕騎掩襲督率弁勇衝過南門木橋攻破土壘殺賊二十餘人賊遂退入北門我軍環繞城下攻擊三時之久傳令收隊不意城內之賊蜂擁而出黃虎臣揮隊回敵而我軍遠來飢困主客勞逸情勢迥殊士卒小挫退奔都司林保胡應元滕加洪等極力抵拒連斃數賊奪獲黃旗十餘面賊始退回查點我軍傷亡一百餘人仍調回

省城駐紮此四月初八九等日攻勦瑞州奉新未能得手之實在情形也臣等伏查近省郡縣爲賊佔據自應逐一勦除以清肘腋之患且大軍現攻撫州尤宜鵬勦各處以爲牽制之計惟逆賊慣技長於堅守而我兵勇單寡又不能處處圍攻建昌雖經克復旋有賊蹤往來現將各營調歸省垣時加訓練以期相機再勦近省各屬克復名城廓清賊氛所有克復建昌縣城後勦瑞州奉新各緣由理合具摺馳奏伏乞

皇上聖鑒訓示遵行謹

奏

江西士民請建羅澤南專祠摺

咸豐六年四月二十一日

奏爲布政司銜道員羅澤南在湖北陣亡江西士民籲請建立專祠以伸愛慕恭摺具奏請

旨飭遵事竊羅澤南自去秋克復甯州之後單騎來南康與臣面籌進取之策矢志廓清武漢以圖會合水師夾江而下仍爲建瓴之勢遂以八月十六日啟行逆往力破崇通蒲圻之賊直擣武昌臣國藩以其頓兵堅城日久未下恐師老挫衄而江西寇氛孔棘奏調羅澤南來援於時道路梗阻自正月以後五次遣使赴鄂迄無音耗中心惶惑至三月二十九日始得胡林翼細字復書則羅澤南已於月初受傷殉節矣臣以正在用兵

之際恐損士氣祕不告人而江右士民潛知消息咸深痛悼旋以公論欲爲建立專祠稟請前來臣伏查羅澤南自咸豐三年正月隨臣出辦團練管帶湘勇慨然有志殺賊以拯時艱經今四載大小百數十戰所向克捷與江忠源塔齊布同時並起而戰功則較兩人爲尤著自岳州以至九江雖水陸併進與大隊齊驅而獨當一面之處爲多岳州之戰羅澤南力扼大橋一路崇通之戰羅澤南力破羊樓崗數壘規復武漢之時塔齊布羅澤南與各員并集臣舟會議羅澤南手出一圖定南岸分爲三路而花園堅壘則自任攻之田家鎮之役羅澤南大戰半壁山破南岸之賊營而後可斷江中之鐵鎖此羅澤南與人同功

究不因人成事者也若其功在江西者咸豐三年六月賊圍攻
江西省城羅澤南偕諸軍赴援抵江後獨勦吉安安福之賊以
數百勁旅禦一作徒旬日戡定吉郡至刊刻詩文數卷歌頌
功績五年三月廣信之役賊破府城南及三日羅澤南四戰克
復賊退之後嚴禁兵勇入城並禁土匪搶掠百姓之逃難歸來
者但見家室依然倉箱無恙相與感激次骨義甯州之戰以三
千人破數萬眾居民尤詫爲神奇是時腹地安謐閭井晏然無
驚逮羅澤南率師赴鄂粵東新匪自茶陵入竄吉安石達開自
通城入陷瑞臨曾不數月各屬糜爛故江省士民深悔羅澤南
去日未得攀畱而此日之籲請建祠爲出中心之誠輿論之公

者也臣又竊念羅澤南以窮苦諸生砥學礪行伏處授徒咸豐元年薦舉孝廉方正亦未請咨赴京其胸懷恬澹不求聞達概可想見乃一旦仗義從軍毅然以身許

國冒危險而不顧及蒙

聖恩洊升監司加銜藩牧

賞賜勇號

賞戴花翎彌覺受寵若驚誓滅賊以報

君恩聞其彌畱之際殷殷以武漢未復爲憾忠誠內蘊久而彌篤揆之有功德於民則祀以死勤事則祀之義實屬相符合無仰懇

天恩准於江西地方爲羅澤南建立專祠以褒臣節而從民望
是否有當伏乞

皇上聖鑒訓示施行謹
奏

卷和

江西近日軍情片

咸豐六年四月二十一日

再逆首石達開或云下竄徽甯或云回救安慶或云仍據臨江府探報不一傳聞異詞業經臣等於三月二十六日附片奏明在案近來吉袁瑞臨撫建等府之賊深濠密籤閉城堅守近省之豐城奉新安義靖安建昌德安等縣亦皆有兩廣老賊督率新附之匪踞守城池官兵不至之處則擄糧催貢民不堪命官兵一往則援賊四集該逆詭計益欲堅守各城使我疆土日狹餉源日竭省會成坐困之勢逆謀兇毒實堪髮指臣等悉心籌商目前勦辦之法惟當力保廣饒以通蘇杭之餉道先勦撫建以固閩浙之藩籬此江西本省之兵勇所能竭力以圖者其南

路贛州則不能不藉廣東之援師西路吉袁則不能不藉湖南之援師頃接據探稟萬載已於四月十三日克復又接劉長佑函稟連日獲勝漸逼袁郡胡林翼亦派劉騰鴻普承堯等率勇四千來江援勦仰託

皇上威福西路或有轉機南路吉贛一帶文報久梗仰懇

天恩飭下兩廣督臣檄催援兵星馳踰嶺保全贛州會勦吉安

不勝跂幸至於江西軍務臣等身在局中間見較確其各處奏

報之詞前此或稱省會被圍近日或稱真賊盡去皆因賊蹤飄

忽道路阻塞傳聞失實在所難免臣等忝廁軍旅不敢過事張

皇亦不敢稍涉大意理合將近日軍情縷晰具奏伏乞

聖慈垂鑒指示機宜謹

奏

硃批知道了廣東已屢有寄諭飭催崑壽帶兵進援矣欽此

孝和卷一

三

仍請撥上海關稅片

咸豐六年四月二十一日

再臣等因江西餉項支絀曾於二月二十一日附片奏懇

天恩飭撥上海關稅銀十萬兩以濟眉急茲准戶部咨稱前件於三月十五日遵

旨議奏本日奉

旨依議欽此欽遵鈔錄原奏前來臣等查戶部奏稱江西軍務吃緊應請

飭下浙江巡撫將前撥未解銀三萬兩迅速籌解外擬請於該省無論何款再行速籌二萬兩解往江西以濟急需至上海關稅現在金陵鎮江揚州三處軍營皆取給於此尙不敷用江西

請撥之款應無庸議等語既經奉

旨依議臣等何敢再瀆惟江西自去冬以來八府數十州縣相繼失陷本省餉源已竭目下攻勦撫州之師及省城與各路水陸尙有二萬五千餘人欠發口糧兩月三月不等幾與咸豐四年夏間鄂省情形相似臣等補救無術實不忍以此等情形上瀆

九重之聽而大局攸關又不敢不以軍中事實陳訴

君父之前浙江撥項雖照戶部奏定五萬兩全數撥解尙屬不敷散放況該省嚴衢一帶防務緊急恐一時不能全解惟上海商賈輻湊貨物駢羅中外交資稅務極旺雖本省三營於此取

給而地利攸殊挹注較易尙可波及鄰封合無仰懇

皇上天恩仍飭兩江督臣江蘇撫臣於上海關稅項下籌撥銀

十萬兩迅速運解江西以濟急需不勝迫切待

命之至謹附片具

奏請

旨

硃批戶部速議具奏欽此

卷之十一

官兵攻勦撫州迭獲勝仗摺

咸豐六年五月二十三日

奏爲四月十一日至五月初十日官兵攻勦撫州迭獲勝仗情形恭摺具奏仰祈

聖鑒事竊官兵自三月下旬進勦撫州破賊五營並四月初旬圍攻各情業經具奏在案嗣據李元度會同鄧輔綸林源恩等陸續稟稱四月十一日探知建昌援撫之賊盤踞油墩等處派兵馳往截擊擒斬十六名十四日黎明賊傾巢來犯先撲左右二營分黨千餘排立隄上接應李元度親率中營馳進彭大壽從左路鈔襲賊後彭斯舉從右路直衝賊鋒該逆前後受敵力不能支奔赴水田斷港被官兵刺殺二百餘名港水爲赤各營

直趨城下又刃賊七八十名是日周鳳山繞禦西門大股耿光
宣李進發等截擊南門一路高夢漢迎擊隄上之賊陳大力迎
擊隄下塘岸之賊均斬獲多名收隊後查點賊屍由營外至隄
外共三百十六具而城下及港中溺斃者不與焉此十四日迎
勦大勝之實在情形也十八十九二十等日賊均出隊搦戰我
軍每出不意開礮殪賊賊不敢前二十一日水師定湘營在城
外文昌橋轟礮攻城各營出隊夾攻該逆出城迎拒被礮轟斃
十餘名追殺數名賊遂歸巢二十二日賊忽大舉來犯一從西
門直撲中營爲正兵一從南門繞至清風門爲牽制之兵我軍
捲旗埋伏潛襲賊後賊遂驚潰各軍併力馳擊傷賊二百餘名

別股賊由文昌門至隄上各營追擊轟斃及偪溺水中者約近百人是日自辰至午鏖戰三時之久我軍亦受傷八十餘名陣亡三名二十五日賊仍出隊先撲中營以千餘人列陣隄上以百餘人直偪濠邊復分一股從東門繞出隄上我軍或伏民房或伏叢林或從隄內斜鈔大礮對轟刀矛交錯血戰兩時殲賊一百餘名我軍受傷者十八人二十六日探知瑞臨援賊三千屯紮西津渡對岸距北門僅五里因派兵前往防勦城內賊窺我軍出隊縋城來撲李進發身先陷陣殺賊數名受傷力戰直抵城下復斃賊多名李元度見西北城空虛督兵負梯進攻該逆併力堅禦胡蓋南吳齊源彭大壽周鳳山等分路鏖戰賊遂

敗奔傷斃計百餘名我軍亦陣亡七名受傷六十二名二十七日賊復出犯中營親兵劉步鼃等殺賊四十餘名其時沿隄另有伏賊突出鄧輔綸派右營搜勦火器環攻追殺十餘名此十八至二十七日接仗小勝互有損傷之情形也二十八日城內賊由北門分二股繞出一直沖隄上一從隄下包鈔對岸之援賊亦趁勢分數起渡河希圖會合其時耿光宣堵住上游賊不得渡彭斯舉彭大壽陳大力等包鈔賊後奮力衝殺約斃三百餘名餘賊折回河干復被張應龍等追逼溺水無數對岸之賊移船接渡我軍百礮齊轟下游水師又至擊沈賊船十餘隻約斃四五百人拋棄刀矛旗幟不計其數二十九日我軍復沿河

堵截奪獲賊船十餘隻焚燬三隻三更後賊用小划偷渡我軍排礮截之並沈其船三十日我軍復過河搜勦援賊追逐七八里將河岸新築賊壘三座盡行焚燒奪獲帳房二十餘架刀矛數捆大小船四十餘隻黃旗號褂百餘件子藥十餘石此二十八二十九三十日截擊援賊躡毀營盤迭獲勝仗之情形也五月初一日探知崇宜交界之棠埠地方及相距十里之秋下地方均有賊盤踞希圖來援初二日五鼓派兵往勦當我軍出隊時城內賊已偵知辰刻傾巢出犯專撲南門清風門我軍力戰相持兩時之久迴合數十次別隊從兩旁鈔住殺賊百餘名鎗傷二百餘名賊終不退我軍因見城內空虛傳令負梯登城撲

營之賊乃退登陴擊鼓百礮齊轟我軍受傷二十餘人賊之傷斃者亦以百計初五日賊復以全力撲我中營我軍開礮轟斃大旗四賊追至堤上鎗礮對擊傷斃之賊二百餘名我軍帶傷亦五十餘人收隊後探知崇宜援賊復踞棠埠搭橋至秋下嘯聚幾二千人恐其乘閒入城急派弁勇往擊申刻行抵秋下兵力已疲兩旁伏賊鈔出我軍遂至小挫幸丁峻陳英等殿後回追殺賊數人乃得捲塘收隊初七日賊又出城直犯中營李元度以中營最當賊衝先期於賊之來路埋伏銅礮三尊撥勇守護賊近營牆轟礮連斃數賊賊遂奔回初八日賊又來撲中營愈出愈多其由後路鈔出者尤兇悍我軍靜待數刻始行出隊

併命對擊傷賊殺賊計一百數十名追至城根該逆暗設突門地孔倏忽不見城上礮子如雨我軍陣亡九人帶傷四十餘人是日各營血戰而都司唐得陞怒馬陷陣尤爲諸弁所不及初九日賊又分股出犯我軍傳令勿動惟轟礮禦之而北門忽出千餘賊往西津一路迎接援賊進城我軍派隊截擊賊仍退入北城初十日黎明秋下援賊二千入糾合城內之賊大舉來撲中營從上頓渡來者分三路馳至從城內出者亦分三路圍攻直逼營前港外及卡門我軍分投迎擊彭大壽大呼過港唐得陞怒馬衝鋒吳齊源童梅華李錫發陳增應等從港之上下游分途圍殺連斃兇悍大旗賊十餘人賊遂奔潰各勇追殺計三

百餘人彭斯舉李卿雲帶兵從塢下過港衝殺殪賊二百餘名其援賊逃至上頓渡回巢者被李錫發童梅華陳上進等且追且殺屍橫遍野其城內出犯之賊仍回西北城被彭斯舉耿光宣丁峻等轟擊不成隊伍其分犯江軍老營者亦經林源恩等擊退是日城內城外之賊糾集來犯兇猛異常我軍奮勇直前僅陣亡一人受傷數人殺賊五六百名轟斃三四百名生擒七名奪獲大旗號褂二百餘件擡鎗紅鎗刀矛二百六十餘件此五月上旬接仗及初十日大獲全勝之實在情形也伏查李元度周鳳山督帶楚軍鄧輔綸林源恩督帶江軍自三月之季進剿撫州大小二十餘戰惟五月初五日小挫一次餘皆仰託

天威迭獲大勝祇以該逆倚恃堅城上排大礮我軍屢偪城下輒被轟傷以致前後傷亡至八九百人之多瑞臨援賊源源不斷郡城未能遽復然賊雖愈勦愈悍我軍仍愈戰愈憤臣等時加激勵誓當力復此城先清東路以挽大局所有四月十一日至五月初十日撫州攻勦各情形理合據實縷陳伏乞

皇上聖鑒謹

奏

卷之十

七

饒州防勦勝仗摺

咸豐六年五月二十三日

奏爲饒州防勦迭次接戰互有勝負並五月十五日大獲勝仗情形恭摺具奏仰祈

聖鑒事竊饒州一郡外防江皖內障廣信實爲江西東北之藩籬自二月閒樟樹鎮失利湖口東岸之陸軍撤赴撫州青山西岸之陸軍撤赴省垣都湖彭建之賊匪虎視眈眈常有窺伺饒州之意吉南贛甯道耆齡自調防以來辦理諸務俱臻妥善惟部下兵勇僅二千餘人軍勢實形單薄所辦鄉團又皆未經戰陣若無官兵維持亦未足恃臣等因派都司畢金科帶陸兵一千名都司金世蓮候選知縣賀虎臣帶水師千人前往饒郡聽

候該道調度以資防勦據該道陸續稟報三月初旬股匪屢犯鄯陽地境疊經防兵團勇迎擊俱有斬獲十七日賊合大股進犯十六都地方團首陳鴻烈軍功趙德溶等率勇出隊斃賊五六十名內有僞士十二將軍張姓金九將軍汪姓及僞總制等三人該逆另股從後鈔襲趙德溶力竭捐軀士卒傷亡四十餘人次日整隊復出五更時用噴筒火彈焚燬賊踞民房火光中時聞礮聲迸烈乃賊所藏火器之局也該逆不虞我軍猝至火器被焚倉皇回竄我軍乘勝跟追傷斃賊黨五十餘名追偪落水死者百餘名奪船十餘號追至二十里外之黃家祠始行收隊此三月十七十八連日接仗之情形也自此以後該逆退

屯都昌之張家嶺鄱陽境內爲之一清然張家嶺與鄱湖鄰近處處皆可入寇該道相度地勢繪圖貼說詳稱章田渡響水灘十六都三處尤爲緊要派撥陸勇水師分屯扼守仍規畫進取張家嶺之策意在以勦爲堵以戰爲守其由省派去之都司畢金科千人者則令駐紮童子渡以與各營互相控制正在調遣之際而都昌湖口逆匪勾結彭澤南康之賊四千餘眾於五月初六日直撲十六都該處團勇接仗失利響水灘營會同章田渡營馳往援勦斃賊百餘名我軍陣亡二十餘人受傷十餘人遂退至章田渡東岸併力守禦初九日聞賊將自荻溪灘渡河來撲營官康國器等出隊河干禦之立將賊船擊沈奪獲旗幟

斃賊二十餘人我湯家嶺營內之勇乘勢過河追剿章田營之
勇亦渡河接應伏賊突起前隊失利賊遂以大股圍包我接應
之師我軍見眾寡不敵仍復渡回東岸賊亦未敢追逼惟前隊
湯家嶺營各勇未及回渡傷亡百餘人營盤陷失此五月初六
初九接仗挫損之情形也自此西路要隘響水灘十六都章田
渡三處均被該逆佔踞惟都司畢金科所部千人駐紮童子渡
尙屬完全無恙十四日探得該逆於章田渡搭造浮橋將撲我
童子渡之營畢金科意以我僅千人賊數五倍若待其四面圍
撲必難抵禦不如中途邀截擊之遂於十五日丑刻出七百人
進剿畱三成隊守營行抵油墩地面尙距章田十五里聞該逆

亦已整隊前來畢金科飭令幫辦朱洪章哨長楊承英李正清等帶勇一支當前迎擊又派千總龔廷貴哨長李克封黃興貴等帶勇一支隨後策應而自督哨長李興隆呂紹全等暨雲南征兵壓隊以防後面鈔襲分撥後未及三里卽遇黃馬褂騎馬賊老長髮約二千餘人前來迎戰朱洪章龔廷貴等飭我兵開放鎗礮轟斃騎馬賊數名另率一隊從逆賊後路鈔出連斃悍賊多名賊卽潰敗迄至我兵追逼近前而該逆又竭力反噬山後又鈔出伏賊一股約四千餘人浮橋上又添援賊一股亦近千入四面圍撲勢甚猖獗畢金科督雲南兵暨哨長李興隆等奮力抵禦鏖戰逾時賊黨敗北步步追殺逼近河岸卽將浮橋

折斷該逆紛紛墜水共擊斃長髮賊六百餘人生擒二十四名
奪獲騾馬一百餘匹大旗七十餘面刀矛器械無數此十五日
畢金科由童子渡進勦大獲勝仗之情形也伏查饒州一郡西
接都湖悍賊北鄰皖南大股防務極爲吃重臣等以本省之兵
全力攻勦撫州建昌二府僅撥水陸各千人分防饒郡兵力實
屬單薄贛南道耆齡到饒年餘勸團撫民籌捐練勇百計經營
始臻妥善此次該逆大股入寇一戰大捷人心爲之鎮定然眾
寡懸殊隘口過多仍須由省城添撥兵勇前往始足以資防禦
都司畢金科自臣國藩咸豐四年奏調入營以來每戰身先士
卒驍勇冠倫軍中稱爲塔齊布以下一人去臘攻破樟樹鎮亦

係首先陷陣此次獨當一面以少勝多關係東北全局甚重籲懇

皇上天恩賞加巴圖魯名號其餘出力員弁兵勇容臣等酌保數人以勵戎行而作士氣陣亡弁勇查明照例辦理所有饒州防勦大獲勝仗各緣由恭摺由驛馳奏伏乞

皇上聖鑒訓示施行謹

奏

[illegible]

派兵赴建昌助剿摺

咸豐六年五月二十三日

奏爲建昌官紳辦理防剿並由省城分撥兵勇三千餘人赴建會剿各情恭摺具奏仰祈

聖鑒事竊建昌府城於二月二十九日失陷其時路途梗阻至三月二十五日始接據該府何忾稟報並據稟稱探得各屬賊匪裹脅居多不甚兇悍冀欲艱難號召次第收復卽會同丁憂在籍之安徽候補知府張家駒籌辦口糧招勇五百名並札諭新城縣拔貢生楊希閔招勇五百名與游擊名謙分帶於三月二十八日收復新城縣因駐紮新城再行招募共得勇一千八百餘名分派游擊名謙署守備楊錦斌管帶六百名駐鴻門拔

貢楊希閔把總劉興揚管帶五百名爲中隊駐下長巷前署守
備吳瀛外委趙金彪管帶三百名駐上長巷該府與張家駒管
帶四百餘名輪赴各營調度相機進剿四月十五十八十九二
十等日疊次打仗俱有斬獲自是宜黃崇仁等處援賊日增城
上之防禦日密二十七日城內之賊由東關出一千人由南關
出一千二百人分隊至廟嶺地方搦戰名謙楊錦斌分本營爲
三隊賊以右支衝我左隊楊錦斌策馬大呼兵勇應聲而出殺
賊數十名賊遂敗退繼以左支衝我中隊右支之賊退而復進
名謙楊錦斌督率中左兩隊奮力抵禦殲賊數十名並殲大旗
賊目賊隊自亂我軍右隊從旁突進殺賊百餘名賊不能抵禦

兩支並退逆首二人提刀攔截賊眾復回旗搦戰我軍蜂擁而前一以當百刀矛鎗礮各自爲戰自辰至未該逆三戰三北紛紛回竄入城統計斃賊四百餘人驅散脅從二百餘人奪獲器械百餘件我軍傷亡二十餘人此四月二十七日大獲勝仗之實在情形也自此以後賊愈嬰城固守堅伏不動五月初五日學政廉兆綸派廩生郭守謙帶廣信義勇一千二百名何棣等派教諭袁英帶南豐勇五百人均赴建郡因約會各營分路進攻名謙楊錦斌等紮南路之麻橋楊希閔趙金彪等紮東北之萬家橋郭守謙等紮西北之登高山初六日偪城而陣以鎗礮仰攻斃賊二十餘人一勇扒城殺賊五人受傷而墜初七日復

議進攻自辰至午賊仍不出忽聞西路有宜黃援賊千人將至
守備楊錦斌教諭袁英各帶兵勇馳往迎擊該逆不虞官兵猝
至拋棄礮械而奔我軍追殺一百餘人餘賊奔踞山巔我軍飢
疲收隊賊忽下山追逐武生張榮燮扼住山口楊錦斌回軍合
擊殺賊三十餘名生擒五人賊遂竄逸此五月初六初七連日
攻城並截擊逆援之實在情形也臣等以建昌與撫州兩府相
爲唇齒能破建昌則撫賊之右臂已斷聲援益孤或可迅速得
手而建昌之何棡張家駒等當無兵無餉羣情渙散之秋尙能
招集義旅自成一軍若非由省城另派兵勇助之一旦挫敗則
官紳中更無敢出而任事之人而廣信及南豐新集之勇未可

深恃亦須有久經戰陣者列前行以爲之倡率於是商定派楚軍黃虎臣等二千三百人益以九江鎮標兵勇千餘共三千五百人於五月初二日由省城馳赴建昌十二日行抵該府以張家駒前在安徽屢著戰功卽派該守總理營務處與何棻會辦建昌防剿事件合之該郡兵勇及廣信南豐之勇統計建昌一軍不下六千五百人與撫州大軍互爲聲援氣勢頗覺雄厚該逆堅忍頑悍素以善守爲長技臣等嚴飭張家駒等激勵士卒晝夜環攻務期力復名城肅清東路所有建昌府官紳辦理防剿並由省城添撥兵勇會剿各緣由理合恭摺馳奏伏乞

皇上聖鑒訓示施行謹

奏

奏稿卷七

水師吳城勝仗克豐城縣片

咸豐六年五月二十三日

再水師九營惠潮嘉道彭玉麟帶四營駐吳城防下游湖口之賊記名道劉于潯帶二營駐市汊防上游瑞臨之賊又分撥二營駐饒州一營駐省河均經奏明在案嗣據李元度等迭次稟請水師赴撫州會剿臣等分撥饒州一營省河一營前赴撫州水陸夾攻而吳城及市汊上下游之防如故也據劉于潯先後稟稱豐城被賊占踞相逼太近市汊終無安枕之日必須克復豐城而後上可以規取臨江下可以保全市汊四月初十日督戰船至豐城十一十二連日鏖戰十五十八亦督隊轟擊豐城一線大隄我開礮則賊隱隄以避之賊登隄則我排礮以擊之

終以無陸兵助勦未能得手二十日初更乘月光未出於豐城縣東西北三門各派戰船放礮攻城牽制賊匪一面親督舢板十號從西岸暗渡派令千總李逢春萬元昌右營涂安邦豐城縣把總宛世雄等督帶哨勇登岸各持火器直撲南門外賊營登時火起賊卽退走我勇隨後追趕復燒賊隄內營盤並將四門戰船調齊轟擊賊疑陸軍已至前後夾擊不敢駐足悉往樟鎮上竄擊斃殺斃約二三百人克復縣城旋督各勇搜捕城內城外奪獲大礮鉛子鎗械百餘件米五百餘石分賞各勇此劉于潯水師克復豐城之情形也又據彭玉麟督同吳城水師四營稟稱五月十三日辰刻有賊船四十餘號偃息旗鼓混稱民

船蜂擁上犯將近望湖亭開礮轟擊時各營哨探已先後偵知彭玉麟派定後營嚮導營走東路由夾河包鈔左右兩營走西路由大河直下比賊船已近各帶船隻分途而下兩相攻擊鏖戰逾時約轟斃賊匪數十名賊始敗退我軍乘勝追趕燒燬賊擄民船四隻追三十里至德安河口日昃風起收隊回營我軍無一傷損此吳城水師迎勦獲勝之實在情形也伏查水師各營分駐要地均尙得力祇以西岸數百里無一陸兵水軍不能獨樹功績劉于潯專用水師克復豐城籲懇

天恩准臣等酌保數人以示鼓勵所有水師近日開仗緣由理合附片具奏伏乞

皇上聖鑒謹

奏

硃批賊先竄出焉得謂克復姑念其打仗奮勇著准其酌保數人欽此

陳明鄰省援兵協餉片

咸豐六年五月二十三日

再江西軍務除撫州建昌饒州三府勦辦吃緊各由專摺具奏外至各省援兵湖南援師分兩路而來南路係道員劉長佑統帶由醴陵萍鄉以至袁州屢獲勝仗現已圍逼郡城北路係同知蕭啟江都司劉培元等管帶由瀏陽以至株樹潭四月二十九日克復萬載縣城軍威大振湖北援師係游擊普承堯同知吳坤修暨臣國藩之弟曾國華管帶普承堯所帶之兵勇則去年八月自九江派去

奏明隨羅澤南援勦鄂省者也現經胡林翼派撥回援江西業已克復咸甯蒲圻擬由通城以達於義甯州計兩湖援兵三路

共萬餘人集厚力以相拯救而賊亦出死力以相抗拒凡江楚文報自賊中經過輒被殺害臣等顧募長髮探卒蠟丸細字作爲隱語以通消息但能知三路勝仗之大略而不能詳悉何營何地及鏖戰之情形也至浙江援師前經

奏明派萬青藜前來廣饒等處援剿厥後因甯國失守浙防孔亟不暇議及援江之事福建援師參將舒隆阿所帶之五百人已至河口鎮現調赴建昌府會剿副將張從龍所統之三千餘人尙無入境確信廣東援師蒙

恩派重兵五六千人臣等亦屢次函咨陳詞懇切迄今未見援師未接回文每念贛州天險爲古來必爭之地非得廣東厚援

終恐不免疏虞道途久梗呼救無從中宵念此魂夢屢驚合無
籲懇

皇上天恩飭下廣東督撫先撥一二千人星速踰嶺保守贛州
先據上游俟大隊齊集再圖入援吉安不獨江西之幸亦廣東
之先著也至各省協濟之餉浙江五月閒解到銀二萬兩分撥
各軍尙不敷抵換鈔票之用廣東之餉亦以道途梗阻尙無音
耗所有鄰近各省援兵協餉理合附片縷晰陳明伏乞

皇上聖鑒謹

奏

殊批另有旨欽此

分別失守員弁處分片

咸豐六年五月二十二日

再江西八府淪陷州縣失守至四十餘屬之多文武員弁有守土防汛之責者若不嚴行參辦則居官者不復知城守之重幾以

國憲爲不足畏然使一律嚴辦則其中不無情有可原之人臣文俊擬逐一查明察其平日居官之賢否臨時被賊之情形分別輕重參辦恭候

欽定因軍務旁午道途梗塞尙多不知下落之員一時未能訪察確實未及悉行入奏惟現在攻剿撫建袁州等府萬分吃緊之際中有一二守令艱難顛沛出而任事籌兵籌餉慨然以克

復爲志者

臣

文俊與

臣

國藩再四熟商不得不假以事權作其

愧奮之氣卽如建昌府知府何棻到任甫經月餘兵餉兩空無可藉手猝被淪陷卽赴各鄉糾合紳耆號召義旅竟能成軍以出圍攻郡城日下省城及廣信兵勇赴建會勦該守又赴新城等處籌捐錢米接濟軍餉萬載縣知縣李吉言於去冬城陷之後率舉人辛辰雲等招募瀏勇誓圖克復嗣同知蕭啟江在鐵山界防堵卑辭乞援逮援師入境大小十二戰李吉言自率瀏勇千人扼守株樹潭後路派其弟李審言隨同進勦屢次陷陣衝鋒攻克縣城所捐錢五萬餘串於給發瀏勇口糧外概接濟蕭啟江等援師餉項宜春縣知縣錫榮於候選道劉長佑援師


入境以後竭力供支捐錢四萬餘串贍給楚師俾無缺乏目下
建昌大兵雲集實自何棡創其端萬載援師賴李吉言爲之主
袁州援師賴錫榮爲之主此一府二縣者實屬失守案內愧奮
有爲之員臣等責令襄辦一切如果始終出力再行

奏請寬免處分除文武各員并由臣文俊查明另行分別參奏
外所有何棡李吉言錫榮現在建昌袁州出力之處謹合詞先
行附奏伏乞

皇上聖鑒謹

奏

奏和卷十



PL
2728
.A1
1876
v.9

曾文正公奏稿

卷之八目錄

官軍攻勦撫州迭獲勝仗摺

咸豐六年八月三十日

水師連勝收復南康府城摺

全日

饒州失守旋經克復摺

全日

建昌攻城黃虎臣陣亡摺

全日

陳明各路援師片

贛州解圍并攻勦情形摺

八月初七日

湖北援師進攻瑞州府城摺

全日

攻勦撫州疊獲勝仗摺

全日



水師疊獲勝仗摺

全日

專催崑壽赴江南并及江省軍情片

請撥山陝餉銀片

報瑞州援軍勝仗片

查明吉安殉難員弁請卹摺

全日

圍攻瑞州收復靖安安義二縣摺

八月三十日

邊錢會匪圍攻廣信浙兵援剿解圍摺

全日

閩兵援剿建昌府前後獲勝情形摺

全日

請撥湖南軍火片

玉亮病故請卹片

李沛蒼免罪畱營片

瑞州一軍九月接仗情形摺

十月十一日

撫州老營被賊撲陷摺

全日

請饒廷選仍駐廣信片

請頒部照交黃冕勸捐片

請捐錢照湖南成案片

贛南匪勢蔓延請添調粵兵摺

十一月十七日

官兵攻勦撫州迭獲勝仗摺

咸豐六年六月三十日

奏爲五月十一日至六月十一日官兵攻勦撫州迭獲勝仗恭摺具奏仰祈

聖鑒事竊官兵攻勦撫州五月初十日以前迭獲勝仗各情形業經會奏在案嗣據李元度會同鄧輔綸林源恩等陸續稟報五月十一日賊分三支來犯楚軍中營我軍豫伏礮位於濠外樹閒出其不意轟斃數名各勇隨煙搶進賊仍死拒都司唐得陞從右手鈔擊直薄城下互有殺傷賊遂從隄上橫過更犯江軍經各軍奮力擊退十六日約會水陸夜攻四更時從文昌橋轟擊東北門其駐紮千金陂之礮船十號攻擊清風門及南門

楚軍復於西城轟礮以分賊勢城內更鼓加嚴鎗礮不絕江軍之在清風門梯城而登者被火彈燒傷十一人遂於黎明收隊十八日探得瑞臨援賊由棠埠秋溪進紮上頓渡對岸初列三營繼併爲一大營高壘深溝冀與撫賊爲犄角之勢因約會水師於十九日合攻辰刻楚江兩軍派哨馳抵渡口該逆列隊河干紅傘黃衣怒馬充斥所掠民船百餘號盡泊對岸我軍水師二十餘艘駛至礮斃數十賊賊遽敗退我勇梟水過河牽船接濟陸軍營官彭大壽等由上游徑渡童梅華等繼之哨官易祥泰等由下游過渡夏宏江等繼之同時飛渡千餘人該逆分股抵敵我軍鎗礮先轟刀矛續進斫倒悍賊數名賊始卻退仍復

回禦是時我軍進易退難已成背水之勢人人併命直逼賊壘彭大壽等從左手衝來劉體厚等從右門薄入立將賊壘蹋平賊從壘後狂竄我軍乘勝追殺合計殲斃四五百名偏溺百餘名逃散殆以千計奪獲黃旗百七十三面號褂四百餘件擡鎗刀矛藥鉛甚多此十九日冒險渡河踏破援賊營壘之實在情形也二十三日賊探知我軍開挖地道因出二百人傍城開濠並埋鎗礮以爲抵禦之計我軍出隊驅逐用大礮轟斃數名賊始縋城而入二十四夜用火箭噴筒前來驚營四更始盡擊退我軍旋於五更水陸夾攻千礮雷動該逆登陴死拒黎明收隊次日辰刻賊復分股出城一撲右營一撲中營經各營擊退二

十七日我軍在懸鶴嶺築一邊牆安礮俯擊城內賊出三百人奮力相爭我軍亦奮力迎擊互有傷亡而退六月初一日賊用全力來撲江軍我軍用銅礮排轟紛紛踣地仍堅忍不退其分犯楚軍者亦極強悍鏖戰兩時之久殲斃一百餘名我軍陣亡二人受傷四十餘人初三日省城解運大礮十尊到營是夜轟攻達旦初四日水師營官金世蓮帶船十四號紮於千金陂會合攻城自晝至夜水陸巨礮連聯不絕聲如隕牆城內震怖初五日城內遣散百姓七八百人復出賊二百餘人趁便劫掠我軍出隊追擊賊仍入城我軍復排礮攻城轟倒垛口守陴者盡皆伏匿我軍卽負梯薄城賊又拚命死拒隊長周芝芳外委方

鳴玉中礮陣亡受傷者十餘人遂收隊罷攻十一日有賊數百由東岸來襲我水軍營官成章鑑先期防賊來犯多削竹籤暗釘兩岸沙草之中賊至半爲竹籤所窘連發礮轟斃二十餘名賊黨稍退或伏隄下或匿樹間少頃再進復被轟斃十餘名賊始飛遁我軍尾追數里而還此自五月二十三日至六月十一日水陸圍攻迭獲勝仗之實在情形也伏查撫州賊匪嬰城拒守又有瑞臨援賊相繼而來經李元度等水陸夾攻迭有斬獲而相持兩月有餘郡城尙未克復自五月初十以後惟十九日渡河踏毀逆壘殺賊最多此外雖屢次報捷我軍傷亡亦多將士同深憤激臣等更切悚慚誓當力復此城以清東路所有五

月十一日至六月十一日攻勦各情理合據實縷陳伏乞

皇上聖鑒謹

奏

水師連勝收復南康府城摺

咸豐六年六月三十日

奏爲水師連獲勝仗收復南康府城恭摺奏祈

聖鑒事竊南康府城爲江西全省水道之總匯外接大江內控鄱湖爲古來舟師戰爭之地去年臣國藩駐紮該府及屏峯等處水陸布置尙無疏虞自本年二月間樟樹鎮官軍失利將分駐青山屏峯之水師調紮吳城下游之賊遂竄踞南康城中不時乘閒上犯水軍統領惠潮嘉道彭玉麟督率各營防剿兼施四獲勝仗疊經會奏在案茲據該道稟稱六月十一日探有賊船上駛因派後營嚮導營由東路包鈔左右兩營由西路直下麾旗向前兩相攻擊該逆潰竄我軍尾追礮轟其後子落賊船

傷亡甚眾順水順風該逆揚帆而遁十四日賊復上窺又經各營擊壞其船二隻斃賊十餘人此六月十一十四連日獲勝之情形也旋探賊在南康一帶迫脅民夫修造戰船因派各營分途往勦長龍在前舢板繼後於十八日五鼓出隊行抵老爺廟地方焚賊艦六隻賊卽下竄維時風勁浪高我軍暫行停息風波稍定將長龍分泊兩岸各帶舢板直赴南康城下該逆嬰城拒守我軍將礮口高擡轟子入城而沿岸堆積船料甚夥一概焚燒賊見城外火起卽開東門逃竄該道同營官鄧翼升孫昌國陳炳元丁義方麾水勇登岸進城因水兵不慣陸戰尾追十里而還城內磚牆爲賊撤毀熬硝礮臺礮壘將其礮廠船廠一

概蕩毀此十九日收復南康府城之情形也伏查南康地瘠民貧城內賊黨無多水軍出其不意卽時收復惟吳城水師祇有四營下游之賊雖經懲創前後兩河尙有德安建昌之賊截我後路又無陸兵爲之犄角故不敢守此荒城祇得安撫居民仍回吳城駐泊每日派船十餘號游繹郡城以巡哨爲防守所有善後事宜臣等另籌陸兵與水師依護庶足以資堵禦所有收復南康府城緣由理合由驛馳奏伏乞
皇上聖鑒訓示謹
奏

饒州失守旋經克復摺

咸豐六年六月三十日

奏爲饒州失守旋經克復恭摺具奏仰祈

聖鑒事竊饒郡防勦事宜及五月十五日大獲勝仗情形業經會奏在案臣等以此股賊匪雖經懲創而饒郡西通都湖北接彭建實爲羣賊之淵藪四路可通時虞窺伺仍飭新任布政使耆齡督率水陸各軍擇要扼防相機攻擊並添派參將阿達春一帶得勝軍五百名前往應援耆齡與各營商酌擬以阿達春一軍進紮童子渡而令畢金科移營紮陶溪渡會合贛營併力守禦初一日探得都湖建德逆匪分三路內犯已抵陳家嶺畢金科等會商亦分三路迎敵初二日平明進至陳家嶺畢金科奮

勇當先派千總龔廷貴督勇衝殺殲斃長髮四百餘人奪獲羸馬九匹追及臥虎山四面壁立遙見密林中尙有伏賊四股畢金科勒馬壓隊毋許再追該逆知我兵不入伏中遂由山背鈔至陶溪渡直襲贛勇營盤須臾火起被陷贛營各勇退屯四十里街畢金科以陶溪營壘被陷恐童子渡亦難孤立帶勇暫退紮北門外此初二日接仗互有勝負兩營退紮之實在情形也阿達春得勝軍到饒四日初三日方進紮四十里街中途聞信亦折回紮北門外贛勇亦回屯府城初四日探聞該逆分竄景德鎮知其爲聲東擊西之詭謀議定贛營諸軍力扼東路阿達春畢金科防禦西路相機進剿水師則分布於祝君垠黃龍廟

沿河一帶旣防賊舟突入兼爲陸路聲援初五日賊眾分五股來撲郡城畢金科與得勝軍哨官朱光裕李鶴齡李遐齡等分途迎敵鏖戰二時陣斬僞指揮張姓等四名賊黨敗走追不數里忽分股鈔出隊尾兩營腹背受敵顛勇之在茅園者亦已敗退賊眾由北門竄入直出東門各營紛紛潰散競渡沈溺者約二百人得勝軍哨官藍翎千總李鶴齡與其弟把總李遐齡回合衝擊至六七次被該逆重重包裹偪入湖中力竭陣亡水師賀虎臣康國器兩軍見事勢危急督帶水勇登岸畢金科率親兵百餘回擊由高門進至東門水勇登城短刀相接雜以磚石殲賊三百餘名該逆先勝後敗狂奔出城我師雖於收隊時轉

敗爲勝然以傷亡過多勞乏過甚亦未敢久駐城內耆齡督率水師泊於城河對岸陸營亦分紮角山圩等處旋與賀虎臣退至距饒三十里之表恩汛地方此六月初五日官軍挫衄郡城失陷并該司等移營退守之實在情形也臣等以陸軍帳械全失卽飭畢金科馳回省城重加整輯迅圖克復十八日復自省駛赴饒州因阿達春告病乃另派都司林葆等協和營千人而以九江鎮總兵居隆阿前往督同勦辦十九日師至表恩汛與耆齡紮泊一處該逆於城外紮營四座一營黃龍廟并於河邊立礮臺九座阻我兵登岸之路一營東門外一營毛園防我兵鈔襲一營北門外以爲退步尙有小營分布數處堅壘深濠竹

籤鹿角極爲周密二十一日耆齡等定大舉進攻之議畢金科
林葆兩軍由角山圩進攻東路及北門贛營由沙洲進攻西路
及芝山期於風雨山相會水師金世蓮賀虎臣兩營助攻東路
康國器助攻西路二十二日東路水師金世蓮等先抵黃龍廟
該逆鎗礮齊施火箭噴筒形如驟雨我軍幾不得進各戰船飽
食羣子萬礮齊轟哨官楊占鰲首先登岸畢金科與林葆隨換
小船一躍而登兵勇如牆繼進奮力衝殺火箭火彈四面拋放
賊營火起千總龔廷貴等堵截該處股匪畢金科攻勦沿河礮
臺衝蹋一座各處潰散遂合攻東門該處悍賊畢萃併力死拒
自卯至巳尙未擊退迄協和營繼進水師亦捨舟登岸環攻數

重始衝入賊營奪獲鎗礮數十件我兵進城乘勢跟追直逼至大街城中伏賊突起三路鈔來勢似潮湧畢金科積前日之憤乘新勝之氣下馬怒戰又值從九品楊玉輝帶守船丁勇前來助勦連刺騎馬賊十一名該逆將旗幟各物拋棄墜城逃奔計殺死及轟斃約五六百人林葆等至茅園繞出會合追賊共躡北門外及張王廟賊營水師亦由祝君垠進躡去高門內教場賊營一座維時居隆阿同赴東門督勵將弁追殺尤多其自西路進者康國器先帶礮船於高門上下開礮故作攻撲之勢城西之賊稍稍分撤往救耆齡督令守備羅玉祥等分爲三隊風飛登岸賊之撤救高門者回顧不及濟勝軍水師及陸勇乘機

分道上城先將其坐纛砍倒勦散守城之賊旋分爲二一撲高
門一撲靈芝門賊營縱火焚燒賊膽驚落遂大奔潰分投追勦
自西城轉戰而出北門者適與城外羅玉祥勦散芝山股匪之
兵相遇前後夾攻殺賊無算其奔逃不及者紛紛竄匿東湖西
湖兩軍合併窮追至風雨山收隊武舉于宣等遙見援應之賊
自山後捲旗而來計圖暗襲我後各營嚴陣以待賈其餘勇併
力追擊復殺賊百餘並燒道旁小營二處通計江楚水陸各軍
殺賊千餘生擒八十五名先後解送省城奪獲旗幟四百一十
面鎗礮子藥騾馬無數此二十二日克復饒州府城之實在情
形也伏查饒州一郡捍禦都湖皖南之賊東蔽廣信南衛省垣

實維江省要區特以逆蹤切近無城可守遂致屢復屢陷該逆以善守爲長技此次甫經半月修築營壘礮臺至十餘座爲堅悍不拔之計幸我軍文武同心憤激用命一鼓克捷保全東北藩籬然近而都湖遠而徽池匪黨環窺仍須厚集兵力乃足以資防勦此次酷暑鏖戰克復神速所有水陸將弁尤爲出力者籲懇

天恩容臣等開單保獎以示鼓勵布政司耆齡有專辦饒防之責饒州府知府張澧翰鄱陽縣知縣夏燮有地方之責均有應得處分惟克捷迅速功過尙足相抵應請免議哨官李鶴齡請交部從優照守備例

賜卹李遐齡請照千總例

賜卹陣亡弁勇查明照例辦理所有饒州失守旋經克復緣由
恭摺由驛馳奏伏乞

皇上聖鑒訓示施行謹

奏

奏和卷八

建昌攻城黃虎臣陣亡摺

咸豐六年六月三十日

奏爲官兵會剿建昌府城連獲勝仗恭摺具奏仰祈

聖鑒事竊建昌官紳辦理防剿並省城分撥兵勇應援各情業經會奏在案嗣據該府何栻在籍知府張家駒等稟稱省兵黃虎臣等於五月十二日到郡與建昌兵勇更番派隊分駐西北三面晝夜環攻閩兵張從龍等於五月二十七八等日次第到郡分駐東面斷賊接濟並派哨赴宜黃偵探以防賊之應援建昌城外民房櫛比我軍分駐房內開掘地道復派隊分段緣梯而登該逆頑悍不出平時城上並無旌旗聲息俱寂我軍於登高山設立望臺俯視城中不見一賊忽然礮聲陡起鉛子從

山頂飛過及我軍約會進攻賊匪了不接應兵勇扛梯而進飛擲火毬則城上旗幟林立號鼓雷鳴鎗礮如雨每垛用皮木箱滿盛磚石傾筐而下我軍受傷甚多因之卻立稍卻則鎗礮頓息每夜用鐵鍊木板堆積棉花桐油四面燃放號火至四鼓漸熄我軍卽支梯飛聳而上纔至梯巔則木石鎗礮齊下或傾倒火藥往往跌墜陣亡苦攻半月之久未能得手六月初一日探得宜黃援賊白茅排地方蠡擁而來各營集議派隊分守要隘截擊外援並堵城內出應之賊是夜二鼓南城內突出數百人暗撲建昌營經虎字營江永和帶勇橫截擊之殲賊五十餘名建昌營聞聲攔擊又殲二十餘名賊遂鼠竄入城次日黎明援

賊忽分三路而來一撲西門一撲南門一襲建昌營併撲南門
突過虎字營地道之旁營官黃虎臣大隊未至率勇九人挺矛
邀擊衝突過早前面之賊爲其所殲後股蜂擁攢刺該營官身
受十餘傷力竭捐軀各營駐建昌者以黃虎臣爲眾望所歸未
成列而遇害三軍爲之氣奪幸本營哨官黃之一江永和及外
營營官李大雄胡應元等聞信奔救大隊齊出於刀矛叢中將
黃虎臣屍首奪回且涕且戰憤氣百倍該逆紛紛敗北免走烏
飛自相踐踏廣義軍郭守謙等從登高山直趨而下聲震山谷
所向披靡兩路共殺賊五百餘人生擒二十三人訊明正法奪
獲黃旂呢轎文卷衣服甚多大小礮位十一尊步隊追至二十

里外馬隊至三十里之規下撤隊回營建昌營守備楊錦斌另擊麻源之賊分路鈔追亦斃賊匪百餘名生擒十六名奪獲黃旗軍械八十餘件此六月初一初二連日接仗獲勝之實在情形也伏查建昌郡城之賊偵探皆云真賊不過千餘乃環攻半月該逆嬰城拒守寸步不出較之撫州悍賊時出搦戰者情形迥不相侔此次截勦援賊酣戰獲勝軍心爲之一振然黃虎臣爲數營領袖遽爾殉難亦屬得不償失適因初五日饒州挫敗臣等恐饒賊東援撫州南犯省城而建昌一隅兵力尙厚遂將攻勦建郡之六營者移駐撫州撤回省城以便調遣都司黃虎臣樸實驚勇前此克復建昌縣案內擬保游擊尙未出奏此次

力戰捐軀應請照游擊例

賜卹營官藍翎把總李大雄胡應元哨官江永和均係建昌縣案內克城先登之員此次當黃虎臣初逝之際俱能憤極力戰轉敗爲勝關係甚大李大雄請以守備補用胡應元江永和均請以把總卽補並

賞戴藍翎陣亡弁勇查明照例辦理所有官兵會勦建昌疊獲勝仗緣由理合具摺會奏伏乞

皇上聖鑒訓示施行謹

奏

陳明各路援師片

咸豐六年六月三十日

再福建援江兵勇三千一百人現到建昌府者已有二千六百
人屢接閩浙總督臣王懿德來咨先派副將陳上國帶一千五
百人馳赴金陵交向榮調遣其餘兵勇仍交副將張從龍臣留於
江西攻勦建昌等因鈔摺咨送前來六月初五日饒州失陷臣
等恐賊蹤竄擾廣信擬俟陳上國閩兵過郡之便截臣留防守廣
信咨明學政臣廉兆綸會摺具奏在案今饒州業已克復此項
閩兵卽無庸留防廣信應令迅赴金陵以資援勦惟查該副將
等一軍口糧取之閩省糧臺夫船取之江省州縣雖經臣等札
催刻下尙未據報起程至湖北援師由普承堯曾國華等統帶

來江已於六月十八日克復新昌縣二十四日克復上高縣接
據細字隱語書函七月初旬可至瑞州從此兩湖聲息可通大
局當有轉機廣東援師接據稟報潮州鎮總兵壽山於五月十
九日至贛州入城二十二日大獲勝仗贛郡防守尙嚴當可保
全要郡仰慰

宸廑所有各路援師情形理合附片奏

聞謹

奏

贛州解圍攻勦情形摺

咸豐六年八月初七日

奏爲贛州府城解嚴並各屬勦辦情形恭摺奏祈

聖鑒事竊贛州據江西上游爲古來用兵者所必爭之地又與粵東毗連時有土匪滋事本年正月吉安失守泰和繼陷沿途文報不通該郡一切軍務傳聞異詞六月閒廣東援師至贛

等附片奏

聞在案茲接據護南贛道汪報閏署南贛鎮總兵阿隆阿等專差繞道賁文來省據稱本年春閒泰和一帶寇氛日熾汪報閏帶領新城南康之勇三千餘名文英羊角二營官兵同往進勦接仗失利三月十二日興國武進士韓進春至良口地方十五

日與泰和之賊戰於萬安武索一帶大獲勝仗擒斬頗多並擊沈賊船三隻十七日該匪復四路來攻我軍陸路失利水軍不能獨支韓進春一軍退紮大湖江汪報閏卽帶餘勇回贛適值署饒州營參將遮克敦布撫州戰敗之後於甯都收集兵勇到贛三月二十二日南康所屬之潭口地方會匪滋事將委員鄒慶雲戕害數日之間土匪四起下游之長髮賊又於二十五日破龍泉於是潭口之賊糾集大庾新城土匪於四月初二日圍南康塘江一帶之賊於初四日破上猶風鶴迭警人心搖動適汪報閏先期招募之湖南東嶺勇從崇義而來十四日克復上猶縣商借之廣東南雄勇從大庾而來初九日將新城土匪剿

散於是南康之勇會合東嶺南雄各勇連日攻勦金雞嶺李家山鏡埧墟以及塘江潭口各處贛州亦派兵勇夾擊先後六十餘戰殺賊近萬軍威日振此東嶺南雄等勇勦辦土匪得手之情形也南贛界連楚粵羣盜淵藪連歲三省梭勦斬刈不爲不多無如黨羽甚繁蔓延日廣又復糾邀泰和萬安一帶之長髮賊上竄贛州四月十九日韓進春在大湖江戰敗之後各賊卽分東西兩路於二十九日直薄贛城兩岸紮營數十座礮船數十號在城北龜角尾地方停泊復於上游擄取船隻搭造浮橋五月初三日賊分東西兩路過河徑撲城下經兵勇出隊擒斬三百餘人擊沈賊船七號淹斃百餘人餘匪潰回追逐落水者

尤多由是賊鋒稍挫連日未敢過河南路陸賊迭至扛道坪嶺上紮營均經我軍擊敗燬其營盤十五日以後大雨河漲湧金門一帶水與雉堞相平防守喫緊適東嶺勇因南康缺糧前來贛州就餉卽令該勇入城守堞而廣東督撫奏調潮州鎮總兵壽山督帶兵勇一千五百名來江助剿於十六日攻破雩都十八日亦抵贛城官軍援師日集賊數亦日增二十二日東河賊匪會合南路賊萬餘直撲東南兩門各兵勇由南門出隊鎗礮齊施刀矛繼進擒斬五百餘人割級一百八十八顆追逐落水除漂失不計外壅塞汊河賊屍尙有六百餘具並開放大礮擊沈賊船奪獲旗幟器械無數其東岸嶺上營內各賊亦由旱路

逃往山後我軍追逐燒燬賊營十數座此贛郡被圍二十二日
接仗獲勝東岸肅清之情形也總兵壽山等與汪報閏熟商攻
勦西河之策欲趕造浮橋則船隻不敷且對岸賊礮甚多難於
措手於是佯爲置之不理令我軍分日出隊或攻東南路之樓
梯嶺湖裏塘或攻正南路之南橋或攻西南路楊梅渡老虎坑
等處至六月十七日乘其不備仍令兵勇於各路誘戰待至賊
眾應接不暇之時我軍千餘人突出西門乘船過河直至對岸
一擁而登先殺斃執旗賊目數人並焚燬沿河賊營兩座匪始
退走我軍分路鈔擊上游楊梅渡等處之兵勇亦各用竹筏木
簰過河上下夾擊計擒斬六百餘名割級三百八十五顆奪獲

大礮十一尊擡鎗一百五十三桿礮船三隻又大小船隻三十餘號躋平嶺上賊營二十餘座餘匪卽日逃遁我軍追逐十餘里次日搜捕及鄉民捆送者又得五十餘人並將已受僞職之舉人劉效忠生擒正法此六月十七日攻破西岸賊營贛郡解圍之情形也現據鄉民稟報東河自贛城至興國得團勇數萬人西河自贛城至八十里之沙地均無賊蹤北路自贛至良口一百二十里亦趕辦團練一律薙髮惟南路之賊尙須迅圖攻勦前經汪報閩臬明廣東督撫臣准令南澳鎮總兵帶兵來江協勦如能上下夾擊則潭口一帶當可指日蕩平又前任按察司周玉衡之子候選同知周炎先於四月二十八日自備軍需

錢二萬串招集龍南鄉勇二千餘人來贛曾屢次出仗獲勝嗣於六月間因廣東和平之賊竄入定南圍城以致長甯安遠信豐一帶時有警報飭周炎帶勇前往信安長定一路相機剿辦各等因稟報前來臣等伏查江西自吉安撫建並陷之後贛州遠隔南路道途梗阻臣等每聞警報寢饋不安厯次陳

奏皆以此爲慮該護道汪報閏就近稟請廣東督撫撥兵赴援並接濟軍餉十餘萬又有東嶺南雄南康等勇及周炎捐募之龍泉勇先後協剿藉以殄逆黨而保郡城實爲江省大局旋轉之一端除俟查明尤爲出力人員籲請保獎傷亡弁丁照例請卹外謹據護南贛道汪報閏署南贛鎮總兵阿隆阿來文附驛

具奏伏乞

皇上聖鑒再此案經汪報閏就近稟報廣東督撫臣或已先行
具奏合並聲明謹
奏

湖北援師進攻瑞州府城摺

咸豐六年八月初七日

奏爲湖北援師進攻瑞州府城江省派兵四千前往會合屢獲勝仗江楚之路漸通恭摺馳奏仰祈

聖鑒事竊湖北援師克復新昌上高等縣將至瑞州業經附片具奏在案嗣據探稟候補參將普承堯候補同知吳坤修同知銜曾國華候選知縣劉騰鴻於七月初一二等日先後抵瑞州府城外初三初五等日大獲勝仗臣等因派湖南河溪營都司彭山杞都司李新華守備萬泰羊瀛等率兵勇七營四千人於初九日自省起行十五日馳抵瑞州與援師相會合自上高新昌以前接戰情形均由湖北湖南撫臣具奏旣至瑞州城下十

五以前接戰情形仍是細書隱語略敘大概十五以後省兵已到接戰情形稟報較詳臣等謹據原稟分別陳奏六月三十日援軍於距瑞州二十里之大山地方駐紮七月初一日率隊赴府城察看形勢猝與城外賊遇格殺數十名生擒六名初二日移紮西門外查瑞郡分建南北兩城北曰官城南曰民城中夾一河上有大橋一道初三日僞北王韋昌輝自臨江率黨三千餘人來援我軍派定兩大支以一支畱河北攻勦城內之賊以一支過河南列陣堵截外賊使不得入比韋逆至我軍之先過河者已拔其南城卽從南城出勦望見賊勢甚盛儀從赫奕奢僭非常頭隊排刀手兇悍直前劉騰鴻堅持不動靜以待之該

逆三次猛撲銳氣稍衰我軍突起乘之賊眾敗潰我軍復從北岸渡兵鈔其後尾賊隊大亂殲斃近五百人奪獲僞王黃轎繡傘金碗金盆各僭物及銀錢甚多韋逆逃竄鄉間是夜偷入城內初五日我軍大舉攻城緣梯踏肩肉薄而登該匪鎗礮木石同時并發壯士多傷未能得手初九日賊匪乘雨前來撲營先犯吳坤修彪勇營盤我軍悄寂無聲佯呼天雨藥溼何以禦敵賊悉銳撲至濠外我軍點放劈山大礮飽食羣子轟倒數人各營鈔出截擊賊黨敗潰紛紛四竄有不及進城者追殺幾盡十一十二兩日賊復傾城出犯我軍相戒勿動俟其疲乏奮勇直前殲賊甚多追至城根而還此楚軍到瑞後十五日以前六次

接仗獲勝之情形也當楚軍初至瑞州之時該逆方大舉撲犯
省城於省河之對岸數十里內築立賊壘五六處另詳水師奏
中其塘頭垓一壘去省垣十里而近逆旗日來沙井搦戰一河
僅隔臣等欲派兵勇迎接瑞州之援師必先攻破沙井之賊壘
七月初四日渡兵二千餘人進剿派守備羊瀛義武營擊中路
守備萬泰把總胡應元兩營擊西路守備李大雄滕加洪兩營
擊東路如牆排進直抵塘頭垓賊壘該逆出營迎敵未及片時
我西路兵已截斷其尾營內逆黨紛紛潰竄前敵之賊亦相繼
敗退踏破逆壘二座奪獲大礮四尊旗幟軍械無算此初四日
進剿省河對岸賊壘獲勝之情形也初九日添派新字營虎字

營合四千人前赴瑞州十五日到郡與鄂省援師相會十七日該逆以楚軍精強未可輕犯江軍稍弱且新到營壘未堅遂出二千餘人牽制楚軍而以大隊六千人猛撲新到江軍之營江軍各營官議定整隊以待俟其切近始行出擊右路一股先至直向平江營胡應元帶隊沖出中路繼至李大雄出禦之萬秦率九江營抵禦左路義武得勝兩營合鈔右路之後回合數十次右路退挫義武營勇夫紛紛逃潰幾至不支都司李新華帶新字虎字營馳出力堵楚軍湘寶勇馳至救援各營先挫者亦回旗轉戰李大雄力衝中堅賊卽敗潰勢如山頽殺賊五百餘人追至城下後者不及入城逼入濠籬自相踐踏城上火毯大

礮自相擊斃餘皆鳥驚獸散未得歸隊此十七日江楚兩軍初合擊賊獲勝之情形也二十七日楚軍派三成隊出迎餉項賊又分股來犯西門三股湘勇寶勇禦之江軍各營懲十七日之小挫堅壁不動以觀楚軍之戰湘勇寶勇鏖戰二時許該逆抵死不退滕加洪帶得勝軍策應寶營胡應元策應湘營又相持一時未能取勝李新華李大雄等從東北鈔出鎗礮兼施刀矛竝舉聲震天地賊眾大敗江軍由北門追至西門與湘寶各營會合殺賊共五百餘人餘眾狂奔入城城上巨礮轟擊煙塵蔽空火箭石塊驟如雨下不及入城者自斃約近百人此二十七日接戰獲勝之情形也伏查湖北援師四月初間自鄂省起行

追賊繞至長沙旋復馳至江西酷暑行軍轉戰千有餘里克復咸甯蒲圻崇陽通城新昌上高大縣扼駐瑞州以通兩湖之路江西全局之轉機胥係乎此所有帶兵得力之員應卽籲懇恩施以示鼓勵湖北補用參將普承堯請以副將歸部遇缺卽選湖南候補同知吳坤修請以知府歸於湖南補用同知銜曾國華係臣國藩之弟未敢仰邀

獎敘臣文俊查曾國華經其父曾麟書因聞羅澤南傷亡遣令馳赴湖北幫理營務卽經湖北撫臣委帶湘勇兼統湘寶各營來江援剿辛苦備嘗戰功卓著請以同知歸部儘先選用候選知縣劉騰鴻謀勇爲全軍之冠請以直隸州歸於江西補用並

奏
請

賞加勇號其餘出力員弁仰懇

鴻恩容

臣

等擇尤開

單保獎以昭激勸所有湖北援軍已至瑞

州並派江軍赴瑞會合疊獲勝仗各緣由恭摺由驛馳奏伏乞

皇上聖鑒訓示施行謹

奏

攻勦撫州疊獲勝仗摺

咸豐六年八月初七日

奏爲六月十二日至七月十三日官兵攻勦撫州疊獲勝仗恭摺具奏仰祈

聖鑒事竊官軍攻勦撫州六月十二日以前疊獲勝仗業經臣等會奏在案嗣據李元度會同林源恩陸續稟報六月十四日楚軍擬於西南城根隄下築一新壘以絕賊蹤而挖隧道以爲轟城之計賊併力來爭我軍抵陣衝鋒殺賊四十餘名殺黃旗賊目十一名隄上之賊復經江軍轟斃數十名十六日五鼓賊由文昌橋渡河趨正覺寺江軍派隊過河迎擊賊忽分股直撲老營又分股在楚軍對岸隄上挑戰我軍分路迎勦並乘勢夾

攻礮斃數十名賊退復追斬七名二十日楚軍定計仍於西南城隄上潛築新營以便再掘隧道夫役眾多四更工竣次日黎明賊出城來爭我軍豫安大礮八尊於新營之內先出數十人搦戰佯敗誘至牆邊開礮轟斃三四十名各營併力衝擊追至城根忽值狂風暴雨遂各收隊中有數十悍賊衝風冒雨來撲新壘復被劉長培等轟退是日共計刃賊四十餘名礮斃四十餘名鎗傷尤多二十二日賊復來犯新壘各營飛馳應援刃賊三名礮斃二十餘名賊遂敗退二十四日五更賊復向新營大呼圍撲營內靜守不動迨各勇馳赴一齊奮追斃賊十餘名其分股牽制江軍者出清風門沿隄來撲復被斬獲二十餘名此

六月十四日至二十四日攻勦屢勝之實在情形也七月初一日探報僞翼貴丈黃玉崑僞承宣黃士福等由臨江經崇仁統賊七千餘人冀圖與郡城悍賊內外夾攻猛撲我軍老營然後併力以西禦兩湖來援之師是夕至上頓渡民房打館我軍定議於初二日五鼓派隊馳勦逆黨四千餘人已於四更時潛伏卡外我軍行抵該處賊分三路包來黃旗徧野勢甚洶洶周岐山胡德璜鄧國祥從左路鈔出賊後彭大壽策馬涉水衝賊之右耿光宣吳齊源夾攻中路殲賊二百餘人賊遂奔潰經周岐山彭大壽等怒馬窮追沿途殺斃二百餘名黃玉崑僅以身免綠呢大轎拋棄沙洲當各軍乘勝追逋之時城內突出二千餘

賊以數百人犯江軍以數百人犯掘隧之新壘以千人犯楚軍之中營其犯中營者復分三路直薄濠邊經丁峻鍾朝輔黃兆麟等協力鏖戰斃賊數十名其犯新壘者經劉長培督勇出營立取大旗賊之首級賊遂氣奪而奔復被斬獲多名其犯江軍者由隄上包鈔右軍營盤經呂克生雷福堯等堵擊被殲數十名而退是日自卯至午鏖戰四時計共殺賊五六百名裒尸十餘里殺僞官數名生擒十四名奪獲黃旗黃繖黃帽黃馬褂多件軍器數百件此初二日大破援賊之實在情形也是夜逆黨仍聚上頓渡次日我軍派隊再往城中賊黨窺營內空虛傾城出犯以兩支撲新壘兩支撲楚軍之中營兩支撲江軍營經我

軍分投迎擊眾礮齊發踣尸徧地維時進剿上頓渡之軍業已
列陣市門該逆紛紛過河避遁我軍亦卽收隊初五日賊分數
支出犯江楚二軍而其撲新壘者尤悍炎天礮熱不便連開我
軍更番轟擊計斃四五十名每斃一人新賊鬨然遽退老賊持
矛督後兇很異常我軍用大隊衝之斬十餘名賊遂退去是夜
五鼓我軍派隊埋伏民房賊黨出城拒戰李晉發呂克生耿光
宣等中路誘之伏兵從旁鈔出鎗斃轟斃甚夥賊遂鼠竄入城
初六夜賊出百餘人來襲新壘火箭噴筒突入牆內我營寂然
不動但指人影所在轟礮指擊天明視之血痕殷地此初三初
五初六等日夜接戰之實在情形也初十日黎明賊黨三四千

人出犯中營我軍用礮擊斃數名賊仍屹立不動每開一礮反進數步相持兩時之久周岐山彭大壽併力衝突賊始退至隄邊旋復猛撲新壘緣新壘之中開掘兩隧賊黨偵知特用全力圍逼忽值大雨如注我軍鎗礮皆不能然賊遂撲入迨吳齊源等率勇再進賊已反客爲主混戰一時之久不能奪回計陣亡十三人受傷八九十人是夕我軍徹夜戒嚴次早賊復大至各營堅壁不動待其疲乏一擁而前賊出不意潰至隄根我軍用排鎗併擊每開一輪輒進十餘步如是數次轟斃約二百餘名又有埋伏民房之賊亦經圍燒死者纍纍又有從洲頭撲營之賊被擊落水無數是日我軍憤激誓洒前恥血戰半日呼聲震

天計殲賊四百餘名奪回五百斤大礮一尊此初十日被賊撲去新壘十一日復獲全勝之實在情形也十三日寅刻賊卽吹角出城火光徧野黎明時分三路來犯中左右三營我軍先日趕築長牆於隄下埋伏劈山礮以俟逆黨先踞營前山嘴大礮轟倒八九名羣子如雨賊仍不退其下墩來撲者經埋伏之礮排轟之連斃十餘人時督隊之賊有黑白馬二匹左突右衝前後窺探大隊皆受其指揮突被礮轟落馬馬遂狂奔有數十黃旗簇擁百餘人擡以入城於是各路之賊皆喪氣而歸收隊尙在辰初其來也如潮湧其去也如山隕擊斃者必爲著名賊首無疑是日賊黨數千人出北門過西津渡而去有馬四五十匹

轎二十餘乘婦女二百餘名受傷之賊用竹牀舁去附近百姓一概逃盡據報稱人數在六千以上悉赴瑞臨以禦兩湖之援師由是撫州之賊數稍減我軍久戰力疲亦少資休息矣伏查臨江援撫之賊前經李元度等擊退三次蹋毀四營受創不爲不重今僞翼貴丈黃玉崑復率大股七千餘眾來援氣勢浩大民心軍心一時大爲搖動我軍竭力撐持合計斬獲傷夷數在千名以外惟初十日賊因探知地道所在出其全力撲去新壘小挫一次餘皆連獲勝仗足以固士氣而折逆鋒目下兩湖援師已至瑞州賊勢全注西路臣等仍飭李元度圍逼撫城力圖克復以期肅清東路厯次接仗奮勇初終不懈者籲懇

天恩准臣等核保數人其始勤終怠者甄別數人以昭激勸所
有六月十二日至七月十三日撫州攻勦各情理合據實馳奏
伏乞

皇上聖鑒訓示施行謹

奏

硃批知道了著查明舉劾欽此

水師疊獲勝仗摺

咸豐六年八月初七日

奏爲水師疊獲勝仗恭摺馳奏仰祈

聖鑒事竊江楚水師分布各路使水賊不致蔓延先後收復豐城南康郡縣業經陸續奏報在案該逆自去冬今春攻陷吉袁瑞臨等府因水路不得逞志於我遂於吉安臨江瑞州三府修造戰船於臨江鑄造礮位又復煎硝製藥採鐵鑄子勒派鄉官多設分局議定秋閒大舉圍撲省城上游瑞臨之賊船出而下竄下游湖口之賊船入而上犯冀圖困我水師於中段六月二十五日該逆於生米司築立賊壘二十七八等日於塘頭垓萬壽宮瑞河口築立賊壘七月中旬又於臨江河口築立賊壘其

在塘頭垓者去省城不過數里逆旗逼於沙井一水僅隔猖獗已極七月初四臣等派陸軍渡河攻勦踏毀賊營另於瑞州案內具奏其在生米司瑞河口臨江河口者深溝高壘密排礮位專擊官軍船隻而護瑞臨賊舟爲衝出省河之計七月初一日賊由松湖帶戰船三十餘號陸賊千餘將抵瑞河口該處經我軍先釘排樁僅容一船出入是日辰刻江軍水師劉子潯派李鴻泰等相機進勦傍山迎敵該賊船身笨重甫近排樁被我軍哨官陳元勝唐書麒衝鋒直入百礮轟擊火器並舉各哨船兩路分追擊斃溺斃之賊各數十名熊吉華管帶小划督勇登岸殺斃陸賊多名餘賊逃避山中其燒燬賊匪大快蟹船二號奪

獲大戰船二號舢板小划三號大礮十二尊子藥旗幟無數其
生米河沿之賊被楚軍前營游擊劉國斌礮船日夜轟擊新附
逆黨不肯入壘因初一日水師有瑞河口之捷初三初四陸軍
有瑞州之捷沙井之捷賊眾膽寒遂於初五夜棄營而遁我軍
追奪大礮四尊火藥五十九桶大小子彈鎗械旗幟尤多此水
師獲勝瑞河口及生米賊營逃遁之情形也七月二十七日記
名道劉于潯親督守備李鴻泰李逢春蔡康業等營戰舟小划
前往臨江河口巡哨該逆於南北兩岸堅築礮台二座外設浮
橋內闌木板又於裏河爲連珠小礮台五座劉于潯傳令往樟
樹鎮會齊派李逢春等船六號竟上吉安河以爲疑兵派曹篤

清等船六號上前引賊派黃金彪等緊傍北岸以便入營放火
曹篤清等至浮橋口門彼此開礮賊堅壁不動我軍佯爲膠淺
回船退走賊果擁出口門乘勢追趕我軍小划隨卽進口一面
斬斷浮橋曹篤清等六船一擁直前李鴻泰左營各船啣尾進
勦李逢春等從南岸上牆放火黃金彪等從北岸上牆放火謝
鳳高張桂林之陸勇分投登岸水陸夾擊賊不能支我軍將賊
船圍在河心進退無路殺斃擊斃溺斃之賊約四百名奪得大
小戰船九號大小礮位四十七尊火藥礮子百餘石大小黃旗
五六十面奪米煤船十三號燒燬數十號割取僞元帥王姓首
級僞印兩顆二十八日探得賊匪尙餘礮船五號退守臨江城

下劉于潯派舢板船王炳等徑入內河囑令見賊卽退暗派李逢春等帶陸勇伏於南岸隄下賊見我軍船少果水陸來追我軍佯退隄下伏兵忽起賊船退敗我軍回棹返追閻廷臣躍入賊船鎗礮齊開斃賊甚多陸賊見事急自上游厲水前來救援我軍縱火焚賊划二十餘號奪獲大礮六尊煤米船十餘號子藥十餘石此二十七二十八日劉于潯水師獲勝掃除臨江河口賊壘之情形也下游水師之駐紮吳城者自六月收復南康之役久未接仗七月二十七日惠潮嘉道彭玉麟帶後營嚮導營赴下游巡哨行九十里已刻至南康循東岸而下遙見謝司塘逆旗招展陸賊上犯賊舟亦自西岸神靈湖列陣而出彭玉

麟率各營哨仍自東而下將鈔尾而兜擊之賊船斜趨而西彼此橫列一字陣對敵逾時賊舟敗北我師乘勝窮追直至屏風去吳城老營已隔一百三十里捩舵收隊行不數里南風忽起該逆見我軍遠來勞乏又見南風之不利於退師也遂回棹返攻極力猛撲子如驟雨我軍亦停棹對擊礮煙蔽空湖波大作軍心搖惑幾至不支彭玉麟傳令大舟下旋與之坐戰陣腳稍定各舢板亦回頭奮擊銜枚無譁千礮雷震賊勢蹙復敗我軍揚帆佯作欲追之勢實則靜待以觀其變待賊舟奔北已逾二十里始行捲塘收隊五更乃抵老營此吳城水師巡哨南康接仗之情形也伏查江西水賊以湖口逆舟最爲凶悍而吉安臨

江瑞州三處造船鑄礮各治水軍以圖上下夾擊困我省垣譎謀毒計深堪髮指臣等派彭玉麟駐吳城以防湖口之賊劉于濬駐豐城以防贛河臨江河劉國斌駐市汊以防瑞河茲幸仰仗

天威數戰俱勝奪獲礮位至六七十尊之多從此瑞臨兩河賊舟不足爲害上游漸易肅清記名道劉于濬自督帶水師以來無戰不勝以寡禦眾士卒樂爲效命籲懇

天恩賞戴花翎以示鼓勵其麾下出力員弁及彭玉麟麾下屢戰出力之員可否容臣等核保數人出自

皇上天恩傷亡弁勇查明照例辦理所有水師迭獲勝仗緣由

恭摺由驛馳奏伏乞

皇上聖鑒訓示施行謹

奏

專催崑壽赴江南并及江省軍情片

咸豐六年八月初七日

再臣等於八月初三日承准軍機大臣字寄七月十七日奉

上諭現在廣東赴援江西之兵已有壽山謝焜孫福同等管帶
著卽飭令崑壽徑往江南丹陽軍營藉資攻勦該提督克復和
平後是否已由江西折回改由海道前進或已出粵境行抵江
西著葉名琛柏貴曾國藩文俊確探該提督現在何處傳旨催
令迅赴丹陽毋稍延誤至江西省各路援軍漸次雲集南康饒
州兩府城已報收復建昌撫州亦獲勝仗大局當有轉機且逆
賊麇聚江南則江西境內情形較鬆曾國藩等務宜乘此機會
激勵將士將臨江瑞州等府次第克復此次畢金科攻克饒州

尚能奮勇著令隨勦隨進毋得株守一隅專待外省援兵致稽時日等因欽此臣等於七月十七日接贛州鎮道來文尙無提督崑壽入境確信茲欽奉

諭旨臣等卽恭錄咨明專派把總曾耀坤繞道馳赴贛州確探崑壽行營投交催令迅赴丹陽毋稍延誤至江西賊勢之浩大黨類之眾多臣等於二月二十一日覆奏一摺業已縷晰言之厥後三月初間逆首石達開竄擾皖南帶去男婦三萬餘人然所帶者多係江西新擄之民非盡兩廣久從之賊江西賊勢仍未見其衰落八郡名城久被淪陷南康雖經收復尙無陸兵駐守刻下贛州建昌饒州三府各有兵勇數千撫州瑞州袁州三

府各宿重兵將近萬人兵力不爲不厚鏖戰不爲不苦殺賊動以千計自損動以數百計不爲不多而迄未能克復要郡挽回全局固由臣等調度之乖方亦足見此賊以全力圍困江西未嘗有一處之瑕隙一日之鬆懈也臣等查閱俘獲僞文參核各處探報賊首之在江西主持軍務者自去年十一月至本年二月底以僞翼王石達開爲主三四月以僞翼貴丈黃玉崑爲主六七月後以僞北王韋昌輝爲主如九江之林啟容瑞州之賴裕新湖口之黃文金皆著名劇賊撫州之三檢點建昌之張三和袁州之李能通雖不甚著名亦復譎謀百出堅悍異常統計江西境內廣西滿髮老賊與廣東湖南新附之賊約在四萬

奏稿卷八
以外本省甘心從逆之匪約在三萬以外而皖鄂兩省上下往來之賊不在此數臣等忝列戎行惟當壹意鎮靜化大爲小以安軍民之心何敢稍涉張皇然賊勢之多寡軍情之輕重亦當悉心考究又何敢稍事含糊反蹈諱飾之咎所有專弁咨催提督前赴江南及江西近日軍情理合附片覆

奏伏乞

皇上聖鑒謹

奏

硃批知道了欽此

請撥山陝餉銀片

咸豐六年八月初七日

再臣等本年因餉項支絀先後奏請於上海抽釐者一次請撥上海關稅銀者二次均經江蘇督撫臣議駁未得籌撥來江廣東協款亦以道路梗阻不克解至江省本省則八郡淪陷錢漕捐輸無從措手竭蹶情形久在

聖明洞鑒之中欠餉愈久兵勇愈疲且亡者無卹銀傷者無養銀怨望之情積而爲挾制之狀勝仗不能加賞敗挫亦難於言罰臣等日夜焦灼毫無良策今幸湖北援師馳至瑞州軍威爲之一振然其欠餉已滿兩月零三日矣若不急籌放給則勁旅亦將變爲疲兵此後安得復有振興之機合無籲懇

皇上天恩敕下山西陝西兩省撫臣每月各籌銀三萬兩協濟
江西委員解至荊州臣等派委大員在於荊州府守候催提解
至瑞州等處專供兩湖援師之用儻有贏餘分撥各營稍補前
數月之欠項臣等爲保全勁旅挽回大局起見迫切下忱伏希
聖慈垂鑒謹附片具

奏請

旨

報瑞州援軍勝仗片

咸豐六年八月初七日

正封摺聞接據稟報八月初一日瑞州賊匪糾集臨江奉新安義武甯義甯等處之賊約二萬人猛撲官軍營盤鏖戰四時幸獲大勝該匪欲困江西必不使我與兩湖相通瑞州乃其必爭之地日內仍當有數次大戰除查明初一日開仗情形續行具奏外理合附片先行

奏報仰慰

宸衷謹

奏

查明吉安殉難員弁請卹摺

咸豐六年八月初七日

奏爲查明吉安陣亡殉難文武員弁請

旨從優議卹恭摺奏祈

聖鑒事竊照吉安府城於本年正月二十五日被賊攻陷業經

臣文俊繕摺

奏報嗣

臣

等於三月二十六日承准軍機大臣字寄欽奉

上諭文俊奏吉安失陷一摺臬司周玉衡理問周恩慶遇害情形著曾國藩文俊確查再降諭旨其闔城文武如何下落一併查奏等因欽此欽遵行局查明詳辦在案查吉安府城於咸豐五年十一月二十日被圍逆匪愈集愈多百計圍攻經臬司周

玉衡督同道銜吉安府知府陳宗元前任吉安營參將柏英及在城文武員弁兵勇登陴堅守晝夜嚴防十二月初八日該逆用地雷轟坍西門月城經周玉衡等督率士卒奮勇堵截立時搶築完固斃匪多名賊眾屢次用雲梯四面來攻均爲我軍擊退每次殺賊三四百名不等並乘賊不備開城出勦迭有斬擒焚營多座該逆聚眾數萬圖攻益急距郡周圍數百里外皆爲賊踞接濟阻絕援兵久頓泰和以致城中食用俱竭勢雖十分危急而士卒齊心不稍懈怠詎本年正月二十五日被賊復用地雷轟塌城牆逆眾拚死蜂擁衝入周玉衡陳宗元柏英與同知銜吉安府通判王保庸推升湖北興國州知州現任廬陵縣

知縣楊曉昀提舉銜准升知縣署吉安府經歷余焯吉安府照磨胡瀚吉安府教授余步蟾准升知縣廬陵縣縣丞呂承恩廬陵縣典史章德懋國子監學正銜廬陵縣教諭李傳心訓導吳襟浩推升浙江處州鎮標右營游擊萬安營都司馬福壽署吉安營守備揀發都司克什布周玉衡之子江甯布政司理問周恩慶六品軍功頂戴試用縣丞周自新六品軍功頂戴直隸候選訓導張滋六品軍功頂戴浙江生員范雲程六品軍功頂戴卽補縣丞秦振元准升清江縣知縣王見周湖北舉人李鴻鈞候補未入流孟國觀陳宗元之子監生陳世濟署興國營千總贛標左營候補把總武舉張捷魁贛標中營署守備蔡元陞署

把總事外委李得魁左營兼署千總事本營把總吳廷瑞把總
藍珩外委千總鄺昌貴後營把總戴文斌外委黃萬成吉安營
千總謝明亮額外劉起元劉效熊准發臨江營候補外委武生
鄧家璧已革准升德化縣知縣本任吉安府經歷林蔚六品軍
功頂戴王虎臣直隸俊秀程虎炳九品軍功頂戴秦登元已革
甘肅涼州鎮標外委千總韓衍彬督兵力戰柰寡不敵眾均遭
戕害周玉衡陳宗元楊曉昀遇害尤慘兵勇紳民被戕甚多時
永豐縣縣丞候選知縣萬慶章在郡辦理支應局務知城已失
陷將縣丞鈐記交家丁嚴義密藏身邊囑令前赴鄰郡呈繳該
員卽在府義倉後投井殉難茲據總局司道以迭據各該員家

屬稟報具詳請

奏前來臣等伏查吉安被圍兩月有餘逆眾數萬百計攻撲經在城文武悉力守禦殲擒多賊乃因城牆兩次轟坍以致失陷該員弁或臨陣捐軀或從容殉節大義凜然該員弁等前次搶護缺口出力曾經臣文俊奏奉

硃批查明彙保欽此臣文俊當卽逐加酌覈臬司周玉衡擬請加布政使銜陳宗元擬保以道員補用柏英擬加副將銜王保庸擬保以同知補用楊曉昀擬保以知府升用馬福壽擬保以參將用周恩慶擬保以知州補用周自新擬保以知縣補用張滋擬保以知縣卽選范雲程擬保以從九品卽選秦振元擬保

以知縣補用王見周擬加同知銜陳世濟擬保以縣丞選用黃萬成擬保以千總拔補張捷魁擬保以千總補用王虎臣擬保以府經歷卽選程虎炳擬保以從九品卽選秦登元擬保以從九品選用林蔚擬請開復准加知縣韓衍彬擬請開復外委正在覈辦旋聞該郡業已失陷是以未經出奏合無仰懇逾格天恩均照擬保官銜

敕部議卹余焯胡瀚余步蟾呂承恩章德懋李傳心吳襟浩李鴻鈞孟國觀克什布蔡元陞李得魁吳廷瑞藍珩鄺昌貴戴文斌謝明亮劉起元劉效熊鄧家璧萬慶章俱請交部從優議卹周玉衡久任贛南堵剿粵匪力衛邊疆素著聲威士民感戴並

請於吉南贛三府各建專祠陳宗元等均於吉安祠內附祀以
慰忠魂而勵節義除飭查各署殉難眷屬幕友姓名及兵勇名
數另行辦理外所有查明吉郡陣亡員弁請卹緣由謹合詞恭
摺具

奏伏乞

皇上聖鑒訓示謹

奏

圍攻瑞州收復靖安安義二縣摺

咸豐六年八月三十日

奏爲官軍圍攻瑞州屢獲大勝並分支出剿奉新收復靖安安義二縣恭摺馳奏仰祈

聖鑒事竊照湖北援師自抵瑞州臣等派兵四千前往會合七月內屢獲勝仗業經具奏在案八月初一日僞指揮黃姓糾集臨江奉新安義武甯義甯各處逆黨併合城內大股號稱四萬四路擁至旗分五色排列山岡黃旗一股對我湘營紅旗一股對我寶營白旗藍旗二股對我省兵五營青旗及雜色鑲旗一股伏在樹林之間我軍派定隊伍靜以待之賊亦排立不動相持約一時許另有青旗一股從東北數里外風馳雨驟而來截

我軍之後路排列山岡之賊呼聲震天直撲我軍待至濠外我軍一齊衝擊而賊勢浩大前者已殪後者不退黃旗已卻紅旗又至青旗一股更爲兇悍我湘營以數人翼蔽劈山礮俟其逼近則轟擊之退而又進又指擊之賊陣大亂棄甲狂奔有數百賊撲平江營者戀戰不退幾欲摩壘而入我軍以數營追逐敗賊而以二營迴鈔平江營前之賊之尾圍此數百逆匪於垓心千矛叢刺黃埃殷地官軍與賊隊混亂將不可辨悍賊露刃外向衝出重圍者近五百人殲斃者二百餘人其大隊分追敗賊馳逐奉新之西道分投擒斬橫屍徧野棄械塞途窮追三十里而返訊據生擒賊供號稱四萬實二萬餘人廣賊數千極爲驍

悍本日被殺約計千餘此八月初一日瑞城之匪與援賊合攻我營迎戰大勝之情形也赴援之賊一經敗潰卽欲分歸各處初三日僞將軍石姓自九江來援勒令敗賊仍回瑞州於東北大路夾立營盤五座與城內之賊爲犄角欲斷我軍通省之路楚軍劉騰鴻普承堯與省兵營務處彭山吧羅萱等商議援賊初敗其眾已餒石逆新到之援強之同戰志氣未一壁壘未堅宜速戰以挫之定以楚軍之湘後營寶中營自守營盤以防城內賊黨之出犯而以湘中營寶右營與省兵五營者往攻東北援賊之營劉騰鴻恐省兵不可深恃親率楚軍三百人者與之偕往初四日黎明出隊行未三里該逆蜂擁而至恃其眾倍於

我大圍包鈔漸逼漸近悉銳以撲劉騰鴻之師三百人者植立如樹不進不退寂然無聲該逆大呼動地我軍不之應火器如雨亦不之應待其撲近乃發劈山礮殪其執旗賊目賊稍卻則三百人者植立如故又近又殪之如是者凡六七次賊氣稍沮省兵得勝軍躍馬衝陣各營併力齊進賊遂敗退追至小橋忽卓旗排立我師斬其先鋒二名追至牆下賊又排立劉騰鴻率三百人者繼至乘勝一呼破其大壘一座火毬齊擲煙燄障空各壘驚惶又連破其四座敗賊擁聚一處我軍以一隊橫截之紛紛四竄追殺數里而還方悍賊卓旗排立之時城內之賊出撲官軍營壘湘中營寶右營飛馳回救我進則賊卻我稍暇則

賊仍進更番迴合至三時之久直待劉騰鴻與省兵五營者盡
踏賊壘追賊歸來然後併力以擊城內之賊始獲全勝日暮收
隊此初四日城外續添援賊我軍大獲勝仗踏破賊壘之實在
情形也得此兩戰軍心大定援賊竄歸各處省城之路無梗江
西兩湖遂獲疏通矣初六日我軍派隊渡河禁南城之民與賊
貿易誅運送賊糧者五人西門出賊千餘來爭我軍迎擊驅而
敗之初九日賊出二三千人分撲湘營寶營劉騰鴻普承堯督
隊堵擊該逆反奔河沿甚窄遂徒步而涉以趨南城河干竹簳
賊之預防我軍者至此反以自刺南城先有伏賊千餘突出來
援我軍乘勝涉水追之矛擗港內殲斃無數十一日北城出賊

二千餘撲省城兵各營西門出賊四五千分趨兩路南城出賊千餘護礮船而上我軍亦分三路應之劉騰鴻擊西南普承堯擊西北萬泰李大雄等擊北路分道揚鑣鎗礮並發鏖戰三時西南兩路相繼敗潰北路之賊望風亦退十二日賊又出數千來撲省兵各營我軍出隊施放連環鎗礮斃賊百餘人賊奔入城午刻收隊傳餐甫畢賊又來犯以千餘人出北路牽制省兵各營而出全隊近萬人猛撲劉騰鴻之湘營長髮悍賊蟻附濠外火箭噴筒迸落營中帳棚屢然卽時撲滅弁勇悄寂不動相持二時該逆氣竭湘營開壁馳之賊遂大敗如山潰河決殲斃甚多訊據生擒賊供賊中聞劉騰鴻分兵出勦奉新遂定計以

全力攻撲湘營自辰至午出戰一次以疲之北路另出一枝以牽綴之其注意在專撲湘營不料反爲所敗等語此初六初九十一二等日接戰獲勝之情形也嗣後逆匪常出搦戰小有斬獲二十六日南城出賊千餘護礮船而上抵湘營之對岸北城西門出賊約二千橫列隄上撲省兵之營劉騰鴻以礮轟南岸之賊而令劉連捷劉芳貴由西南橫截之省兵得勝軍出擊北路之賊斃尤悍者十餘名我軍亦傷數人二十七日奉新援賊復至瑞州由西南門出五六千人抵西北隅向省兵衝突者爲第一隊其抵正西接應者爲第二隊其橫布西南隅者爲第三隊南城仍出賊千餘護礮船以上牽制石鼓嶺之湘營劉騰鴻

令省兵各營靜鎮以待以湘後寶中營直搗中堅攻其第二隊
自帶親兵堵擊南城并礮船一股西路之隊先到將賊之第二
隊衝開蹂踐田隴開殺斃百餘人第一隊已被我軍截斷省兵
開壁逐之四圍包裹桀者突圍而出殺斃者近二百人正追逐
閒南岸賊忽徒涉來撲分支堵之一律敗退此二十六二十七
日連獲勝仗之情形也前此七月下旬官軍急攻瑞州之時上
高新昌又有賊徒佔據湖南之路復梗臣等因於瑞州營內抽
派候選同知吳坤修率原帶之彪勇一千名益以義武勇七百
名作為游兵回勦新昌上高相機規復奉新安義靖安等縣四
路雕勦不惟斷瑞州賊援且可掃除游匪無令到處蔓延民不

聊生吳坤修等於七月二十五日重收復新昌縣派員於二十八日重收復上高縣停留數日搜捕餘匪八月初八日行抵奉新夜半派隊渡河至縣城北門外之獅子山守城之賊寂不聞聲各勇急欲梯城而上將近城頭則火彈齊發若預知者我軍高踞獅山對城輪放鎗礮自寅至午聲震山谷正擬暫行休息忽賊繞東城而出獅山之麓直撲我營被我軍殲斃百餘人十一日安義援賊約二三千人分爲兩股一股由正東撲義武營一股排列東北山岡我軍先擊山岡之賊連斃數人正東股匪亦卽卻退兩路追殺奪獲旗械三百餘件斬馘百餘生擒十七名收隊不及一時靖安援賊又來數百人亦被我軍圍殺紛紛

逃竄十三日吳坤修飭令守備羊瀛等堅守營壘以防城內之賊而自帶各勇馳勦靖安該逆探知傾巢逃竄當卽窮追截殺後隊甚多卽日收復縣城十六日復帶各勇馳勦安義先飭邑人余英慶混入城內約會被脅鄉兵舉火爲號我軍抵城天尙未曙銜枚渡河由南門梯城而上城內之火亦起該逆倉皇失措開北門而逃屯聚王家橋其地樹木叢雜賊旗隱見綿亘數里未幾反戈來撲我軍奮力直前開礮連擊該逆不能抵禦盡氣狂奔而民房尙有輜重小車百餘兩吳坤修恐各勇貪財行伍散亂縱火焚之申刻進城安民次日仍返奉新此吳坤修分勦奉新擊散援賊並先後收復安義靖安二縣之實在情形也

臣等伏查逆賊欲困江西必先力爭瑞臨瑞州城內本集悍賊萬餘又調各援賊撲我營壘初一初四兩次大戰關係全局甚鉅所有尤爲出力人員應請立沛

恩施以示鼓勵營務處湖南河溪營都司彭山岷九江營守備萬泰均請

賞戴花翎候選訓導羅萱請以知縣歸部分班選用仍加知州銜守備銜千總滕加洪請以都司歸於湖南儘先補用藍翎把總詹榮清請以守備歸於湖南儘先補用外委黃純珍黃在玉均請以藍翎把總歸於永州鎮標補用外委黃兆麟建昌案內擬保千總尙未出奏此次奮勇捐軀請

奏稿卷八
敕部照千總例議卹其餘傷亡弁勇查明照例辦理所有瑞州
官軍屢獲大勝並分支攻勦奉新克復安義靖安各緣由恭摺
由驛馳奏伏乞
聖鑒

皇上聖鑒訓示施行謹
奏

邊錢會匪圍攻廣信浙兵援剿解圍摺

咸豐六年八月三十日

奏爲邊錢會匪竄陷建昌廣信各屬並圍攻廣信府城現經浙兵援剿解圍各屬並未佔據恭摺馳奏仰祈

聖鑒事竊江西吉安建昌等處向有邊錢會名目以錢塗硃描金爲字地方官厯經查禁而黨與已多不能遏絕漸且勾結已革之游勇新附之長髮煽聚千餘人滋事於吉建交界之區臣等接據署廣昌縣朱國幹署廣昌營都司張騰霄稟報七月十五日報有會匪竄擾甯都州永豐縣連界之黃坡地方官兵接仗失利十八日竄至該縣城西門外典史周德耀之子從九周光裕抵禦陣亡經張騰霄督帶弁兵紳勇攻破隔河賊壘賊於

二十日卽竄下游南豐縣境旋接建昌府何忭在籍知府張家駒稟報南豐縣於十九日告急當派閩兵及本處義勇前往會剿援師未至該縣已於二十三日失陷賊多本地會匪因四月閒曾經拏辦會首林雙桂故破城之日屠戮甚慘文武各官俱無下落先經張家駒函諭該縣紳民協力規復收復之後稟請豁免錢糧眾心鼓舞聲勢甚壯賊遂於二十四夜棄城而去竄往新城縣境新城爲建昌府營糧台所在何忭恐有疏虞卽日帶領義勇七百名馳往防護仍調閩兵續往援應不意二十四日賊分三股蜂擁入城關廂內外四面火起在城之縣令諸葛槐縣丞馬長嶽巡檢吳毓濬在籍知府楊堃父子同時殉難何

栳妻薛氏女三人胞姪何彥猗幕友陳德亮陳濟之僕婢八人
全家盡節無苟免者該府何栳身被矛刺死而復甦兵勇昇至
鴻門地方不食二日氣息僅屬適續調援應之建昌一軍聞兵
五百前後趕到該府帶同回縣掩殺匪黨遂於二十七日收復
縣城二十九日賊由新城竄至瀘溪縣境之長興嶺卽乘勢進
城知縣田彬外委林長延帶兵燒燬賊營一座殺斃賊黨百餘
次日賊由北門竄往貴溪此會匪擾陷建昌各屬並未佔據之
實在情形也復據貴溪縣令扎拉豐阿稟報八月初三日賊至
貴溪四十里之杜灣初四日學政廉兆綸派令前皖南道石景
芬教職郭守謙等各帶廣義勇分投迎擊先勝後敗郭守謙陣

亡餘俱潰散匪黨卽於是日進城該縣招集鄉兵堵擊賊旋紛
紛東竄由弋陽興安一帶行走初七日卽到鉛山之河口鎮焚
燒房屋擄掠船隻聞該匪將分兩股一竄鉛山縣城一竄廣信
府城據署鉛山縣令陳汝楨稟稱賊踞河口爲境內山河所阻
初九日尙未到城旋據探報該匪初十日突入鉛山隨卽竄出
徑奔郡城此會匪擾陷廣信各屬亦未久踞之實在情形也復
據署廣信府沈葆楨稟稱該守先隨廉兆綸在河口籌辦軍餉
忽聞貴溪失守因於初六日五鼓單騎馳回府城不但居民鋪
戶移徙一空卽兵勇胥役僕從亦皆散去當卽飛函請駐防玉
山之安義鎮總兵饒廷選就近赴援初九日饒廷選統帶浙兵

二千順流抵郡十一日賊亦麕集城下四門皆有賊蹤饒廷選令開東北二門出隊迎擊殺賊百餘名二十三復有斬獲賊尙未退等語臣等自聞貴溪之敗廣義軍全數潰散一面咨調玉山浙江之兵前來救援一面飛檄撫州李元度之師抽撥馳勦部署甫定接據稟報十五日浙兵大獲勝仗殲其渠魁餘匪遂於是夜全行遁去由興安竄往德興一帶廣信之圍已解河口亦無賊蹤此會匪圍攻廣信府城浙兵援勦解圍之實在情形也臣等伏查此股會匪初本不甚猖獗卽旬日之間連擾數縣亦實無兵勇與之拒禦非果由賊勢之兇悍迫廣義軍潰於貴溪於是逆燄遽張裹脅愈眾遂敢圍逼廣信梗塞江省咽喉

之路大局幾不可問幸知府沈葆楨先馳入城得以豫請援師與參將榮壽知縣楊昇千總胡再陞四人者立志堅守提調援師保全要郡實屬危而獲安沈葆楨係原任雲貴總督林則徐之甥又係其女壻講求有素此次守城吏民散盡衙署一空其妻亦同在危城無僕無婢躬汲爨具壺漿以餉士卒沈葆楨與楊昇等徒步登陴晝夜辛勤兩年以來江西連陷數十郡縣皆因守土者先懷去志惟汪報閏守贛州沈葆楨守廣信獨能伸明大義裨益全局除汪報閏歸於贛州案內奏請外所有署廣信府知府沈葆楨參將榮壽知縣楊昇千總胡再陞及饒廷選所帶之出力員弁可否容臣等分別保獎抑或另將浙江援師

歸於浙江撫臣保奏之處伏候

聖裁訓示至新城縣在籍廣東知府楊塋知州銜署知縣諸葛槐縣丞馬長廬州同銜極高司巡檢吳毓潛從九周光裕均請照陣亡例從優

賜卹貢生陳德亮監生陳濟之何彥猗均請照外委例

賜卹何棾一門殉難其妻薛氏及其三女均請

旨敕部旌表仍請分別官紳男婦准於殉難地方及各原籍建祠立坊僕婦照例附祀以慰忠魂監生陳廷弼手刃二賊身中五矛越宿而蘇城中紳士惟該紳僅存懇

恩賞給六品翎頂以昭激勸此外新城及各縣殉難官紳俟確

切查明續行具奏失事各員弁由臣文俊分別查辦所有邊錢
會匪竄陷各屬圍偏廣信浙兵來援府城圍解各情由恭摺由
驛馳奏伏乞

皇上聖鑒訓示施行謹
奏

閩兵援勦建昌府前後獲勝情形摺

咸豐六年八月三十日

奏爲閩兵援勦建昌府前後獲勝情形恭摺馳奏仰祈

聖鑒事竊官軍於六月初旬會勦建昌府城連獲勝仗嗣因饒
州告警將省兵調回各情形業經具奏在案省兵調回之後廣
義一軍亦經學政臣廉兆綸撤回廣信其在建昌會勦者惟有
福建副將張從龍護副將陳上國等所帶援師二千六百名暨
本府之兵勇千餘人嗣據知府何栻在籍知府張家駒暨張從
龍等稟稱閩兵扼府之東南更番攻擊以防賊之內出本地義
勇在西北一帶往還會哨晝夜設伏以杜賊之外援復於南城
逼近築礮台一座卽於其下開挖地道二處爲明攻暗陷之計

六月三十日賊從水閘鑽出突襲礮台守台弁勇短兵相接殺斃執旗老賊多名賊之後隊奔潰入城張從龍等旋派守備吳景芳伍連青勇目莊廷禮各帶兵勇分紮礮台前後而身偕參將舒隆阿各帶精兵駐紮距城半里秋水園地方派建昌營千總楊錦斌等分探賊蹤乘機截剿自七月初旬以來分兵馳赴二三十里外堵截九次屢有擒斬逆援斷絕賊首張三和陶文發俱經受傷雖地道掘至城根爲賊窺破壅水灌注然城中之賊日益惶懼勢甚窮蹙正擬指日克復府城不意十九日有邊錢會匪勾結逆黨嘯聚數千人竄擾南豐新城等縣不得不商派閩師並本地兵勇二千餘人馳往屬縣分途堵剿此圍剿建

昌正在得手因會匪竄擾近縣郡城之圍稍弛之情形也知府何棻以新城設立糧台親率兵勇前往防護郡城軍務交張家駒等辦理維時城內之賊見官軍紛紛調撥計圖內外夾攻撲我營壘張家駒等探知卽與張從龍陳上國商議嚴防並籌截擊二十七日宜黃援賊果分兩路而來一由西南麻源偷撲張從龍後山一由西路黃堂廟夾擊閩營之左城內之賊亦分三股而出張從龍以山後賊至揮軍出迎先據山巔立刺數賊餘黨滾跌下山自相踐踏死者甚多西路賊眾經閩營分軍擊敗復與西南之賊會合張從龍躍馬指揮刀矛齊進賊遽逃竄入城其出南門之賊正思接應經閩軍另枝截住遂併股衝突勢

極兇悍我軍迭開連環鎗礮該逆冒煙直撲而來陳上國手刃一賊將弁齊赴先斬執大黃旗賊目乘勝追北其出東門者經建昌隔岸兵勇截擊其後閩省興化泉州兩營夾攻其前次第敗竄合計殲賊近六百名閩營之功爲多奪獲大旗幟槍械五十餘件此二十七日官兵分調他縣賊匪乘虛撲營擊勦獲勝之情形也二十九日賊復由東門渡河武生張烈趙金彪會興化營迎擊敗之八月初一日復分兩路出城官軍分頭夾擊閩營外委曾瑞英奮勇爭先中伏殞命閩兵憤怒追擊直逼南門城下共殺斃三百餘人生擒二十一人初三日黎明復傾巢出戰爲官軍所敗午後偷渡東岸簾運糧糈復經東營兵勇擒斬

數人此又連日獲勝之情形也臣等查建昌之賊嬰城固守閩師百道圍攻該逆勢已不支乃因邊錢會匪突起大軍分調四出卽勾引外援出城衝突幸我軍連獲勝仗足以寒賊膽而定人心目下撤調外縣之師已回郡城臣等又派都司張大雄道庫大使李熙瑞帶贛標龍泉兵勇六百餘人前往協剿嚴飭各軍誓必力破此城以冀全局之轉外委曾瑞英衝鋒殞命請從優照把總例

賜卹以慰忠魂其餘傷亡弁勇查明照例辦理所有閩兵援剿建昌前後獲勝情形理合具摺馳奏伏乞

皇上聖鑒訓示施行謹

奏

奏和卷八

五

請撥湖南軍火片

咸豐六年八月三十日

再_臣等前因江楚軍局火藥應用不敷飛咨閩浙兩省無論火藥硝磺每省籌撥十萬觔委解來江以應急需於本年正月間附片具奏嗣准閩浙兩省先後解到硝磺共五萬八千餘觔分給藥局配製撥用數月以來所存無幾_臣等咨催閩浙兩省將短解硝磺趕緊籌補惟江西水陸兵勇數近五萬需用火藥甚鉅一經缺誤關係非輕因思湖南境內現已肅清自可設法協濟合無仰懇

天恩飭下湖南撫_臣無論火藥硝磺籌撥十萬觔迅速委解來江以資防剿_臣等仍一面飛咨該省先行撥解謹附片具奏請

旨

奏和卷五

聖

玉亮病故請卹片

咸豐六年八月三十日

再據統帶福建援兵延平協副將張從龍等稟稱署興化協左營都司玉亮揀發到閩卽行調派出征於咸豐六年五月二十四日帶兵至江西建昌府援剿六月十一日進逼郡城東門紫營圍攻截擊逆匪屢次撲營均經玉亮率師擊退連獲勝仗晝夜督兵巡哨不稍鬆勁凡遇攻剿無不勇往直前嗣因積受寒熱染患病症仍力疾辦事未嘗稍懈詎於七月初五日病勢增劇醫藥罔效在營病故現將該故員身後事宜妥爲料理稟請核辦等情當經批據總局司道查議具詳請

奏前來

臣等伏查該故都司玉亮帶領閩兵來江援剿圍攻建

昌府城屢獲勝仗晝夜督兵巡哨不辭勞瘁以致積受寒熱患
病身故殊堪憫惜合無仰懇

天恩將已故署福建興化協左營都司玉亮

敕部照軍營病故例議卹以資激勸理合附片奏

聞伏乞

聖鑒訓示謹

奏

硃批玉亮著照軍營病故例議卹欽此

李沛蒼免罪畱營片

咸豐六年八月三十日

再安徽已革署貴池縣知縣李沛蒼於咸豐四年經撫臣福濟據署池州府龔培元揭報以擅離職守奏參奉

上諭著卽革職交刑部治罪欽此嗣該革員在廬州具稟前署貴池時沿江賊匪肆擾屢請撥兵未到遂通報公出就近赴金陵大營請兵先見護理道員潘筠基諭以應赴廬州大營稟商旋經潘筠基稟請畱於甯國府幫辦巡防勸捐有案可查龔培元並不代爲聲明等語復經福濟奏奉上諭署池州府龔培元著暫行解任交福濟提同李沛蒼訊究確情儻有被參誣揭情事卽著加等治罪欽此適值道員何桂

珍勦辦擒匪該革員隨營差遣臣國藩奏調何桂珍帶同李沛

蒼來九江行營襄辦軍務該革員奉札先到經臣畱營當差是

以被參革訊之案久懸未結本年四月李沛蒼呈請給假前往

廬州以憑質訊而剖冤誣臣以該革員承辦發審經手案件甚

多一時未便更易生手因飭具確切親供由臣移咨撫臣福濟

請其據供定案旋據福濟函稱該革員係特調人員仍應由臣

處奏畱臣伏查該革員兩載以來於發審事件研鞫精詳不辭

勞瘁實爲營中得力之人合無仰懇

天恩免其治罪畱營當差俾臣得收臂指之助仍請

敕下撫臣福濟將李沛蒼親供就近傳龔培元訊明奏結實出

聖主鴻施謹附片具奏請

旨

藝
種
卷
八

藝

瑞州一軍九月接仗情形摺

咸豐六年十月十一日

奏爲瑞州一軍九月接仗情形及上高縣再被賊擾旋即收復恭摺馳奏仰祈

聖鑒事竊瑞州一軍八月二十七日以前迭次勝仗業經具奏在案嗣據卽選副將普承堯候選同知曾國華候補直隸州劉騰鴻稟稱二十八日賊出西路搦戰旋分股往北向省兵營衝突我軍寶營湘中營出隊擊之賊防寶勇之橫截也仍退聚西路官軍兩路夾擊賊敗走劉騰鴻昇礮叢伏樹林中擊卻之九月初三劉騰鴻劉連捷由南城外直趨飛蛾亭朱祖貴劉芳貴率寶營由金川門入時甫五鼓飛蛾亭守卡之賊數百均枕戈

酣睡我軍圍而殲之燒濟賊之戶百餘家初十日賊由西門出隊伏於城北田畔省兵五營出隊擊之賊卽敗走方追殺閒田畔賊伏突起迴合十餘次鎗礮對轟傷亡相當新保守備詹榮清腹中礮子次日殞命寶營朱祖貴劉芳貴出隊橫擊賊陣潰亂申刻收隊十五日西門出賊二三百人護礮船上犯北城出賊約二三千意在撲省兵營壘劉騰鴻派黃澤遠擊賊之正兵自率後營由河岸趨西門橫截之昇大礮堵擊賊船瑞州城內多廣東老賊鎗礮最準劉騰鴻亦以火器擅長往往傷斃二三百名而賊隊堅立不退我軍有受傷者亦堅立相持未刻收隊賊忽回頭搦戰劉騰鴻之親兵素稱驍悍莫不一以當十刀矛

摩戛有聲賊遂紛紛奪路入城此九月十五日以前接仗獲勝之情形也臣國藩以九月初三日赴瑞州軍營二十日仍回省河在瑞周視城垣履勘各路與各營官熟商必須先斷南路臨江之接濟而後可以困賊自二十日後連朝大雨河水盛漲賊之礮船不時上衝石鼓嶺擾湘勇各營之後二十七日普承堯曾國華劉騰鴻等因南路之陰岡嶺傅家墟等處係臨江各賊接濟之藪卽飭黃澤遠劉連捷兩營往勦二十八日賊窺我分兵遠出遂來撲犯老營西門出賊二千伏樹林中南城賊數百護礮船上衝營壘劉騰鴻昇大礮至河岸截擊賊船普承堯率寶營擊樹林之伏千礮萬鎗聲如隕牆積年悍賊專以持久爲

得計直待傷斃數百始紛紛鼠竄入城二十九日賊黨復出搦戰與二十八之戰相似特爲時更久燈初乃克收隊三十日賊復以戰船上犯而陸賊數百出南城外縱燒民房又二千餘人出西北縱燒民房撲省兵之營壘適黃澤遠劉連捷兩營前日出勦陰岡嶺傅家墟者自南路歸來南城之賊卽遁竄入城曾國華劉騰鴻分兩路飛趨西北賊遂敗退我軍追逼城下已過小港鎗礮對施刀矛互進城上礮子密如驟雨我軍後背港水無地可退壹意噤聲力戰賊知不能敵全數奔退此九月底三日苦戰之情形也當我師之全集瑞州也後路之新昌上高二縣時有逆匪回竄前經吳坤修迴勦一次而上高之賊復來竄

踞知縣傅自銘招募壯勇五百並請新昌縣令沈曦添撥錦字營勇協同勦辦九月十六日傅自銘正欲進勦適有湖南候選同知凌煌壽帶領平江勇二千餘名來江卽商請同往上高協助十七日傅自銘凌煌壽率平江勇由北路進新昌撥魏大伸高祥霖兩營由南路鈔擊十八日馳抵上高逆匪大隊由西門來撲傅自銘會督平江勇奮力出戰魏大伸高祥霖由南路夾擊鏖戰三時我軍大勝奪獲馬匹器械多件不意又有臨江援賊數千拚死堅拒愈殺愈多平江勇眾寡不敵卽時潰散傅自銘手刃數賊力竭陣亡所有印信交家丁呈繳藩庫此上高縣接仗小挫之情形也曾國華劉騰鴻等以上高爲瑞軍後路不

可令寇氛梗阻卽派黃澤遠朱祖貴周福昆等三營二千人於十月初三四等日進剿上高連獲勝仗克復縣城先後稟報前來臣等伏查江西各府久陷逆賊據城死守堅不可拔智窮力困焦灼難名然瑞州通接兩湖扼據西路中段但使此軍屹然不動大局終有可轉之機上高縣知縣傅自銘上年到任未及一月卽已失守此次募勇剿賊勉贖前愆力戰殉難深堪憫惜籲懇

天恩交部照知縣例從優議卹新保守備詹榮清應請照例賜卹以慰忠魂傷亡弁勇查明照例辦理所有瑞州一軍九月各勝仗及上高縣再被賊擾旋卽收復各緣由恭摺馳奏伏乞

皇上聖鑒訓示施行謹
奏

卷之七

七

撫州老營被賊撲陷摺

咸豐六年十月十一日

奏爲撫州一軍分兵克復宜黃崇仁郡城老營被賊撲陷現在併紮崇仁恭摺馳奏仰祈

聖鑒事竊同知李元度林源恩分統江楚兩軍圍攻撫州屢獲勝仗迭經具奏在案自七月十三以後僞翼貴丈黃玉崑率大隊以去城中畱廣賊不過三千餘人不常出戰戰亦小有斬獲無甚勝負我軍因四五兩月傷亡過眾又以盛暑鑿兵熱溼鬱蒸疾疫至千餘人之多八月中旬有邊錢會匪隨同粵匪自建昌竄擾廣信臣等卽飭李元度等派撥數營赴援廣信行至流坊適浙兵之駐防玉山者先到將匪擊退撫州兵勇仍歸本營

李元度與林源恩商議撫建之賊以宜黃崇仁爲來路取宜黃則建昌之賊源可斷取崇仁則撫州之賊源可斷此搃吭拊背之計也因於九月初二日分兵四營先勦宜黃初四日五岳營舉人陳大力帶兵先到城外賊卽出城迎敵被我軍轟斃刃斃十餘人賊將望城返奔陳大力督率哨官彭厚坤等搶佔縣城東關之大通橋斷賊入城之路賊見歸路已絕沿港斜趨訓導郭式源率勇續至復斃十餘名賊竄南關守備伍連魁知縣鍾世楨等截殺二十餘名知縣傅培峯縣丞曾毓璋等亦追殺十數名陳大力簇擁入城城內守賊紛紛由北關奪門而逃卽將縣城收復乘勝遂赴崇仁崇仁有民城與官城相間一河中有

大橋其形勢與瑞州相似賊踞城中重關鐵鎖繚以短垣木石堆積鐵籤密布百長鍾連升等衝入橋邊伏賊突出短兵相接身被重傷守備劉長培率二哨鳧水過河城上礮石並施相持兩時之久彭厚坤李富廷童梅華等首先梯城砍倒點礮二賊親兵羅順高力開城門各營蜂擁而入殲賊百餘賊黨由北門逃往臨江復追殺數十名查點城內積穀萬餘石子藥數十石火箭噴筒數十簍知縣費兆鎔等隨同入城此九月初四日收復宜黃初九日收復崇仁之實在情形也當我軍之分勦宜黃崇仁也撫州之賊無日不出城來犯初六日全隊來撲犯江軍者呂克生率八哨禦之鎗傷百餘賊五音營由懸鶴嶺至城邊

破屋鈔擊犯楚軍者四股約千餘人連礮指擊賊退伏樹林另
股三百人踞左營之空壘周岐山迎勦李元嘉繼之三進三誘
賊遂折回塹下是日兩軍共傷賊三四百名我師亦傷亡九十
三人初八日大霧漫天城賊分路來撲一由清風門出至隄上
右護軍在卡上轟礮禦之該逆敗竄繞至南門左護軍迎勦營
官耿光宣嚴督隊伍且轟且進礮煙與晨霧相迷隨煙搶進不
期已近城根耿光宣被城上礮子中腹穿髀登時陣亡該營憤
管帶官殉難愈憤不退縱橫馳突賊遂敗竄其犯楚軍者周岐
山李元嘉出隊鈔截該逆退近城隄復進犯中營李元度派丁
峻迎擊百礮對轟賊之火箭雨集我軍據卡不動連斃大旗數

賊賊退追擊傷斃者七八十人哀尸滿地我軍亦傷亡四十餘人初九日辰刻賊復出犯盡萃於江軍之左營蓋探知營官耿光宣新失故也江軍衝出交矛對壘鎗礮已紅挑水漬之良久賊退李進發等搜殺鎗斃一黃馬掛賊目是夜賊驚江軍之左營火彈噴筒飛入牆內我軍出兩哨潛鈔擊卻之初十日賊又撲江軍以二百餘人牽制楚軍江軍出隊直衝賊又敗潰追上懸鶴嶺鏖戰一時楚軍派五哨應援賊乃悉退十一日賊復來犯楚軍礮斃三賊江軍出隊轟擊賊折入左右營舊地周岐山三往三返傷賊數十賊遂潛伏已燬之民房穴牆開礮傷斃我軍七人李元度率後哨從田隴斜截賊黨驚奔我師追擊賊輒

卓旗迴立又擊又退又復迴立相持三時始行收隊此九月初六初八初九初十十一等日賊窺我軍分勦崇宜連日撲營迎擊獲勝之情形也李元度等見賊雖屢挫勢仍凶悍我軍分兵出勦老營實形單薄商議退紮四五里許江楚兩軍團聚一處又飛調宜黃崇仁之師回保撫州老營無如欠餉日久各弁勇見宜黃可捐銀數萬兩崇仁有賊積穀二萬餘石遂欲據此二縣以補舊欠而籌新款不肯回郡城老營適有另股賊匪三千餘人自景德鎮而來竄擾萬年安仁以至東鄉勢將先抵許灣卽援撫州李元度等以許灣係捐局所在軍資百物取給於此因派把總彭大壽曹錦榮等帶八百人往守許灣於是郡營之

兵愈單弱矣十六日城賊大舉出犯我軍迎擊斃賊三十餘名賊不退亦不進而援賊千餘人從流坊過河意圖夾擊官軍李元度等急派鳳字營及左護軍四哨往截賊忽從下游近城處偷渡水淺河寬不能截住援賊遂與城賊合犯江軍李元度林源恩並都司唐德陞親自衝鋒鏖戰竟日殺傷相當援賊一股進城一股分擾河東而省城道路遂梗十七日城賊出犯先分三支撲楚軍中營經彭斯舉等擊敗另支圍撲江軍經唐德陞親兵擊敗奪黃旗十四五面斬首四十餘級忽大股援賊又從流坊過渡合圍江軍將附營民房一律縱火煙燄障天火箭火彈紛入營中唐德陞躍馬衝突手刃十餘賊馳赴中營入視林

源恩時右營已火起矣林源恩曰今日全營必陷此吾死所也誓不出營唐德陞不忍林源恩獨死而已獨生遂麾親兵出壘而囑其姪以報讐爲念從容與林源恩同死兵勇死事者計三百人糧台委員從九周尙桂等殉焉李元度先率陳英吳修鼓李昇平等往救林源恩勢已無及回營則賊來愈多四面合圍李元度將聚軍裝縱火自焚親兵挾之上馬與陳英丁峻吳修鼓李昇平鍾輔朝單綏福等併力突圍而出因與都司周岐山定計直趨崇仁崇宜兩處尙有左右兩營志同寶勇等軍益以許灣彭大壽之師計完好者尙有七營四千餘人暫駐此處招集潰散重加整頓以圖再振此十七日撫州老營被賊撲陷

併紫崇仁之實在情形也現在撫州敗卒之回省者收輯潰散
另編隊伍其赴崇仁者由李元度重加整輯二十九三十等日
撫州大股前往撲營均經力戰擊退追奔二十餘里據李元度
等先後稟報前來臣等伏查撫州一軍大小五十餘戰除五月
初五七月初九兩次小挫外餘俱獲勝三四月各府之
賊萃於該郡尙能肅清東路外通江浙內蔽省垣惟此軍是賴
厥後傷亡過多暑疫交臻臣等慮其疲乏致挫札飭全軍退駐
七里岡李元度志在破城堅不肯退九月克復宜黃崇仁兩縣
方期軍威更振終可斷賊援而復名郡不圖分兵太多復值景
德鎮另股援賊突至遂致挫敗卽選同知李元度調度失宜請

旨革去花翎同知仍以知縣降補至殉難之湖南補用同知直隸州林源恩忠憤填膺見危致命前在平江任內倡團保境力遏寇衝自調赴大營後每戰身先應請

賞加道銜卽照道員例

賜卹湖南卽補都司唐德陞樸誠驍勇從容就義有烈士風應請照游擊例

賜卹副貢教諭耿光宣忠勇廉明前此擬保知縣加同知銜尙未出奏應請照同知例

賜卹卽選從九品周尙桂請照縣丞例

賜卹以昭激勸而慰忠魂其餘陣亡兵勇查明照例辦理所有

撫州一軍分兵克復宜黃崇仁老營被賊撲陷現在併紮崇仁緣由恭摺由驛馳奏伏乞

皇上聖鑒訓示施行謹

奏

奏
科
卷
八

請饒廷選軍仍駐廣信片

咸豐六年十月十一日

再_臣等於九月十二二十四等日疊奉

諭旨飭_臣等派委大員統帶兵勇馳赴廣信俟派兵到後該郡肅清饒廷選仍可回駐玉山等因_臣等當卽調派駐紮奉新之湖南候補知府吳坤修統帶彪勇等營二千五百人前赴廣信咨明學政及浙江巡撫在案嗣據奉新安義靖安三縣紳士御史帥方蔚等稟稱官軍一去賊匪出而焚掠更甚於前民不堪命懇畱吳坤修一軍勦辦奉新匪黨解三邑之倒懸等語具稟前來_臣等查奉新等三縣距省皆在百里內外旣據紳民合詞懇畱自不宜調開此軍以失民望現在新駐崇仁一軍尙可移

緩就急卽札飭李元度由崇仁帶兵馳赴廣信駐防以保江西之要郡而固閩浙之藩籬惟江西餉項萬分支絀久在聖明洞鑒之中若此軍僅駐郡城則不能設法籌餉若令駐紮貴溪則河口之商民可以復業而七屬之錢漕可以徵收於餉需大有裨益合無籲懇

天恩敕下浙江撫

臣

咨行總兵饒廷選統率得勝之師仍駐廣

信府城

臣

等卽飭李元度之師駐守貴溪俾該府得趕緊徵收

錢漕以濟眉急玉山去郡城僅八十里同係江西境內饒廷選

之駐廣信與駐玉山無甚區別萬一婺源開化等處有警饒廷

選仍可馳往策應李元度卽可移駐府城是饒廷選之師並非

堅守一郡不能策應四路也如此一轉移間於浙江之兵力無損而於江西之籌餉有益是否有當伏乞

皇上聖鑒訓示謹附片具

奏請

旨

請頒部照交黃冕勸捐片

咸豐六年十月十一日

再新授吉安府知府黃冕白奉

特旨簡放之後忠義奮發於湖南勸捐募勇急圖另集援師規復吉安會同奉

旨援江之前任湖北藩司夏廷樾竭力籌辦親赴常德湘潭等處就江西之貿易湖南者剴切勸導以濟軍餉疊接函稟募勇一千五百名訓練三月諸務就緒卽日來江援勦又已革廣東羅定協副將周鳳山自與李元度會攻撫州每懷樟樹鎮敗挫之恥誓圖奮翼澠池以贖前愆經臣國藩飭令繞道回楚另募勁旅以通兩湖之路而伸忠憤之氣嗣據節次來稟該革將由

福建廣東以達湖南奔馳六千餘里艱苦備嘗五月自撫州啟行至八月始抵長沙稟商湖南撫臣募勇千七百名急欲馳赴江西力掃寇氛臣等與湖南撫臣駱秉章往返熟商周鳳山一軍與黃冕夏廷樾新募之師合併三千餘人兵力較厚卽飭其徑擣吉安取上游建瓴之勢南通南贛北接瑞袁冀擊中而首尾皆應如吉郡不能卽下再行酌量調撥惟該員等所募各勇人數較多口糧甚鉅目前雖勉爲供支將來實無可接濟臣等伏思江楚兩省處處毗連商賈仕宦互爲主客久相親附無復畛域之分黃冕以湖南之紳而仕於江西夏廷樾以江西之紳而仕於湖南平日皆物望夙孚此次共辦援師尤爲兩省士民

所推重若令該二員悉心籌捐必可源源不竭合無籲懇

天恩敕部頒發各項執照二千張內監生照一千張從九照八百張

封典翎枝及各職銜照二百張遞至湖南發交黃冕夏廷樾手認真勸辦專濟此軍之用實於江西軍務大有裨益如蒙

俞允此項執照所得銀兩無論捐於何省用於何軍責成黃冕統歸臣國藩糧台報銷以昭核實是否有當伏候

訓示遵行謹附片具

奏請

旨

斷示以備備具

歸國者務須知

歸國者務須知

歸國者務須知

歸國者務須知

歸國者務須知

歸國者務須知

歸國者務須知

歸國者務須知

百

天啟

天啟

河

河

請捐錢照湖南成案片

咸豐六年十月十一日

再查江西捐輸章程遵照籌餉事例核減二成以制錢二千作銀一兩久經通行在案惟地方糜爛民力益形拮据各屬捐輸未能如前踴躍臣等正擬奏請量爲變通茲准湖南撫臣駱秉章咨開咸豐五年十一月二十五日戶部核議該撫奏請將湖南省捐輸章程照江南河南湖北等省於新例減二成外仍以制錢一千六百文作銀一兩俾士民樂效輸將而軍餉可資接濟等因奉

旨依議欽此臣等查江西與湖南境壤相接而現在物力之困敝過之合無仰懇

天恩准將江西捐輸亦照湖南成案於新例減二成外仍以制錢一千六百文抵銀一兩庶與鄰省事例不致兩歧而於本省籌捐可期應手謹會同前任刑部侍郎

臣

黃贊湯附片具

奏請

旨

贛南匪勢蔓延請添調粵兵摺

咸豐

六年十一月十七日

奏爲贛南各屬土匪鄰匪勾結滋蔓兵力不敷分剿請

旨敕下廣東督撫添撥勁旅接濟軍餉以資剿洗恭摺具奏仰

祈

聖鑒事竊照贛郡解圍並各屬剿辦情形業經臣等繕摺奏報
並咨行該鎮道會督諸軍設法攻剿在案茲據廣東潮州鎮總
兵壽山署贛州鎮總兵阿隆阿護理吉南贛甯道汪報聞暨各
府廳縣先後咨稟六月十九日起至二十五日派撥兵勇分攻
西南路之老虎坑盤龍墟馬坳等處股匪並添撥田勇助剿將
該三處賊營先後攻破焚燬殺賊三百餘人餘匪逃散二十六

日會撥江粵兵勇分剿沙河口樓梯嶺之賊均獲小勝並於興國江口地方擊沈賊匪米船三隻淹斃匪黨三十餘人奪獲匪船五隻二十九日以後分攻樓梯嶺沙河口畫眉瀧沙石鋪俱獲小勝斬獲首級二十九顆生擒八名其南康之塘江一帶亦經已革知府周汝筠進剿連獲勝仗道路已通七月初十日探知南路來賊六七百人捲旗息鼓欲偷越西岸山背下竄該鎮道卽派兵分伏密林山坳以待賊眾窺見驚懼回竄兵勇乘勢追殺斬馘三十我軍亦傷亡數人該鎮道以官軍進剿南路賊匪須先走十餘里賊轉以逸待勞於十三日派彪勇赴離城十里之高樓地方分紮水陸兩營自八月初間以後連日分攻南

路各匪殲斃一千餘人割取首級耳記九百餘件焚燬下寒灘等處賊巢二十餘處大南坑等處賊匪棚寮四十餘處九月初四日江粵各兵勇會出大隊賈勇過河將樓梯嶺賊巢焚燬擊殺賊匪甚多內有騎馬賊目三名斬取首級一百三十七顆髮長一二尺者居半又耳記五十三件奪獲大銅礮一尊旗幟刀矛多件初五日攻勦從埠沙河嶺之賊亦有斬獲其樓梯嶺附近之砂石鋪大埠華林寺均爲賊藪現籌勦辦並令東莞勇及守備孔慶林所帶兵勇畱於南康縣協勦會同該縣田勇屢攻附近潭口之黎邊王村殺賊千餘人賊巢焚燬大半武舉匡化隆等之勇及續派彪勇廣勇進勦下游之賊於武索大王廟大

廖石華山並萬安縣城下連獲勝仗殺賊三百餘名生擒四十餘名奪獲賊船三隻擊沈八隻淹斃匪黨百餘人又獲大礮二尊鳥槍旗械一百餘件此贛郡連日分路攻剿之情形也定南廳地方於五月初六日有廣東和平縣逆匪翟火姑率其黨與六七千竄入廳境初七日圍攻廳城愈聚愈眾數至萬餘經代理定南廳姚世恩會同把總歐陽釗督率兵勇居民竭力固守該逆攻撲二十餘次幸兵民同心屢次擊殺統計斃匪七百餘人二十八日該逆由東門挖掘地道轟倒城牆五丈餘姚世恩等督飭兵民堵禦殺賊四五十人槍礮轟斃無數立將缺口修築完固我軍陣亡七名該逆復在西南一門挖掘地道姚世恩

等察出飭令兵勇破其地穴殺賊十人八月初八日由府派往
援剿之候選同知周炎帶龍南勇二千名行抵廳境姚世恩遂
令各堡鄉團協力助剿逆匪分股屯聚六花寺地方堵我援兵
來路十七日周炎會同署橫岡營都司古勒通阿督帶兵勇並
五戶村團勇直入賊營斃賊匪多名餘匪敗退長橋地方十九
日周炎進攻長橋詎該逆先令黨與五路埋伏突起襲擊我軍
失利周炎將勇撤回龍南設法整頓再圖進剿自援兵敗後逆
燄愈張勾結鵝公墟天花寺土匪約有數萬之眾二十三日圍
攻橫岡營時下歷司巡檢孫雲錦先期前往月子江一帶催收
捐項接濟軍餉都司古勒通阿外委趙雲龍督兵守禦寡不敵

眾被匪撲入營內兵勇傷亡多名吉勒通阿等各受重傷退紮
逕腦地方嗣經姚世恩等齊集各堡田勇連日設法勦洗七月
初十日該逆被擊敗退竄往信豐境內廳城解圍此定南廳被
匪竄擾連日防勦之情形也和平縣逆首翟火姑之黨與陳芝
蘇勾結土匪葉紹品李元古等糾匪五千竄擾安遠縣太平堡
經署安遠縣知縣張仁法署把總李正穰帶領兵勇於五月十
七及二十三等日迭次進勦先後斃賊四百餘名生擒三十
餘名二十六日張仁法等石口墟遇賊接仗乃另股賊匪翻
越山嶺攻撲縣城守城兵力無多被匪攻陷典史曹秉正受傷
經兵勇救出在籍候補兵馬司吏目鄭家成被匪逼脅自縊殉

難兵勇亦多傷亡張仁法等趕回救援不及旋於六月二十四日經張仁法添集團勇合力攻勦賊匪敗竄當卽收復城池此安遠縣被匪擾陷旋經克復之情形也五月二十五日贛縣韓坊匪徒數千竄入信豐縣之小坑月嶺擾及竹絲河適候選同知周炎帶勇赴援定南廳路過信邑該署縣吳秉衡卽與周炎商派練勇一千五百名吳秉衡又帶自募練勇八百名往勦擊斃賊匪一百數十人生擒二十七名該匪敗退月嶺六月初二日該匪竄踞曾姓圍內周炎又派勇一千七百名隨同吳秉衡馳往圍攻殺賊數十名焚斃無數餘匪敗散周炎因定南待援甚急卽拔營起程旋有安遠賊匪分股竄至信豐縣鳳凰墟幸

初七日從九品孫福同帶領彪勇到縣吳秉衡卽與相商進剿斃賊十餘名賊始退踞韓坊一帶孫福同押護餉銀赴郡畱勇數百在縣協剿十四日擊斃安息堡賊匪數十人十八日探聞韓坊之賊愈聚愈眾十九日吳秉衡會同湯彪帶領彪勇進攻韓坊賊巢斃匪多名餘黨四散旋又探聞和平股匪嘯聚於定南之八十岡有眾數萬逼近信豐而安息堡痢痢石等邊界亦有和平安遠等處匪徒越入境內圍攻縣城吳秉衡商令前任南康縣訓導熊福茹招募南康龍迴地方田勇二千名與本縣團勇合力援剿屢獲勝仗殺賊不計其數割取耳記六十餘件已追至離城二十里之新仁墟因沿途節節有賊尙未直抵縣

城此信豐縣被匪圍攻之情形也六月初九日安遠縣賊匪勾通粵逆二千餘人竄入長甯縣西南等鄉肆擾該縣知縣楊長杰會同署羊角營都司藍塔率領弁兵田勇於十二日往剿斃賊十餘人生擒四名該逆退竄菖蒲墟十五日跟蹤追捕該逆遁回廣東境內各自散去二十六七日該匪散而復聚共三千餘人竄擾古坑岡等村七月初一日蜂擁撲城楊長杰等會督兵勇紳民嬰城固守開放槍礮擊斃賊之藤牌手數人施放火箭燒燬賊營火藥二桶賊勢稍卻一面飛調各鄉田勇赴援隨有北鄉廩生羅福基等帶練勇三百餘人三堡紳士胡德貴等帶練勇一千餘人先後來城楊長杰等亦派勇出剿兩面夾

攻賊眾潰敗追殺六十餘人是日酉刻該逆回旗來撲我軍仍分兩路迎敵鏖戰逾時殺賊二十餘名賊復敗退乘夜逃遁我兵追至河嶺地方殲斃匪黨數十人紳士劉士傑率勇沿途生擒賊目陳立謙等十六名十四日匪首謝滿石廣豐各率夥黨三千餘人至縣屬牛鬬岡焚搶楊長杰派兵三路進攻殺賊四十餘人生擒謝滿石廣豐正法餘匪退入咸水地方我兵被傷三十餘人二十日藍塔帶各堡壯勇襲擊溪尾村賊營殲斃五十餘名二十一日匪眾圍撲我營經團勇奮力擊退餘匪仍踞公平菖蒲二墟勾結愈眾須厚集兵力方可擒渠掃穴此長甯縣節次被擾之情形也七月初一日上猶縣營前之賊竄至崇

義縣杰壩地方初二日署崇義縣何允廉派勇往剿兩獲勝仗詎是夜蝸牛坳營盤失火自焚合營驚潰何允廉正在添募壯勇初五日探知賊匪由茶潭高灘兩路來撲縣城何允廉卽與汛弁分投堵禦而杰壩之賊已由蝸牛坳徑抵北門被城上兵勇擊斃多匪該逆全股攻撲南門城池遂陷何允廉聞警馳回已不能入城只得退守密溪趕緊招勇以圖收復此崇義縣城被擾失陷之情形也上猶縣城亦被營前股匪攻撲連挖地道兩處轟塌城牆二十餘丈經代理縣程烜把總畢開錄等會督兵勇奮力堵禦搶築完固八月初六七等日該逆又在西門外開挖隧道並於各要路紮營斷絕城中接濟正在危急之際經

該縣紳士前任御史李臨馴招募南康古樓堡田勇千餘名又經汪報閏派委候補按察司知事章澍帶勇千餘名同往救援初九日抵縣各鄉紳士亦帶團丁數千前來協助程烜等卽率兵勇由東門出隊內外夾攻槍礮疊擊斃賊一百數十人奪獲旗幟數十件將東北一帶賊營悉行焚燬逆匪敗竄西街我軍乘勝進攻又轟斃匪黨數百人奪獲五百觔大礮一尊抬礮鳥槍數十桿火藥鉛彈數十桶賊船四十餘隻敗匪竄往爛泥湖一帶復被鄉團出奇邀截擒斬多名是役鏖戰竟日斃匪六百餘人城圍遂解我軍僅傷七名此上猶縣勦匪獲勝縣城解圍之情形也雩都縣城經候補同知潘毓瑞帶勇收復以後堵禦

鄰匪迭獲大勝搜捕伏莽屢有殲擒地方賴以無虞龍南會昌
二縣及甯都州並瑞金石城等縣亦均有粵匪土匪滋擾幸俱
隨時擊退惟信豐被圍崇義未復應請速調大兵救援各等情
前來臣等伏查贛州府城雖已解圍而南路之砂石鋪等處賊
匪尙未翦滅南康縣塘江之路雖已無阻而潭口餘孽亦未肅
清是贛郡兵勇勢不能分顧外縣其定南安遠信豐長甯崇義
上猶等廳縣均被鄰匪土匪勾結滋擾僅祇安遠克復定南上
猶解圍此外各廳縣或被賊圍攻或城池被踞匪黨勾通誘脅
日見蔓延兵勇戰守巡防漸形疲乏况各該處均係瘠苦之區
餉糈無多勢難持久若不趕調客兵協力勦洗深爲可虞無如

省城兵力本屬無多並須兼顧廣信兩湖福建援師分屯瑞州
袁州建昌三府均值圍剿喫緊難以抽撥且贛南距省千里而
遙賊踞吉安路途多梗遞送文報均係繞道而行省中實有鞭
長莫及之勢臣等再四籌商惟有仍請添調粵兵以資會剿合
無仰懇

天恩敕下兩廣督臣再行籌撥勁旅三四千名隨同接濟餉糈
取道和平徑趨定南等廳縣會同本地兵勇次第剿辦務將各
屬逆匪殲除淨盡倘敗匪逃回粵境卽併力跟蹤搜捕盡絕根
株庶免此拏彼竄聚散靡常防剿無已洵於兩省邊界俱有裨
益至署安遠縣知縣張仁法署安遠汛把總李正穰於城池被


匪攻陷雖因兵單餉絀所致業已據報自行克復尙知愧奮第
地方究已被擾應請將張仁法李正穰均革職畱任辦理善後
以贖前愆典史曹秉正請免置議署崇義縣事義甯州州同何
允廉被匪竄撲入城雖因賊分三路並進堵禦難週究屬防守
不力應請將何允廉先行革職仍令畱營攻剿以觀後效同城
武弁及佐雜等官俟查明係何員在任有無奉委出境再行核
辦除咨行該鎮道會督士卒並飭令各屬實力攻剿防禦並確
查傷亡員弁兵勇及殉難紳士分別請卹外所有贛南匪勢蔓
延請添調粵兵會剿緣由理合恭摺附驛具奏伏乞

皇上聖鑒訓示謹

奏

奏和

奏



PL
2728
.A1
1876
v.10

曾文正公奏稿

卷之九目錄

謝湘鄉加學額 恩摺

咸豐六年十一月十七日

謝弟國華以同知選用 恩摺 全日

江西近日軍情據實覆奏摺 全日

瑞州奉新攻戰情形摺 全日

建昌官軍潰退摺 全日

湖南援師克復袁州府摺 全日

饒州豐城等六案保獎摺 全日

湖口等縣團紳請獎片



克復安福縣城摺

十二月二十三日

畢金科軍進剿勝仗摺

全日

劉于潯水師疊次勝仗摺

全日

附陳近日軍情請催各省協餉片

湖北援軍保獎請卹摺

全日

查覆鄧仁堃被參各款摺

全日

克復奉新縣城摺

咸豐七年正月十七日

官軍克建昌武甯兩湖軍收復各縣摺

全日

目疾請假摺

全日

報丁父憂摺

二月十六日

呈請代奏奔喪到籍日期摺

二月三十日

呈請代奏謝恩摺

三月二十六日

瀝陳下情懇請終制摺

五月二十二日

恭謝天恩并籲請開缺摺

六月初六日

瀝陳辦事艱難仍懇終制摺

全日

欽奉兩次諭旨覆奏摺

九月初九日

酌擬報銷大概規模摺

十二月初七日

明倫彙編 家範典 卷九

孝和卷九

孝和卷九

孝和卷九

孝和卷九

孝和卷九

孝和卷九

謝湘鄉加學額

恩摺

咸豐六年十一月十七日

奏爲恭謝

天恩仰祈

聖鑒事竊

臣

接閱邸鈔

咸豐六年六月二十一日內閣奉

上諭駱秉章奏請賞加湘鄉縣文武學額一摺湖南在籍侍郎曾國藩前經招募鄉勇一萬餘人駐紮衡州頗資捍衛嗣後軍分水陸克復武漢田鎮屢著戰功迨賊竄湘潭等處該紳勇截擊獲勝地方得以保全連年土匪竊發亦賴該縣士民不分畛域實力防剿南路肅清先後捐輸數逾巨萬洵屬踴躍急公自應優加鼓勵所有湘鄉縣學額著於原額取進文章十五名外

加增三名取進武童十二名外加增三名均作為永遠定額以示優獎欽此竊臣於咸豐二年十二月奉

命幫辦團練即邀同縣生員羅澤南劉蓉王鑫數人至省招募

湘勇千人認真訓練三年六月與撫臣駱秉章熟商復招湘勇

二千救援江西均經奏明在案是年冬間臣駐紮衡州疊奉

諭旨飭令援鄂援皖籌備船礮肅清江面遂招募水陸弁勇數

逾萬人雖概稱湘勇之名實不盡湘鄉之籍頻年以來或在江

西湖北隨征或在本省南路防剿薄効涓埃之力屢邀高厚之

恩計一縣之中數年之內文員保舉道府以下至州縣佐雜者

數十人武弁保舉參游以下至千把外委者數百人悉荷

恩旨俞允而羅澤南李續賓均蒙

賞加藩司之銜

錫以二品之封在合縣諸人言之已覺勞薄而

賞厚在

微臣

一身言之尤爲功寡而過多迺蒙

闔澤宏敷

皇仁特沛增文武三名之學額

寵錫溫綸勵水陸萬眾之軍心歡如挾纘鼇戴地而深知其重

蚊負山而不憚其難

臣

惟有勉策駑駘誓除醜逆率湘中之子

弟永矢同袍同澤之忱揚泮沼之芬芳無忘獻馘獻囚之義所

有

微臣

感激下忱謹繕摺恭謝

奏稿九
天恩伏乞

皇上聖鑒謹

奏

謝弟國華以同知選用

恩摺

咸豐六年十一月十七日

奏爲恭謝

天恩事九月十四日准兵部火票遞到八月二十七日內閣奉

上諭同知銜曾國華著以同知儘先選用欽此竊曾國華係

微

臣之胞弟出繼叔父爲嗣世守清門家承儒術惟縹緲之麤涉

實軍旅之未嫻本年三月因聞羅澤南受傷馳赴湖北軍營經

撫臣胡林翼派委管帶湘勇兼轄各營救援江西同行如普承

堯吳坤修劉騰鴻等皆久厯戎行夙諳將略臣弟國華與之諮

商得所依倚類因人而成事敢貪天以言功迺蒙

皇仁廣被寵錫頭銜仕版初登遽分猷於五馬

恩綸特沛如負重於六鼇臣惟有督飭臣弟共攄丹悃念累世

踐土食毛之義欲全孝必思全忠法古人臥薪嘗膽之誠必有

忍乃能有濟明恥教戰補拙習勤冒鋒刃以先驅效鉛刀之一

割庶冀仰答

高厚鴻慈於萬一所有微臣感激下忱謹率同臣弟國華北向

叩頭恭謝

天恩伏乞

皇上聖鑒謹

奏

江西近日軍情據實覆奏摺

咸豐六年十一月十七日

奏爲江西近日軍情據實覆奏仰祈

聖鑒事竊臣等於十一月初八日承准軍機大臣字寄十月二十日奉

上諭曾國藩文俊自八月三十日奏報瑞州建昌勝仗之後已及月餘未見續報昨據廉兆綸奏有探聞撫州官軍失利之語與本日何桂清奏報相同亦未見曾國藩等入奏前聞賊匪多回至金陵而江西失陷各郡尙無一處克復所有占據城池之賊聞皆石逆黨與誘脅土匪爲之拒守卽廣東新附匪徒亦皆係石逆所糾集與金陵逆黨尙未歸併現據江浙各省奏報皆

言金陵內亂楊逆已爲韋逆所殺又聞楊逆被殺後石逆不服逃出金陵洪逆現懸重賞購其首級可見石逆斷不再返金陵金陵亦不肯更助石逆昨又據福濟等奏石逆現在安慶桐城一帶其爲糾合黨與自圖占踞已可概見現在福濟等已攻克巢縣和州不日即可進擣安桐而湖北沙口田鎮水陸兵勇屢絕賊援恐石逆不得逞志於皖楚勢必竄入江西該逆於諸賊之中最爲凶悍若令回竄江西占踞數郡煽惑莠民其勢愈難收拾著曾國藩等乘此賊心渙散之時趕緊克復數城使該逆退無所歸自不難窮蹙就擒若徒事遷延勞師糜餉日久無功朕卽不遽加該侍郎等以貽誤之罪該侍郎等何顏對江西士

民耶又聞石達開係湖南拔貢現因與韋逆不睦頗有投誠之意雖未必卽係確信而窮蹙思降亦或事之所有此輩狼子野心原難輕議招撫儻向曾國藩處乞降應如何處置之法或使先自立功贖罪再邀重賞亦當豫爲籌畫經權互用以收實效現在仍將失陷各城先圖攻克使該逆無所憑藉不敢退至江西是爲至要本日據何桂清奏請飭催候補同知吳坤修將所帶彪勇二千五百名速赴廣信等語此項壯勇何以日久未到著曾國藩等查明飭令該員迅速馳往以便饒廷選回駐玉山毋稍延緩將此由六百里諭令知之欽此

臣等伏查賊首之在江西主持軍務者自上年十一月至本年二月底以僞翼王石

達開爲主三四月以僞翼貴丈黃玉崑爲主六七月以僞北
王韋昌輝爲主曾於八月初六日附片具奏在案自韋昌輝在
瑞州戰敗竄回金陵被楊秀清斥責洪韋二賊謀殺楊秀清并
誅其宗族黨與於是石達開自湖北洪山歸去黃玉崑自江西
臨江歸去并赴金陵謀爲楊秀清伸冤復仇八月以後江西軍
事卽係九江賊首林啓容主之臣等正思趁此機會克復數城
仰慰

宵旰憂勤之意不意九月中撫州以分軍致挫十月間建昌以
疲乏致潰而拏獲賊中僞文均稱石達開諭令諸賊謹守江西
凡江西境內之賊概未調赴下游而下游之賊反由景德鎮以

赴援撫建蓋安慶爲石逆舊踞之巢穴江西爲石逆新陷之土地

諭旨所謂石逆糾合黨與自圖占踞已可概見

聖天子明見萬里之外洵屬無微不照臣等曷勝欽服至石達開係湖南拔貢頗有投誠之意一節查石逆係廣西潯州府桂平縣大梭村人在金陵時先據故明張侯第後駐上江考棚甲寅八月踞守安慶十一月臣國藩師次九江石逆與羅大綱同赴湖口救援官軍被挫乙卯春武漢復陷該逆往來蘄黃一帶提調賊軍十月由通城竄入新昌招納廣東新附之匪連陷江西數府本年三月下竄甯國蕪湖等處七月初九復由興國州

上援武昌爲李續賓之師所敗現據各路探報石逆糾集匪黨十餘萬人前往金陵誓殺洪韋二賊爲楊秀清報仇以臣等愚見揆之如果洪韋勝而石逆敗則投誠乃意中之事若其石逆勝而洪韋敗則該逆挾詭詐以馭眾假仁義以要民方且飛揚自恣未必遽有投誠之心臣等曾檄諭九江賊目林啓容令其歸順又作僞文調瑞州賊目賴裕新令赴下游均無成效假令石達開自知大勢之已去識

天威之難犯翩然歸命稽顙投誠則臣等招撫之法當令其立功贖罪獻城爲質以大局言之北岸安慶南岸九江該逆之所必爭也以江西言之瑞州臨江爲根本撫州吉安爲膏腴亦該

逆之所不肯輕棄也能於此六城中獻一二城爲質則可信其爲真心歸附

國初之施琅黃梧近日之張國樑成例具在

臣等立即奏懇

鴻恩縻以高位優以厚祿若不能獻城爲證外稱歸義內懷叵測如阿睦爾撒納先降後叛之案幾至不可收拾

臣等

不敢貪招撫之虛名弛防剿之實務是否有當伏乞

訓示指授機宜刻下瑞州奉新兩軍疊獲勝仗剿辦尙屬得手周鳳山黃冕等之師初赴吉安差稱勁旅袁州新復西路大有振興之機水師則彭玉麟駐下游之吳城鎮劉于浚駐上游之樟樹鎮均甚得力惟撫建疊挫東路空虛

臣

等惟當嚴飭西路

諸將恪遵

諭旨先圖攻克數城使該逆無所憑藉仰副
聖主睠懷南服拯民水火之至意所有江西
近日軍情恭摺據
實覆奏伏乞

皇上聖鑒訓示施行謹

奏

硃批爾等主見甚屬允妥剿撫固應并用尤
重先剿後撫可隨
時審其機宜好爲之欽此

瑞州奉新攻戰情形摺

咸豐六年十一月十七日

奏爲瑞州一軍十月接仗屢次獲勝現在新修南北兩城暨奉新接仗獲勝情形恭摺馳奏仰祈

聖鑒事竊瑞州一軍九月接仗情形并分兵克復上高縣城業經具奏在案嗣據普承堯曾國華劉騰鴻等稟稱瑞州分兵兩營於初四日克復縣城尋獲知縣傅自銘尸首安撫遺黎接剿餘匪擬於初十日回瑞州老營是日卯刻探報有賊數千隔河浩蕩而至紛分三支一由河南一由河西一由河東湘寶各營商議朱祖貴敵河南之賊黃澤遠敵河西周福昆敵河東而賊之從河西來者因水深未能猝渡又分而爲二與河南河東兩

支涉水急渡黃澤遠見賊不從西面徑渡乃分兵助朱祖貴周
福昆而白率親兵抄河東之賊之尾該逆濟河甫畢朱祖貴周
福昆迎擊賊背水而陣死戰不退黃澤遠自東旁抄前後圍偏
自辰至午殺賊四百餘名溺死無數奪獲槍礮旗幟刀矛號褂
五百餘件此分兵克復上高後初十大戰獲勝之情形也瑞州
分南北兩城中跨一河北曰官城南曰民城鄂省援師初到瑞
時於七月初三日攻破南城賊黨盡歸北城然南路與臨江相
通賊中之接濟頑民之貿易猶以南城爲藏奸之藪我軍屢赴
南路搜剿大小數十戰終不能絕其接濟自九月下旬大雨漲
河浮橋衝斷而南路之賊日益猖獗候補直隸州劉騰鴻與曾

國華普承堯等熟商必須築堅壘於南岸造極固之浮橋而後南路之外援可斷十月初八日劉騰鴻於南岸修築新壘拆取舊南城之磚石搬移新營之前有賊數百出而爭之劉騰鴻先派隊伍埋伏於舊城之內賊至遇伏突起奮擊賊奪橋而遁後遁者數十名梟水而渡我軍小槍入水擊之須臾皆斃初九日辰刻賊數百人抄省兵各營之後經都司滕加洪守備李大雄擊退午後城內賊大股擁出實二千餘人滕加洪復與胡應元出隊迎擊副將普承堯派寶勇分兩支而出一從田壠抄賊之尾一接應滕加洪等之軍進退數合賊不能支卽行敗退田壠之師從中邀擊逆黨大敗退至樹林當寶勇與賊鏖戰之時劉

騰鴻率親兵百餘名至西門外牽制賊勢與城門之賊正爾相持而大股賊之爲寶勇擊敗者悉至其地因劉騰鴻隊僅百餘人二千餘賊併力來撲劉騰鴻令各勇植立不動槍礮環擊該逆雖眾亦不敢犯忽一騎馬賊目揮眾前進我軍劈山礮適中其胸餘賊遂如鳥獸散矣十一日賊隊全出我軍堅守不動俟其稍近各營會合齊出將四面圍剿以大創之該逆甫經接仗卽逃回城根我軍跟追僅斃數名賊遂全竄入城我軍憤極繞城仰攻劉騰鴻攻南門萬泰胡應元等攻北門滕加洪李大雄攻東門普承堯曾國華攻西門而往來接應北路直逼城下雲梯甫進城上火彈礮石紛如驟雨驍敢者多受重傷自午至亥

未能得手收隊時已三鼓矣各營官會商多製長梯廣儲稻草添造攔牌十八日復大舉進攻普承堯率寶勇二千獨當前敵直入濠內拔其木椿竹簽低頭於礮子亂石之中相戒不復仰視前者已死後者繼進傷者昇歸昇者仍來苦戰四時城賊以全桶火藥傾下燒斃過多始傳令收隊凡傷亡二百餘人都司銜劉芳貴身受重傷普承堯據地涕泣矢以城不破不肯還營各弁勇強扶之以歸此初入以後各仗獲勝及十八日攻城未克之情形也劉騰鴻以南路爲賊所力爭每日派隊五成排立南岸而以其半修築新壘高厚堅固屹然如一石城南工旣畢又於北岸石鼓嶺就現在之營基築一新城派湘勇長夫四千

餘人并力興工劉騰鴻與曾國華晝夜監視至十一月初旬一律竣工累石爲基移磚爲壁環以雉堞排以槍眼四門鞏固閉以閘板高皆二丈有奇內濠深一丈外濠倍之崇墉仡仡與瑞州之北城相隔二里有餘寬廣不逮舊城而堅實過之自是賊之南城拆毀殆盡而我軍南北兩城占據上游歸然新立此劉騰鴻等因瑞州通江楚要路特築新城之情形也湖南候補知府吳坤修管帶彪勇各營駐紮奉新之甘洲地方臣等前派赴廣信府防守因三縣紳士稟畱仍令畱駐奉新業經具奏在案旋因甘洲去城稍遠近城之賊焚劫奸淫不堪言狀紳民泣求進剿九月三十日吳坤修派彪左營由東路六分橋進彪右營

義武營由中路百尺橋進長字營由西路烏嵐橋進黎明起行
先紮距城五里外吳坤修自率親兵登城北獅山周覽城垣復
繞至南城登岐嶺瞭望該逆由南門出隊蜂擁而來當卽渡河
迎敵且戰且退佯作畏縮之狀該逆逞志狂追引至數里外方
卓旗回戰彪左營全隊從東抄出彪右營兩哨并義武營抵敵
中路長字營全隊禦西門之賊槍礮先施刀矛繼進傷賊極多
而該逆知我距營較遠難忍飢渴計欲疲乏我軍傾城而出漫
山遍野進退數十回合自辰至申更番飲食力戰五時酉正始
收隊賊復以數千人尾追牽掣俟其來旣遠我軍鼓勇撲回擊
之又斃數人自來交鋒之久以是日爲最吳坤修因城賊四出

竄擾卽移紮近城之六分橋地方十月初八日賊來誘戰堅忍
不出使其久立以勞之初九日復分數股直來撲營吳坤修派
彪左右營兩路衝出長字營從左首遠包義武營從右首遠包
賊卽敗退轟擊無算追至城下而旋十八日各營派七成隊分
作兩路繞城五里外游繹該逆亦分兩路來迎彪右營長字營
抵東南一股彪左營義武營抵西北一股賊匪愈戰愈多兇狠
已極長字營官把總王吉昌奮勇逾恆進退數十合賊不能抵
禦卽退回南城王吉昌接踵而至意欲乘勝入城該逆復從城
中衝出各勇稍卻王吉昌殿後被傷陣亡彪右營長字營又合
隊衝擊殺賊無數彪左營獨當西面力戰尤久營官千總吳修

攷衝鋒二十餘次中賊火彈身受重傷是日我兵傷亡逾百而斃賊三倍過之此吳坤修在奉新屢戰獲勝之情形也據普承堯曾國華劉騰鴻吳坤修先後稟報前來臣等伏查江西賊匪以瑞臨爲根本自鄂省援師抵瑞該逆併力固守堅不可拔現在我軍新修南北兩城亦以爲西路各軍之根本如瑞城不能遽克則畱五千人守此新城餘兵或分或合可以調遣如意把總王吉昌由湖南千里來援自備口糧三四千金前在新昌上高屢獲勝仗後隨同進剿奉新克復安義均甚出力此次力戰捐軀應請照千總陣亡例從優

賜卹以慰忠魂所有瑞州一軍十月接仗屢次獲勝現在新修

南北兩城暨奉新屢戰獲勝各緣由恭摺由驛馳奏伏乞
皇上聖鑒訓示施行謹

奏

硃批知道了王吉昌著照千總例議卹欽此

建昌官軍潰退摺

咸豐六年十一月十七日

奏爲建昌官軍屢獲勝仗十月二十五日挫敗營壘被陷閩兵退回本境各情形恭摺馳奏仰祈

聖鑒事竊建昌軍營八月間分兵救援南豐新城及郡營擊退援賊各情業經奏明在案嗣據副將張從龍陳上國琳潤等先後稟稱自琳潤續帶閩兵抵建與省城之贛兵龍泉勇合紮北路建勇亦自新城回軍駐紮西北兵力較厚卽於十五十六等日會合四面併力環攻柰我軍當攻擊之際賊匪了不接應有欲扛梯而進則礮子飛落如雨兵勇卽被槍傷因之卻立且每於我軍收隊之時該逆窺視後隊人寡卽出數百人搦戰我兵

預先隄防十七日北路一軍回頭迎擊大獲勝仗二十一日各營會合攻城該逆突出南門數百人衝抵營盤我兵分道攔擊殲賊十數名西路黃家駒帶勇馳至東路張家駒林士魁督兵勇梟水截擊該逆三面被圍殺斃百餘旗幟軍械橫棄遍野紛紛踰垣逃遁退至城門城內老賊閉門不納仍驅出數百人回戰又被火箭槍礮力擊卻之二十三日北路各營出隊城賊出數百人迎戰我軍以槍礮斃紅旗賊目一名匪黨十餘該逆抵死向前力拒我軍各紮定陣腳靜以持之大礮環施賊眾且拒且退西北接應之兵勇從旁橫擊而出逆賊勢不能支退入城內二十四日探知逆賊由東門出城取水派兵勇三百名前

往埋伏賊至溪邊號礮一響伏兵齊起刀矛殪其前鋒數人抬礮繞旁擊敗之二十五日逆賊六七百人開城搦戰琳潤帶兵趨北門張大雄李熙瑞名謙楊錦斌等各領隊而出約各撥奇兵一隊繞左右旁擊正兵以大礮連環并擊傷斃甚多奇兵起而乘之逆賊敗入城內堅守不出二十六日琳潤張大雄圍攻如故賊仍堅守不出二十七日琳潤令興化勇一人手執藤牌躍入子城斬取賊旗誘賊出城該逆果憤怒出城迎戰我軍伏兵齊起楊錦斌張大雄等從左右截出逆賊紛紛敗散追抵子城相持兩時興化營把總陳光陞被槍飛傷猶自督兵奮擊九月初二日將邵武運來之大煩礮對城轟擊逆賊分路出戰三

百餘人由中路直撲琳潤之陣又出兩隊由城左右包抄而來琳潤令曾大升帶各兵詐退三十餘步然後名謙張大雄等三路并進金鼓齊鳴與槍礮之聲相應傷斃賊匪百餘我軍三面圍裏城賊出而接應始得逃出重圍午後收隊我軍亦受傷多名初五日琳潤張大雄等復由東北進攻名謙等由西北夾擊逆賊出城迎禦我軍左右包裹該逆唯得力戰以出重圍而已割取首級二十五顆奪獲旗幟器械四十餘件張從龍等以屢次攻戰未能得手由是重修攻具重懸賞格力圖大舉九月十三日四更出隊趁月光將沈負薪向南門堆積扛梯西南城下一面燒其檔門千觔閘板一面奮力扒城該逆於門外築有護

城短垣暗伏牆內我兵甫近槍礮連施外委徐榮生衝鋒直前被長矛刺傷扛梯有豎至城上有未及扶立者城上礮石紛紛雨下火罐火包亂擲我兵擋牌不能抵禦又被傷數人十九日我軍出隊環攻之際該逆於西門突出迎敵我西路兵勇稍卻南路大隊伏出夾攻連斃大旗老賊眾賊奪屍我兵搶入壘進壘退傷斃賊匪數十名奪獲旗幟火藥刀矛等件此八月下旬及九月上半月壘次攻剿獲勝之情形也自九月十七日撫州李元度之營被賊撲陷賊之凶殘頓長建昌之局勢爲之一變蓋緣建郡一軍以聞兵三千人爲大宗本府額兵與新募各勇千餘人次之自省城撥往之贛標兵龍泉勇六百又次之臣等

責成知府何栻在籍安徽知府張家駒綜理該郡軍務其於閩兵有主客之分無統屬之權七月底新城之陷何栻一門八口殉難該員傷病餘生顛連萬狀張家駒以本地紳士籌餉籌兵任勞任怨雖使心力交瘁實亦呼應不靈而省城庫款支絀臣等竟不能籌備糧餉軍火遠解建昌該郡竭蹶情形想在

聖明洞鑒之中至九月十七撫州營盤失陷建郡與之毗連唇亡齒寒軍心不固何栻等屢次稟請濟師臣等以無大枝勁旅可供調撥深用焦灼蓋建昌軍營岌岌危殆之勢臣等寢食憂之亦已意料及之矣旋據何栻張家駒稟稱自李元度崇仁之兵撤調貴溪初七日賊匪卽入崇仁初十日又陷宜黃前僞監

軍冷逆於初九日入金谿又於陷宜黃之後擾及楓林神岡大雄關軍山以逼南豐陷金谿之後擾及黃獅渡高陂以逼瀘溪建郡地界四五十里如西路之澤泉茅排北路之青泥石門無不面面皆賊何栻等計無所出卽設爲雕剿之策聞賊蹤擾近郡界各營抽兵數百掩襲之遠則五六十里近則三四十里盡夜而出向曉而歸南豐宜黃交界搜剿一徧人心藉資鎮定十五日探報宜黃出賊二千餘人直抵岱七都十七日已逼規下距郡城三十里各營議定抽兵赴規下迎剿潛師夜出建營署守備楊錦斌偕世職崔思坤引軍疾馳天明已抵規下該逆正擬飯後撲城零星四散猝不及防楊錦斌揮軍掩殺該逆不及

措手緣崖逃竄我兵勇躡追搜剿響震山谷斃賊百餘顛撲殞命及擄脅逃散者甚多奪獲大旗礮械無數追至魏嶺雲梯關收隊此建營於危急之際抽兵出剿梟下獲勝之情形也何忒等以該逆爲崇宜勅敵必不因此一挫遂戢其鋒仍囑各營面面戒嚴連日派撥兵勇四處雕剿二十一日探稱楓林埂口裏塔墟一路有逆匪七八千前來張從龍派兵六百馳往迎擊候選同知黃家駒帶勇百名爲之嚮導張家駒自帶壯勇三百堵東路張大雄率贛標兵勇三百爲接應三更起程夾岸而進二十二日黎明抵距城四十里之大安橋與賊相遇賊分三股皆爲我軍擊敗殺傷百餘人正待窮追殊左右逆匪抄出山後將

我軍衝爲兩段先勝後挫共陣亡五六十名被傷亦數十名管帶漳勇之保舉把總蘇廷美力戰陣亡前湖南長沙縣典史李廷耀不知下落南軍併由東岸紛紛敗退張家駒張大雄接應兵至截住敗卒紮駐山頭殺賊數十名直抵河沿賊眾卻退我軍始得收隊是日賊卽撲至上湖橋下兩處距郡城三十餘里張從龍因南岸兵勇傷亡較多銳氣少挫卽親督所部扼駐廟嶺立待與該賊死戰張大雄連夜赴南岸助之張家駒復調楊錦斌帶建營六百人併往擊之次日迎賊復戰賊漫山寨野而來馬隊數百匹橫衝直突我軍分三路迎敵張大雄楊錦斌身先士卒奮力掩殺將賊左右兩路擊敗中路賊亦退走追至十

餘里轟斃殺斃之賊不計其數奪獲騾馬不少正待收軍賊復掩至如是數次我軍更番疊進戰至日中城內之賊探知外援已到遍吹海螺出城接應我軍氣力稍懈回顧營內有賊眾志稍慌隊伍稍亂賊將馬隊分兩翼馳驟包裹將我軍困在垓心署閩安協副將陳上國截住南門之賊我軍首尾不能相顧東岸之勇方待接應而有賊千餘人由田螺石突至爲所牽制北營之兵方來助戰而又有賊二三千從界山嶺撲來從規下撲來爲所牽制時西北路官軍僅琳潤兵九百名顧標守營兵一百名及龍泉勇建營兵五百餘名而已西北兩城內之賊蜂擁而出琳潤正分途迎擊而南營敗卒紛紛由西奔回琳潤知南

軍失利急於馳援乃會同拔營冀得全師以出一面截殺北路之賊一面移軍東行時已申酉之際南營張從龍張大雄楊錦斌始從重圍衝出賊馬攢追張從龍受傷投水遇救始甦張大雄手受矛傷賊卽撲渡而東混戰逾時我勇敗潰副將陳上國督同管帶漳兵之守備伍連青候補通判呂文烱巡檢丁開第併入漳營在麻橋苦戰內外之賊併力交擊二十五日天色微明營中火起遂爲賊陷陳上國呂文烱丁開第同時遇害北軍福建兵勇退駐閩境之飛鳶自守南軍郡營潰散甚多贛營受傷患病亦衆令把總謝福麟帶回贛郡歸伍張家駒率龍泉勇及將弁由貴溪河口一路回省此十月二十二二十四五等日

建昌苦戰營盤被陷之情形也臣等伏查撫建兩郡輔車相依撫營既陷建昌勢難孤立加以師老力疲餉項久缺援賊新至鏖戰兩晝夜之久遂致挫失除福建各將弁應行賞罰由閩浙總督奏明辦理外所有護閩安協副將陳上國深明大義力戰之苦遇難之貞無愧大將風節應請與同時遇害之把總蘇廷美守備伍連青通判呂文炆巡檢丁開第一併從優

賜卹以慰忠魂其餘傷亡員弁兵勇查明照例辦理所有建昌軍潰閩兵退回本境緣由恭摺由驛馳奏伏乞

皇上聖鑒訓示施行謹

奏

湖南援師克復袁州府摺

咸豐六年十一月十七日

奏爲湖南援師克復袁州府城恭摺馳奏仰祈

聖鑒事竊湖南援軍圍攻袁州防剿萬載臣等於三月二十六日具奏一次旋因道路梗塞稟報未能常通所有袁州軍情概由湖南撫臣奏報茲於十一月初六初八等日先後接據道員劉長佑候補知府蕭啟江游擊劉培元稟稱自九月屢破援賊之後袁城之賊十分窮蹙旋於吉安糾合僞檢點傅逆龍泉黃逆并安福賊共萬餘臨江賊數千齊集分宜設卡昌山十月初三夜五更前隊已到彬江翌日我軍出隊下浦以待賊果三路至遂分頭迎擊又大敗之至初七八賊遂悉數駐紮合山築立

土城深溝高壘誓決死戰劉長佑等飛書至萬載調游擊田興
恕一軍來袁州助剿十三日迎擊援賊於下浦賊潰轉守台山
巢窟十六日蕭啓江田興恕等分三路進破合山賊巢大獲全
勝賊連營二里一炬焦土斬奪無算積聚概行燒盡乘勢追逐
距分宜僅十五里乃收隊是夜分宜賊乃悉數遁去二十三日
復有竄轉者二十四日劉長佑派隊會剿收復分宜縣城賊援
自此絕矣袁城之賊計窮力盡紛紛投誠惟廣賊尙欲忍死以
待堅不肯降我軍乘其內潰連夜環攻二十七日賊目僞侍衛
李能通詣劉長佑軍中乞降羣賊益無固志十一月初一日游
擊劉培元率兵列陣楊家山令哨官黃開甲莫有陞等伏於山

下誘戰城賊數千由秀江橋蜂擁而來我軍佯爲敗退賊眾追來黃開甲等率勇橫截斃賊十餘進而衝擊又斃賊目二名餘賊潰走乘勢力追城門下聞賊眾大亂未申之際降賊俱供稱城中賊束裝將遁初更候僞檢點黃逆果率數十賊由北門出餘眾續出我軍恐其竄向萍鄉派隊堵禦賊之出者悉皆驚回欲逃無路我軍乃收隊暫避暗伏各處四更後賊多絕城出者我師併力攻之蕭啓江率勇斬絕城之賊而自奪其索絕入急開北門以納諸勇西門內應之賊亦啓關以納劉長佑軍中之勇賊悉向東南冒死突出我軍分路跟追沿途剿殺伏勇橫出追擊俱往返百餘里逃賊殄滅殆盡城內投誠者計二千餘僞

檢點亦經生擒立將城池克復該逆漏網無幾各等情稟報前來臣等伏查江西八府淪陷惟南康府聚賊無多餘皆悍賊數千悉力固守堅不可拔自湖南援軍圍攻袁州吉臨等處之賊盡銳以救袁城逮鄂軍圍攻瑞州又盡銳以救瑞城互相援應轉相灌輸我之兵力已疲而賊之負隅如故臣等焦灼之餘彌增慙悚茲幸仰仗

天威袁州克復一郡得手全局或有轉機除應保員弁及安置降賊各事宜由湖南撫臣詳細奏報外所有袁州克復緣由謹繕摺由驛馳奏仰慰

宸廑伏乞

皇上聖鑒訓示施行謹
奏

饒州豐城等六案保獎摺

咸豐六年十一月十七日

奏爲遵

旨彙保克復饒州豐城等前後六案出力員弁開列清單仰懇
恩施恭摺奏祈

聖鑒事竊本年六月二十二日克復饒州所有在事出力員弁
當經奏請開單保獎奉

上諭准其擇尤保奏以示鼓勵欽此伏查饒州東蔽廣信南衛
省垣實爲江西要郡布政司耆齡自上年四月調赴該郡部下
兵勇僅二千人防剿兼施已踰一載本年三月復經臣等派都
司畢金科帶陸兵一千名都司金世蓮候選知縣賀虎臣帶水

師一千名前往饒州隨同防禦至六月初五日該郡失陷臣等復派都司林保知縣黃振成帶協和營一千名以九江鎮總兵居隆阿率本鎮之兵督同剿辦文武同心調度合宜兩旬之間一戰而復臣等仰體

皇上微勞必錄之意公同酌核開列清單仰懇

恩施不敢稍涉冒濫惟畢金科一軍上年在九江樟樹鎮案內奮勇逾常奉

旨准令保奏林保黃振成一軍上年克復義甯州案內奉

旨交臣等覆查保奏此次均係兩案併保人數較多又卽用道

劉于潯管帶水師四月二十二日克復豐城七月初一日攻破

瑞河口二十七八等日攻破臨江河口奪獲礮船甚多疊奉
恩旨准予保獎此次係三案併保又廣東惠潮嘉道彭玉麟所
帶水師收復南康案內遵

旨酌保數人亦歸入此次彙列全單恭候

聖裁至耆齡所轄員弁六品軍功文生汪煥文本年在章田渡
追賊陣亡軍功趙德溶在陳家港殺賊被戕卽補府經縣丞黃
邦治因出隊失跌身故汪煥文請照訓導例趙德溶請照把總
例黃邦治請照軍營病故例仰懇

天恩敕部分別議卹劉于潯所轄員弁外委蕭樾因巡哨落水
淹斃照陣亡例議卹以慰忠魂而作士氣所有遵

旨保奏克復饒州豐城等案出力員弁理合具摺會奏伏乞
皇上聖鑒訓示施行謹

奏

湖口等縣團紳請獎片

咸豐六年十一月十七日

再鄱陽湖之東岸湖口彭澤都昌鄱陽四縣爲饒九南三府接壤之區外濱長江內臨大湖東鄰皖南池州各縣久已陷於賊中鄉民迫於凶威蓄髮納貢編充僞職三年以來幾若淪爲異域而其間一二忠義之士抗節不屈變易名姓避跡山林或陰結壯士密辦團練以待官軍之至咸豐五年臣國藩駐紮南康有湖口都昌紳士舉人袁英等來營請兵情詞懇摯分任嚮導偵探之責自李元度師抵湖口後該紳等辦團辦捐任勞任怨前後捐米一萬石銀一萬五千餘兩添募三營二千人分駐鄱湖兩岸兩月口糧及製備軍械棚帳等件共費二萬餘金皆係

取給捐款爲該紳董等所合籌本年二月官軍撤營後土匪復
仇賊目緝拏各紳士家破無歸生業蕩盡內如袁英之子弟遭
屠謝庭芝之全家受戮譚焱奎之父叔被戕均係大兵未到之
先因辦團致觸賊怒一門殉難上年七月官軍克復涂家埠袁
英胞兄袁蕃安子姪五人均被賊擒死事尤慘曾經臣文俊遵
旨查明復奏在案方湖口駐軍之時前翰林院編修吳嘉賓與
彭澤紳士劉文藻等倡辦二十五都團練於程山廟地方扼要
設防募勇六百人捐餉五萬餘緡兩次克復彭澤縣城殺賊頗
多團勇隨剿者五六千人在事紳耆類皆自備資斧跋涉經營
不避艱險今春湖口撤營之後彭澤各團紳之家屋宇被焚貲

財被掠父母兄弟妻子流離播越尤可矜憫據總局司道具詳
請將各縣團紳擇尤保獎臣等正核辦聞復據鄱彭都湖四縣
紳士公同具稟以鄉里被賊久據片瓦無存奸淫擄掠民不堪
命願糾合四邑義憤之士辦團殺賊由鄱陽進剿都昌由都昌
規復彭湖以助官軍而雪私憤等情臣等查江西被賊蹂躪之
區以四縣爲最久其受害亦最深該紳等忠憤激發始終不懈
理合籲懇

天恩附案保獎以勵團練而策將來除鄱陽陳鴻烈等歸於此
次饒州案內奏保外所有都昌湖口彭澤三縣辦團紳士謹開
列清單仰懇

恩施伏乞

皇上聖鑒訓示施行謹附片具奏請

旨

克復安福縣城摺

咸豐六年十二月二十三日

奏爲周鳳山等一軍疊獲勝仗克復安福縣城恭摺馳奏仰祈
聖鑒事竊照新授吉安府知府黃冕與前任湖北藩司夏廷樾
前任廣東羅定協副將周鳳山共籌援師進剿吉安府業經臣
等於十月十一日附片具奏在案嗣准湖南撫臣駱秉章咨稱
派委臣國藩之弟曾國荃帶湘勇二千人先發黃冕夏廷樾隨
後繼進等語曾國荃由萍鄉入周鳳山由萬載入約定會攻安
福以趨吉郡十一月十二日周鳳山駐軍楓溪距安福城四十
里次日五鼓行至清溪探報大嶺小嶺伏有賊匪攔截卽派守
備劉之能等自左路進攻守備楊光福等自右路抄出初及交

鋒賊卽折回我軍乘勢追北殺賊數十名奪獲黃旗馬匹槍礮等件曾國荃亦於是日行至江口遇賊距安福尙三十餘里登高瞭望賊匪兩枝迤邐而來曾國荃派都司陳光孚拒其右蕭孚泗截其左而自率隊伍禦於中路有騎馬黃袍賊目六人突前我軍植立不動相距二丈許該逆亦不復進逼張開輯以劈山礮擬定一發立斃二賊奪馬與印羣賊遂紛紛獸散我軍三路抄追殺斃二百餘賊生擒十六人窮追三十里申刻卽抵安福克復縣城周鳳山亦卽入城安撫遺黎接剿餘匪兩軍會合均紮東門之外此十三日兩路獲勝同克安福縣城之情形也嗣據探報稟稱通吉安之東路大汾楓田等處屯賊甚多約有

五六千人約期來撲官軍勞壘十七日周鳳山等出隊分三路進兵曾國荃派都司蕭孚泗等由中路進周鳳山派守備劉之能等抄右路進歐啓貴等抄左路進該逆亦分三股迎敵槍礮雷轟自辰至午我軍堅不可撼該逆悉眾向右路衝突哨官李發枝奮勇直前刺取黃袍賊目一人賊勢小卻劉之能彭東貴何正旺等大呼齊進刀矛摩髮斃賊二百餘名該匪敗竄追過大汾河十餘里奪獲旗幟繡帽龍袍槍械百餘件生擒十一人正擬移營進剿間探得古城永新來援賊千餘屯集固江里田并驅還安福敗匪二千餘竄至竹江青一帶思據河以拒我軍十九日周鳳山率哨官劉之能楊光福等由河東北分五枝徑

擊竹江青之賊曾國荃率湘營由樓背洋口分三枝兜剿里田之賊周鳳山行三十里竹江青股匪已先遁矣曾國荃偵知賊在洋口對河之千金壇山上各弁勇赤身涉河賊見我軍至列一字陣於山腰有黃袍賊目四人擁隊前衝又伏賊一枝出隴中大村冀繞擊官軍之旁藍翎都司蕭孚泗陳光孚禦中左兩路而張開輯偃旗蛇行由右路抄出賊伏之外羣賊由山半乘高撲下槍礮兼施并放噴筒我軍靜寂無聲屹立不動賊下山甫逼我軍衝鋒擁進賊勢稍卻眾勇大隊趁之羣賊奔竄追殺五里至橋東村賊據石橋相拒思俟伏賊之勝卓旗回戰不意官軍追騎奄至刀矛相格張開輯之伏兵已從右路抄出伏賊

之旁中路之賊頓失所恃首尾不能相應遂大敗狂奔我軍窮追直至距營六十五里之固江亭子始行收隊奪獲洋槍礮械藤牌四百餘件旗幟尤多此十七十九日大汾里田兩次獲勝之情形也據周鳳山曾國荃等稟報前來臣等伏查吉安爲江西膏腴之地該逆悉力固守與瑞臨撫州并重茲幸克復安福疊獲勝仗乘此聲威圍攻吉郡或可迅速得手成上游建瓴之勢以固南贛天險之區所有周鳳山等一軍克復安福各緣由恭摺由驛馳奏伏乞

皇上聖鑒謹

奏

畢金科軍進剿勝仗摺

咸豐六年十二月二十三日

奏爲饒防一軍進剿泥灣等處疊獲勝仗鄱陽境內肅清恭摺
奏祈

聖鑒事竊照饒州府城自六月克復以後防剿各情經臣等具
奏在案嗣據雲南臨沅鎮都司畢金科升用都司林保等先後
稟稱該逆屢次受創之後糾集都昌彭湖各處匪黨八千餘人
盤踞鄱陽縣西北百餘里之泥灣一帶奸淫焚掠民不聊生紳
民紛紛來營請兵畢金科等熟商該逆既萃各處之賊竄踞泥
灣勢必撲犯郡城與其使人薄我不若我先薄人遂定議於九
月十三日進剿十四日至泥灣十五日黎明該逆約四五千人

分五股直撲我軍畢金科等亦分五路迎敵升用都司林保拒中路已革都司岳炳榮擊右路畢金科派千總龔廷貴把總朱洪章等分擊左路而自率親兵迎頭衝殺鏖戰數時該逆抵死不退畢金科下馬大呼衝入賊陣岳炳榮由松嶺之旁包襲賊後該逆首尾不能相顧遂如鳥獸散矣我軍乘勝窮追斃賊四百餘名生擒十二名奪獲旗幟刀矛馬匹無數次日仍回老營此十五日進剿泥灣賊匪大獲勝仗之情形也十一月十六日探報前竄饒州之聶張二賊由建德東流等處各聚悍賊數千與新到李邱二賊目所帶匪黨不日來犯官軍營壘畢金科等籌商以我軍僅二千人而賊眾數倍過之不可力勝但可智取

當派龔廷貴等五百餘人於初更時乘暗潛赴陶溪渡復派百餘人分布各路叢林埋伏以作疑兵十七日賊分兩路而來一由陶溪渡一由童子渡塵土漲天黃旗徧野龔廷貴等前夕已至由左路遠包以防童子渡之賊抄襲後路朱洪章等由右路繞過山後橫出以截之岳炳榮向前迎敵而自率親兵接應不逾時聞龔廷貴等已抄左路之賊之尾朱洪章等亦將右路之賊截爲兩段該逆分爲兩枝殊死鏖戰畢金科飭放號礮叢林中伏兵四起呼聲雷動畢金科縱馬衝突各哨弁亦迴合力擊無不以一當十賊黨大敗我軍兩路窮追至臥虎山青田埠兩處始行收隊殲斃及生擒共六百餘名此十七日在陶溪渡大

獲全勝之情形也二十三日紳民稟稱該逆經痛剿之後竄踞
線洲地方催貢掇搶民不堪命畢金科以鄱境未清終爲饒郡
之患且聞調湖口之賊千餘約期大舉入犯遂於二十四日派
隊前進二十五日黎明甫抵離線洲三里賊於望樓下點放信
礮偵候之賊飛奔而退畢金科登高瞭望見該處四面皆山中
橫一港兩岸民房數百間該逆已於兩路列陣而待畢金科派
龔廷貴由西路進岳炳榮由東路進而自伏中路靜觀其變方
接仗時民房之內伏賊齊起勢如潮湧我軍四面受敵幾不能
支龔廷貴等躍馬衝陣斬大旗賊目一人中路親兵突起衝擊
刀矛摩戛有聲雜以噴筒火箭該逆紛紛敗北畢金科截住橋

頭擒斬尤多賊多揭衣渡港我軍投鞭追之至村後金龍橋以
山峻力疲卽行收隊是日擊斃及生擒者多係長髮老賊我軍
亦傷亡十餘人此二十五日線洲接仗獲勝之情形也臣等伏
查饒州一郡西接都湖北鄰皖南爲羣盜出沒之區畢金科等
一軍僅二千人臣等慮其單薄常飭嚴守老營不宜輕出免致
疏失畢金科以紳民疊次籲請遠出迎剿以少勝多鄱湖肅清
辦理尙屬得法現仍飭其嚴加防守以固藩籬一俟鄂師進攻
九江卽可調赴湖口水陸會剿所有饒防一軍疊次進剿獲勝
緣由恭摺由驛馳奏伏乞

皇上聖鑒訓示施行謹

奏

奏
和
名
力

劉于潯水師屢次勝仗摺

咸豐六年十二月二十三日

奏爲道員劉于潯一軍再克新淦縣城及在樟樹鎮屢獲勝仗
恭摺馳奏仰祈

聖鑒事竊道員劉于潯一軍駐紮樟樹鎮屢次擊敗瑞河臨江
河口賊船克復新淦爲上游之鎖鑰屢次具奏在案自十月以
來據劉于潯先後稟稱九月之季水軍至上游黃山奪獲大木
牌一次至臨江城下奪獲船礮二次十月之初焚剿茂林荷塘
墟兩處賊卡者二次擊敗樟樹鎮撲營之賊者一次自撫州師
潰臨江之賊數日增樟樹之警報頻聞而新淦縣克復之後未
能分兵防守復爲賊黨所踞十月二十一日劉于潯督帶戰船

十五號飛划十二號寅夜前往襲之派陸勇三百隨船馳進黎
明抵縣賊見我軍人數無多城池新葺竟敢負隅固拒蔡康業
督廣勇攻北門白天佑帶川貴勇攻南門謝鳳高帶團勇攻東
門以分賊勢西門濱江大河礮船自河下轟擊賊見四面受敵
於城上擲下大黃旗兩次暫求解圍卽出投誠我軍自前夕二
更至酉刻未得少息收隊傳餐因令百姓趕辦稻草暗置門洞
裏以火藥噴筒射入頃刻火起城內鼎沸西門亦放火延燒槍
礮乘之聲震山谷各勇梯足於肩緣城而入百姓跪稱賊已開
南門逃走其存者概係長髮不辨是民是賊遂出南門追逐十
餘里奪得旗幟刀矛入城安民賊存米鹽食物分給各勇當劉

于潯襲擊新淦之時臨江之賊乘虛來犯樟鎮老營從西岸突出李逢春派船上下迎擊管帶彰武軍謝得龍吳攀魁等亦出隊衝鋒廣勇川貴勇從隄內包裹該逆三次回旗返戰俱被我軍擊卻適新淦之師從上游歸來礮聲不絕羣賊一律敗退此二十二日再克新淦次日樟鎮交仗獲勝之情形也自袁州克復之後袁城敗賊二三千陸續至臨江城內不納在西岸沙湖屯駐撫州樂安復陷有賊三四千在東岸永泰屯駐聲言約會二十四日來樟樹鎮圍撲官軍營盤至期劉于潯派蔡康業帶廣勇白天佑帶川貴勇沿河直上謝得龍帶彰武軍謝鳳高帶團勇由隄內包裹專擊東岸之賊水師轟擊江中防西賊渡而

相援水師先至永泰賊匿隄下以避礮子廣勇川貴勇衝鋒出戰以人寡稍卻後彰武軍團勇繼至併力擊退臨河口有賊數百亦經礮船擊敗二十五日西岸之賊出二千餘來犯劉于潯令陸軍暫緩出隊礮船排列河口連斃數賊賊避匿隄裏廣勇川貴勇分兩路抄裏一人直前刺取首逆僞張指揮燼之奪其大旗賊盡敗退我軍水陸登岸追北十餘里始行收隊二十六日賊匪出隊來犯東西兩岸約共五六千名水陸弁勇各告奮勇登岸相持半日勝負未決劉于潯傳令收隊飭弁勇登舟飽餐賊仍站立兩岸不退并車載千金重礮三四位臨河施放我軍飯畢劉于潯麾旗登岸我飽賊饑勇氣百倍賊黨亦自知餒

腹不可以久持徐徐引退我軍鼓譟乘之殺賊二百餘追北數里賊由隄裏奔命四散時已酉正矣二十七日賊復兩岸來犯東岸之賊以鄉音與廣勇相約曰我願投誠助官軍以攻西岸匪黨西岸之賊亦以鄉音相約曰我願投誠助官軍以攻東岸匪黨我軍方推心待之該逆忽放排槍傷官軍五人各弁勇憤甚登岸力戰我猛進則賊退我稍卻則賊又進刀矛對舉洞曾賊目迴合十餘次斃賊百餘我軍亦傷亡數十人二十八日復出隊鏖戰自辰至酉更番迭進賊眾皆百戰之餘頑鈍凶狡彼此互有殺傷此二十四以後五日苦戰之情形也該逆以數日未受大挫遂爲久踞之計距我軍五里村家村一夜之中築起

礮台三座用木桶架砌中實以土外挖深濠十分堅固官軍礮船連環攻擊該逆卽藏匿礮台之內負固不出樟樹鎮兩岸民房皆賊時出時沒多寡不定劉于潯日夜籌思正不得所以破之之法適臣等派康國器水軍前往濟師二十九早至樟樹鎮各營因驟添勁旅歡欣鼓舞康國器之水勇尙未紮營一擁登岸劉于潯恐其初到不知地形囑令紮駐河灘派蔡康業帶水陸廣勇與之同進以禦中路派白天佑川貴勇團勇分股包裹派謝得龍帶彰武軍兩路接應派署臨江都司羅玉祥帶本營兵前導派戰船二十號牽制杜家村礮台之賊小划上下飛巡以迷賊目畱李逢春涂安邦水師兩營於樟鎮以固老營行抵

大隄望大小村莊黃旗徧插中有大營盤二座與杜家村礮台遙遙相對該逆分五隊迎敵馬隊當先勢如潮湧我軍初見恟懼卻退劉于潯帶親勇督隊大呼退奔者斬白天佑卓旗停駐彼此施放槍礮噴筒火毬連環拋擲相持不下康國器昇小礮食以羣子擊必命中賊稍畏懼劉于潯施放一窩蜂火箭賊遂潰敗我軍乘勝追北蔡康業匹馬衝突圍攻賊營縱火環燒衣服錢米堆積如山同時火起煙燄漲天連日受傷之賊與守營之賊敗歸之賊無一逃脫兩營旣焚軍威大振李逢春涂安邦亦卽帶勇登岸拆毀杜家村礮台三座是日之戰賊死於火死於礮死於刀矛者約六百餘人我軍受傷者甚少二更後該逆

用民船紮成巨簾上載枯草數百石火藥十餘石意欲衝燒水
營又被我哨船立刻擊散此二十九日蹋燬賊營及礮台之實
在情形也伏查道員劉于潯自督帶水軍以來勸捐供支不盡
取之官帑戰則身先功則歸人軍心民心樂爲效命此次臨江
撫州之賊兩面環伺臣等深以眾寡不敵爲慮該道以水陸二
千之眾拒凶悍三倍之賊實屬謀勇兼優記名道劉于潯籲懇
天恩賞加巴圖魯名號蔡康業驍勇尤著懇請

賞換花翎以示鼓勵其餘出力員弁可否容臣等擇尤保獎出

白

聖主鴻施所有再克新淦縣城及樟樹鎮疊獲勝仗緣由恭摺

馳奏伏乞

皇上聖鑒訓示施行謹

奏

奏稿卷九

附陳近日軍情請催各省協餉片

咸豐六年十二月二十三日

再臣國藩於十二月初一日由江西省河赴吳城鎮與廣東惠潮嘉道彭玉麟商酌水師進剿事宜連日接據署湖北提督楊載福布政司銜李續賓函稟武漢蘄黃大冶興國三府七州縣於十一月底次第克復楊載福督水師於十一月二十九日直抵九江焚奪賊船殆盡李續賓督陸師進剿南岸賊匪於十二月初九日進攻九江府城臣展閱之下不勝忭慰查外江水師上年正月初五日經臣國藩奏明飭赴湖北援剿是時戰船或入內湖或爲風損僅存一百四十餘號駛至武昌今重來九江陸續添至四百餘號李續賓陸軍係上年八月遵

奏稿卷九

三

旨派赴湖北援剿是時羅澤南李續賓所帶湘寶各營僅五千人今重來九江添至八千餘人該二軍馳驅數省轉戰三年所向有功而江甯將軍都興阿統帶之馬隊亦由北岸以至小池口臣國藩於十八日由吳城馳赴九江迎勞諸軍見其軍威嚴肅士氣樸誠自十二至十八日環攻六晝夜并未收隊楊載福李續賓與都興阿聯絡契合愛敬交至雖積勞之後屢勝之餘猶復日夕兢兢衣不解帶不特東三省馬隊忠勇可風卽湘營與水師亦實爲不可多得之勁旅惟是餉項匱乏積欠口糧一百三十餘日臣等前次奏請山陝兩省每月各撥協餉三萬兩恭奉

恩旨飭令酌解數月現聞晉餉起解三萬兩已有一萬到江合無籲懇

天恩飭催山西陝西迅速籌解概交湖北撫臣胡林翼經收由水路解至九江專濟北軍之用至於江西各府尙有分駐兵勇五萬餘人舊欠無從補給新歲尤難支持合再瀝懇

天恩敕下兩廣督

臣

廣東撫

臣

於該省無論何款項下每月籌

撥銀四萬兩解至長沙由湖南撫

臣

駱秉章轉解江西以濟急

需能多發一日之餉則多收一日勁卒之用能早克一處之城

則早收一處錢漕之利

臣

等補苴無術迫切瀆陳不勝惶悚待

命之至除新到各軍接仗情形另行查明續奏外謹附片具

奏請
旨

奏稿
卷九

湖北援軍保獎請卹摺

咸豐六年十二月二十三日

奏爲遵

旨酌保鄂省援師出力員弁開單奏懇

恩施恭摺奏祈

聖鑒事竊照鄂省援師經湖北撫臣胡林翼奏派來江援剿四月初自武昌起行七月初一馳抵瑞州冒暑遠征轉戰千里克復咸甯蒲圻崇陽通城新昌上高大縣又分兵圍攻奉新克復安義靖安二縣七月初三擊敗僞北王韋昌輝之兵八月初一初四擊敗大股援賊二萬有奇疊奉

諭旨准令擇尤奏獎茲據各營開單稟保前來

臣等公同酌核

鄂省援軍湘勇寶勇彪勇六千人中共保二百四十七人其由
省城派往瑞州會剿之虎字雄字九江等營三千五百人中共
保四十人理合開具清單叩懇

鴻施以勵戎行而作士氣至疊次陣亡將弁藍翎把總潘河清
藍翎外委李經元高長源唐梅洪外委李上安彭益勝姚長青
劉家全吳秀山千總向秀武均請交部從優

賜卹所有遵

旨酌保鄂省援師出力員弁緣由恭摺馳奏伏乞

皇上聖鑒訓示施行謹

奏

查覆鄧仁堃被參各款摺

咸豐六年十二月二十三日

奏爲遵

旨確查臬司鄧仁堃被參各款據實覆奏仰祈

聖鑒事六月初八日承准軍機大臣字寄咸豐六年五月二十一日奉

上諭廉兆綸奏瀝陳江省實在情形一摺逆匪竄擾江西蔓延八府前據曾國藩等奏報克復建昌東鄉兩縣而瑞州奉新尙未得手撫州等府猶爲賊踞該侍郎等自應揀派妥員分投剿辦乃據廉兆綸奏稱自省城派出之兵以捐職知府鄧輔綸主之該員年少輕脫本不知兵又非江西官員伊父鄧仁堃係本

省臬司其子本不應與聞公事現在帶兵萬餘時將兩月軍情重大該省豈無妥員可派何以令鄧輔綸管帶兵勇設有疏虞咎將誰諉著曾國藩文俊接奉此旨卽將鄧輔綸撤回另行揀派得力大員前往會同李元度趕緊攻剿毋許延誤至臬司鄧仁堃兼署藩司糧道錢漕各項均係該員經手據廉兆綸奏捐辦城濠各工不能潔己遠嫌致物議沸騰怨聲載道又令伊子鄧輔綸辦理軍務等語現在軍餉支絀臬司鄧仁堃如有營私舞弊情事曾國藩等近在省城見聞較近卽著嚴密確查據實參奏毋得稍有徇隱卽有未能勝任之處亦著曾國藩等奏明撤任并據奏石逆下竄賊勢漸鬆各府大抵土匪長髮賊甚少

等語土匪嘯聚剿辦較易正宜乘此機會分路進剿迅圖克復
著曾國藩文俊亟籌剿辦毋令該匪日久盤踞是爲至要將此
由六百里諭令知之欽此

臣等接奉

諭旨當將鄧輔綸撤委鄧輔綸交卸營務七月初二日自撫州
起行回省伏查上年十一月初十日瑞州臨江兩府同時失陷
江西省城震動官紳會議招募楚勇千餘人防守省垣分爲兩
軍曰保衛軍曰捍衛軍又因平江勇隨同知縣劉希洛李錕在
瑞州打仗力戰兩日義憤可用令李進發重爲招輯以其均係
湖南籍貫議以候選知府鄧輔綸權理營務鄧輔綸堅辭不肯
任事鄧仁堃亦以其子未嫻軍旅不令其出冒鋒鏑僅令點驗

奏稿卷九

三

名冊校看技藝維時臣國藩駐紮南康臣文俊尙在途次十二

月十六日臣文俊抵任後因查悉營伍散碎通省并無大枝勁

旅深以爲慮嗣接見鄧輔綸數次見其局度安詳心地明白新

到之平江勇暨前此寶勇志同各軍多與之同鄉熟識情意聯

絡因飭令綜理營務一面函商臣國藩調曾任平江縣之同知

林源恩來省與鄧輔綸同統一軍此札飭鄧輔綸帶勇之原委

也二月十八日樟樹鎮官軍敗挫臣國藩星夜進省會籌一切

定議調李元度之四千餘人自湖口饒州而來鄧輔綸林源恩

率四千餘人自省城進賢而往兩軍會合號稱萬人併力以攻

撫州曾於三月二十六日克復進賢摺內縷晰具奏在案是撫

州一軍李元度轄其半鄧輔綸林源恩共轄其半并非鄧輔綸全主之也自塔齊布淪謝之後羅澤南李續賓等遵

旨派赴湖北周鳳山畢金科等春初正駐樟樹而江西各官多以失守獲咎維時實無妥員可付以統軍之任臣等豈不知軍情重大思得將材以肩艱鉅無如兵凶戰危畏避者多自任者少卽素稱賢員談及戎事則藉詞規避不願以身試險自七月初撤回鄧輔綸以後江軍平江勇責成林源恩主之厥後口糧缺乏分兵出剿崇仁援賊大至於是九月十七之挫林源恩唐得陞耿光宣先後陣亡臣等亦竟無得力大員可以另派日夜焦慮常以乏材爲患想

聖主必能曲諒苦衷也至廉兆綸奏鄧仁堃捐辦城濠各工不能潔己遠嫌一節臣等於八月間傳集承辦城濠經手銀錢各委員飭令將工程做法用錢細數逐條開報據現在省城委員南康府同知張賦林候選知府吳文瀾鄧輔綸前江蘇常州通判陳進修暨各員等先後呈送清摺內稱咸豐二年冬閒粵匪竄擾長沙江西籌辦防堵鄧仁堃時在首府任內創議於進賢順化等城外築建虛中礮台五座其三座於二年臘月興工三年三月畢役其二座修築未畢值三年夏閒粵匪竄圍南昌八月解圍後續修完畢其台基皆排大木長椿鋪以松板壘砌麻石糯米之粥洋藤之水融漿灌縫俾無虛罅下層開圈甕礮眼

七門五門不等中層二門三門不等各輔以葫蘆槍眼數十箇上列垛口高建敵樓又開鐵閘門以便奇兵出入此虛中礮台工程之大概如此當賊圍省城之時開掘地道兩次轟坍城身三十餘丈城內亦掘洞出外仰鑿天窗基腳虛鬆又坐坍十餘丈解圍後就坍陷之處建造礮城以護其外分德勝門界內爲五段章江門界內爲一段每段大城膨裂土牛傾卸皆拆修而堅築之其礮城則用木椿巨石疊砌成台開安礮洞十二槍眼數十內礮平石上構走廊其第二第三兩段畢工後因雨多土漲台身受損四年五月拆修一次挑去積土換用紅石開砌級坡附建兵棚此德勝門外六段礮城工程之大概如此其培修

全省大城自三年十一月興工各員分門承辦地段有長短工費有繁簡畢事有早遲城上垛牆一律增高培厚拆砌敲傾外施兔耳以繫攔牌內安葫蘆以作槍眼高者砌礮台低者挖礮池池面鋪石抵灰鑲嵌堅緻開砌八字小洞以鐵裹門五垛置一兵棚數十垛一官棚每門建瞭台數座官廳數所又設柵欄川門以嚴汛地分硝磺各庫以慎職守外築護坡內濬水門各城大約相類惟順化門傾卸拆砌較長德勝門附建虛敵台一座忠義祠一所水甬一區比之各門工費爲多此七門城身工程之大概如此又於章江等門添建礮城五座章江門爲臨河險要之地舊時月城單薄三年賊退之後乃於左角建立礮城

就舊濠之內下基深掘一丈六尺始築實址釘椿疊石疊砌成
台左右各接造牛馬牆覆以堅石北建甕城以障月城之外開
砌礮門嵌安鐵菱右畱突門以出游兵內有生門以通月城其
順化德勝二門暨進賢門之東西各礮城與章江門做法相似
牛馬牆長者八十丈短者八九丈不等又於永和廣潤惠民三
門新建月城巨石排砌灌以糯漿外安礮洞內施懸閘此礮城
五座月城三座工程之大概如此咸豐四年十月大城將畢濠
工始興環城修浚深各二丈有奇用紅石鑲砌泊岸護以巨椿
各門釣橋砌成八字長墩臨濠礮台添砌護基德勝門外飛沙
向與城齊舊濠久被淤塞此次加工挑挖一律深通其豫章溝

西水關稽疑津等處立閘引水疊石爲堤西城各門之外瓦礫堆積多成小阜濠內之土亦填於近岸處處攔塞礮路此次逐段挑去一律鏟平此修濠平土工程之大概如此各委員開摺呈報并開列銀錢數目前來據此臣等悉心查核周歷履勘凡城守之道攻者爲客守者爲主如果主強而客弱則當開城迎擊若其主弱而客強則當閉門堅守惟恐有一處之鬆懈一穴之偷入江西修理城垣畱突門五處奇兵門五處除大城門外尙有十處可以偷入又礮洞各門大者低頭可入矮者短梯可登實有防不勝防之慮濠工石岸平石疊砌者少側石立砌者多未能鑲培穩固以致廣潤等門畢工未久卽有三處衝塌重

行補修之案此皆辦理未甚合法者也又查定例修理工程事前有勘估之員事後有驗收之員則承修者不得任意開報當癸丑八月江西解圍之後城外民房廟宇十餘里拆毀殆盡磚石料木堆積如山取攜甚便價值甚廉收買紅石每塊不過數文至六十而止青石麻石每塊不過數十至二百而止是時興工修城若先行核實勘估則物價之賤共見共聞承修者亦不敢互有低昂乃當時未經勘估畫一致委員各自開報多寡懸殊進賢門之城垣與德勝門垛口相等長短相等章江門則地段更短乃進賢門僅用錢二千二百餘串章江門則報至九千餘串德勝門則報至二萬餘串又如委員陳敬修承辦永和門

之月城并其城身同係一段之工同經一人之手而開報兩摺亦滋迷混又各員或一面修工一面勸捐自捐自用委員之賢愚不一捐生之疑義斯起原參摺內所稱物議沸騰殆卽因此類而時有所聞然在臬司鄧仁堃當時但求城濠之速成未暇遵勘估之定例但求工料之堅實未及防各員之浮領究屬急於大端略於小節且自咸豐二年賊犯長沙以來江西風鶴震驚已無固志迨三年粵賊圍南昌土匪擾吉安九饒等府相繼淪陷嗣是湖口南康無時無逆舟義武安建無日無警報鄧仁堃於三四兩年烽煙擾攘之際毅然獨以修城爲己任不辭勞怨不事苟簡卒能完繕高堅儼若金湯插石滾木守具畢備兵

房官廳各有定所爲東南數省第一名城自去冬七郡失陷賊蹤常在百里內外終不敢窺伺省垣而兵民亦有恃以無恐未始非新修此城之功臣等再四察訪鄧仁堃綜理城工謂不能防人浮冒在所難免謂不能潔已遠嫌則實不至如此

諭旨垂詢鄧仁堃是否勝任及營私舞弊一節查鄧仁堃在江西十餘年歷任南安廣信南昌等府於山川之險易民情之樸澆鄉里之殷實瘠苦一一洞悉本末前在蜀省久任州縣刑案素所研究雖閱歷過深不免失之寬厚而持心平慎尙無不能勝任之處自去歲八月鄧仁堃兼署布政司藩糧兩庫一手經理適值寇氛四擾郡縣淪陷錢漕無可徵收鄰省無由協濟而

兩庫例應支放之款紛至沓來刻不容緩按照部章搭放鈔票
搭放大錢猶不足以供給於是設法騰挪或暫發四成五成或
暫緩兩月三月甚至兵精役食屢催不應公私拮据怨望日生
遂疑鄧仁堃兼管兩庫領款遲延恐吏胥不無弊竇而不知春
夏數月涓滴已竭羅掘俱窮臣等日擊時艱不特無弊之可舞
實亦無籌之可借迨七月間新任布政司耆齡接管藩庫新任
督糧道李桓接管糧庫鄧仁堃不復經手銀錢而各款之支絀
如故羣情亦坦然共釋矣惟是鄧仁堃在江日久承辦事件較
多營私市恩在所不免於營務及城上差使好引用同鄉及親
族子弟請託易行俸門時開復不能約束家丁致滋物議現有

參革前任進賢縣知縣潘尊賢在臣文俊處訐告各款亦非盡出無因相應請

旨將江西按察使鄧仁堃交部嚴加議處其城濠各工臣等一面札飭布政使耆齡逐段驗收將突門奇兵門酌量封閉數處各委員摺報錢數指明駁詰如有確係浮冒者再行從嚴參辦除江西各府軍務業由臣等按月逐細奏報暨潘尊賢稟揭之案由臣文俊另摺奏

聞外所有遵

旨確查臬司鄧仁堃被參各款恭摺據實覆奏伏乞

皇上聖鑒訓示施行謹

奏

奏
和
名
丹

監

克復奉新縣城摺

咸豐七年正月十七日

奏爲吳坤修一軍屢獲勝仗克復奉新縣城恭摺馳奏仰祈
聖鑒事竊湖南候補知府吳坤修管帶鄂省援師來至瑞州分
兵克復安義靖安圍攻奉新臣等擬調防廣信府城經三縣紳
士御史帥方蔚等具稟請畱均由臣等奏明在案旋據吳坤修
陸續稟稱十一月初八日探知建昌之賊將欲上犯安義派彰
武軍丁峻長字營易桂修彪中營滕代富等馳往迎擊初九日
賊匪撲城安義把總藍占魁衝其前彪營等自後策應佯北誘
賊折回擊之割取首級者百有九顆追奔二十餘里保全安義
縣城吳坤修以我軍分隊往援安義賊必乘虛攻撲遂飛函瑞

州約會副將普承堯於十一日來奉新助戰該逆果於是日蜂擁而來吳坤修掩旗息鼓佯示以怯該逆志得氣驕聲震山谷適普承堯率所部六百人至兩軍自武昌同來親如手足分軍數月忽然相聚歡欣鼓舞奮勇百倍該逆氣奪鑒戰三時賊黨大敗其悍者回撲愈猛擒斬愈多十三日賊復出搦戰我軍堅忍不動疲而擊之刀矛摩戛賊尸林積追逼近城吳坤修飭士眾少退避城上之賊礮該逆見我軍收回以爲敗怯悉力撲出寶勇分枝包抄勢如山壓斃賊計在六百以外官軍亦傷亡四十餘人藍翎外委余瑞林力戰殞命二十一日賊來誘敵我軍力戰窮追忽於樹林中衝出悍賊官軍小退傷亡近百吳坤修

念近營則賊勢愈猛營壘且不能自保立馬麾眾與賊相搏死者曳歸後者復進苦戰經時賊旋敗竄次日復戰亦如之二十三日又戰亦如之二十四日逆黨大舉來犯我軍堅忍不出俟其情歸開壁逐之勢如潮湧賊遂大敗自有此數日苦戰士氣愈堅賊燄漸落奉新逆黨不敢復出而下游之建昌安義警報日三四至吳坤修於二十九日帶各營馳往安義救援奉新城內之賊乘虛出犯各營官守吳坤修堅立之法排隊岡嶺橫亙數里屹立如山卒亦以此取勝殺賊無算此十一月苦戰屢勝之情形也自二十一以後吳坤修於營外修築長濠立壩遏水每遇賊眾我寡之時利則前進否則阻水自固十二月初二

三月初十日十八九二十等日均與該逆接仗賊强悍而多吳
坤修終守此法自立於不敗伺其隙而破之該逆遂於瑞州邀
來悍賊於二十三日黎明乘天大霧來撲我營我軍寂然不動
若漫無驚覺者廣賊本以槍礮擅長發必命中是日與官軍連
環對擊自卯至申鏖戰六時除奪去賊尸受傷不計外尙割取
首級八十四具從此賊膽已喪堅閉不出吳坤修料其不能固
守此城矣但以官軍單薄甫及三千剿辦則有餘圍攻則不足
乃嚴飭各鄉趕辦團練以相協助賊在奉新肆虐已久百姓恨
之切骨紳士御史帥方蔚等督令比戶練丁各持器械二十七
八九等夜賊由南門出城赴各鄉擄劫頃刻之間聚集團練數

萬人鳴鑼震天賊知官兵方盛團練又成不敢復出城半步聲
息斷絕始有逃遁之意咸豐七年正月初五日吳坤修派隊直
逼城下以火箭噴筒焚其更樓而以槍礮環擊傳齊三縣團練
盡夜環攻使之不得休息二更時城上槍礮已稀各營由北門
獅山梯繩而上縱火焚燒該逆由西南兩門奔竄列炬追殺斃
賊極多三更時克復奉新城池藍翎把總陳有才手刃十餘賊
中礮殞命初六七等日各營及四鄉團練遍搜山林民房生擒
老賊二百二十一名寶勇追至大坵斬殺及瑞州營內截擊者
均不在此數內百姓恨之切齒每生擒一賊輒剖腸剝皮冐樹
礮石以雪其憤見者無不凜凜此十二月力戰疊勝及正月初

五日克復奉新縣城之情形也

臣

等伏查逆黨之在江西專以

堅守爲長策自九江瑞臨等六府之外又以全力守湖口奉新二縣蓋以湖口與九江爲唇齒奉新與瑞臨爲犄角故也吳坤修自抵瑞州卽思先拔奉新以翦瑞賊之羽翼乃圍攻四月大小五十餘仗我兵傷亡至七百餘人之多尙賴團練協助乃克奪此堅城賊之凶很善守實有出於情理之外者湖南卽補知府吳坤修自鄂省率援師而來分兵獨攻奉新所辦捐款旣以供其本軍復能解濟省庫實屬謀勇兼優仰懇

天恩交軍機處記名以道員請

旨簡放候選知縣杜霖請免選本班以直隸州知州不論雙單

月遇缺卽選藍翎卽選從九品孔廣晉請免選本班以知縣畱
於江西補用其餘營中員弁兵勇暨隨同出力之地方各官團
練紳士可否容臣等開單酌保之處出自

聖主鴻恩藍翎把總陳有才請

旨飭部照守備例議卹藍翎外委余瑞林請照千總例議卹以
慰忠魂所有疊戰獲勝克復奉新縣城緣由恭摺由驛馳奏伏
乞

皇上聖鑒訓示施行謹
奏

官軍克建昌武甯兩湖軍收復各縣摺

咸豐七年正月十七日

奏爲官軍兩克建昌一復武甯及湖北官軍收復瑞昌德安湖南援師克復新喻永甯等縣城恭摺彙奏仰祈

聖鑒事竊查瑞州奉新經臣等分派大兵圍攻而由西迤北至於九江中間建昌武甯德安瑞昌等縣數百里間均有逆黨盤踞往來遙爲瑞奉聲援而建昌近接省城武甯近接興國州尤爲賊匪出沒嘯聚之區吳坤修奉新一軍亦只能兼顧安義靖安不能遠及建昌武甯十一月初六日臣等由省派令千總張金壁帶九江兵從九品段起樊俊帶衡勇四百名馳赴建昌雕剿初八日至老官嘴探知小河口有賊數千人初九日抵三角

湖焚燬把卡賊船二隻整齊隊伍分四路直撲小河口老巢賊亦分股迎敵鏖戰兩時之久未分勝負親兵丁世昌周高升等拋擲火毬十餘適中賊隊賊始敗退跟蹤力追殺斃溺斃四百餘名陣斬守城之吳賊目及來援之德安賊目卽將建昌縣城克復張金璧等帶勇旋省嗣聞該縣仍被德安之賊竄踞十二月初一日臣等復派張金璧段起樊俊等前往攻剿探知離馬路口二十里之蔴藉有賊千餘人離蔴藉二十里之灘頭有賊二千餘人存城之賊尙有千餘張金璧等初二日行抵馬路口適遇管帶平江勇投効之李元音正議進兵而蔴藉灘頭之賊聞風先遁是夜我軍宿半邊花橋山一帶初三日黎明張金璧

督同把總李華榮從九段起樊俊及投効之李元音前進賊於距城八里之廖姓村迎敵我軍四面兜擊追至河邊平江勇稍卻賊眾猛追張金壁等直前截之賊黨潰亂紛紛入城我兵四面環攻登山瞭望賊旗已靡親兵丁世昌周高升等首先登城衡勇繼之共斃賊五百餘名生擒二十三名奪獲黃袍黃褂旗幟五百餘件騾馬三十一匹此十一月初九日十二月初三日兩次克復建昌之實在情形也又疊據代理武甯縣候補府經歷冒溶稟報十月初八日賊匪千餘自紐絲嶺犯境舉人柯芬管帶平江勇李述攀駐紮橫路預定前後夾攻之計柯芬由東路潛繞賊後李述攀迎擊賊前行至芭蕉地方遇賊接仗礮斃

數賊嶺巖路狹難以成列我軍小卻賊蠡擁直撲勢幾不支而柯芬一軍之抄出口者已襲賊背賊倉皇回顧爲我兵擊殺五十餘名平江勇乘勢轉戰呼聲震山谷賊眾大潰由旁峽分竄又斃六十餘名生擒三名奪獲馬匹旗幟刀矛無算查點兵勇陣亡六十五名十八夜賊復分股撲營柯芬領大隊伏於嶺頭大營之右軍功黃量成督中營伏於嶺頭大營之左張瑞嵐等伏於楊神坪賊由清溪延山繞入意圖抄襲甫至楊神坪張瑞嵐等伏兵出其不意開礮轟擊斃賊多名其別路分進之賊聞敗回竄嶺頭左右伏兵齊出追殺數里賊多有顛崖墜澗死者二十三夜賊曰張佩五率黨千餘由瑞昌王家鋪撲紫鹿嶺

營軍功羅燭予等帶勇先由僻路抄出賊後教職黃先鐸等督隊迎剿行至上莊猝與賊遇槍礮齊施斃十餘賊羅燭予等復從後截擊賊盡棄械越嶺而逃生擒張佩五別股賊目柯定耀帶數百人由羊腸山衝出亦經羅燭予擊卻之二十八日賊眾四千人由黃坊清溪港兩路入犯柯芬與黃量成議分三路迎剿賊盡銳撲左路黃量成督勇殺斃大旗賊日一名中右兩支乘勝衝出四圍兜擊斃賊百餘三十夜柯芬黃量成偵知賊在路口洪家源滋擾分派隊伍驀往圍剿獲勝十一月初一日賊數千人由瑞昌之王家鋪竄入上莊一帶經紫鹿嶺練勇迎擊眾寡不敵我兵小挫初五日賊忽閒道由建昌之猴子崖竄至

草坪冒溶督帶存城義勇及團勇又輔以童益彰之平江勇四百名初七日擊賊於潘墩港連斃十餘賊乘勝直追賊愈集愈眾我兵被困紛紛潰散縣城洊罹兵火陣堞不完賊撲城下冒溶等退紮澧溪與舉人劉馨翰招集潰勇一面迅催橫路柯芬黃量成之勇一面飭各團派兵助剿初十日賊出千餘人至石口渡焚劫冒溶帶鄉勇二千餘名馳擊柯芬黃量成等橫路之勇繼進適臣等飛調駐紮奉新之府經歷鄭奠管帶義武營先到遇賊開仗并力夾攻斃賊百餘居民積苦荼毒怨恨入骨或持木棍鋤鋤之屬助戰瓦石攢擊如雨諸軍人人思奮斬馘四百名逐北四十餘里是夜我軍駐距城八里之羅墩鄭奠因

賊膽已寒帶勇繞至西南山坡千聲大呼雜以槍礮冒浴亦率
勇從南路堵截城內之賊逃去大半跌斃踐斃溺斃無算僞檢
點李同僞將軍黃光手刃諸賊迄不能制十一日卯刻四面攻
城賊由東門竄出皆爲鄉團擒殺立復縣城此十月初九十八
等日屢獲勝仗十一月初七日先勝後挫兵單城陷初十一
大獲勝仗克復縣城之實在情形也又據布政使銜李續賓稟
報自大冶興國追賊東下十二月初六日行次距瑞昌縣十里
之亭子山該逆聞風遁去該縣署汛外委扈高發與紳耆率練
勇抄擊殲賊多名生擒十二名內有僞探花舒三峯訊明正法
奪獲黃風帽黃馬褂多件收復瑞昌縣城李續賓一面進駐九

江一面派兵收復德安縣城此十二月初五六等日鄂師抵潯收復瑞昌德安之實在情形也又據道員劉長佑稟稱十一月二十日探報新喻賊目僞將軍朱一點率眾二千勢將上竄劉長佑派隊馳赴分宜并催候選知府蕭啟江進屯洋橋互爲聲援二十三日三更賊果悉眾來犯一股進界首一股進界橋界首之賊抵離城五里白田地方楚勇奮擊破之界橋之賊亦爲汪正準親勇及團練所敗十二月初三日劉長佑率楚勇及投誠李能通之義勇千名由袁州赴分宜朱一點退踞新喻分股扼守寶山初八日我軍屯紮界首是夜進剿寶山李能通率眾先進劉長佑隨後策應寶山之賊先嚴陣以待李能通匹馬突

陣各勇鼓譟從之賊遽敗退我軍并力窮追至離新喻縣城里許之大頭山賊悉據山巔義勇衝擊賊猶拚死抗拒選知縣劉坤一麾眾繞向山後賊勢不支乃敗入城中義勇逐之而入賊遂出東門楚勇在城外邀擊賊渡河欲斷浮橋我軍一擁登橋賊於對岸開放槍礮正在相持義勇從下游渡河賊首尾受敵始狂奔四竄追殺百餘名生擒五名此劉長佑一軍克復新喻縣城之實在情形也又據知府銜卽選同知趙煥聯稟報奉湖南撫臣札飭會商酃縣各軍先攻永甯十二月初九日派左右兩營進扼永新之橋頭初十日趙煥聯督中營越山而進永甯外委呂宗標蓮花廳照磨沈鶴鳴隨帶兵勇助剿探知甯新

交界之泥湖坳有逆黨設伏守隘十一日且探且進該逆聞風遁去未刻行抵渡陂營壘未定礮頭賊目何逆因乘我軍疲乏掩旗息鼓分三路來犯趙煥聯分三路擊之中路之賊先敗左右同時奔潰殲斃四十餘名次日黎明派隊往擊賊竄入亂山中尾殺十餘人十三日行抵縣城我軍甫入南門偵知賊伏城外五里之蕉碧村趙煥聯率眾奮擊大破之殺賊目二名餘匪三百餘名生擒僞協理王起盛等此趙煥聯一軍克復永甯縣城之實在情形也據各營稟報前來臣等伏查咸豐五年冬間瑞臨袁州相繼失陷西路州縣多淪於賊自去秋援軍來瑞而兩湖之路始通自袁州克復鄂師抵潯而西路各屬以次恢復

目下南昌八屬袁州四屬一律肅清南康四屬已復其三臨江
瑞州吉安九江四府亦各克復二屬四屬不等臣等仍當激勵
諸將規復府城俟西路局勢大轉卽當分兵東路埽盪羣醜以
期仰慰

宸廑其武甯縣一案可否容臣等酌保數人伏候

訓示遵行所有官軍兩克建昌一復武甯及湖北官軍收復瑞
昌德安湖南援師克復新喻永甯等縣城各緣由理合恭摺彙
奏伏乞

皇上聖鑒訓示施行謹
奏

目疾請假摺

咸豐七年正月十七日

奏爲

微臣

現患目疾懇

恩賞假一月在營醫調恭摺奏祈

聖鑒事竊

臣

於上年十二月初一日馳赴吳城九江各軍營業

經附奏在案旋於二十八日回省疊接稟報南岸李續賓之師
於三十日與城賊援賊接仗大勝北岸續到之副將鮑超管帶
三千六百人於初五日接仗獲勝蹋毀小池口賊壘二座目下
九江南北兩岸水陸馬步至二萬餘人之多聲勢浩大事務繁
多臣卽日擬由瑞州前往九江料理一切庶可與湖北安徽聯
絡一氣惟現患目疾竟日不能開視合無籲懇

天恩賞假一月卽在瑞州九江軍營靜心調養恭候

訓示除九江各戰情形另行會摺詳報外理合附驛具奏伏乞

皇上聖鑒謹

奏

報丁父憂摺

咸豐七年二月十六日

奏爲

微臣

現丁父憂恭摺馳報仰祈

聖鑒事竊

臣

於正月十七日自省河拜摺後卽馳至奉新督帶

候補知府吳坤修一軍同赴瑞州四面合圍開掘長濠斷賊接

濟二月初四日回省一次與西安將軍

臣

福興巡撫

臣

文俊晤

商大局初九日仍來瑞州十一日接到家信

臣

父

誥封光祿大夫曾麟書於二月初四日病故

臣

係屬長子例應

開缺丁憂溯查

臣

自咸豐二年奉

命典試江西奏蒙

恩准假歸省親行至太湖縣聞訃丁母憂卽由九江奔喪回籍

甫經百日奉

旨飭辦團練時值武昌失守數省震動臣出而襄事摺內聲明俟大局稍轉卽當回籍終制具奏在案咸豐三年冬閒屢奉援鄂撥皖肅清江面之

命四年八月摺內聲明

臣

係丁憂人員如稍立戰績無論何項

褒榮何項議敘

微臣

概不敢受辦理稍有起色卽當奏明回籍

補行心喪等因具奏亦在案五年九月蒙

恩補授兵部右侍郎維時雖已服闋而

臣

之私心常以未得在

家守制爲隱憾今又遽丁父憂計

微臣

服官二十年未得一日

侍養親闈前此母喪未能妥辦葬事今茲父喪未能躬視含殮

而軍營數載又過多而功寡在

國爲一毫無補之人在家有百身莫贖之罪椎胸自責抱痛何

極瑞州去

臣

家不過十日程途卽日遵

制丁憂奔喪回籍一面由驛馳奏恭候

諭旨

臣

之胞弟曾國華出繼叔父爲嗣現在瑞州軍營卽日交

卸回里丁本生降服憂胞弟曾國荃現在吉安軍營亦應奔喪

回籍惟撫建大股賊匪二萬餘人赴援吉安連日與官軍大戰

雖屢獲勝仗而我軍亦有傷亡國荃之能否蒞歸尙未可知伏

查

微臣

經手事件以水師爲一大端署提督楊載福駐紮九江

所統外江水師十五營道員彭玉麟駐紮吳城所統內湖水師

八營合計船隻五百餘號礮位至二千餘尊之多此非臣一人所能爲力臣在衡州時僅奏明造船百六十號岳州以下雖陸續增添而九江敗挫之後則水師中衰其時回援湖北者僅船百餘號賴彭玉麟力支危局胡林翼楊載福重廓規模而又有廣東督臣購運洋礮湖南撫臣督率官紳廣置船隻子藥於是外江之水師始振陷入鄱湖者亦僅船百餘號賴江西撫臣及總局司道竭力維持增修船礮籌備子藥於是內湖之水師亦振合四省之物力各督撫之經營楊載福等數年之戰功乃克成此一枝水軍臣不過因人成事豈敢無其實而居其名惟臣因事離營內外水軍或分歧而不定相應奏明請

旨特派署提督臣楊載福總統外江內湖水師事務惠潮嘉道
彭玉麟協理外江內湖水師事務庶幾號令歸一名實相符楊
載福戰功最偉才識遠勝於臣彭玉麟備歷險艱有烈士之風
伏乞

聖恩時加訓勵該二人必能了肅清江面之局仍請

旨飭下湖北撫

臣

胡林翼月籌銀三萬兩江西撫

臣

文俊月籌

銀二萬兩解交楊載福彭玉麟水營俾此軍不以饑疲致潰則
不特爲攻剿九江湖口所必需卽將來圍攻金陵巡防長江亦
必多所裨益此臣經手事件之大端也白水師而外惟湘勇係
同縣之人寶勇係久從之卒於臣略有關係現在李續賓之湘

勇駐紮九江精勁樸實隱然巨鎮久在

聖明洞鑒之中劉騰鴻之湘勇普承堯之寶勇駐紮瑞州嚴明

勤謹足當大敵但使餉項稍敷必能樹立功績臣在軍中亦無

所益卽不在軍中亦無所損此外江西水陸諸軍及各省援師

自去歲以來皆由撫臣文俊與臣會商調遣今臣丁憂開缺應

由西安將軍福興與撫臣會商辦理近日洪楊內亂武漢肅清

袁州奉新等處克復數城江西局勢似有旋轉之機惟臣猝遭

父喪苦塊昏迷不復能料理營務合無籲懇

天恩准臣在籍守制稍盡人子之心而廣

教孝之典全家感戴

皇仁實無旣極抑或

賞假數月仍赴軍營効力之處聽候

諭旨遵行現在函商將軍福興巡撫文俊兩

臣酌請

一人前來

瑞州撫循各營將士

臣

拜摺後卽由瑞州奔喪回里除俟抵家

後再行呈報外所有

微臣

丁憂開缺緣由理合由驛六百里馳

奏伏乞

皇上聖鑒訓示施行謹

奏

奏
禾
名
加

全

呈請代奏奔喪到籍日期摺

咸豐七年二月三十日

爲呈請據情代奏仰祈

聖鑒事竊

國藩

在瑞州營次聞訃丁憂奔喪回籍業於二月十

六日由驛馳奏在案嗣經西安將軍福興江西巡撫文俊派令

督糧道李桓於二十日來至瑞州軍營聯絡將領拊循士卒

國藩

將一切軍情面爲述告布政司銜李續賓亦令其胞弟李續

宜由九江馳至瑞州幫同照料營務瑞州開挖長濠三十一里

於正月二十五日興工晝夜催趲二月十八日完竣賊之接濟

文報均已斷絕諒無他虞

國藩

卽於二十一日匍匐起行二十

五入湖南境二十九日抵家所有奔喪到籍日期理合呈請據

情代奏伏乞

皇上聖鑒謹呈

呈請代奏謝 恩摺 咸豐七年三月二十六日

爲呈請據情代奏恭謝

天恩仰祈

聖鑒事本年三月十一日准湖南巡撫咨開咸豐七年二月二十七日內閣奉

上諭駱秉章奏統兵大員現丁父憂一摺兵部侍郎曾國藩之父曾麟書在籍病故該侍郎現在江西督師軍務正當喫緊古人墨經從戎原可奪情不令回籍惟念該侍郎素性拘謹前因母喪未終授以官職具摺力辭今丁父憂若不令其奔喪回籍非所以遂其孝思曾國藩著賞假三箇月回籍治喪并賞銀四

百兩由湖南藩庫給發俾經理喪事俟假滿後再赴江西督辦軍務以示體恤欽此跪聆之下感泣難名當卽宣讀

諭旨祭告先靈恭設香案率領闔家大小望

闕叩頭竊

國藩

才識庸劣軍旅未嫻數載從戎過多功寡覩烽

煙之未靖愧調度之無方茲又遽遭大故解職離營方憂懼之交深欲陳情而悚息迺蒙

皇上天恩賞假三月回籍治喪并

賞銀兩經理喪事凡臣子難言之隱早在

聖明體諒之中不匱之思

錫類罔遺於一物非常之典

殊恩下賁於九泉

國藩

惟有殫竭愚忱勉圖報稱戰戰兢兢常

懷履薄臨深之義子子孫孫永矢銜環結草之忱所有

國藩感

激下忱理合率同諸弟呈請據情代奏叩謝

天恩伏乞

皇上聖鑒謹呈

易經和義

瀝陳下情懇請終制摺

咸豐七年五月二十二日

奏爲瀝陳下情懇請終制仰祈

聖鑒事咸豐七年二月二十七日奉

上諭駱秉章奏統兵大員現丁父憂一摺兵部侍郎曾國藩之父曾麟書在籍病故該侍郎現在江西督師軍務正當喫緊古人墨經從戎原可奪情不令回籍惟念該侍郎素性拘謹前因母喪未終授以官職具摺力辭今丁父憂若不令其奔喪回籍非所以遂其孝思曾國藩著賞假三箇月回籍治喪并賞銀四百兩由湖南藩庫給發俾經理喪事俟假滿後再赴江西督辦軍務以示體卹欽此三月初一日奉

上諭曾國藩奏丁憂回籍請派員督辦軍務一摺曾國藩丁父憂前據駱秉章奏到業經降旨賞假三箇月回籍治喪假滿後著仍遵前旨卽赴江西督辦軍務以資統率等因欽此仰見我皇上深仁渥澤旣俯鑒臣子之隱曲示矜憐復不棄驚下之材曲加器使凡屬旁觀猶爲感泣矧在身受能無奮興惟微臣下情有不敢不瀝陳於

聖主之前者臣通籍時祖父母父母皆無恙在京十四年在軍五年堂上四人先後見背生前未伸一日之養沒後又不克守三年之制寸心愧負實爲難安前代及我

朝奪情之案被人彈劾者層見疊出而兩次奪情則從古所無

臣到籍以來輾轉思維欲終制則無以報吾

君高厚生成之德欲奪情則無以報吾親恩勤鞠育之懷欲再出從軍則無以謝後世之清議欲不出則無以謝患難相從之軍士進退狼狽不知所裁伏查近日軍務我

皇上不動聲色芟夷大難潛移默運實已挽回十分之七八以大局言之河北蕩平洪楊內亂武漢肅清水師精勁迴非咸豐二三年氣象可比以江西言之西路克復十餘州縣潯瑞吉臨皆駐重兵亦迴非上年春夏情形可比自臣出營而後又聞瑞州長濠日固臨江四面合圍吉安賊船焚燬一空東路貴溪屢獲大捷江西軍事漸有起色得將軍巡撫兩臣辦理裕如添臣

一人未必有益少

臣

一人不見其損

臣

恭閱邸鈔上年大學士

賈楨丁憂

皇上賞假六箇月令其回籍治喪旋因賈楨奏請終制又蒙

諭旨允其所請并指明御史鄒煥杰傳聞之誤

臣

假期將滿葬

事未畢合無籲懇

天恩援照賈楨之例准

臣

在籍終制感激

鴻慈永無既極

微臣

報

國心長治軍才短守制之日有限事

君之日無窮瞻望

北闕惶恐待

命所有漚陳下情懇請終制緣由恭摺由驛五百里馳奏伏乞
皇上聖鑒訓示遵行謹

奏

秦和親

卷

恭謝

天恩并籲請開缺摺

咸豐七年六月初六日

奏爲恭謝

天恩仍籲請開缺恭摺仰祈

聖鑒事咸豐七年閏五月十七日兵部火票遞到閏五月初五日內閣奉

上諭曾國藩奏瀝情懇請終制一摺曾國藩在江西軍營聞丁父憂前經降旨賞假三箇月回籍治喪俟假滿時再赴江西督辦軍務以示體卹茲據該侍郎奏稱假期將滿葬事未畢籲准在籍終制曾國藩本以母憂守制在籍奉諭幫辦團練當賊氛肆擾皖鄂卽能統帶湖南船勇墨經從戎數載以來戰功懋著

奏稿卷九

李

忠誠耿耿朝野皆知伊父曾麟書因聞水師偶挫又令伊子曾國華帶勇遠來援應尤屬一門忠義朕心實深嘉尚今該侍郎以假期將滿陳請終制并援上年賈楨奏請終制蒙允之例覽其情詞懇切原屬人子不得已之苦心惟現在江西軍務未竣該侍郎所帶楚軍素聽指揮當茲剿賊喫緊亟應假滿回營力圖報効曾國藩身膺督兵重任更非賈楨可比著仍遵前旨假滿後卽赴江西督辦軍務并署理兵部侍郎以資統率俟九江克復江西肅清朕必賞假令其回籍營葬俾得忠孝兩全毫無餘憾該侍郎殫心事主卽以善承伊父教忠報國之誠當爲天下後世所共諒也欽此

微臣

白顧何人膺茲

寵獎非分之榮惶悚無地臣父畎畝效忠旣蒙

頒賜賻銀復荷

溫語褒嘉當卽焚香祭告宣讀

諭旨合家跪聆感激零涕伏念臣材識駑下本乏寸長而事會

所乘復多乖舛自咸豐三年初奉援鄂援皖之

命維時吳文鎔總督鄂中係臣之座師江忠源巡撫皖省係臣

所保舉公義私情望援孔切書牘催促皆相勛以忠義期共濟

於艱危不圖臣甫出師而吳文鎔江忠源相繼殉難臣亦旋有

岳州之敗靖江之挫厥後憑仗

天威水陸東征岳鄂蕲黃長驅席卷謂可成破竹之勢不圖舟

師挫於湖口陸兵潰於北岸遂有武昌再陷之變五年秋閒九江南康水陸安穩又分湘勇回援湖北軍勢尙沛然而有餘不圖塔齊布羅澤南相繼淪謝兩路悍賊適於其時竄入江西腹地局勢爲之大震聲威亦爲驟減六年困守江西備極艱險冬春之閒西路克復十餘州縣漸有轉機臣進駐瑞州開掘長濠甫經合圍不圖又有聞訃丁憂之耗材智本極庸愚事機復多不順臣獨居深念常恐福分淺薄終不能立功以報

聖明於萬一所爲闇自傷感者也計湖南一軍有功可言者往年則陸路塔羅水路楊彭久立聲績近年則李續賓力振湘軍而劉騰鴻李元度亦有撐持堅忍之力微臣因人成事毫無功

效屢經具奏在案

諭旨戰功懋著之褒讀之惶悚流汗在

聖主善善從長或姑爲過情之譽以試將來在

微臣

循名責實

又何敢掠人之美以爲己有至楚軍素聽指揮一節查湖南練勇昔年猶有見賊逃遁懷鄉思歸之事近則閱歷極久膽氣皆壯輕賊匪之伎倆慕

天家之官爵以投營爲名利兩全之場以戰陣爲日用常行之務湘中勇夫赴江西湖北投效者絡繹不絕父缺子代此往彼歸較之臣初募練之時風氣迥不相同但使稍給口食即可靜聽指揮臣二月聞訃之初亦慮將士相從日久恐難驟離而他

屬自出營而後各路安謐如常吉安臨江屢獲勝仗將軍福興
至瑞州視師一次巡撫耆齡遣員至瑞州犒賞一次各營皆歡
欣踴躍樂爲用命可見士無常親惟撫馭者是親不必楚人而
後能用楚眾也我

皇上器使庸材嘉矜并至於有過宜罰之時曲賜

恕原於無善可錄之中曲加

獎借旣荷

溫語寵荅復蒙

飭署兵部侍郎以資統率

臣

伏念丁憂人員未開實缺寸心終

抱不安衰絰從事明臣黃道周目爲凶醜不祥之人況

臣

兩遭

親喪自度不祥之身決非宏濟時艱挽回大局之象合無籲懇
天恩俯准開除兵部侍郎缺感激

皇仁實無旣極除將

微臣

辦事艱難情形同日另奏外所有恭

謝

天恩并籲請開缺緣由恭摺由驛五百里馳奏伏乞

皇上聖鑒訓示施行謹

奏

瀝陳辦事艱難仍懇終制摺

咸豐七年六月初六日

奏爲瀝陳

微臣

辦事艱難竭蹶終恐

貽誤籲懇在籍守制恭摺

奏祈

聖鑒事竊

臣

謬廁戎行與聞軍事仰蒙

聖慈垂注

幃載恩深凡有奏請多蒙

俞允卽有過失常荷

宥原遭逢

聖明得行其志較之古來疆場之臣掣肘萬端者何止霄壤之

別惟以

臣

之愚處

臣

之位歷年所值之時勢亦殊有艱難情狀

無以自申者不得不略陳於

聖主之前定例軍營出缺先儘在軍人員拔補給予劄付臣處
一軍概係募勇不特參游都守以上無缺可補卽千把外委亦
終不能得缺武弁相從數年雖保舉至二三品而充哨長者仍
領哨長額餉充隊目者仍領隊目額餉一日告假卽時開除終
不得照綠營廉俸之例長遠支領弁勇互生猜疑徒有保舉之
名永無履任之實或與巡撫提督共事一方隸人衙門則挑補
實缺隸臣麾下則長生缺望臣未奉有統兵之

旨歷年在外不敢奏調滿漢各營官兵實缺之將領太少大小
不足以相維權位不足以相轄去年會籌江西軍務偶欲補一

千把之缺必婉商巡撫請其酌補其隸九江鎮標者猶須商之總兵令其給予劄付雖居兵部堂官之位而事權反不如提鎮此辦事艱難之一端也

國家定制各省文武黜陟之權責成督撫相沿日久積威有漸督撫之喜怒州縣之榮辱進退繫焉州縣之敬畏督撫蓋出於勢之不得已其奉承意旨常探乎心之所未言臣辦理軍務處處與地方官相交涉文武僚屬大率視臣爲客視本管上司爲主賓主旣已歧視呼應斷難靈通防剿之事不必盡謀之地方官矣至如籌餉之事如地丁漕折勸捐抽釐何一不經由州縣之手或臣營抽釐之處而州縣故爲阻撓或臣營已捐之戶而

州縣另行逼勒欲聽之則深慮事勢之窒礙欲懲之則恐與大吏相齟齬錢漕一事小民平日本以浮收爲苦近年又處積困之餘自甲寅冬閒兩路悍賊竄入江西所在劫掠民不聊生今欲於未經克復之州縣徵收錢漕勸諭捐輸則必有勁旅屯駐以庇民之室家而又或擇良吏以恤民隱或廣學額以振士氣或永減向日之浮收或奏豁一年之正課使民感惠於前倖澤於後庶幾屢捐而不怨竭脂膏奉公上而不以爲苦然此數者皆巡撫之專政臣身爲客官職在軍旅於勸捐擾民之事則職分所得爲於吏治學額減漕豁免諸務則不敢越俎代謀縱欲出一愷惻詳明之告示以儆官邪而慰民望而身非地方大吏

州縣未必奉行百姓亦終難見信此辦事艱難之一端也臣幫辦團練之始仿照通例鐫刻木質關防其文曰

欽命幫辦團防查匪事務前任禮部右侍郎之關防咸豐四年八月臣剿賊出境湖南撫臣咨送木印一顆其文曰

欽命辦理軍務前任禮部侍郎關防九江敗後五年正月換刻

欽差兵部侍郎銜前禮部侍郎關防是年秋間補缺又換刻

欽差兵部右侍郎之關防臣前後所奉援鄂援皖籌備船礮肅

清江面諸

諭皆係接奉

廷寄未經明降

諭旨外間時有譏議或謂臣係自請出征不應支領官餉或謂臣未奉

明詔不應稱

欽差字樣或謂臣曾經革職不應專摺奏事臣低首茹歎但求

集事雖被侮辱而不辭迄今歲月太久關防之更換太多往往

疑爲偽造釀成事端如李成謀戰功卓著已保至參將矣被刑

辱於芷江縣出示以臣印札而不見信周鳳山備歷艱辛已保

至副將矣被羈押於長汀縣亦出示以臣印札而不見信前福

建巡撫呂佺孫曾專函馳詢臣印不符之故甚至捐生領臣處

之實收每爲州縣猜疑加之鞠訊或以爲不足據而勒令續捐

今若再赴軍營又須另刻關防歧舛愈多憑信愈難臣駐紮之
省營次無定閒有部頒緊要之件亦不徑交臣營四年所請部
照因久稽而重請六年所請實官執照至今尙無交到確耗此
外文員之憑武官之劄皆由督撫轉交臣營常遲久而不到軍
中之事貴取信如金石迅速如風霆而臣則勢有所不能斯又
辦事艱難之一端也茲三者其端甚微關係甚鉅臣細察今日
局勢非位任巡撫有察吏之權者決不能以治軍縱能治軍決
不能兼及籌餉臣處客寄虛懸之位又無圓通濟變之才恐終
不免於貽誤大局凡有領軍之責者軍覆則死之有守城之責
者城破則死之此天地之常經古今之通義微臣講求頗熟不

敢踰閑今楚軍斷無覆敗之患省城亦無意外之虞臣赴江西
無所容其規避特以所陳三端艱難情形既如此而奪情兩次
得罪名教又如彼斯則宛轉縈思不得不泣陳於

聖主之前者也

臣

冒昧之見如果賊勢猖狂江西危迫

臣

當專

摺馳奏請赴軍營以明不敢避難之義若猶是目下平安之狀

則由將軍巡撫會辦事權較專提挈較捷

臣

仍籲懇

天恩在籍終制多守數月盡數月之心多守一年盡一年之心
出自

聖主逾格鴻慈不勝惶恐待

命之至所有瀝陳辦事艱難仍籲懇終制緣由恭摺馳奏伏乞

皇上聖鑒訓示施行謹
奏

奏稿卷九

欽奉兩次

諭旨覆奏摺

咸豐七年九月初九日

奏爲欽奉兩次

諭旨恭摺覆奏仰祈

聖鑒事七月初一日准兵部火票遞到六月十九日奉

上諭前因曾國藩以假期將滿籲懇終制當經諭令假滿後卽赴江西督辦軍務并署理兵部侍郎以資統率原因該侍郎督剿有年楚軍正資調度墨經從戎忠孝兩盡茲據奏稱江西各營安謐如常毋庸親往撫馭并懋陳才難宏濟心抱不安仍請開缺守制各等語曾國藩以督兵大員正當江西喫緊之際原不應遽請息肩惟據一再陳請情詞懇切朕素知該侍郎并非

畏難苟安之人著照所請准其先開兵部侍郎之缺暫行在籍
守制江西如有緩急卽行前赴軍營以資督率此外各路軍營
設有需才之處經朕特旨派出該侍郎不得再行瀆請致辜委
任欽此九月初三日淮湖南巡撫咨稱八月十四日奉

上諭在籍侍郎曾國藩前經降旨准其暫行在籍守制倘江西
軍務緊急或他省有需人之處仍著候旨前往昨據給事中李
鶴年奏曾國藩自丁父憂屢蒙賜金給假褒獎慰留此後墨經
從戎宜爲天下所共諒豈容以終制爲守經再三瀆請請飭仍
赴江西及時圖報等語軍務奪情原屬不得已之舉朕非必欲
該侍郎卽入仕途然如該給事中所奏亦可見移孝作忠經權

并用公論自在人心現在江西軍務有楊載福統帶雖無須曾國藩前往而湖南本籍逼近黔粵賊氛未息團練籌防均關緊要該侍郎負一鄉重望自當極力圖維急思報稱所有李鶴年原摺著鈔給閱看將此諭知駱秉章著傳旨諭令曾國藩知之欽此

臣

初奉暫准守制之

旨因軍勢未定恐有

後命是以未及遽行覆奏自七月以來聞龍泉克復吉安挫失之信又聞克復瑞州府城進賢縣城之信頃又聞九江一軍攻克黃梅縣及小池口之信仰託

聖主威福江西軍務辦理得手

批諭飭令緩急赴營之處揆度時勢自可毋庸前往茲復欽奉

諭旨飭臣在湖南本籍辦理團防力圖報稱

聖主使臣以禮因時制宜跪聆之下感悚曷勝目下湖南全省
肅清臣當仍遵

前旨暫行守制如果賊氛不靖湖南告警所有應須團練籌防
之處屆時商之湖南撫臣再行奏明辦理臣自到籍以來日夕
惶悚不安自問本非有爲之才所處又非得爲之地欲守制則
無以報

九重之鴻恩欲奪情則無以謝萬世之清議惟盼各路軍事日
有起色仰紓

宵旰之憂卽

微臣

恪守禮廬寸心亦得以稍安所有奉到兩次

諭旨恭摺由驛三百里覆奏伏乞

皇上聖鑒訓示施行謹

奏

硃批江西軍務漸有起色卽楚南亦就肅清汝可暫守禮廬仍應候旨大臣出處以國事爲重抒忠卽爲全孝所云懼清議之訾猶覺過於拘執也欽此

西漢書卷之九

漢書卷之九

漢書卷之九

漢書卷之九

漢書卷之九

漢書卷之九

漢書卷之九

酌擬報銷大概規模摺

咸豐七年十二月初七日

奏爲酌擬報銷大概規模請

旨飭部核議恭摺奏祈

聖鑒事竊臣處一軍未經奏派大員總理糧台亦無專司之員
始終其事初在衡州造船募勇冒昧從事條理未精厥後越境
剿賊用銀漸多歷時漸久所募概係勇丁將領多係紳士官事
非其所嫻冊報閒有未備而又與湖南湖北江西三省總局相
交涉有先在臣處糧台領餉而後在他處支領者有本在臣處
領餉而他處亦時爲接濟者又有由江援鄂由鄂援江忽分忽
合中間并無餉可領者臣處辦理報銷比他軍尤覺散漫難清

臣之愚見擬將統轄較多者分爲數大款將臣處領餉之月日及他處領餉之月日先行具奏俾眉目清楚起訖分明庶免轉轄混淆之弊亦無重複開報之虞如塔齊布所統爲一款該提督所帶道勇寶勇等於咸豐四年二月在臣處糧台支餉其所帶撫標等兵仍在湖南省局支餉在通城湘潭岳州皆係如此辦理四年閏七月初二日岳州賊退塔齊布出境追剿其所帶全軍應自閏七月初三日起至五年七月二十日止概由臣處糧台報銷二十一以後卽歸入周鳳山款下接算羅澤南所統爲一款該員所帶湘勇自咸豐二年臘月隨臣同赴長沙嗣後年餘均在省局領餉自四年閏七月初三日起直至五年十一

月二十八日由江西抵湖北洪山之日止應歸臣處糧台報銷
其二十九日以後卽應歸湖北總局報銷楊載福所統水軍爲
一款該鎮自咸豐三年十一月衡州造船起至五年正月初五
日止應歸臣處糧台報銷其因病離營後再出統帶水師則由
湖北湖南報銷彭玉麟所統爲一款該員自三年十一月衡州
造船起至五年正月由九江赴援湖北尙在臣轉運局支餉擬
截至四月三十日止歸臣處報銷五月初一日以後則歸湖北
總局報銷是冬調赴江西自十二月起至六年臘底止仍歸臣
處報銷七年正月以後則歸江西總局報銷李孟羣所統爲一
款該司經臣咨調由廣西來楚自四年六月初八到長沙之日

起至五年正月初三由九江赴援湖北之日止應歸臣處糧台報銷此後則歸湖北報銷李元度所統爲一款該員自五年正月在南昌募勇起至六年臘月三十日止應歸臣處糧台報銷七年以後則歸江西省局報銷周鳳山所統爲一款該將自咸豐三年九月剿辦常甯道州土匪卽在臣處支餉自四年二月至五年七月應併入塔齊布款下核算自七月廿一日接統潯營全軍起至六年九月止應歸臣處糧台報銷其再由長沙募勇援剿吉安則歸湖南江西報銷以上七款皆爲日較久用銀較多交涉各省宜分別界限者也此外水陸兩軍營數尙多或先分後併或因敗撤遣與各省并無交涉者將來彙冊報部不

必先行瑣陳又如李續賓蔣益澧前在臣軍年餘擬卽併入羅澤南款下核算厥後該員等各統一軍則歸湖北等省報銷又如臣弟曾國華曾國荃或自武昌赴援瑞州或自長沙赴援吉安在臣處領餉甚少應歸江西等省報銷凡此皆出款之大概規模也至若經手人員臣在衡州時出入銀錢多係自行經理委員卽補同知陶壽玉檢點帳目四年二月至長沙委員候補知府李瀚章管理收支事件七月由岳州赴鄂於長沙設立後路糧台派湖南卽用道裕麟湖北記名道厲雲官司其事其水陸行營收支事務則李瀚章及江南同知鄭德基主之九月以後於漢口設立轉運局派禮部員外郎胡大任司其事五年駐

軍南康於南昌設立後路糧台派禮部員外郎甘晉及李瀚章司其事六年十二月撤毀糧台自七年正月起歸併江西省局司道辦理除鄭德基業經病故外其裕麟厲雲官胡大任甘晉李瀚章陶壽玉六員現在分處兩湖江西安徽四省俟江西軍務將畢卽行設局飭該六員爲臣辦理報銷事件遵照定式造冊送部大約水陸數年之餉精礮船各廠之經費通共用銀在三百萬兩內外勾稽尙易完竣惟是該六員者并非總理本無專責自始至終皆係窮窘之境勸捐挪墊委曲維持或因敗挫迸散奔走於危地或因空乏屢展受侮於弁兵廉謹將事艱苦備嘗而九江一敗又有燒劫餉船遺失文卷之事將來如有款

目不符著賠追繳之處皆係臣一身承認不與該六員相干是
否有當謹擬大概規模請

旨飭下該部核議施行理合具摺送交江西撫臣附奏伏乞
皇上聖鑒訓示施行謹

奏



